

唐于闐國三藏沙門實叉難陀 譯經
唐清涼山大華嚴寺沙門澄觀 疏義
明匡山法雲寺憨山沙門德清 提挈

大方廣佛華嚴經綱要

第肆冊

〔卷第四十八～卷第六十四〕

佛陞教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

大方廣佛華嚴經綱要卷第四十八

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺慈山沙門德清提挈

如來十身相海品第三十四

初來意者。前品總明果法。此品別顯相德。近答前品身問。遠答普光眼等六根。非唯眼等。徧於法界。而各具多相用。難思議故。二釋名者。如來十身。標人顯德。言相海者。依人顯相。並如前釋。福報奇狀。炳著名相。相德深廣。故稱爲海。故文云有十蓮華。

藏微塵數相。相體廣矣。一一用徧。相用廣矣。一一難思。互相融入。體用深矣。若此之相。唯屬圓教。標以十身故。觀佛三昧海經。辨相有三類。一略中略說。有三十二相。二略說八萬四千相。三廣說有無量相。如雜華經中爲普賢賢首等說。雜華卽此經異名。三中初通權小。示同於人。端居不亂故。次唯大乘。菩薩修八萬四千波羅蜜故。後唯一乘。一乘修無盡行故。又初化。次報。後屬十身。十身之相。海依主釋也。又初凡聖同見。次唯地上。後唯圓機。然通五位。若語其體。初以形色。次卽定慧。後以無盡。

法界。若語其因。後通純雜。如初會說故。一一相果。皆周法界。三宗趣者。顯無盡相海爲宗。令修無盡之行。顯成爲趣。

爾時普賢菩薩摩訶薩。告諸菩薩言。佛子。今當爲汝演說如來所有相海。

正釋文中。大文三段。一誠聽許說。二正陳相狀。三結略顯廣。今初。所以普賢說者。相海普周故。令行普行。獲普相故。普賢本是會主。前說已窮。此便說故。第二如來頂上下。正陳相狀。略舉九十七相。文通有五。一依處。二列名。三體嚴。四業用。五結數。或

略不具。至文當知。或加成益。業用中攝。然名依體。用以立。皆以體用釋名。或單從體用。或雙從二。或名與體用義不相似者。則是文略義含耳。細論一相各依一處。則爲九十七段。經文自標。今以類例相從。卽爲十九段。始自於頂。終至於足。斯卽順觀相海。

佛子。如來頂上。有三十二寶莊嚴大人相。

今初依頂中三。初約處總標。次其中下。別列名相。後佛子下總結爲嚴。今初寶莊嚴者。通顯體嚴事。寶則云皆摩尼等爲莊嚴故。亦顯智寶圓淨嚴故。

一一相中。皆有事理。二嚴。隨宜解釋。大人相者。大人之相故。二別列中三十二相。文各爲四。以依處一種。已總標故。此處獨有三十二者。理實應多。爲顯圓融。一卽一切。故一頂中。已具權教三十二處。若爾。餘何不然。顯頂尊勝故。若約人具有。好爲勝故。相伏於人。好勝諸天故。餘處說好爲微細。

其中有大人相。名光照一切方。普放無量大光明網。一切妙寶。以爲莊嚴。寶髮周徧。柔軟密緻。一一咸放。摩尼寶光。充滿一切無邊世界。悉現佛身。色相圓滿。是爲一。

第一相中四者。一列名。名從用立。二一切妙寶下體嚴。三一下業用。四是爲一者。結數。他皆倣此。次有大人相。名佛眼光明雲。以摩尼王種種莊嚴。出金色光。如眉間毫相所放光明。其光普照一切世界。是爲二。

二中以摩尼下體嚴。卽釋光明義。其光下業用。釋佛眼義。佛眼無不照故。

次有大人相。名充滿法界雲。上妙寶輪以爲莊嚴。於於如來福智燈明。普照十方一切法界諸世界海。於中普現一切諸佛。及諸菩薩。是爲三。次有大人相。名

示現普照雲。眞金摩尼種種莊嚴。其諸妙寶。咸放光明。照不思議諸佛國土。一切諸佛。於中出現。是爲四。次有大人相。名放寶光明雲。摩尼寶王清淨莊嚴。毗瑠璃寶以爲華藻。光照十方一切法界。於中普現種種神變。讚歎如來往昔所行智慧功德。是爲五。次有大人相。名示現如來徧法界大自在雲。菩薩神變寶。燄摩尼以爲其冠。具如來力覺悟一切寶燄光輪。以爲其鬘。其光普照十方世界。於中示現一切如來坐於道場。一切智雲。充滿虛空無量法界。是爲六。次有大人相。名如來普燈雲。以能震動法界國土大自在。

寶海而爲莊嚴。放淨光明。充滿法界。於中普現十方諸菩薩功德海。過現未來佛智慧幢海。是爲七。次有大人相。名普照。諸佛廣大雲。因陀羅寶。如意王寶。摩尼王寶。以爲莊嚴。常放菩薩燄燈光明。普照十方一切世界。於中顯現一切諸佛衆色相海。大音聲海。清淨力海。是爲八。

八中巖內摩尼名意故。不同如意。

次有大人相。名圓滿光明雲。上妙瑠璃摩尼王種種寶華。以爲莊嚴。一切衆寶。舒大燄網。充滿十方一切世界。一切衆生。悉見如來。現坐其前。讚歎諸佛及諸

菩薩法身功德。令入如來清淨境界。是爲九。次有大
人相。名普照。一切菩薩行藏光明雲。衆寶妙華。以爲
莊嚴。寶光普照無量世界。寶燄普覆一切國土。十方
法界。通達無礙。震動佛音。宣暢法海。是爲十。次有大
人相。名普光照耀雲。毗琉璃因陀羅金剛摩尼寶。以
爲莊嚴。琉璃寶光。色相明徹。普照一切諸世界海。出
妙音聲。充滿法界。如是皆從諸佛智慧大功德海之
所化現。是爲十一。

十一中如是皆從下。辨業用因。亦業用攝。

次有大人相。名正覺雲。以雜寶華而爲莊嚴。其諸寶

華悉放光明。皆有如來坐於道場。充滿一切無邊世界。令諸世界。普得清淨。永斷一切妄想分別。是爲十
二。次有大人相。名光明照耀雲。以寶燄藏海心王摩
尼而爲莊嚴。放大光明。光中顯現無量菩薩。及諸菩
薩所行之行。一切如來智身法身。諸色相海。充滿法
界。是爲十三。次有大人相。名莊嚴普照雲。以金剛華
毗瑠璃寶而爲莊嚴。放大光明。光中有大寶蓮華座。
具足莊嚴。彌覆法界。自然演說四菩薩行。其音普徧
諸法界海。是爲十四。

十四用中云。四菩薩行者。瑜伽菩薩地云。一切菩

薩略有四行。一波羅蜜行。二菩提分法行。三神通行。四成熟有情行。

次有大人相。名現佛三昧海行雲。於一念中。示現如來無量莊嚴。普徧莊嚴。一切法界。不思議世界海。是爲十五。次有大人相。名變化海普照雲。妙寶蓮華。如須彌山。以爲莊嚴。衆寶光明。從佛願生。現諸變化。無有窮盡。是爲十六。次有大人相。名一切如來解脫雲。清淨妙寶。以爲莊嚴。放大光明。莊嚴一切佛師子座。示現一切諸佛色像。及無量佛法諸佛刹海。是爲十七。次有大人相。名自在方便普照雲。毗瑠璃華。眞金

蓮華摩尼王燈妙法燄雲以爲莊嚴。放一切諸佛寶
燄密雲。清淨光明。充滿法界。於中普現一切妙好莊
嚴之具。是爲十八。次有大人相。名覺佛種性雲。無量
寶光以爲莊嚴。具足千輪。內外清淨。從於往昔善根
所生。其光徧照十方世界。發明智日。宣布法海。是爲
十九。

十九云。具足千輪者。梵本云。具千輻輪。

次有大人相。名現一切如來相自在雲。衆寶纓絡璫
璃寶華以爲莊嚴。舒大寶燄。充滿法界。於中普現等
一切佛刹微塵數去來現在無量諸佛。如師子王。勇

猛無畏。色相智慧。皆悉具足。是爲二十。次有大人相。名徧照。一切法界雲。如來寶相。清淨莊嚴。放大光明。普照法界。顯現一切無量無邊諸佛菩薩智慧妙藏。是爲二十一。

二十一示身智二光。俱顯智慧。

次有大人相。名毗盧遮那如來相雲。上妙寶華。及毗瑠璃清淨妙月。以爲莊嚴。悉放無量百千萬億摩尼寶光。充滿一切虛空法界。於中示現無量佛刹。皆有如來結跏趺坐。是爲二十二。次有大人相。名普照一切佛光明雲。衆寶妙燈。以爲莊嚴。放淨光明。徧照十

方一切世界。悉現諸佛轉於法輪。是爲二十三。次有大人相。名普現一切莊嚴雲。種種寶燄以爲莊嚴。放淨光明。充滿法界。念念常現不可說不可說一切諸佛。與諸菩薩。坐於道場。是爲二十四。次有大人相。名出一切法界音聲雲。摩尼寶海上妙栴檀以爲莊嚴。舒大燄網。充滿法界。其中普演微妙音聲。示諸衆生一切業海。是爲二十五。次有大人相。名普照諸佛變化輪雲。如來淨眼以爲莊嚴。光照十方一切世界。於中普現去來今佛所有一切莊嚴之具。復出妙音。演不思議廣大法海。是爲二十六。

二十六中莊嚴云。如來淨眼爲莊嚴者。此通十眼。光照下。顯業用。亦通身智二光。淨眼及光。釋前普照。現於嚴具。是上輪義。卽法輪故。

次有大人相。名光照佛海雲。其光普照一切世界。盡於法界。無所障礙。悉有如來結跏趺坐。是爲二十七。次有大人相。名寶燈雲。放於如來廣大光明。普照十方一切法界。於中普現一切諸佛。及諸菩薩。不可思議諸衆生海。是爲二十八。次有大人相。名法界無差別雲。放於如來大智光明。普照十方諸佛國土。一切菩薩道場衆會。無量法海。於中普現種種神通。復出

妙音。隨諸衆生心之所樂。演說普賢菩薩行願。令其
迴向。是爲二十九。次有大人相。名安住一切世界海
普照雲。放寶光明。充滿一切虛空法界。於中普現淨
妙道場。及佛菩薩莊嚴身相。令其見者。得無所見。是
爲三十。次有大人相。名一切寶清淨光燄雲。放於無
量諸佛菩薩摩尼妙寶清淨光明。普照十方一切法
界。於中普現諸菩薩海。莫不具足。如來神力。常遊十
方盡虛空界。一切剎網。是爲三十一。

從二十七至三十一。並略無莊嚴。亦由名中已含
有故。

次有大人相。名普照。一切法界莊嚴雲。最處於中。漸次隆起。閻浮檀金。因陀羅網。以爲莊嚴。放淨光雲。充滿法界。念念常現一切世界諸佛菩薩道場衆會。是爲三十二。

三十二。先名。次最處下。體嚴。此居頂極。特顯別處。故云處中。則知所餘皆遶此相。略不明耳。漸次隆起者。正顯其相。智論第五云。如來頂有骨髻如拳。觀佛三昧海經云。如合拳。卽隆起之相也。

佛子。如來頂上。有如是三十二種大人相。以爲嚴好。三總結爲嚴。

佛子。如來眉間有大人相。名徧法界光明雲。摩尼寶華以爲莊嚴。放大光明。具衆寶色。猶如日月。洞徹清淨。其光普照十方國土。於中顯現一切佛身。復出妙音。宣暢法海。是爲三十三。

第二眉間有一相。卽白毫相。自下並有依處。故文皆有五。初依處。二顯名。三摩尼下。體嚴。謂此毫相。若收則右旋如瑠璃碗。若展則具十楞。有大光明。嚴唯一寶光具多色。中表皆空。卽是洞徹。四其光下業用。復出已下。卽是法光。故此光名。從用而立。五結數可知。

如來眼有大人相。名自在。普見雲。以衆妙寶而爲莊嚴。摩尼寶光。清淨暎徹。普見一切。皆無障礙。是爲三十四。如來鼻有大人相。名一切神通智慧雲。清淨妙寶。以爲莊嚴。衆寶色光。彌覆其上。於中出現無量化佛。坐寶蓮華。往諸世界。爲一切菩薩。一切衆生。演不思議諸佛法海。是爲三十五。

第三眼。第四鼻。各有一相。

如來舌有大人相。名示現音聲影像雲。衆色妙寶。以爲莊嚴。宿世善根之所成就。其舌廣長。徧覆一切諸世界海。如來若或熙怡微笑。必放一切摩尼寶光。其

光普照十方。法界能令一切心得清涼。去來現在所有諸佛。皆於光中炳然顯現。悉演廣大微妙之音。徧一切刹。住無量劫。是爲三十六。如來舌復有大人相。名法界雲。其掌安平。衆寶爲嚴。放妙寶光。色相圓滿。猶如眉間所放光明。其光普照一切佛刹。唯塵所成。無有自性。光中復現無量諸佛。咸發妙音。說一切法。是爲三十七。

第五舌有四相。初一卽舌根廣長相。於體嚴中。宿善成者。此舉因嚴。偏此說因者。合讚演一乘故。其舌長廣。卽語其體。福德人至鼻。權佛至髮際。餘大

乘中明現神足。方至梵世。或覆三千。今直語體。便覆一切。後如來下。辨其業用。演法。釋音聲。現佛。釋影像。二舌掌之相。掌謂近根。其光下業用。光照諸刹。合應度者無俟觀破搏聚。自曉但合塵成。何性之有。

如來舌端。有大人相。名照法界光明雲。如意寶王。以爲莊嚴。自然恆出金色寶燄。於中影現一切佛海。復震妙音。充滿一切無邊世界。一一音中。具一切音。悉演妙法。聽者心悅。經無量劫。玩味不忘。是爲三十八。如來舌端。復有大人相。名照耀法界雲。摩尼寶王。以

爲嚴飾。演衆色相微妙光明。充滿十方無量國土。盡於法界。靡不清淨。於中悉有無量諸佛。及諸菩薩。各吐妙音。種種開示。一切菩薩。現前聽受。是爲三十九。後二同在舌端。或居左右。或在上下。觀文業用。但有展卷不同。前則卷佛海於舌端。後則展諸佛於法界。

如來口上齶。有大人相。名示現不思議法界雲。因陀羅寶。毗瑠璃寶。以爲莊嚴。放香燈燄清淨光雲。充滿十方一切法界。示現種種神通方便。普於一切諸世界海。開演甚深不思議法。是爲四十。

六上齧一相。上腭既有。下亦宜然。或是梵本脫漏。如來口右輔下牙。有大人相。名佛牙雲。衆寶摩尼。卍字相輪。以爲莊嚴。放大光明。普照法界。於中普現一切佛身。周流十方。開悟羣生。是爲四十一。

第七牙有四相。謂左右上下四大牙故。故佛涅槃茶毗。四牙不碎。輔頰也。亦云頰車骨。

如來口右輔上牙。有大人相。名寶燄彌盧藏雲。摩尼寶藏。以爲莊嚴。放金剛香燄。清淨光明。一一光明。充滿法界。示現一切諸佛神力。復現一切十方世界淨妙道場。是爲四十二。

二右輔上牙。名須盧者。顯妙高故。

如來口左輔下牙有大人相。名寶燈普照雲。一切妙寶。舒華發香。以爲莊嚴。放燈燄雲。清淨光明。充滿一切諸世界海。於中顯現一切諸佛坐蓮華藏師子之座。諸菩薩衆所共圍繞。是爲四十三。如來口左輔上牙有大人相。名照現如來雲。清淨光明。閻浮檀金寶網寶華。以爲莊嚴。放大燄輪。充滿法界。於中普現一切諸佛。以神通力。於虛空中。流布法乳。法燈法寶。教化一切諸菩薩衆。是爲四十四。

四中有法乳法燈法寶者。約資法身名乳。照了萬

境稱燈。令其圓淨爲寶。卽演三德涅槃之法。亦成涅槃三德之益。

如來齒有大人相。名普現光明雲。一一齒間。相海莊嚴。若微笑時。悉放光明。具衆寶色。摩尼寶燄。右旋宛轉。流布法界。靡不充滿。演佛言音。說普賢行。是爲四十五

第八齒有一相。

如來脣有大人相。名影現一切寶光雲。放閻浮檀眞金色。蓮華色。一切寶色。廣大光明。照於法界。悉令清淨。是爲四十六。

第九層有一相。上二各應分出上下。放閻浮下體。嚴以脣色赤好。如日初出紅蓮葉故。後照于下業用。

如來頸有大人相。名普照一切世界雲。摩尼寶王以爲莊嚴。紺滿成就。柔輒細滑。放毗盧遮那清淨光明。充滿十方一切世界。於中普現一切諸佛。是爲四十七。

第十頸有一相。

如來右肩有大人相。名佛廣大一切寶雲。放一切寶色。眞金色蓮華色光明。成寶燄網。普照法界。於中普

現一切菩薩。是爲四十八。如來右肩。復有大人相。名最勝寶普照雲。其色清淨。如閻浮金。放摩尼光。充滿法界。於中普現一切菩薩。是爲四十九。如來左肩。有大人相。名最勝光照法界雲。猶如頂上。及以眉間種種莊嚴。放閻浮檀金及蓮華色。衆寶光明。成大燄網。充滿法界。於中示現一切神力。是爲五十。如來左肩。復有大人相。名光明徧照雲。其相右旋。閻浮檀金色。摩尼寶王。以爲莊嚴。放衆寶華香燄光明。充徧法界。於中普現一切諸佛。及以一切嚴淨國土。是爲五十一。如來左肩。復有大人相。名普照耀雲。其相右旋。微

密莊嚴。放佛燈燄雲。清淨光明。充徧法界。於中顯現一切菩薩種種莊嚴。悉皆妙好。是爲五十二。

第十一肩有五相。右二左三。或亦脫也。

如來胸臆有大人相。形如卍字。名吉祥海雲。摩尼寶華以爲莊嚴。放一切寶色。種種光燄輪。充滿法界。普令清淨。復出妙音。宣暢法海。是爲五十三。吉祥相右邊有大人相。名示現光照雲。因陀羅網以爲莊嚴。放大光輪。充滿法界。於中普現無量諸佛。是爲五十四。吉祥相右邊復有大人相。名普現如來雲。以諸菩薩摩尼寶冠而爲莊嚴。放大光明。普照十方一切世界。

悉令清淨。於中示現去來今佛。坐於道場。普現神力。廣宣法海。是爲五十五。吉祥相右邊。復有大人相。名開敷華雲。摩尼寶華。以爲莊嚴。放寶香燄。燈清淨光明。狀如蓮華。充滿世界。是爲五十六。吉祥相右邊。復有大人相。名可悅樂金色雲。以一切寶心王藏。摩尼王而爲莊嚴。故淨光明。照於法界。於中普現。猶如佛眼。廣大光明。摩尼寶藏。是爲五十七。吉祥相右邊。復有大人相。名佛海雲。毗琉璃寶香燈華鬘。以爲莊嚴。放滿虛空。摩尼寶王香燈。大燄清淨光明。充徧十方。一切國土。於中普現道場衆會。是爲五十八。吉祥相

左邊有大人相。名示現光明雲。無數菩薩坐寶蓮華。以爲莊嚴。放摩尼王種種間錯寶燄光明。普淨一切諸法界海。於中示現無量諸佛。及佛妙音。演說諸法。是爲五十九。吉祥相左邊。復有大人相。名示現徧法界光明雲。摩尼寶海以爲莊嚴。放大光明。徧一切刹。於中普現諸菩薩衆。是爲六十。吉祥相左邊。復有大人相。名普勝雲。日光明摩尼王寶輪鬘而爲莊嚴。放大光燄。充滿法界諸世界海。於中示現一切世界一切如來。一切衆生。是爲六十一。吉祥相左邊。復有大人相。名轉法輪妙音雲。一切法燈清淨香藥。以爲莊

嚴放大光明。充滿法界。於中普現一切諸佛所有相。海。及以心海。是爲六十二。吉祥相左邊。復有大人相。名莊嚴雲。以去來今一切佛海而爲莊嚴。放淨光明。嚴淨一切諸佛國土。於中普現十方一切諸佛菩薩。及佛菩薩所行之行。是爲六十三。

第十二曾十一相。初一當中。左右各五。今初卅字。正翻爲吉祥海雲。以依形立名。故先標形相。應迴安名下。以屬體攝無違。

如來右手。有大人相。名海照雲。衆寶莊嚴。恆放月燄。清淨光明。充滿虛空。一切世界。發大音聲。歎美一切。

諸菩薩行。是爲六十四。如來右手。復有大人相。名影
現。照耀雲。以毗瑠璃帝青摩尼寶華而爲莊嚴。放大
光明。普照十方菩薩所住蓮華藏摩尼藏等一切世
界。於中悉現無量諸佛。以淨法身。坐菩提樹。震動一
切十方國土。是爲六十五。如來右手。復有大人相。名
燈燄鬘。普嚴淨雲。毗盧遮那寶以爲莊嚴。放大光明。
成變化網。於中普現諸菩薩衆。咸戴寶冠。演諸行海。
是爲六十六。如來右手。復有大人相。名普現一切摩
尼雲。蓮華燄燈而爲莊嚴。放海藏光。充徧法界。於中
普現無量諸佛。坐蓮華座。是爲六十七。如來右手。復

有大人相。名光明雲。摩尼燄海。以爲莊嚴。放衆寶燄。香燄華燄。清淨光明。充滿一切諸世界網。於中普現諸佛道場。是爲六十八。

第十三手有十三相。分三。初九直語手相。右五左四者。或左脫一。或表右常用故。右中六十六云成變化網者。光化爲網故。

如來左手。有大人相。名毗瑠璃清淨燈雲。寶地妙色。以爲莊嚴。放於如來金色光明。念念常現一切上妙莊嚴之具。是爲六十九。如來左手。復有大人相。名一切剎智慧燈音聲雲。以因陀羅網金剛華而爲莊嚴。

放閻浮檀金清淨光明。普照十方一切世界。是爲七十。如來左手。復有大人相。名安住寶蓮華光明雲。衆寶妙華以爲莊嚴。放大光明。如須彌燈。普照十方一切世界。是爲七十一。如來左手。復有大人相。名徧照法界雲。以妙寶鬘寶輪寶瓶。因陀羅網。及衆妙相。以爲莊嚴。放大光明。普照十方一切國土。於中示現一切法界。一切世界海。一切如來坐蓮華座。是爲七十二。

左中七十二云。因陀羅網爲嚴者。卽是網輓之相。互涉入故。

如來右手指。有大人相。名現諸劫刹海旋雲。水月燄藏摩尼王。一切寶華。以爲莊嚴。放大光明。充滿法界。其中恆出微妙音聲。滿十方刹。是爲七十三。如來左手指。有大人相。名安住一切寶雲。以帝青金剛寶。而爲莊嚴。放摩尼王衆寶光明。充滿法界。其中普現一切諸佛。及諸菩薩。是爲七十四。如來右手掌。有大人相。名照耀雲。以摩尼王千輻寶輪。而爲莊嚴。放寶光明。其光右旋。充滿法界。於中普現一切諸佛。一一佛身。光燄熾然。說法度人。淨諸世界。是爲七十五。如來左手掌。有大人相。名燄輪普增長。化現法界道場雲。

以日光摩尼王千輻輪而爲莊嚴。放大光明。充滿一切諸世界海。於中示現一切菩薩演說普賢所有行海。普入一切諸佛國土。各各開悟無量衆生。是爲七十六。

後二左右掌皆有千輪者。輪轂輻輳三事具足。自然成就。

如來陰藏。有大人相。名普流出佛音聲雲。一切妙寶。以爲莊嚴。放摩尼燈華燄光明。其光熾盛。具衆寶色。普照一切虛空法界。其中普現一切諸佛遊行往來。處處周徧。是爲七十七。

第十四陰藏一相。猶如馬王。

如來右臀。有大人相。名寶燈鬘普照雲。諸摩尼寶以爲莊嚴。放不思議寶燄光明。彌布十方一切法界。與虛空法界同爲一相。而能出生一切諸相。一一相中。悉現諸佛自在神變。是爲七十八。如來左臀。有大人相。名示現一切法界海光明彌覆虛空雲。猶如蓮華。清淨妙寶以爲嚴飾。放光明網徧照十方一切法界。於中普現種種相雲。是爲七十九。

第十五坐處二相。

如來右膝。有大人相。名普現雲。以衆色摩尼而爲莊

嚴。其胜與臙。上下相稱。放摩尼燄妙法光明。於一念中能普示現一切寶王遊步相海。是爲八十。如來左胜。有大人相。名現一切佛無量相海雲。一切寶海隨順安住。以爲莊嚴。廣大遊行。放淨光明。普照衆生。悉使希求無上佛法。是爲八十一。

第十六胜有二相。左云隨順安住者。體多行動。故須多寶隨順而嚴。

如來右邊伊尼延鹿王臙。有大人相。名一切虛空法界雲。光明妙寶。以爲莊嚴。其相圓直。善能遊步。放閻浮金色清淨光明。徧照一切諸佛世界。發大音聲。普

皆震動。復現一切諸佛國土。住於虛空。寶燄莊嚴。無量菩薩從中化現。是爲八十二。如來左邊伊尼延鹿王。膺有大人相。名莊嚴海雲。色如真金。能徧遊行一切佛刹。放一切寶清淨光明。充滿法界。施作佛事。是爲八十三。如來寶膺上毛有大人相。名普現法界影像雲。其毛右旋。一一毛端放寶光明。充滿十方一切法界。示現一切諸佛神力。其諸毛孔悉放光明。一切佛刹於中顯現。是爲八十四。

第十七膺有三相。第三膺毛通於二膺。若準晉經直云毛端。則通身一切毛也。義應如昔。則處成十

九。

如來足下有大人相。名一切菩薩海安住雲。色如金剛。閻浮檀金清淨蓮華。放寶光明。普照十方諸世界。海寶香燄雲。處處周徧。舉足將步。香氣周流。具衆寶色。充滿法界。是爲八十五。

第十八足有十三相。通分爲七。初足下一相。略無左右。而晉經足趺之後。別有足下千輻輪相。此必合有。故後品明下輪相。名普照王。今經千輪之言。乃在後指間。或以常明易知指間有異。故舉之耳。名安住者。以足下安平。一切著地。不容針故。

如來右足上。有大人相。名普照。一切光明雲。一切衆寶。以爲莊嚴。放大光明。充滿法界。示現一切諸佛菩薩。是爲八十六。如來左足上。有大人相。名普現。一切諸佛雲。寶藏摩尼。以爲莊嚴。放寶光明。於念念中。現一切佛神通變化。及其法海所坐道場。盡未來際劫。無有間斷。是爲八十七。

二足上二相。

如來右足指間。有大人相。名光照。一切法界海雲。須彌燈摩尼。王千輻燄輪種種莊嚴。放大光明。充滿十方一切法界。諸世界海。於中普現一切諸佛所有種

種寶莊嚴相。是爲八十八。如來左足指間。有大人相。名現一切佛海雲。摩尼寶華香燄燈鬘一切寶輪。以爲莊嚴。恆放寶海清淨光明。充滿虛空。普及十方一切世界。於中示現一切諸佛。及諸菩薩圓滿音聲。卍字等相。利益無量一切衆生。是爲八十九。

三足指間二相。

如來右足跟。有大人相。名自在照耀雲。帝青寶末。以爲莊嚴。常放如來妙寶光明。其光妙好。充滿法界。皆同一相。無有差別。於中示現一切諸佛。坐於道場。演說妙法。是爲九十。如來左足跟。有大人相。名示現妙

音演說諸法海雲。以變化海摩尼寶。香燄海須彌華。摩尼寶及毗琉璃而爲莊嚴。放大光明。充滿法界。於中普現諸佛神力。是爲九十一。

四足跟二相。

如來右足趺。有大人相。名示現一切莊嚴光明雲。衆寶所成極妙莊嚴。放閻浮檀金色清淨光明。普照十方一切法界。其光明相。猶如大雲。普覆一切諸佛道場。是爲九十二。如來左足趺。有大人相。名現衆色相雲。以一切月燄藏毗盧遮那寶。因陀羅尼羅寶。而爲莊嚴。念念遊行諸法界海。放摩尼燈香燄光明。其光

徧滿一切法界。是爲九十三。

五足趺二相。

如來右足四周。有大人相。名普藏雲。因陀羅尼羅金剛寶。以爲莊嚴。放寶光明。充滿虛空。於中示現一切諸佛。坐於道場。摩尼寶王師子之座。是爲九十四。如來左足四周。有大人相。名光明徧照法界雲。摩尼寶華。以爲莊嚴。放大光明。充滿法界。平等一相。於中示現一切諸佛。及諸菩薩。自在神力。以大妙音。演說法界無盡法門。是爲九十五。

六足四周。因陀羅尼羅者。此云帝青。

如來右足指端。有大人相。名示現莊嚴雲。甚可愛樂。閻浮檀清淨真金。以爲莊嚴。放大光明。充滿十方。一切法界。於中示現一切諸佛。及諸菩薩。無盡法海。種種功德神通變化。是爲九十六。如來左足指端。有大人相。名現一切佛神變雲。不思議佛。光明月燄。普香摩尼寶燄輪。以爲莊嚴。放衆寶色清淨光明。充滿一切諸世界海。於中示現一切諸佛。及諸菩薩。演說一切諸佛法海。是爲九十七。

七足指端左右爲二。文顯可知。上來略列九十七相。次第數名。譯者安置。旣不說盡。豈不盈百。足

下缺一。脣齟不開。設合此二。六根皆辨。耳何獨無。若加兩耳。及足下一。則圓百數。以顯無盡。豈不妙哉。況此中所列。於三十二。尚有未盡。豈普賢力不及百耶。晉經有遺。但九十四。亦無次第之數。故知九十七數。不在生情配屬諸法。

佛子。毗盧遮那如來。有如是等十華藏世界海微塵數大人相。一。一身分。衆寶妙相。以爲莊嚴。

第三結略顯廣。別說難周。故須結略。非略可盡。故須顯廣。一華藏塵相已無邊。況十華藏。則無盡無盡。非普眼者。安能覩歟。既三十二相權實不同。互

有互無。故不會釋。

如來隨好光明功德品第三十五

初來意者。前品明相。此品明好。相好雖殊。俱用嚴身。以答前身及眼等兼自在問。好依相有。德劣於相。故次明之。劣德之用。用成頓益。翻顯大相。德難思矣。二釋名者。如來標人表德。隨好等顯德依人。隨好是體。隨逐大相。益姿好故。光明是用。功德者德。謂從好發光。光能益物。顯好之德。故以爲名。如來之隨好等。亦如來有隨好等。通二釋也。三宗趣者。明好感德爲宗。令物敬修爲趣。

爾時世尊告寶手菩薩言。佛子。如來應正等覺。有隨好名圓滿王。此隨好中。出大光明。名爲熾盛。七百萬阿僧祇光明而爲眷屬。

次釋文中二。先略後廣。略中二。先標果好。二佛子我爲下舉。因對顯。今初。佛自說者。有二意故。一僧祇因終。此品果極。故二皆佛說。二好用劣相而用難思。恐物不信。故佛自說。告寶手者。亦有二義。一說手隨好。彼主此門。二合當寶重。起信手故。有隨好者。總相舉也。卽足下之好。與後名同故。德用周備。故云圓滿。攝益自在。最勝名王。光名熾盛者。如

日具德。由此復能攝諸眷屬百萬等顯多。復云七

者淨七支。修七覺。照七地故。言七地者。一種性地

當信二勝解行地。當三賢三淨勝意樂地。當初地四正

行地。從二至七地五決定地。當八地六決定行地。當九七

到究竟地。從十地至如來地

補義曰。此品言隨好之功德。大用難思。意顯佛德

不可思議也。以佛德難思。無可比況。故舉最劣隨

好之德。以顯全體勝德耳。今經云有隨好名圓滿

王者言隨好乃總舉隨好之通相。名圓滿王。則意

指足下千輻輪中之好故。後方出其處。此乃最下

最劣之一好耳。若是佛之足輪。猶勝。今下文佛自說因中之足輪。則又劣矣。然因中最劣之好。放一光明。則能令地獄極苦之衆生。脫苦生天。且又得三重頓圓十地之利益。因中之光。有此大益。則果中之劣光。又可知矣。又足下劣光之益如此。況上諸相中之好乎。好尙如此。況勝相乎。因尙如此。況果德乎。一好如此。況多好多相乎。一好一相如此。況通身多相多好乎。一身之相好之益如此。況十華藏微塵數相及相中之好乎。以此重重增勝。擴而思之。其佛之功德利益。豈可得而思議耶。以經

文含義最深。疏中雖舉數重。猶難盡指。具相好如此之廣多。其佛身之大可知矣。以此觀佛。豈劣解可能及耶。

佛子。我爲菩薩時。於兜率天宮。放大光明。名光幢王。照十佛刹微塵數世界。

第二舉因對顯者。爲顯勝故。此有數重。一以相德深廣。言不能備。故置之說好。二好德復多。以三十二相既有八十隨好。則十蓮華藏塵數之相。好彌多矣。始且舉其一好。三一中置勝。但說劣者。故舉足下。四足下一好。復有多光。但說一光。五果位一

光亦不可說。故寄因顯。因光成益。三重頓圓。況果一光乎。如是展轉。況於諸相。況復總說如來之德。果海絕言。正斯義也。文中二。先光照分齊。卽前圓滿。好中放光。故不別標放處。而非前光。好具多光。此特七百萬阿僧祇光中之一耳。

彼世界中地獄衆生。遇斯光者。衆苦休息。得十種清淨眼。耳鼻舌身意。亦復如是。咸生歡喜。踊躍稱慶。

次光所成益。於中二。先令離苦淨宿善益。

從彼命終。生兜率天。天中有鼓。名甚可愛樂。彼天生已。此鼓發音而告之言。諸天子。汝以心不放逸。於如

來所種諸善根。往昔親近衆善知識。毗盧遮那大威神力。於彼命終。來生此天。

後轉報生天。得聞法益。於中初示宿因。謂昔近善友。必聞普法。成金剛種。心不放逸。顯會修行。種諸善根。通見聞等。次毗盧下顯其現緣。後於彼下結因屬果。文從略故。結屬生天。理實息苦得淨眼等。皆由此因緣也。是知佛光等照。不種善因。無斯勝益。何以一光頓成斯益。無盡功德之所顯故。純淨法界之所流故。非如權教八十隨好。但嚴於形。生信而已。此中略無墮獄之因。謂雖修乘。戒行寬故。

三摩地經卷第一
補義曰。此光照地獄之人。非是乘急戒緩。謂是昔
曾親近知識。聞諸大乘經。發心修行者。但因聞華
嚴圓融法門。不信誹謗墮惡趣者。以曾謗者。乃聞
華嚴之名。爲金剛種子。故今遇此因緣。乃出苦得
益耳。鈔中亦自申明。疏失經意。

佛子。菩薩足下千輻輪。名光明普照王。此有隨好。名
圓滿王。常放四十種光明。中有一光。名清淨功德。能
照億那由他佛刹微塵數世界。隨諸衆生種種業行。
種種欲樂。皆令成熟。阿鼻地獄極苦衆生。遇斯光者。
皆悉命終。生兜率天。

第二廣辨。但廣於因果難說故。文中亦二。先廣淨
宿善益。後既生天下。廣聞法益。今初。摧下惡趣之
苦。放足下輪光。四十光者。表四十位無不照故。中
有一者。置廣說略。能照已下。分齊過前。隨諸已下。
淨惑成德。故前光受清淨等名。以重況輕。故舉阿
鼻。

既生天已。聞天鼓音而告之言。善哉善哉。諸天子。毗
盧遮那菩薩入離垢三昧。汝當敬禮。

次廣聞法益中。長分爲六。一略標勸誨。二爾時諸
天子下。聞已生疑。三是時天鼓下。總示所因。四諸

天子下。正明勸教。五時諸天子聞是音下。依勸詣佛。六說是法時下。見聞益深。

爾時諸天子聞天鼓音如是勸誨。咸生是念。奇哉希有。何因發此微妙之音。是時天鼓告諸天子言。我所發聲。諸善根力之所成就。

前三可知。

諸天子。如我說我而不著我。不著我所。一切諸佛亦復如是。自說是佛。不著於我。不著我所。諸天子。如我音聲。不從東方來。不從南西北方四維上下來。業報成佛。亦復如是。非十方來。

四中有四。一以己喻佛。無我無來。

諸天子。譬如汝等。昔在地獄。地獄及身。非十方來。但由於汝顛倒惡業。愚癡纏縛。生地獄身。此無根本。無有來處。諸天子。毗盧遮那菩薩威德力故。放大光明。而此光明。非十方來。諸天子。我天鼓音。亦復如是。非十方來。但以三昧善根力故。般若波羅蜜威德力故。出生如是清淨音聲。示現如是種種自在。諸天子。譬如須彌山王。有三十三天上妙宮殿。種種樂具。而此樂具。非十方來。我天鼓音。亦復如是。非十方來。

二以他喻己。顯來卽無來。文有三喻。並顯可知。然

惡業善根。是來因緣。因緣無性。故來卽無來。非先有法。在十方中。從彼來也。故因緣者。卽是智慧。智慧之法。本非因緣。云何念言有何因緣。

諸天子。譬如億那由他佛刹微塵數世界。盡末爲塵。我爲如是塵數衆生。隨其所樂而演說法。令大歡喜。然我於彼。不生疲厭。不生退怯。不生憍慢。不生放逸。諸天子。毗盧遮那菩薩住離垢三昧。亦復如是。於右手掌一隨好中。放一光明。出現無量自在神力。一切聲聞辟支佛。尙不能知。況諸衆生。

三以己況佛難思之境。台中舉手隨好者。別舉顯

勝。上救下趣。故舉足光。今約顯通。故舉手耳。

諸天子。汝當往詣彼菩薩所。親近供養。勿復貪著五欲樂具。

四正勸往詣。誠不應留。於中二。先總誠勸。

著五欲樂。障諸善根。諸天子。譬如劫火燒須彌山。悉令除盡。無餘可得。貪欲纏心。亦復如是。終不能生念佛之意。

次廣釋。於中亦二。先釋前誠。有法喻合。

諸天子。汝等應當知恩報恩。諸天子。其有眾生不知報恩。多遭橫死。生於地獄。諸天子。汝等昔在地獄之

中。蒙光照身。捨彼生此。汝等今者。宜疾迴向。增長善根。諸天子。如我天鼓。非男非女。而能出生無量無邊。不思議事。汝天子天女。亦復如是。非男非女。而能受用種種上妙宮殿園林。如我天鼓。不生不滅。色受想行識。亦復如是。不生不滅。汝等若能於此悟解。應知則入無依印三昧。

後釋勸。於中有六。一順釋。爲報恩故。二諸天子其有下。反釋。三諸天子汝等下。示其恩相。四汝等今者下。勸往增善。五諸天子如我天鼓下。示法令修。謂說二空。非男女喻。以顯人空。不生滅喻。以顯法

空。六汝等若能下。勸修成益。言無依印者。既解悟無生。則能所雙寂。儻然靡據。故曰無依。以斯智印。印定萬法。不收不攝。任心自安。故稱三昧。

時諸天子聞是音已。得未曾有。卽皆化作一萬華雲。一萬香雲。一萬音樂雲。一萬幢雲。一萬蓋雲。一萬歌讚雲。作是化已。卽共往詣毗盧遮那菩薩所住宮殿。合掌恭敬。於一面立。欲申瞻覲而不得見。

第五依勸詣佛中分五。一獻供不遇。

時有天子作如是言。毗盧遮那菩薩已從此沒生於人間淨飯王家。乘栴檀樓閣。處摩耶夫人胎。

二聞其所在。

時諸天子。以天眼觀。見菩薩身處在人間淨飯王家。梵天欲天。承事供養。

二觀見下生。

諸天子眾。咸作是念。我等若不往菩薩所。問訊起居。乃至一念於此天宮而生愛著。則爲不可。時一一天子。與十那由他眷屬。欲下閻浮提。

四發心欲往。

時天鼓中。出聲告言。諸天子。菩薩摩訶薩。非此命終而生彼間。但以神通隨諸眾生心之所宜。令其得見。

諸天子。如我今者。非眼所見而能出聲。菩薩摩訶薩入離垢三昧。亦復如是。非眼所見而能處處示現受生。離分別。除憍慢。無染著。

五教見佛儀。於中二。先教識受生。令捨曲見。後教發心悔過。令其必見。今初。由前不遇。後覩下生。不離有無。情存彼此。故示體用。顯無生受生。文中有法喻合。法中先誠其曲見。後但以下。示其正見。是知佛化所生。非歿生也。二諸天子如我下。喻三菩薩下。合於中。先明法身無生。徧而叵見。而能下。應無不生。卽處處皆有。有感此中亦見。何須更下閻

浮離分別下。顯應生之德。拂其諸見。以無分別智而生。非謂有選生處。雖處王宮而無憍慢。諸天圍繞而無染著。

諸天子。汝等應發阿耨多羅三藐三菩提心。

第二。教發心悔過中。三。先標教誨。次徵問其方。後如法正教。夫欲悔過。須識逆順十心。謂先識十種順生死心。以爲所治。一。妄計人我。起於身見。二。內具煩惱。外遇惡緣。我心隆盛。三。內外既具。滅善心事。不喜他善。四。縱恣三業。無惡不爲。五。事雖不廣。惡心徧布。六。惡心相續。晝夜不斷。七。覆諱過失。不

欲人知。八虜扈抵突。不畏惡道。九無慚無愧。不畏
凡聖。十撥無因果。作一闡提。次起十種逆生死心。
從後翻破。一明信因果。二自愧剋責。三怖畏惡道。
四不覆瑕疵。五斷相續心。六發菩提心。七修功補
過。八隨喜他善。九念十方佛。十觀罪性空。今此三
段。文皆具有。而爲次不同。向以起心之次第。此以
勝劣言故。今初標教誨中。文有四節。治其六失。一
發菩提心爲懺所依。以是行本。攝衆德故。首而明
之。翻昔惡心徧布。自安危人。今悉覆法界。廣利有
情。

淨治其意。住善威儀。

二令淨三業。爲能懺體。淨治其意。是意止行。住善威儀。義通止作。謂當發露不覆瑕疵。及斷相續心。翻前六七。

悔除一切業障。煩惱障。報障。見障。

三令除業障。卽惑業苦。業報二障。約因果分異。旣懺報障。則怖畏惡道。以翻不畏。天子新從彼來。故不廣明。於煩惱中。利鈍分二。邪見斷善。最可畏。故別明見障。又障所知。亦見障故。餘如別說。

以盡法界眾生數等身。以盡法界眾生數等頭。以盡

法界眾生數等舌。以盡法界眾生數等善身業。善語業。善意業。悔除所有諸障過惡。

四運心普徧。令無不盡。由昔起過。既徧諸境。今悔昔非。故普運三業。等眾生界。一一佛前。及眾生前。皆發露懺悔。既人天凡聖。皆對懺悔。則自剋責。翻無慚愧。由意徧運。令身口徧。頭卽頂禮。兼身爲總。五輪著地。此言徧者。爲以何徧。故下次言善三業徧。此卽修功補過。翻縱恣三業。

時諸天子。聞是語已。得未曾有。心大歡喜。而問之言。菩薩摩訶薩。云何悔除一切過惡。

第二徵問其方。上言猶略。餘義未盡。故次徵之。

爾時天鼓。以菩薩三昧善根力故。發聲告言。

第三如法正教。正教觀罪性空。兼顯妄計我人。撥無因果。外遇惡緣。文分二。先明發聲之因。

諸天子。菩薩知諸業不從東方來。不從南西北方四維上下來。而共積集止住於心。但從顛倒生。無有住處。菩薩如是決定明見。無有疑惑。

次正說教誨。於中分五。一別觀業空。二總觀四障。三別觀見惑。四對業觀報。五總結懺益。今初業爲報因。三障首故。非先有體。不從十方來。正顯空義。

但從顛倒生。釋空所以。由業障海。從妄想生。故無自性。今此空慧。與心相應。則決定無疑。能如是知。卽名菩薩。

諸天子。如我天鼓。說業。說報。說行。說戒。說喜。說安。說諸三昧。諸佛菩薩。亦復如是。說我。說我所。說眾生。說貪。恚。癡。種種諸業。而實無我。無有所。諸所作業。六趣果報。十方推求。悉不可得。

二總觀四障。卽天鼓說法無說喻。以喻俗有真無。先喻中。初舉所治。謂業報二障。後說行等五。卽是能治。謂行善。止惡。喜他。安他。住三昧。後諸佛下。合。

於中先隨俗說有言我我所者卽是見障說貪恚癡卽煩惱後而實下勝義實無有無二文三障影略旣無我所翻破第一妄計人我。

諸天子譬如我聲不生不滅造惡諸天不聞餘聲唯聞以地獄覺悟之聲一切諸業亦復如是非生非滅隨有修集則受其報。

第三別破見惑見惑深險故廣破之文有三喻一鼓無生滅隨聞喻業雖無生隨修感報謂向觀業空爲遣執有若謂爲空諸佛所不化故今顯非斷無翻破撥無因果。

諸天子。如我天鼓所出音聲。於無量劫不可窮盡。無有間斷。若來若去。皆不可得。諸天子。若有去來。則有斷常。一切諸佛。終不演說有斷常法。除爲方便成熟眾生。

二聲無去來喻。喻歸中道。定有卽常。定無則斷。俱亦是二。故雙破二見。顯離斷常。文中先喻諸天子。若有下合。若有可來卽常。去而不來則斷。故雖空不斷。雖有不常。

諸天子。譬如我聲。於無量世界。隨眾生心。皆使得聞。一切諸佛。亦復如是。隨眾生心。悉令得見。

三鼓聲隨心喻。喻佛由心見。遣其心外定執。懺主令其真念十方諸佛。翻破外遇惡緣。

諸天子。如有頗梨鏡。名爲能照。清淨鑒徹。與十世界其量正等。無量無邊諸國土中一切山川。一切眾生。乃至地獄畜生餓鬼。所有影像。皆於中現。諸天子。於汝意云何。彼諸影像。可得說言。來入鏡中。從鏡去不。答言不也。諸天子。一切諸業。亦復如是。雖能出生諸業果報。無來去處。諸天子。譬如幻師。幻惑人眼。當知諸業。亦復如是。

第四對業觀報。文有二喻。一鏡像體虛喻。喻雖有

而無。謂鏡像依鏡現。像非去來。報依業生。何有去來。二幻師惑眼喻。喻業招報。雖無而有。又業亦如幻。又幻非有無。卽中道矣。

若如是知。是真實懺悔。一切罪惡。悉得清淨。

五總結懺益可知。上明從地獄來生天子聞法懺悔。下明益。

說此法時。百千億那由他佛刹微塵數世界中。兜率陀諸天子。得無生法忍。無量不思議阿僧祇六欲諸天子。發阿耨多羅三藐三菩提心。六欲天中一切天女。皆捨女身。發於無上菩提之意。

第六見聞益。深中二。先明餘眾益。以三昧力。聲普聞故。

爾時諸天子。聞說普賢廣大迴向。得十地故。獲諸力莊嚴三昧故。

次正辯當機益。於中二。先一重益。後其中香雲下展轉益。前中亦二。先得法益。後以眾生下。見佛益。今初。皆有故字。義似牒前爲因。則見佛爲益。而前未有得十地文。爲何所牒。是以晉經皆無故字。應言聞說普賢廣大迴向故。使得十地。獲諸力莊嚴三昧。上句得位。下句成行。分得十力。爲莊嚴故。

以眾生數等清淨三業。悔除一切諸重障故。卽見百千億那由他佛。剎微塵數七寶蓮華。一一華上。皆有菩薩結跏趺坐。放大光明。彼諸菩薩。一一隨好。放眾生數等光明。彼光明中。有眾生數等諸佛。結跏趺坐。隨眾生心而爲說法。而猶未現離垢三昧少分之力。爾時彼諸天子。以上眾華。復於身上一一毛孔。化作眾生數等眾妙華雲。供養毗盧遮那如來。持以散佛。一切皆於佛身上住。

二明見佛益中三。一明見因。二卽見下。正明見佛。三爾時下。敬心興供。言以上者。上來持華詣佛。猶

未散故。毛孔出華者。已得地位故。華在最初。故略舉之。上所持中。有香蓋等。故下見香見蓋。並皆成益。

其諸香雲。普雨無量。佛刹微塵數世界。若有眾生。身蒙香者。其身安樂。譬如比丘。入第四禪。一切業障。皆得消滅。

第二展轉益中二。一聞香益。二見蓋益。並依前供成。今初有法喻合。法中由脫障故。得解脫樂。故喻四禪無八災患。

若有聞者。彼諸眾生。於色聲香味觸。其內具有五百

煩惱。其外亦有五百煩惱。貪行多者二萬一千。瞋行多者二萬一千。癡行多者二萬一千。等分行者二萬一千。

次合。由滅障故。得淨善根。是爲益相。文中先顯所滅。卽八萬四千。古有二釋。一云。眾生根本煩惱有十。然一惑力。復各有十。卽爲一百。計應分爲九品。但上品重故。開爲三品。中下輕故。各爲一品。合爲五百。於內外境起。謂自五塵爲內。以他五塵爲外。一一各五百。卽爲五千。別迷四諦。則成二萬。并本一千。則有二萬一千。依三毒等分。成八萬四千。經

文自具。餘非經意。故不繁錄。

了知如是。悉是虛妄。如是知已。成就香幢雲自在光。明清淨善根。

後顯能滅。謂了惑本虛。居然不生。故晉經云。此諸煩惱皆悉除滅。除滅故清淨。惑亡智顯。卽自在光明善根成就。言香幢雲。卽九地善根。

若有眾生見其蓋者。種一清淨金網轉輪王。一恆河沙善根。

第二見蓋益。於中二。先正明得益。次佛子住此下。明攝化轉益。今初。準晉經云。種一恆河沙轉輪聖。

王所植善根。所謂白淨寶網輪王等。是則多箇輪王。非一輪王之多善也。梵本亦然。言一恆河沙者。謂從九地已前。乃至十住銅輪。以此十地所化分齊。比前如恆河沙矣。故晉經云。寶網輪王等等取前也。

佛子。菩薩住此轉輪王位。於百千億那由他佛刹微塵數世界中。教化眾生。

第二攝化轉益中二。先明得位益。後佛子如得初禪下。成得益。今初。有法喻合。法中直明攝化分齊。已如前釋。

佛子。譬如明鏡世界。月智如來。常有無量諸世界中。比丘比丘尼。優婆塞。優婆夷等。化現其身。而來聽法。廣爲演說。本生之事。未曾一念而有間斷。若有眾生。聞其佛名。必得往生彼佛國土。

二喻中。初化無間斷喻。上法中教化眾生。後若有聞名。必生其國。喻下合中。遇斯光明。獲十地位。

菩薩安住清淨金網轉輪王位。亦復如是。若有暫得。遇其光明。必獲菩薩第十地位。以先修行善根力。故後合中。初總合。準晉經亦復如是。下有放曼陀羅。自在光明之言。今經影在後喻。合中放摩尼鬘清。

淨光明是也。若直云得遇斯光。前文無放光處。爲
遇何耶。言得十地者。此品總有三重。皆得十地。故
名展轉益。一諸天子聞鼓說法得十地。二此天子
毛出華蓋雲。見者得輪王位。卽是十地。三輪王放
光。遇者復得十地。此三位皆齊等。同時頓成。各塵
數多類。總是一隨好中一光之中所成之益。餘光
好等。彌更難說。言以先修行善根力者。顯頓益之
因。因聞普法。修普善故。

佛子。如得初禪。雖未命終。見梵天處所有宮殿。而得
受於梵世安樂。得諸禪者。悉亦如是。

第二成德益中。先喻。後菩薩下。合。喻意云。欲界修得色定。以欲界眼見色界境。喻菩薩頓證未轉凡身。見十地境。以法力故。是則三祇可一念而屆者。明一攝一切故。塵劫不窮一位者。明一切攝一故。如是遲速自在。是此圓教。非餘宗也。

菩薩摩訶薩住清淨金網轉輪王位。放摩尼髻清淨光明。若有眾生遇斯光者。皆得菩薩第十地位。成就無量智慧光明。得十種清淨眼。乃至十種清淨意。具足無量甚深三昧。成就如是清淨肉眼。

二合中。初正明得益。後佛子假使下。顯境分齊。今

初言得菩薩第十地者。猶是牒前合中。以德依地成。所以重牒。不然則成兩度放光。各得十地矣。言成就如是清淨肉眼者。謂上諸德十眼。皆是凡身肉眼而成。故就結之。

佛子。假使有人。以億那由他佛刹。碎爲微塵。一塵一刹。復以爾許微塵數佛刹。碎爲微塵。如是微塵。悉置左手。持以東行。過爾許微塵數世界。乃下一塵。如是東行。盡此微塵。南西北方四維上下。亦復如是。如是十方所有世界。若著微塵。及不著者。悉以集成一佛國土。

後顯境分齊者。卽顯肉眼境界廣大。肉眼尙爾。餘眼玄妙。不可說也。文中二。初假設譬喻。以顯境多。次正明能見。後結德有歸。初分三。初明一重廣大。寶手。於汝意云何。如是佛土廣大無量。可思議不。答曰不也。如是佛土廣大無量。希有奇特。不可思議。若有眾生。聞此譬喻。能生信解。當知更爲希有奇特。佛言。寶手。如是如是。如汝所說。若有善男子。善女人。聞此譬喻。而生信者。我授彼記。決定當成阿耨多羅三藐三菩提。當獲如來無上智慧。

次問答顯廣。

寶手。設復有人。以千億佛刹微塵數。如上所說廣大佛土。未爲微塵。以此微塵。依前譬喻。一一下盡。乃至集成一佛國土。復未爲塵。如是次第展轉。乃至經八十反。

三復積前數重顯廣大。

如是一切廣大佛土。所有微塵。菩薩業報清淨肉眼。於一念中。悉能明見。亦見百億廣大佛刹微塵數佛。如頗梨鏡。清淨光明。照十佛刹微塵數世界。

第二正明能見。先見前廣刹之塵。肉眼能見。已是超勝。況一念耶。次亦見下。明見多佛。後如頗梨下。

明見之相無。心無去來故。

寶手。如是皆是清淨金網轉輪王甚深三昧福德善根之所成就。

第三結德有歸。歸輪王善。此品經來未盡。上差別因果竟。

補義曰。此不思議法三品經。明差別因中修生妙覺之果德也。初不思議法。乃顯法身智身之德。不可思議。相海隨好二品。乃明報身之德。不可思議。以因中一一行。皆稱普法界而修故。今報相。一一皆徧法界身。故云有十華藏世界微塵數大人相。

其相如此。其身又可知矣。然一一相中。具有多好。統論身相功德。不可思議。難以名言。故姑舉足輪最下一相。此相具有多好。今舉一好中常放四十四種光明。今只一光。下照地獄極苦眾生。離苦得生兜率陀天。聞天鼓說法。頓證十地。既證十地。卽以所持香華蓋等供奉於佛。其有聞香見蓋者。亦登十地。此第二轉。登十地者放光。令遇光者亦證十地。如是三重頓圓十地之功德。皆依足下一好中所放光明之所成就。今以最下一好功德。如此不可思議。況多好多相之功德耶。身光如此。況法身

善廣經要卷四十八
智光。又可得而思議耶。此正法華所云。諸佛智慧甚深無量。其智慧門難解難入者此也。學佛法者不知此三品之功德。其說諸佛智慧。如以螢火照四天下也。

大方廣佛華嚴經綱要卷第四十八

大方廣佛華嚴經綱要卷第四十九

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

普賢行品第三十六

初來意者。先通後別。通謂二品明出現因果。故次來也。亦名平等因果。謂會前差別因。成此普賢之圓因。會差別果。成性起出現之果。又前約修生。此約修顯故。若爾。何以更無別問。復何以差別果終。而無瑞證。平等因竟便有瑞耶。卽以此義顯是會

前若更別問。便有隔絕。欲會前故。不以瑞隔。普法希奇。因果各瑞。又前應有瑞。經來未盡。所以無耳。別謂此品先因後果。義次第故。亦遠答第二會初所行問。及不思議品。念請本願問故。前雖已答。下二深妙。故重明之。亦猶相海隨好。而妙中之妙。古德別爲一段因果。二釋名者。初通顯二品義名。依性起修。依性起用。差別相盡。因果體均。故云平等因果。又因是果。因量周法界。果是果。境界如空。因果俱盡。未來利樂含識。故名出現。別則品名普賢。卽標人顯法。明此行法非次第法。行者顯法非

人品明所行。非說人體。德周法界爲普。至順調善。曰賢。依性造修曰行。然普賢行。諸經多有其名。品中雖廣。今略顯十義以表無盡。一。所求普。謂要求證一切如來平等所證故。二。所化普。一毛端處有多眾生皆化盡故。三。所斷普。無有一惑而不斷故。四。所行。事行普。無有一行而不行故。五。所行。理行普。卽上事行。皆徹理源性具足故。六。無礙行普。上二交徹故。七。融通行普。隨一一行。融攝無盡故。八。所起用普。用無不能。無不周故。九。所行處普。上之諸門。徧帝網刹而修行故。十。所行時普。窮三際時。

念劫圓融。無竟期故。上之十行。參而不雜。涉入重
重。故善財入普賢一毛所得法門。過諸善友。不可
說倍。又上十行。通收爲二。若位後普賢。則得果不
捨因。窮徹來際。爲普賢行。以人彰法。則普賢之行。
若位前位中普賢。則以德成人。但修普行。卽曰普
賢。亦則普賢卽行。但從行得名。若獨位後普賢之
行。無施下位。廣釋普賢。如初會辨。三宗趣者。亦先
通後別。通以三品明平等因果爲宗。會前差別爲
趣。別以此品明平等圓因爲宗。成平等果無二爲
趣。

爾時普賢菩薩摩訶薩復告諸菩薩大眾言。佛子。如向所演。此但隨眾生根器所宜。略說如來少分境界。何以故。諸佛世尊爲諸眾生無智作惡。計我我所。執著於身。顛倒疑惑邪見分別。與諸結縛。恆共相應。隨生死流。遠如來道故。出興於世。

文中二此品辨因。後品明果。前中亦二。先長行直明。後以偈重頌。前中又二。先正說。後瑞證。今初亦二。先明說因。後佛子我不見下。正陳今義。前中亦二。先標前少說。後微釋所由。今初普賢說者。以人表法故。言如向者。一近指向前隨好品。爲障重地。

獄眾生。略說隨好少分用故。廣說難思。一。通指前所說之果爲少分境。果海絕言故。三。遠通差別因果。雖有圓融之義。以五位漸次。因果殊分。逐機就病。未盡法源。故名少分。則顯下平等因果。逐法性說。因果圓融。名廣大說。二。徵釋中。徵意云。何以前名少說。釋文二意。一者成上。諸佛所以出世者。以眾生有無明等十過。未宜廣說。故先明差別等。二者生後。謂眾生既過滋多。障累無盡。則一治一切治。一現一切現。眾生無盡。因果亦窮來際。前之所隨。由未盡故。言十過者。一者無明。二作惡行。此二

爲總。次六皆無明。三計我我所。四著身見。故六地云。世間受身。皆由著我。五三倒四倒等。不能決斷。六乖僻正理。七徧計分別。八結縛恆隨。九隨生死流。義通業苦。因流果流。故十遠如來。行邪徑。故此結成其失。結縛等名。如常所辨。

佛子。我不見一法爲大過失。如諸菩薩於他菩薩起瞋心者。

第二正陳普賢行中二。先明所治廣多。後是故諸菩薩下。能治深妙。今初。旣一惑成百萬障。則一障一切障。義則惑惑皆然。今從重說。文中三。初標。次

釋。後結成。今初標瞋最重。除瞋之外。更徧推求。無有一惡如瞋之重。故晉經云。是一瞋心。一切惡中。無過此惡。決定毗尼經云。菩薩寧起百千貪心。不起一瞋。以違害大悲。莫過此故。言於他菩薩者。若於菩薩起瞋。其過尤重。以令菩薩廢大行故。是以大般若中。天魔見諸菩薩互相是非。過常大喜。何以故。佛子。若諸菩薩於餘菩薩起瞋恚心。卽成就百萬障門故。

二徵釋。釋中二。一總顯。

何等爲百萬障。所謂不見菩提障。不聞正法障。生不

淨世界障。生諸惡趣障。生諸難處障。多諸疾病障。多
被謗毀障。生頑鈍諸趣障。壞失正念障。闕少智慧障。
眼障。耳障。鼻障。舌障。身障。意障。惡知識障。惡伴黨障。
樂習小乘障。樂近凡庸障。不信樂大威德人障。樂與
離正見人同住障。生外道家障。住魔境界障。離佛正
教障。不見善友障。善根留難障。增諸善法障。得下劣
處障。生邊地障。生惡人家障。生惡神中障。生惡龍。惡
夜叉。惡乾闥婆。惡阿修羅。惡迦樓羅。惡緊那羅。惡摩
睺羅伽。惡羅刹中障。不樂佛法障。習童蒙法障。樂著
小乘障。不樂大乘障。性多驚怖障。心常憂惱障。愛著

生死障。不專佛法障。不喜見聞佛自在神通障。不得菩薩諸根障。不行菩薩淨行障。退怯菩薩深心障。不生菩薩大願障。不發一切智心障。於菩薩行懈怠障。不能淨治諸業障。不能攝取大福障。智力不能明利障。斷於廣大智慧障。不護持菩薩諸行障。樂誹謗一切智語障。遠離諸佛菩提障。樂住眾魔境界障。不專修佛境界障。不決定發菩薩弘誓障。不樂與菩薩同住障。不求菩薩善根障。性多見疑障。心常愚闇障。不能行菩薩平等施故。起不捨障。不能持如來戒故。起破戒障。不能入堪忍門故。起愚癡惱害瞋恚障。不能

行菩薩大精進故。起懈怠垢障。不能得諸三昧故。起散亂障。不修治般若波羅蜜故。起惡慧障。於處非處中無善巧障。於度眾生中無方便障。於菩薩智慧中不能觀察障。於菩薩出離法中不能了知障。不成就菩薩十種廣大眼故。眼如生盲障。耳不聞無礙法故。口如啞羊障。不具相好故。鼻根破壞障。不能辨了眾生語言故。成就舌根障。輕賤眾生故。成就身根障。心多狂亂故。成就意根障。不持三種律儀故。成就身業障。恆起四種過失故。成就語業障。多生貪瞋邪見故。成就意業障。賊心求法障。斷絕菩薩境界障。於菩薩

勇猛法中。心生退怯障。於菩薩出離道中。心生懶惰障。於菩薩智慧光明門中。心生止息障。於菩薩念力中。心生劣弱障。於如來教法中。不能住持障。於菩薩離生道。不能親近障。於菩薩無失壞道。不能修習障。隨順二乘正位障。遠離三世諸佛菩薩種性障。

次徵列。標雖百萬。略列百門。古人寄位分五。以釋非不有理。如賊心求法。豈獨障於地耶。是知通障一切。信尙不起。況後位耶。又所障法界。如帝網重重。能障同所。亦皆無盡。故知百萬猶是略明。

佛子。若菩薩於諸菩薩起一瞋心。則成就如是等百

萬障門。何以故。佛子。我不見有一法爲大過惡。如諸菩薩於餘菩薩起瞋心者。

三結成。

是故諸菩薩摩訶薩欲疾滿足諸菩薩行。應勤修十種法。

第二能治深妙中二。先正顯。後結勸。今初文有六位。位各十行。初一始修。後五成益。後五段展轉依初。是爲初卽攝後。一治一切治也。說有前後。得卽一時。今初分二。先標舉勸修。

何等爲十。所謂心不棄捨一切眾生。於諸菩薩生如

來想。永不誹謗一切佛法。知諸國土無有窮盡。於菩薩行。深生信樂。不捨平等。虛空法界菩提之心。觀察菩提。入如來力。精勤修習。無礙辯才。教化眾生。無有疲厭。住一切世界。心無所著。是爲十。

後徵列及結。於中十法。攝爲五對。辨五種修。初二約人明謙敬。修敬上愛下故。次二約法明真正修。順教知事故。次二約心行明廣大修。樂大行。堅大心故。次二約智明增勝修。內入果智。外起勝辨故。後二約悲願明長時修。眾生無盡。悲化不疲。世界無邊。願住不著故。

佛子。菩薩摩訶薩安住此十法已。則能具足十種清淨。何等爲十。所謂通達甚深法清淨。親近善知識清淨。護持諸佛法清淨。了達虛空界清淨。深入法界清淨。觀察無邊心清淨。與一切菩薩同善根清淨。不著諸劫清淨。觀察三世清淨。修行一切諸佛法清淨。是爲十。

第二清淨者。依前正修行時成離染故。文中二。初躡前起後。後徵數列名。下皆倣此。列中十句。次第從前十句而成。一由不捨眾生。故達深法淨。以眾生皆有佛性。卽妄而真。爲深法故。二由敬上故能

近。三由不謗故能護。四由知無盡故了如空。五由菩薩行不離法界故深入。六知菩提心等虛空故無邊。七觀察菩薩皆同此觀。能入佛力。故名爲根。八精修不懈。故不著劫數。九由化無厭。故觀三世衆生化未化等。十由願住世界。能修一切佛法。

佛子。菩薩摩訶薩住此十法已。則具足十種廣大智。何等爲十。所謂知一切衆生心行智。知一切衆生業報智。知一切佛法智。知一切佛法深密理趣智。知一切陀羅尼門智。知一切文字辯才智。知一切衆生語言音聲辭辯善巧智。於一切世界中普現其身智。於

一切眾會中普現影像智。於一切受生處中具一切智智。是爲十。

第三廣大智者。垢染旣拂。本智自明。稱性相知。故云廣大。亦從前十及次十而成。可以意得。

佛子。菩薩摩訶薩住此十智已。則得入十種普入。何等爲十。所謂一切世界入一毛道。一毛道入一切世界。一切眾生身入一身。一身入一切眾生身。不可說劫入一念。一念入不可說劫。一切佛法入一法。一法入一切佛法。不可說處入一處。一處入不可說處。不可說根入一根。一根入不可說根。一切根入非根。非

根入一切根。一切想入一想。一想入一切想。一切言
音入一言音。一言音入一切言音。一切三世入一世。
一世入一切三世。是爲十。

第四普入者。事隨理融。本來卽入。智了法爾。無境
不通。故身心皆入。亦從前三生。可以意得。非根者。
境識及理。皆非根也。

佛子。菩薩摩訶薩。如是觀察已。則住十種勝妙心。何
等爲十。所謂住一切世界語言。非語言勝妙心。住一
切眾生想念無所依止勝妙心。住究竟虛空界勝妙
心。住無邊法界勝妙心。住一切深密佛法勝妙心。住

甚深無差別法勝妙心。住除滅一切疑惑勝妙心。住一切世平等無差別勝妙心。住三世諸佛平等勝妙心。住一切諸佛力無量勝妙心。是爲十。

第五勝妙心者。由前知法本融。則事理無礙。應機成益。名勝妙心。從前四生。亦可意得。

佛子。菩薩摩訶薩。住此十種勝妙心已。則得十種佛法善巧智。何等爲十。所謂了達甚深佛法善巧智。出生廣大佛法善巧智。宣說種種佛法善巧智。證入平等佛法善巧智。明了差別佛法善巧智。悟解無差別佛法善巧智。深入莊嚴佛法善巧智。一方便入佛法

善巧智無量方便入佛法善巧智。知無邊佛法無差別善巧智。以自心自力於一切佛法不退轉善巧智。是爲十。

第六善巧智者。由上理事無礙。今則權實決斷。名善巧智。有十一句。後二合一。餘皆如次。從前十成。一卽言亡言爲甚深。二無依故廣大。三如依空生色故能說種種。四住無二邊故。故證平等。五了種智深密。故了差別。六無差全同。七若無疑惑。則佛法莊嚴。八以平等成一方。便。九三世法約差別。門爲無量方便。十由住佛力。得知佛無邊。自力不退。

從前十既爾。從前四段亦然。如是展轉不離始修。故隨一法具一切矣。

佛子。菩薩摩訶薩聞此法已。咸應發心恭敬受持。何以故。菩薩摩訶薩持此法者。少作功力。疾得阿耨多羅三藐三菩提。皆得具足一切佛法。悉與三世諸佛法等。

第二結勸。一行能具一切。故疾得菩提。

爾時佛神力故。法如是故。十方各有十不可說百千億那由他佛刹微塵數世界。六種震動。雨出過諸天一切華雲。香雲。末香雲。衣蓋幢旛摩尼寶等。及以一

切莊嚴具雲。雨眾妓樂雲。雨諸菩薩雲。雨不可說如來色相雲。雨不可說讚歎如來善哉雲。雨如來音聲充滿一切法界雲。雨不可說莊嚴世界雲。雨不可說增長菩提雲。雨不可說光明照耀雲。雨不可說神力說法雲。如此世界四天下菩提樹下菩提場菩薩宮殿中。見於如來成等正覺演說此法。十方一切諸世界。中悉亦如是。

大文第二證成中二。初現瑞證。先此界。後如此下。結通。

爾時佛神力故。法如是故。十方各過十不可說佛刹

微塵數世界外。有十佛刹微塵數菩薩摩訶薩。來詣此土。充滿十方。作如是言。善哉善哉。佛子。乃能說此諸佛如來最大誓願授記深法。佛子。我等一切同名普賢。各從普勝世界普幢自在如來所。來詣此土。悉以佛神力故。於一切處演說此法。如此眾會。如是所說。一切平等。無有增減。我等皆承佛威神力。來此道場。爲汝作證。如此道場。我等十佛刹微塵數菩薩而來作證。十方一切諸世界中。悉亦如是。

二諸菩薩證。亦先此土。後如此下。結通言授記深法者。少用功力。疾得菩提故。同名普賢者。皆有此

行故。普勝世界者。依此普法最爲勝故。普幢自在者。此行成果。高出無礙故。

爾時普賢菩薩摩訶薩。以佛神力。自善根力。觀察十方。洎于法界。欲開示菩薩行。欲宣說如來菩提界。欲說大願界。欲說一切世界劫數。欲明諸佛隨時出現。欲說如來隨根熟眾生出現。令其供養。欲明如來出世。功不唐捐。欲明所種善根。必獲果報。欲明大威德菩薩。爲一切眾生現形說法。令其開悟。而說頌言。

第二以偈重顯中二。先敘述中亦二。先說儀。後欲開下說意。此有十意。偈中並具。文顯可知。

汝等應歡喜 捨離於諸蓋 一心恭敬聽

菩薩諸願行

第二正頌中百二十一頌分二。前二十四顯說分齊。餘皆正辨普賢行相。此是伽陀與前長行綺互共顯普賢之行。前是略明十法展轉相生。此則廣顯諸門。略無展轉。又前多顯體。此多辨用。前中二。初一誠聽許說。

往昔諸菩薩 最勝人師子 如彼所修行

我當次第說 亦說諸劫數 世界并諸業

及以無等尊 於彼而出興 如是過去佛

大願出於世 云何爲眾生 滅除諸苦惱
一切論師子 所行相續滿 得佛平等法
一切智境界 見於過去世 一切人師子
放大光明網 普照十方界 思惟發是願
我當作世燈 具足佛功德 十力一切智
一切諸眾生 貪恚癡熾然 我當悉救脫
令滅惡道苦 發如是誓願 堅固不退轉
具修菩薩行 獲十無礙力 如是誓願已
修行無退怯 所作皆不虛 說名論師子
餘正示分齊。於中二。前九頌許說過去菩薩行。

於一賢劫中 千佛出於世 彼所有普眼
我當次第說 如一賢劫中 無量劫亦然
彼未來佛行 我當分別說 如一佛刹種
無量刹亦然 未來十力尊 諸行我今說
次於一賢劫下。許說三世佛菩薩行。於中二前三
偈舉說時處前一時。後一處。

諸佛次興世 隨願隨名號 隨彼所得記
隨其所壽命 隨所修正法 專求無礙道
隨所化眾生 正法住於世 隨所淨佛刹
眾生及法輪 演說時非時 次第淨羣生

隨諸眾生業 所行及信解 上中下不同
化彼令修習 入於如是智 修其最勝行
常作普賢業 廣度諸眾生 身業無障礙
語業悉清淨 意行亦如是 三世靡不然
菩薩如是行 究竟普賢道 出生淨智日
普照於法界 未來世諸劫 國土不可說
一念悉了知 於彼無分別 行者能趣入
如是最勝地 此諸菩薩法 我當說少分
智慧無邊際 通達佛境界 一切皆善入
所行不退轉 具足普賢慧 成滿普賢願

入於無等智 我當說彼行

後十一偈。明所說行。於中前諸佛出世行。卽普賢行。故名因果圓融。後七菩薩三輪願智行。卽普賢行。

於一微塵中	悉見諸世界	眾生若聞者
迷亂心發狂	如於一微塵	一切塵亦然
世界悉入中	如是不思議	一一塵中有
十方三世法	趣刹皆無量	悉能分別知
一一塵中有	無量種佛刹	種種皆無量
於一塵不知	法界中所有	種種諸異相

趣類各差別 悉能分別知

第二正顯普賢行九十七頌分二。初六十七頌明
卽悲大智行。後未安者下三十頌。明卽智大悲行。
今初有十種行。一。初五頌明入帝網行。

深入微細智 分別諸世界 一切劫成壞

悉能明了說 知諸劫修短 三世卽一念

眾行同不同 悉能分別知 深入諸世界

廣大非廣大 一身無量刹 一刹無量身

十方中所有 異類諸世界 廣大無量相

一切悉能知 一切三世中 無量諸國土

具足甚深智 悉了彼成敗 十方諸世界
有成或有壞 如是不可說 賢德悉深了
或有諸國土 種種地嚴飾 諸趣亦復然
斯由業清淨 或有諸世界 無量種雜染
斯由眾生成 一切如其行 無量無邊刹
了知卽一刹 如是入諸刹 其數不可知
一切諸世界 悉入一刹中 世界不爲一
亦復無雜亂 世界有仰覆 或高或復下
皆是眾生想 悉能分別知 廣博諸世界
無量無有邊 知種種是一 知一是種種

普賢諸佛子 能以普賢智 了知諸刹數

其數無邊際 知諸世界化 刹化眾生化

法化諸佛化 一切皆究竟 一切諸世界

微細廣大刹 種種異莊嚴 皆由業所起

無量諸佛子 善學入法界 神通力自在

普徧於十方 眾生數等劫 說彼世界名

亦不能令盡 唯除佛開示

第二有十七偈頌深入時處微細行。

世界及如來 種種諸名號 經於無量劫

說之不可盡 何況最勝智 三世諸佛法

從於法界生 充滿如來地 清淨無礙念
無邊無礙慧 分別說法界 得至於彼岸
第三有三頌明了佛心祕密行。前一偈半。攝前起
後。後一偈半。正顯難了能了。

過去諸世界 廣大及微細 修習所莊嚴
一念悉能知 其中人師子 修佛種種行
成於等正覺 示現諸自在 如是未來世
次第無量劫 所有人中尊 菩薩悉能知
所有諸行願 所有諸境界 如是勤修行
於中成正覺 亦知彼眾會 壽命化眾生

以此諸法門 爲眾轉法輪 菩薩如是知

住普賢行地 智慧悉明了 出生一切佛

現在世所攝 一切諸佛土 深入此諸刹

通達於法界 彼諸世界中 現在一切佛

於法得自在 言論無所礙 亦知彼眾會

淨土應化力 盡無量億劫 常思惟是事

調御世間尊 所有威神力 無盡智慧藏

一切悉能知

第四有十偈了三世佛攝化行

出生無礙眼 無礙耳鼻身 無礙廣長舌

能令眾歡喜 最勝無礙心 廣大普清淨

智慧徧充滿 悉知三世法

第五有二偈六根無礙行。

善學一切化 剎化眾生化 世化調伏化

究竟化彼岸 世間種種別 皆由於想住

入佛方便智 於此悉明了 眾會不可說

一一爲現身 悉使見如來 度脫無邊眾

第六有三偈如化無方行。

諸佛甚深智 如日出世間 一切國土中

普現無休息 了達諸世間 假名無有實

示現無量身	知身從緣起	究竟無所著
一切如幻化	法界悉平等	普於十方刹
二非二分別	眾生世界劫	諸佛及佛法
心住於世間	世間住於心	於此不妄起
卽是須臾頃	莫見修與短	究竟剎那法
經於無量劫	不動於本處	不可說諸劫
如是見世間	無量諸國土	一念悉超越
無量無數劫	解之卽一念	知念亦無念
不生分別見	善離分別者	亦不見分別
眾生及世界	如夢如光影	於諸世間法

依於無二智 出現人師子 不著無二法

知無二非二

第七有十偈。三世間自在行。此中玄妙。宜審思之。

了知諸世間 如燄如光影 如響亦如夢

如幻如變化 如是隨順入 諸佛所行處

成就普賢智 普照深法界 眾生剎染著

一切皆捨離 而興大悲心 普淨諸世間

菩薩常正念 論師子妙法 清淨如虛空

而興大方便 見世常迷倒 發心咸救度

所行皆清淨 普徧諸法界 諸佛及菩薩

佛法世間法 若見其真實 一切無差別
第八有六偈。別明智正覺世間自在行。

如來法身藏 普入世間中 雖在於世間

於世無所著 譬如清淨水 影像無來去

法身徧世間 當知亦如是 如是離染著

身世皆清淨 湛然如虛空 一切無有生

知身無有盡 無生亦無滅 非常非無常

示現諸世間 除滅諸邪見 開示於正見

法性無來去 不著我我所

第九有五偈。明非身示身行。法身藏者。卽前藏身。

普賢菩薩自體徧言亦同此也。

譬如工幻師 示現種種事 其來無所從

去亦無所至 幻性非有量 亦復非無量

於彼大眾中 示現量無量 以此寂定心

修習諸善根 出生一切佛 非量非無量

有量及無量 皆悉是妄想 了達一切趣

不著量無量 諸佛甚深法 廣大深寂滅

甚深無量智 知甚深諸趣 菩薩離迷倒

心淨常相續 巧以神通力 度無量眾生

第十有六偈。非量示量行。

未安者令安 安者示道場 如是徧法界
其心無所著 不住於實際 不入於涅槃
如是徧世間 開悟諸羣生 法數眾生數
了知而不著 普雨於法雨 充洽諸世間
普於諸世界 念念成正覺 而修菩薩行
未曾有退轉

大文第二卽智之悲行中。亦有十行。一初四偈無住攝化行。

世間種種身 一切悉了知 如是知身法
則得諸佛身 普知諸眾生 諸劫及諸刹

十方無涯際 智海無不入 眾生身無量
一一爲現身 佛身無有邊 智者悉觀見
一念之所知 出現諸如來 經於無量劫
稱揚不可盡

二有因偈。非身現身行。

諸佛能現身 處處般涅槃 一念中無量

舍利各差別

三有一偈。分布舍利行。

如是未來世 有求於佛果 無量菩提心
決定智悉知 如是三世中 所有諸如來

一切悉能知 名住普賢行

四有一偈。知佛大心行。

如是分別知 無量諸行地 入於智慧處

其輪不退轉 微妙廣大智 深入如來境

入已不退轉 說名普賢慧 一切最勝尊

普入佛境界 修行不退轉 得無上菩提

五有三偈。法輪深入行。

無量無邊心 各各差別業 皆由想積集

平等悉了知 染汙非染汙 學心無學心

不可說諸心 念念中悉知 了知非一二

非染亦非淨 亦復無雜亂 皆從自想起
如是悉明見 一切諸眾生 心想各不同
起種種世間 以如是方便 修諸最勝行
從佛法化生 得名爲普賢
六有五偈了知根器行。

眾生皆妄起 善惡諸趣想 由是或生天
或復墮地獄 菩薩觀世間 妄想業所起
妄想無邊故 世間亦無量 一切諸國土
想網之所現 幻網方便故 一念悉能入
七有三偈了世業惑行。

眼耳鼻舌身 意根亦如是 世間想別異

平等皆能入 一一眼境界 無量眼皆入

種種性差別 無量不可說 所見無差別

亦復無雜亂 各隨於自業 受用其果報

普賢力無量 悉知彼一切 一切眼境界

大智悉能入 如是諸世間 悉能分別知

而修一切行 亦復無退轉

入有五偈。了達根境無礙行。

佛說眾生說 及以國土說 三世如是說

種種悉了知

九有一偈。知四種說法行。而利說等者。略有三義。
一約通力。二約融通。一說一切說故。三約顯理。是
說。菩薩觸境皆了知故。則觸類成教。如香飯等。

過去中未來 未來中現在 三世互相見

一一皆明了 如是無量種 開悟諸世間

一切智方便 邊際不可得

十末後二偈。三世攝化行。已上一品平等因竟
大方廣佛華嚴經綱要卷第四十九

大方廣佛華嚴經綱要卷第五十

唐于闐國三藏沙門實叉難陀釋經

唐清涼山大華嚴寺沙門澄觀疏義

明匡山法雲寺憨山沙門德清提挈

如來出現品第三十七之一

初來意者。前品明稱果之因。此品辨如因之果。體雖平等。不壞二相。先因後果。義次第故。亦爲答前不思議品出現念故。答第二會所行問故。二釋名者。如來是有法之人。卽三身十身之通稱。出現是依人之法。果用化用之總名。如來雖見上文對出

現故重辨。十身皆有出現。且寄三身以明。然來卽
出現。爲分人法。曉喻分明。故重辨之。若依法身。如
來者卽諸法如義。如理常現。名爲出現。故文云。普
現一切而無所現。又云。體性平等。不增減等。若依
報身。乘如實道。來成正覺。故曰如來。本性功德一
時頓顯。名爲出現。故文云。如來成正覺時。於一切
義無所疑惑。普見一切眾生。成正覺等。若依化身。
則乘薩婆若。乘來化眾生。故曰如來。則應機大用。
一時出現。文云。以本願力。現佛身。令見如來。大神
變。又云。隨其所能。隨其勢力。於菩提樹下。以種種

身成正覺等。今以新佛舊成。會無二體。新成舊佛。法報似分。無不應時故。卽真而應。應隨性起故。卽應而真。三佛圓融。十身無礙。故辨應現。卽顯真成。是以晉名性起。性字雖是義加。未爽通理。以應雖從緣。不違性故。無不從此法界流故。以淨奪染。性卽起故。若離於緣。性叵說故。下加性起。菩薩表所說故。妄雖卽性。不順性故。今以起義多含。直云出現。從性從因。從真從感。皆出現故。若唯辨應身出現。非唯失前二義。亦未足顯深。何能融前差別之果。若以來爲現義。則如來卽出現。持業釋也。若分

人法。三皆如來之出現故。第三宗趣。平等出現爲宗。融差別果爲趣。

爾時世尊從眉間白毫相中。放大光明。名如來出現。無量百千億那由他阿僧祇光明。以爲眷屬。其光普照十方盡虛空法界一切世界。右遶十匝。顯現如來無量自在。覺悟無數諸菩薩眾。震動一切十方世界。除滅一切諸惡道苦。映蔽一切諸魔宮殿。顯示一切諸佛如來坐菩提座成等正覺。及以一切道場眾會。作是事已。而來右遶菩薩眾會。

第四正釋文。通品大文分七。一加分。二本分。三請

分。四說分。五顯名受持分。六表瑞證成分。七偈頌
總攝分。今初有二。先毫光加請主。後口光加說主。
前中三。初光。次加。後益。光中有十。分三。初光出處。
眉間者。表正道。離有無二邊故。表無住道。離真應
二邊故。白毫者。表所出現性無垢故。能詮出現諸
教本故。二放大下。辨光名體。如所說故。三無量下
入段。皆是光業。初眷屬光。卽是因業。總攝諸法皆
此生故。四其光下。舒業。五顯現下。敬業。六覺悟下。
覺業。七除滅下。止業。八映蔽下。降伏業。九顯示下。
示現業。十作是下。卷業。

入如來性起妙德菩薩頂。

二正明加相。所以加此菩薩者。如名所顯故。性有二義。一種性義。因所起故。二法性義。若真若應。皆此生故。亦有釋云。此之妙德。卽是文殊。說此法門。加性起稱。此釋無違大理。以文殊大智爲能顯。普賢法界爲所顯。共成毗盧遮那之出現故。亦是解行滿故。佛出現也。從頂入者。是加持相。妙智之極。方能顯故。

時此道場一切大眾身心踊躍。生大歡喜。作如是念。甚奇希有。今者如來放大光明。必當演說甚深大法。

三加益中二。先大眾同欣。知法將被故。

爾時如來性起妙德菩薩於蓮華座上。徧袒右肩。右跏合掌。一心向佛而說頌言。

二爾時下妙德領旨。知令求說主故。於中二。先長行。身心致敬。跏者跪也。

正覺功德大智出

普達境界到彼岸

等於三世諸如來

是故我今恭敬禮

已升無相境界岸

而現妙相莊嚴身

放於離垢千光明

破魔軍眾咸令盡

十方所有諸世界

悉能震動無有餘

未曾恐怖一眾生

善逝威神力如是

虛空法界性平等

已能如是而安住

一切含生無數量

咸令滅惡除眾垢

苦行勤勞無數劫

成就最上菩提道

於諸境界智無礙

與一切佛同其性

後偈頌讚請。十偈分二。前五讚。後五請。前中初一

總讚申敬。餘四別讚放光中。有讚因讚果讚用等。

導師放此大光明

震動十方諸世界

已現無量神通力

而復還來入我身

決定法中能善學

無量菩薩皆來集

令我發起問法心

是故我今請法王

今此眾會皆清淨

善能度脫諸世間

智慧無邊無染著

如是賢勝咸來集

利益世間尊導師

智慧精進皆無量

今以光明照大眾

令我問於無上法

誰於大僊深境界

而能真實具開演

誰是如來法長子

世間尊導願顯示

後五中。初一自敘得益。卽是領旨。次偈領眾意請。
次偈歎眾堪聞。次偈敘佛令請。後偈正求說主。已
領佛意。故不請佛。

爾時如來卽於口中放大光明。名無礙無畏。百千億阿僧祇光明。以爲眷屬。普照十方盡虛空等法界一切世界。右繞十匝。顯現如來種種自在。開悟無量諸菩薩眾。震動一切十方世界。除滅一切諸惡道苦。曠蔽一切諸魔宮殿。顯示一切諸佛如來坐菩提座。成等正覺。及以一切道場眾會。作是事已。而來右遶菩薩眾會。入普賢菩薩摩訶薩口。其光入已。普賢菩薩身。及師子座。過於本時。及諸菩薩身座百倍。唯除如來師子之座。

第二口光加說主者。示所請故。文中三。初光。次加。

後益。今初亦十。一出處。口放者。表教道傳通故。二光名。令得無礙辯。不畏大眾及深理故。餘如前辯。二入普下。加中。入口者。教以口傳故。如佛說故。加普賢者。是普賢行之果故。所證法界。由理顯故。三其光入下。明益中。唯除如來。揀師資故。

爾時如來性起妙德菩薩問普賢菩薩摩訶薩言。佛子。佛所示現廣大神變。令諸菩薩皆生歡喜。不可思議。世莫能知。是何瑞相。普賢菩薩摩訶薩言。佛子。我於往昔見諸如來。應正等覺。示現如是廣大神變。卽說如來出現法門。如我惟忖。今現此相當說其法。說

是語時。一切大地悉皆震動。出生無量問法光明。

第二爾時下。本分中三。初徵事而問。次引例以答。答卽是本。後說是語已下。表瑞證成。顯說希奇。纔問其名。已有徵故。大地動者。大法將顯。大惑將傾。故。出問法光者。冥加智慧助發請故。

時性起妙德菩薩問普賢菩薩言。佛子。菩薩摩訶薩。應云何知諸佛如來應正等覺出現之法。願爲我說。佛子。此諸無量百千億那由他菩薩眾會。皆久修淨業。念慧成就。到於究竟大莊嚴岸。具一切佛威儀之行。正念諸佛。未曾忘失。大悲觀察一切眾生。決定了。

知諸大菩薩神通境界。已得諸佛神力所加。能受一切如來妙法。具如是等無量功德。皆已來集。佛子。汝已曾於無量百千億那由他佛所。承事供養。成就菩薩最上妙行。於三昧門。皆得自在。入一切佛祕密之處。知諸佛法。斷眾疑惑。爲諸如來神力所加。知眾生根。隨其所樂。爲說真實解脫之法。隨順佛智。演說佛法。到於彼岸。有如是等無量功德。善哉佛子。願說如來應正等覺出現之法。身相言音。心意境界。所行之行。成道轉法輪。乃至示現入般涅槃。見聞親近所生善根。如是等事。願皆爲說。

第三請分中有長行與偈。前中四。一總舉法請。二佛子此諸下。歎眾堪聞。二佛子汝已下。歎說主具德。四善哉下。標章別請。前二可知。三中別歎十事。一供多佛。必會聞故。二成妙行。會已修故。三定自在。有所依故。四親證入故。五知教道故。六除他疑故。七上力加故。八審根器故。九能隨說故。十順智到彼岸得意深故。有如是下。總結。既有說德堪宜說故。第四標章別請中。初句讚善。躡前三段。後列十事以顯無盡。一如來出現之法。此是總相。總集多緣成出現法。法含軌持。餘九是別。初三卽三業

祕密。四境卽智之所緣。亦分齊境。五依境修行。通
因通果。六成菩提道。七成轉法輪。八應必示涅槃。
九若存若亡。見聞皆益。備斯九事。一化始終。如是
下結請。

時如來性起妙德菩薩欲重明此義。向普賢菩薩而
說頌曰。

善哉無礙大智慧

善覺無邊平等境

願說無量佛所行

佛子聞已皆欣慶

菩薩云何隨順入

諸佛如來出興世

云何身語心境界

及所行處願皆說

云何諸佛成正覺

云何如來轉法輪

云何善逝般涅槃

大眾聞已心歡喜

若有見佛大法王

親近增長諸善根

願說彼諸功德藏

眾生見已何所獲

若有得聞如來名

若現在世若涅槃

於彼福藏生深信

有何等利願宣說

此諸菩薩皆合掌

瞻仰如來仁及我

大功德海之境界

淨眾生者願爲說

願以因緣及譬喻

演說妙法相應義

眾生聞已發大心

疑盡智淨如虛空

如徧一切國土中

諸佛所現莊嚴身

願以妙音及因喻

示佛菩提亦如彼

十方千萬諸佛土

億那由他無量劫

如今所集菩薩眾

於彼一切悉難見

此諸菩薩咸恭敬

於微妙義生渴仰

願以淨心具開演

如來出現廣大法

三有五偈。歎德勸請。通頌後三段。於中初偈總讚請。次二偈勸說之方。以法深難領。故請說因喻。次一偈半。歎眾堪聞。末後半偈。結請所說淨心無所說過。具演文義周圓。

爾時普賢菩薩摩訶薩告如來性起妙德等諸菩薩
大眾言。佛子。此處不可思議。

第四說分。大分爲二。初別答十問。後佛子如來以
一切譬下。總以結酬。今初十段。答前十問。各有長
行偈頌。一一具十。今初答出現之法。長行中二。初
標告歎深。

所謂如來應正等覺。以無量法而得出現。

二所謂下。隨義別顯。於中三。初法說深廣。酬前因
緣。二佛子譬如下。喻明深廣。雙酬因喻。三佛子至
知如來出現下。總結成益。結上十喻。初中分三。謂

標釋結。今總多因成出現果。

何以故。非以一緣。非以一事。如來出現而得成就。以十無量百千阿僧祇事而得成就。

二何以下。釋於中二。先徵以總釋。後何等爲下。徵數別明。今初。先返釋。緣約能成之緣。事卽所成因體。後以十下。順釋。向言無量。乃是總相。今明有十個無量。以顯無盡。理實則有百千阿僧祇數無量。此十無量。皆徧十喻。言百千者。古人云。以十無量入中。十喻成百。以後結中十句。一一結前百門爲千。其中更有別義。方成無量。今以下列十中。門門

皆云無量。則不俟相入。是知百千之言。但是數之

總稱。

何等爲十。所謂過去無量攝受一切眾生菩提心所成故。過去無量清淨殊勝志樂所成故。過去無量救護一切眾生大慈大悲所成故。過去無量相續行願所成故。過去無量修諸福智心無厭足所成故。過去無量供養諸佛教化眾生所成故。過去無量智慧方便清淨道所成故。過去無量清淨功德藏所成故。過去無量莊嚴道智所成故。過去無量通達法義所成故。

二徵數別明中。一始發大心。誓期出現故。此心何相。二明上求勝志。三明下化慈悲。四行以續願。此行謂何。五明不出福智。六別顯福嚴。七別明智嚴。八淨前功德。九嚴前智慧。所謂方便道教道。證道無住道。正道助道。一道。二道等。皆莊嚴故。十窮究法源。真實智故。

佛子。如是無量阿僧祇法門圓滿。成於如來。

三結中。既皆昔因。多法圓滿。令二利果一時出現。故出現言。通真通應。

佛子。譬如三千大千世界。非以一緣。非以一事。而得

成就。以無量緣。無量事。方乃得成。

第二喻明深廣中十喻各三。謂喻合結。喻酬譬喻。合酬因緣。故文云非以一緣一事而得出現。又前法說多約往因。此中合文多約現緣。十中一大干與造喻。此喻爲總。總喻眾緣以成出現。故云以無量緣等。下說雲雨。皆此所霑。初喻中四。一總辨多緣。二別顯緣相。三顯彼因起。四性相結成。今初。先返後順。緣卽因緣。如眾生業及風雨等。事卽事相。謂如所持水及宮殿等。

所謂興布大雲。降霑大雨。四種風輪相續爲依。其四

者何。一名能持。能持大水故。二名能消。能消大水故。三名建立。建立一切諸處所故。四名莊嚴。莊嚴分布咸善巧故。

二別顯中。先雲雨上霑。後風輪下持。一能持者。若無此輪。雨無停處。二水若不減。礙起天宮。三水雖已減。假此成立。謂減一節水。起一重天。如嚴冬急流。重重冰結。四雖起總處。無別莊嚴。故須第四。

如是皆由眾生共業。及諸菩薩善根所起。令於其中一切眾生。各隨所宜。而得受用。

三顯彼因起。謂上雲等略由二因。一眾生外增上

業言共業者。謂多有情應生此界。共業同變。於中有四句。謂共中共等。二菩薩善根。此有二意。一約同居。謂地前菩薩。二約能化。謂隨諸眾生應以何國起菩薩根等。便修彼因以取彼國。故有眾生類。卽菩薩佛國。令於其中下。顯受用果。謂先成器界。後成眾生依之而住。各隨所宜者。謂水族眾生得水受用等。又人羅刹宮殿無礙。菩薩眾生淨穢同居。

佛子。如是等無量因緣。乃成三千大千世界。法性如是。無有生者。無有作者。無有知者。無有成者。然彼世

界而得成就。

第四性相結成中。先結前生後。後法性如是下。正結。此句爲總。此法性言通於性相。無有生下。別顯性定。亦遮妄計。謂非冥性微塵等生。非自在梵王等作。無神我能知。上三顯能作空。無有成者。顯所作空。雖能所俱空。不礙相有。故云而得成就。如是無礙爲法性如是。

如來出現亦復如是。非以一緣。非以一事。而得成就。以無量因緣。無量事相。乃得成就。所謂會於過去佛所。聽聞受持大法雲雨。因此能起如來四種大智風。

輪何等爲四。一者念持不忘陀羅尼大智風輪。能持一切如來大法雲雨故。二者出生止觀大智風輪。能消竭一切煩惱故。三者善巧迴向大智風輪。能成就一切善根故。四者出生離垢差別莊嚴大智風輪。令過去所化一切眾生善根清淨。成就如來無漏善根力故。如來如是成等正覺。法性如是。無生無作而得成就。佛子。是爲如來應正等覺出現第一相。菩薩摩訶薩應如是知。

次合中略不合第三顯彼所因。以次下二喻各別合故。合四輪中。前三是因。後一二利果滿。因圓果

滿佛出現故。一品之內。多以依喻正者。非唯義類相似。實則外由內變。故令外器全似於內。是以上云菩薩善根所起衆生共業所生等。

復次佛子。譬如三千大千世界將欲成時。大雲降雨。名曰洪霖。一切方處。所不能受。所不能持。唯除大千界將欲成時。佛子。如來應正等覺。亦復如是。興大法雲。雨大法雨。名成就如來出現。一切二乘。心志狹劣。所不能受。所不能持。唯除諸大菩薩。心相續力。佛子。是爲如來應正等覺出現第二相。菩薩摩訶薩。應如是知。

第二洪澤大千喻。此之雲雨。卽前喻中興雲降雨。正喻法門廣大難知。周十方故。言心相續力者。若約信受。但是圓機。堅種相續。能受深旨。若約具受。則八地已上。得無盡陀羅尼。方能受持。乃至十地。方受如來雲雨說法。是以文言除大菩薩。由初義故。但揀二乘。

復次佛子。譬如眾生以業力故。大雲降雨。來無所從。去無所至。如來應正等覺。亦復如是。以諸菩薩善根力故。興大法雲。雨大法雨。亦無所從來。無所至去。佛子。是爲如來應正等覺出現第三相。菩薩摩訶薩應

如是知。

第三雲雨無從喻。菩薩善根。如生共業。感彼出現。法雲法雨。機感而現。非先有一方所。從彼而來。機謝而去。亦非歸至舊所。故體無生滅。

復次佛子。譬如大雲降霖大雨。大千世界一切眾生。無能知數。若欲算計。徒令發狂。唯大千世界主摩醯首羅。以過去所修善根力故。乃至一滴。無不明了。佛子。如來應正等覺。亦復如是。興大法雲。雨大法雨。一切眾生聲聞獨覺。所不能知。若欲思量。心必狂亂。唯除一切世間主菩薩摩訶薩。以過去所修覺慧力故。

乃至一文一句。入眾生心。無不明了。佛子。是爲如來應正等覺出現第四相。菩薩摩訶薩。應如是知。

第四大雨難知。喻深非心境。但是大機。卽世間主。無能所行。卽能知之。

復次佛子。譬如大雲降雨之時。有大雲雨。名爲能滅。能滅火災。有大雲雨。名爲能起。能起大水。有大雲雨。名爲能止。能止大水。有大雲雨。名爲能成。能成一切。摩尼諸寶。有大雲雨。名爲分別。分別三千大千世界。佛子。如來出現。亦復如是。興大法雲。雨大法雨。有大法雨。名爲能滅。能滅一切眾生煩惱。有大法雨。名爲

能起。能起一切眾生善根。有大法雨。名爲能止。能止一切眾生見惑。有大法雨。名爲能成。能成一切智慧。法寶。有大法雨。名爲分別。分別一切眾生心樂。佛子。是爲如來應正等覺出現第五相。菩薩摩訶薩應如是知。

第五大雨成敗喻。況佛滅惑成德。喻中初一卽壞界之時。二卽以水止水。合中初二滅惑成福。次二滅障成智。卽止觀雙運。後一權智照機。又無二同。二乘無三同外道。無四增無明。無五非種智。此卽分上總中法雨令差。

三摩沙多卷三十一
二十
復次佛子。譬如大雲雨一味水。隨其所雨。無量差別。如來出現。亦復如是。雨於大悲一味法水。隨宜說法。無量差別。佛子。是爲如來應正等覺出現第六相。菩薩摩訶薩應如是知。

第六一雨隨別喻。喻佛一味隨器。隨器卽合差別。復次佛子。譬如三千大千世界初始成時。先成色界諸天宮殿。次成欲界諸天宮殿。次成於人。及餘眾生諸所住處。佛子。如來出現。亦復如是。先起菩薩諸行智慧。次起緣覺諸行智慧。次起聲聞善根諸行智慧。次起其餘眾生有爲善根諸行智慧。佛子。譬如大雲

雨一味水。隨諸眾生善根異故。所起宮殿種種不同。如來大悲一味法雨。隨眾生物而有差別。佛子是。爲如來應正等覺出現第七相。菩薩摩訶薩應如是知。第七勝處先成喻。喻佛勝緣先濟德。文中先正明。後佛子譬如下。牒以釋疑。先成由業力。法異由機殊。不乖一味。

復次佛子。譬如世界初欲成時。有大水生。徧滿三千大千世界。生大蓮華。名如來出現功德寶莊嚴。徧覆水上。光照十方一切世界。時摩醯首羅淨居天等見是華已。卽決定知於此劫中。有爾所佛出興於世。佛

子。爾時其中有風輪起。名善淨光明。能成色界諸天
宮殿。有風輪起。名淨光莊嚴。能成欲界諸天宮殿。有
風輪起。名堅密無能壞。能成大小諸輪圍山。及金剛
山。有風輪起。名勝高。能成須彌山王。有風輪起。名不
動。能成十大山王。何等爲十。所謂佉陀羅山。仙人山。
伏魔山。大伏魔山。持雙山。尼民陀羅山。目真鄰陀山。
摩訶目真鄰陀山。香山。雪山。有風輪起。名爲安住。能
成大地。有風輪起。名爲莊嚴。能成地天宮殿。龍宮殿。
乾闥婆宮殿。有風輪起。名無盡藏。能成三千大千世
界。一切大海。有風輪起。名普光明藏。能成三千大千

世界諸摩尼寶。有風輪起。名堅固根。能成一切諸如意樹。佛子。大雲所雨一味之水。無有分別。以眾生善根不同故。風輪不同。風輪差別故。世界差別。

第八事別由因喻。喻佛成辦大事德。亦是德殊由智喻。喻中分三。初蓮華表佛。總中略無名。出現者表佛現故。而言大者。準大悲經第三云有千葉故。光照十方者。金色光也。言爾所佛者。有千枝華。表千佛故。故劫名賢。賢善多故。餘多同此。二佛子爾時下。風輪起處者。卽有力遙持。廣前建立風輪。三佛子大雲下。結因有屬。

佛子。如來出現。亦復如是。具足一切善根功德。放於無上大智光明。名不斷如來種。不思議智。普照十方一切世界。與諸菩薩一切如來灌頂之記。當成正覺。出興於世。

二合中三。先合蓮華表佛喻。於中一切善根功德。合上大水徧滿。放於下合生蓮華。謂不斷種性。普照十方。合上光照十方。與諸菩薩下。合知佛當出。佛子。如來出現。復有無上大智光明。名清淨離垢。能成如來無漏無盡智。復有無上大智光明。名普照。能成如來普入法界。不思議智。復有無上大智光明。名

持佛種性。能成如來不傾動力。復有無上大智光明。
名迥出無能壞。能成如來無畏無壞智。復有無上大
智光明。名一切神通。能成如來諸不共法。一切智智。
復有無上大智光明。名出生變化。能成如來令見聞
親近所生善根不失壞智。復有無上大智光明。名普
隨順。能成如來無盡福德智慧之身。爲一切眾生而
作饒益。復有無上大智光明。名不可究竟。能成如來
甚深妙智。隨所開悟。令三寶種永不斷絕。復有無上
大智光明。名種種莊嚴。能成如來相好嚴身。令一切
眾生皆生歡喜。復有無上大智光明。名不可壞。能成

如來法界。虛空界等。殊勝壽命。無有窮盡。

第二佛子下。合風輪起處喻。此十智光次第合前所成唯果德。能成通因果。又能成卽實之權所成。唯差別之德。故下結云同一體性。

佛子。如來大悲一味之水。無有分別。以諸眾生欲樂不同。根性各別。而起種種大智風輪。令諸菩薩成就如來出現之法。佛子。一切如來同一體性。大智輪中。出生種種智慧光明。佛子。汝等應知如來於一解脫味。出生無量不可思議種種功德。眾生念言。此是如來神力所造。佛子。此非如來神力所造。佛子。乃至一

菩薩不於佛所會種善根。能得如來少分智慧。無有是處。但以諸佛威德力故。令諸眾生具佛功德。而佛如來無有分別。無成無壞。無有作者。亦無作法。佛子是爲如來應正等覺出現第八相。菩薩摩訶薩應如是知。

第三合結。因有屬。於中三。一結因。卽能成之智。合上一味之水。風輪不同。此輪由一節水減。一重輪生如澄水塗。今推能成由一味大悲。二佛子一切下結果。卽所成之大智。從一實智隨權而生。合上風輪差別故。世界差別。三結緣。卽由眾生異。合上

以眾生善根不同。兼釋外疑。於中又三。初牒前正理。一解脫味。卽能成之水。水具二義。悲及解脫。二文影略。種種功德。通能所二智。二眾生念言。舉外疑性。然感應之道。略有三義。一互相成。二互相奪。三緣成性空。今眾生以緣奪因。純推佛力。失因緣義。三佛子。此非下。如來爲釋。於中初以因奪緣。一向言非。次但以下。爲說正義。初句因緣相成。後而佛下。有二義。一成上因緣。雖隨眾生。心無分別。二成第三義。了性空故。緣成故無成。無成故無壞。所成旣空。何有能成作者及作法耶。

復次佛子。如依虛空起四風輪。能持水輪。何等爲四。一名安住。二名常住。三名究竟。四名堅固。此四風輪能持水輪。水輪能持大地。令不散壞。是故說地輪依水輪。水輪依風輪。風輪依虛空。虛空無所依。雖無所依。能令三千大千世界而得安住。

第九四輪相倚喻。況佛體用依持德。亦廣建立風之別義。喻中二。先明能持之風有四者。一。一時持水名安住。二。多時不動名常住。三。與劫齊量。四。體性堅密。是以俱舍云。假使有一大諾建那。以金剛輪奮威懸擊。金剛有碎。風輪無損。其量廣無數。厚

十六洛叉。彼但有一。與此不同。二此四下。四輪相依。準俱舍論。次上水輪。厚八洛叉。洛叉。億也。次上更有金輪。厚三億二萬由旬。然其世界。或說三輪成。謂風水金。或說五輪。謂下加虛空。上加大地。今欲稱法。合成四輪。則地中含金。金亦地故。

佛子。如來出現。亦復如是。依無礙慧光明。起佛四種大智風輪。能持一切眾生善根。何等爲四。所謂普攝眾生。皆令歡喜。大智風輪。建立正法。令諸眾生皆生愛樂。大智風輪。守護一切眾生善根。大智風輪。具一切方便。通達無漏界。大智風輪。是爲四。佛子。諸佛世

尊。大慈救護一切眾生。大悲度脫一切眾生。大慈大悲。普徧饒益。然大慈大悲。依大方便善巧。大方便善巧。依如來出現。如來出現。依無礙慧光明。無礙慧光明。無有所依。佛子。是爲如來應正等覺出現第九相。菩薩摩訶薩應如是知。

二合中。先合能持四風。一未信入者。以四攝普攝。示以正理。二已信受者。建立教法。三已入法者。令其成行。四已成行者。令其得果。二佛子下。合四輪相依。一慈悲合地能厚載故。二方便合水。曲隨器故。出現合風。力能持故。無礙合空。如空無礙故。故

淨名云。其無礙慧。無若干故。

復次佛子。譬如三千大千世界。既成就已。饒益無量種種眾生。所謂水族眾生。得水饒益。陸地眾生。得地饒益。宮殿眾生。得宮殿饒益。虛空眾生。得虛空饒益。如來出現。亦復如是。種種饒益無量眾生。所謂見佛。生歡喜者。得歡喜益。住淨戒者。得淨戒益。住諸禪定。及無量者。得聖出世大神通益。住法門光明者。得因果不壞益。住無所有光明者。得一切法不壞益。是故說言。如來出現。饒益一切無量眾生。佛子。是爲如來應正等覺出現第十相。菩薩摩訶薩。應如是知。

第十大千饒益喻。況佛利世德。別顯總中。一切眾生各隨所宜而得受用。合中次第合前四益。見佛生喜。如魚得潤故。戒如平地。萬善出生故。定如宮室。得安息故。慧如虛空。不可壞故。於中二句。初不壞事。後不壞理。

佛子。菩薩摩訶薩。知如來出現。則知無量。知成就無量行故。則知廣大。知周徧十方故。則知無來去。知離生住滅故。則知無行無所行。知離心意識故。則知無身。知如虛空故。則知平等。知一切眾生皆無我故。則知無盡。知徧一切刹無有盡故。則知無退。知盡後際。

無斷絕故。則知無壞。知如來智無有對故。則知無二。知平等觀察爲無爲故。則知一切眾生皆得饒益。本願迴向。自在滿足故。

第三結成益中有十一句。各別結上十門。以九。十。二句。結第九門。故有十一。一多因出現故。二廣故。難受。三無生故。無從。四非心識故。思必發狂。五如空故。惑見雙忘。六平等無我故。一味。七由無盡故。諸乘變化。八後際無斷故。佛種不斷。九無對。卽無礙慧。十爲無爲平等。卽攝三輪歸無礙慧。十一本爲眾生故。令利益滿足。

爾時普賢菩薩摩訶薩。欲重明此義。而說頌言。

十力大雄最無上

譬如虛空無等等

境界廣大不可量

功德第一超世間

第二偈頌三十七頌分三。初十四頌歎深許說。次二十二頌頌上十喻。後一頌結說無盡。不頌上文。今初分二。前十一頌歎深難量。後三頌誠聽許說。今初亦二。初偈總歎。頌前標告不思議言。後十別歎。卽次第頌前總結十一句。亦第九偈頌九。十二句。結旣結喻。今此亦卽通頌前喻。喻則性相雙明。此中多約性說。古稱性起。彌復有由。

三十一
十力功德無邊量

三十一
心意思量所不及

人中師子一法門

眾生億劫莫能知

一無邊量。卽無量義。

十方國土碎爲塵

或有算計知其數

如來一毛功德量

千萬億劫無能說

一。一毛叵量。卽廣大義。

如人持尺量虛空

復有隨行計其數

虛空邊際不可得

如來境界亦如是

三。空際叵得。卽無生義。唯此第三偈似頌第五如

空。第六偈似頌第三無生滅。然取義不同。故皆案

次。

或有能於刹那頃

悉知三世眾生心

設經眾生數等劫

不能知佛一念性

四不能知者。離心識故

譬如法界徧一切

不可見取爲一切

十力境界亦復然

徧於一切非一切

五徧於一切非一切者。卽如空義。

真如離妄恆寂靜

無生無滅普周徧

諸佛境界亦復然

體性平等不增減

六體性平等。卽平等無我義。

譬如實際而非際

普在三世亦非普

導師境界亦如是

徧於三世皆無礙

七前徧諸刹。此徧三世。文綺互耳。

法性無作無變易

猶如虛空本清淨

諸佛性淨亦如是

本性非性離有無

八無變易故盡後際。

法性不在於言論

無說離說恆寂滅

十力境界性亦然

一切文辭莫能辯

九離言說故無二無對。

了知諸法性寂滅

如鳥飛空無有跡

以本願力現色身

令見如來大神變

十本願現身故能成益。

若有欲知佛境界

當淨其意如虛空

遠離妄想及諸取

令心所向皆無礙

是故佛子應善聽

我以少譬明佛境

十力功德不可量

爲悟眾生今略說

導師所現於身業

語業心業諸境界

轉妙法輪般涅槃

一切善根我今說

第二誡聽許說中分二。初一誡聽勸修淨意如空

總以喻顯。下二句別顯。一離妄取。如彼淨空無雲

三三
三二
三
翳故斯卽真止。二觸境無滯。如彼淨空無障礙故。斯卽真觀。此觀不作意以照境。則所照無涯。此止體性離而息妄。故諸取皆寂。若斯則不滯不瑩而自淨矣。無淨之淨。則暗蹈佛境界矣。此爲心要。請後學思行。後二句許說分齊。於中初半偈結前生後。後偈半。正示分齊。牒舉十門。略無行者。二業攝故。闕正覺者。導師中攝。或復略無。

譬如世界初安立

非一因緣而可成

無量方便諸因緣

成此三千大千界

如來出現亦如是

無量功德乃得成

剎塵心念尙可知

十力生因莫能測

譬如劫初雲澍雨

而起四種大風輪

眾生善根菩薩力

成此三千各安住

十力法雲亦如是

起智風輪清淨意

昔所迴向諸眾生

普導令成無上果

如有大雨名洪澍

無有處所能容受

唯除世界將成時

清淨虛空大風力

如來出現亦如是

普雨法雨充法界

一切劣意無能持

唯除清淨廣大心

譬如空中澍大雨

無所從來無所去

作者受者悉亦無

自然如是普充洽

十力法雨亦如是

無去無來無造作

本行爲因菩薩力

一切大心咸聽受

譬如空雲澍大雨

一切無能數其滴

唯除三千自在王

具功德力悉明了

善逝法雨亦如是

一切眾生莫能測

唯除於世自在人

明見如觀掌中寶

譬如空雲澍大雨

能滅能起亦能斷

一切珍寶悉能成

三千所有皆分別

十力法雨亦如是

滅惑起善斷諸見

一切智寶皆使成

眾生心樂悉分別

譬如空中雨一味

隨其所雨各不同

豈彼雨性有分別

然隨物異法如是

如來法雨非一異

平等寂靜離分別

然隨所化種種殊

自然如是無邊相

譬如世界初成時

先成色界天宮殿

次及欲天次人處

乾闥婆宮最後成

如來出現亦如是

先起無邊菩薩行

次化樂寂諸緣覺

次聲聞眾後眾生

諸天初見蓮華瑞

知佛當出生歡喜

水緣風力起世間

宮殿山川悉成立

如來宿善大光明

巧別菩薩與其記

所有智輪體皆淨

各能開示諸佛法

譬如樹林依地有

地依於水得不壞

水輪依風風依空

而其虛空無所依

一切佛法依慈悲

慈悲復依方便立

方便依智智依慧

無礙慧身無所依

譬如世界既成立

一切眾生獲其利

地水所住及空居

二足四足皆蒙益

法王出現亦如是

一切眾生獲其利

若有見聞及親近 悉使滅除諸惑惱

第二頌前十喻。卽爲十段。初喻四頌。以是總故。餘九各二。今初文二。前二頌總顯多緣。後二頌別顯緣相。其第九喻合云方便依智者。智卽頌前出現。然初無礙慧是佛實智。中二皆權。於中智卽知事方便隨機。合上卽權實無礙。對初卽悲智雙遊。

如來出現法無邊 世間迷惑莫能知

爲欲開悟諸含識 無譬喻中說其譬

三結說無盡。

佛子諸菩薩摩訶薩應云何見如來應正等覺身。

第二別答出現九門。先明身業。後八依故。長行中
二。先標舉。

佛子。諸菩薩摩訶薩。應於無量處見如來身。何以故。
諸菩薩摩訶薩。不應於一法一事一身一國土一眾
生。見於如來。應徧一切處見於如來。

後釋相。於中三。初就法總明。次約喻別顯。後就法
總結。然總中五徧。通喻中十身。結中十句。別結十
喻。亦同前出現。今初有四。一總教廣見。二何以故。
徵其所由。三諸菩薩下。反釋所以。四應徧一切下。
順以結酬。就反釋中。總舉五法。法是所知法界及

調伏法。事是調伏。眾生行事故。音經名行。身卽是正。國土是依。生是所化。四順結中。應翻上五。成五無量界。身爲能徧。四爲所徧。一徧法界。二徧調伏界。三徧調伏加行界。四徧世界。五徧眾生界。唯有五界非是略也。第二佛子。譬如如下。約喻別顯中。明如來出現有十種身。一周徧十方身。二無著無礙身。三普入成益身。四平等隨應身。五無生潛益身。六圓迴等住身。七無心普應身。八窮盡後際身。九嚴利益生身。十嚴好滿願身。此卽八地十身。而爲次不同。一法身。二智身。三威勢。四菩提。五莊嚴。六

意生。七化。八力持。九福德。十願。四是菩提者。初成
先照故。偈云。日月出現故。五莊嚴者。一一毛孔隨
好光明。以莊嚴故。餘文並顯。顯此十身。舉十喻。況
一一喻中。文各有三。謂喻。合。結。

佛子。譬如虛空。徧至一切色。非色處。非至非不至。何
以故。虛空無身故。如來身亦如是。徧一切處。徧一切
眾生。徧一切法。徧一切國土。非至非不至。何以故。如
來身無身。故爲眾生故。示現其身。佛子。是爲如來身
第一相。諸菩薩摩訶薩。應如是見。

今初虛空周徧喻。況周徧十方身。故下結云。以其

心無量徧十方故。喻中先直示。後徵釋。徵云。至不至別。何得俱耶。以一無身釋上二義。由無身故。無可得至。亦以無故。無所不至。如色中空。空若有身。身卽質聚。使礙於色。如鐵入水。水不入鐵。今由無身故。徧入色中。法準喻知。此以事空以況理空。理空卽是法身。故經偈云。佛以法爲身。清淨如虛空。故爲眾生下。此釋外疑。

復次佛子。譬如虛空寬廣非色。而能顯現一切諸色。而彼虛空無有分別。亦無戲論。如來身亦復如是。以智光明普照明故。令一切眾生世出世間諸善根業。

皆得成就。而如來身無有分別。亦無戲論。何以故。從本已來一切執著。一切戲論皆永斷故。佛子。是爲如來身第二相。諸菩薩摩訶薩應如是見。

第二空無分別喻。況無著無礙身。故結云。所行無礙如虛空故。空無分別。不礙顯色。智無分別。不礙利生。

復次佛子。譬如日出於閻浮提無量眾生。皆得饒益。所謂破闇作明。變溼令燥。生長草木。成熟穀稼。廓徹虛空。開敷蓮華。行者見道。居者辦業。何以故。日輪普放無量光故。佛子。如來智日。亦復如是以無量事普

益眾生。所謂滅惡生善。破愚爲智。大慈救護。大悲度脫。令其增長根力覺分。令生深信。捨離濁心。令得見聞不壞因果。令得天眼。見歿生處。令心無礙。不壞善根。令智修明。開敷覺華。令其發心成就本行。何以故。如來廣大智慧日身。放無量光。普照耀故。佛子。是爲如來身第三相。諸菩薩摩訶薩。應如是見。

第三日光饒益喻。喻普入成益身。普入法界故。喻合皆有總別釋成。合中別內有十種益。合前八句。初二合初句。世出世異故。三拔四流之苦。與出世之樂。拯二乘沉定水之苦。與菩提樂。皆變溼令燥。

三十一
三十一
之義。四道品通長。三乘草木。五信有二義。一成上
義。信能增長一切法故。二合成熟。信能必到如來
地故。六七二句。合廓徹虛空。一得見聞四諦因果
智。二得三明十力智。如空有日。廓淨照徹故。八有
二義。令心無礙。成上徹空。不壞善根。成下蓮華。如
赤蓮華。不遇日光。翳死無疑。三乘善根。若遇智日。
則便不壞。九正合開華。上已開不壞。今未開。令開
十合後二句。發菩提心。卽見大道。成就本行。是辦
家業。

復次佛子。譬如日出。於閻浮提。先照一切須彌山等

諸大山王。次照黑山。次照高原。然後普照一切大地。日不作念。我先照此。後照於彼。但以山地有高下故。照有先後。如來應正等覺。亦復如是。成就無邊法界。智輪常放無礙智慧光明。先照菩薩摩訶薩等諸大山王。次照緣覺。次照聲聞。次照決定善根眾生。隨其心器。示廣大智。然後普照一切眾生。乃至邪定。亦皆普及。爲作未來利益因緣。令成熟故。而彼如來大智日光。不作是念。我當先照菩薩大行。乃至後照邪定眾生。但放光明平等普照。無礙無障。無所分別。

第四日光等照喻。喻平等隨應身。由住真際故。無

私平等。文中二。先正喻。後重舉釋疑。前中黑山喻緣覺者。無法空之光故。不出功德故。不同菩薩。十大山王。表十地故。高原喻聲聞者。不生佛法蓮華故。大地一種。通含三聚。取決定生處。喻正定聚。得緣方生。喻不定聚。砂鹵等地。喻邪定聚。然亦不捨故。皆等照。

佛子。譬如日月。隨時出現。大山幽谷。普照無私。如來智慧。亦復如是。普照一切。無有分別。隨諸眾生根欲不同。智慧光明。種種有異。佛子。是爲如來身第四相。諸菩薩摩訶薩。應如是見。

後釋疑云。日光是一。佛智萬殊。豈爲同喻。釋云。豈不向說。但隨山地有高下耶。故知但隨眾生智慧不同。佛無私智。無若干也。未違前喻。又旣約機說。異照高未能兼下。照下而猶照高。又若捨化。先捨於小。次捨於中。唯菩薩高山。盡日蒙照。思之。

復次佛子。譬如日。出生盲眾。生無眼根。故未曾得見。雖未曾見。然爲日光之所饒益。何以故。因此得知晝夜時節。受用種種衣服飲食。令身調適。離眾患故。

第五日。益生盲喻。喻佛無生。潛益身。有目者。覩。非是獨爲生盲不見。亦未曾滅。以潛益故。

如來智日亦復如是。無信無解。毀戒毀見。邪命自活。生盲之類。無信眼故。不見諸佛智慧日輪。雖不見佛。智慧日輪亦爲智日之所饒益。何以故。以佛威力。令彼眾生所有身苦。及諸煩惱未來苦因。皆消滅故。

合中二。先略後廣。略中五事。皆盲而無信爲總。故云無信眼故。此卽涅槃闡提三罪。無信斷善。卽一闡提。無解毀見。卽謗方等。毀戒邪命。卽犯四重禁。作五逆罪。此四至惡。猶有佛性。亦爲饒益。令離苦集。

佛子。如來有光明。名積集一切功德。有光明名普照。

一切。有光明名清淨自在照。有光明名出大妙音。有光明名普解一切語言法。令他歡喜。有光明名示現永斷一切疑自在境界。有光明名無住智自在普照。有光明名永斷一切戲論自在智。有光明名隨所應出妙音聲。有光明名出清淨自在音。莊嚴國土。成熟眾生。佛子。如來一一毛孔。放如是等千種光明。五百光明普照下方。五百光明普照上方。種種刹中。種種佛所。諸菩薩眾。

後廣顯中二。先能益光。後所益眾。今初二。先列十光。後結分齊。今初十中。初三成二莊嚴慧。中二句。

一普照事。一照淨理。次三成三慧。初二成聞慧。後
一成思修。後四成四智。大圓鏡智。無住普照故。平
等性智。絕戲論故。妙觀察智。隨應演故。成所作智。
嚴土化生故。佛子下結數分齊。以日有千光。故結
云千。實乃無數。五百照下者。五位自分行。五百照
上者。五位勝進行。

其菩薩等。見此光明。一時皆得如來境界。十頭十眼
十耳十鼻十舌十身十手十足十地十智。皆悉清淨。
彼諸菩薩先所成就諸處諸地。見彼光明。轉更清淨。
一切善根。皆悉成熟。趣一切智。住二乘者。滅一切垢。

其餘一分生盲眾生。身既快樂。心亦清淨。柔軟調伏。堪修念智。

二所益中有四。初益菩薩。二益二乘。三益生盲。四益惡趣。菩薩有二種益。一益圓機。頓證佛境。二益權機。令熟趣實。諸處謂五眼等。諸地謂種性地等。地獄餓鬼畜生諸趣。所有眾生。皆得快樂。解脫眾苦。命終皆生天上人間。佛子。彼諸眾生。不覺不知。以何因緣。以何神力。而來生此。彼生盲者。作如是念。我是梵天。我是梵化。是時如來住普自在三昧。出六十種妙音而告之言。汝等非是梵天。亦非梵化。亦非帝釋。

護世所作。皆是如來威神之力。彼諸眾生聞是語已。以佛神力。皆知宿命。生大歡喜。心歡喜故。自然而出。優曇華雲。香雲。音樂雲。衣雲。蓋雲。幢雲。旛雲。末香雲。寶雲。師子幢。半月樓閣雲。歌詠讚歎雲。種種莊嚴雲。皆以尊重心供養如來。何以故。此諸眾生得淨眼故。如來與彼授阿耨多羅三藐三菩提記。佛子。如來智日。如是利益生盲眾生。令得善根具足成熟。佛子。是爲如來身第五相。諸菩薩摩訶薩應如是見。

四地獄下。光益惡趣。文有六段。一拔苦與樂。二佛子下。因起邪見。三是時下。慈音示正。四彼諸下。迴

邪報恩。五如來下。佛與授記。六佛子下。結光利益。此中諸益。多同隨好。

復次佛子。譬如月輪有四奇特。未曾有法。何等爲四。一者映蔽一切星宿光明。二者隨逐於時。示現虧盈。三者於閻浮提澄淨水中。影無不現。四者一切見者。皆對目前。而此月輪。無有分別。無有戲論。佛子。如來身月。亦復如是。有四奇特。未曾有法。何等爲四。所謂映蔽一切聲聞。獨覺。學無學眾。隨其所宜。示現壽命。修短不同。而如來身。無有增減。一切世界。淨心眾生。菩提器中。影無不現。一切眾生。有瞻對者。皆謂如來。

唯現我前隨其心樂而爲說法。隨其地位。令得解脫。隨所應化。令見佛身。而如來身無有分別。無有戲論。所作利益。皆得究竟。佛子。是爲如來身第六相。諸菩薩摩訶薩應如是見。

第六月光奇特喻。喻佛圓迴等住身。謂等住三世無增減故。合中四法者。一圓智。二乘。二常身。示延促。三由器見有無。四所見無向背。初及後二。皆圓迴義。菩提器者。堪受菩提之人。觀意生身。若心海澄清。妄念都寂。則真見佛矣。

復次佛子。譬如三千大千世界大梵天王。以少方便。

於大千世界普現其身。一切眾生皆見梵王現在已前。而此梵王亦不分身。無種種身。佛子。諸佛如來亦復如是。無有分別。無有戲論。亦不分身。無種種身。而隨一切眾生心樂。示現其身。亦不作念。現若干身。佛子。是爲如來身第七相。諸菩薩摩訶薩應如是見。

第七梵王普現喻。喻佛無心普應身。不分而徧故。復次佛子。譬如醫王善知眾藥。及諸呪論。閻浮提中諸所有藥用無不盡。復以宿世諸善根力。大明呪力。爲方便故。眾生見者病無不愈。彼大醫王。知命將終。作是念言。我命終後。一切眾生無所依怙。我今宜應

爲現方便。是時醫王合藥塗身。明咒力持。令其終後身不分散。不萎不枯。威儀視聽。與本無別。凡所療治。悉得除瘥。

第八醫王延壽喻。喻佛窮盡後際身。喻中二。先彰現德。後彼大下咒力持身。

佛子。如來應正等覺。無上醫王。亦復如是。於無量百千億那由他劫。鍊治法藥。已得成就。修學一切方便。善巧大明咒力。皆到彼岸。善能除滅一切眾生諸煩惱病。及住壽命經無量劫。其身清淨。無有思慮。無有動用。一切佛事。未嘗休息。眾生見者。諸煩惱病。悉得

消滅。佛子。是爲如來身第八相。諸菩薩摩訶薩應如是見。

次合中亦二。初合現德。於中初合用藥無不盡。次修學下。合咒力爲方便。後善能下。合見者病愈。二及住下。合咒力持身。用前咒藥。持住多劫故。

復次佛子。譬如大海有大摩尼寶。名集一切光明毗盧遮那藏。若有眾生觸其光者。悉同其色。若有見者。眼得清淨。隨彼光明所照之處。兩摩尼寶。名爲安樂。令諸眾生離苦調適。佛子。諸如來身亦復如是。爲大寶聚。一切功德大智慧藏。若有眾生觸佛身寶。智慧

光者。同佛身色。若有見者。法眼清淨。隨彼光明所照之處。令諸眾生離貧窮苦。乃至具足佛菩提樂。佛子。如來法身。無所分別。亦無戲論。而能普爲一切眾生作大佛事。佛子。是爲如來身第九相。諸菩薩摩訶薩應如是見。

第九摩尼利物喻。喻佛嚴刹利生身。兩寶利物。卽嚴刹利故。

復次佛子。譬如大海。有大如意摩尼寶王。名一切世間莊嚴藏。具足成就百萬功德。隨所住處。令諸眾生災患消除。所願滿足。然此如意摩尼寶王。非少福眾

生所能得見。

第十寶王滿願喻。喻佛相嚴滿願身。

如來身如意寶王。亦復如是。名爲能令一切眾生皆悉歡喜。若有見身聞名讚德。悉令永離生死苦患。假使一切世界一切眾生。一時專心欲見如來。悉令得見。所願皆滿。佛子。佛身非是少福眾生所能得見。唯除如來自在神力所應調伏。若有眾生因見佛身。便種善根。乃至成熟。爲成熟故。乃令得見如來身耳。佛子。是爲如來身第十相。諸菩薩摩訶薩。應如是見。

次合中先正合。後佛子佛身下。釋疑於中。初雖合

喻。已是釋疑。謂有疑云。若念皆見。今何不見。故云少福不見。次疑云。亦有貧下薄福。何以得見。釋云。除可調伏。

以其心無量徧十方故。所行無礙如虛空故。普入法界故。住真實際故。無生無滅故。等住三世故。永離一切分別故。住盡後際誓願故。嚴淨一切世界故。莊嚴一一佛身故。

第三就法總結。十句次第結前十身。

爾時普賢菩薩摩訶薩欲重明此義而說頌言。

第二頌中有二十偈。次第頌喻。喻各二偈。

譬如虛空徧十方

若色非色有非有

三世眾生身國土

如是普在無邊際

諸佛真身亦如是

一切法界無不徧

不可得見不可取

爲化眾生而現形

初虛空周徧喻。

譬如虛空不可取

普使眾生造眾業

不念我今何所作

云何我作爲誰作

諸佛身業亦如是

普使羣生修善法

如來未曾有分別

我今於彼種種作

二空無分別喻。

譬如日出闍浮提

光明破闇悉無餘

山樹池蓮地眾物

種種品類皆蒙益

諸佛日出亦如是

生長人天眾善行

永除癡闇得智明

恆受尊榮一切樂

三日光饒益喻。

譬如日光出現時

先照山王次餘山

後照高原及大地

而日未始有分別

善逝光明亦如是

先照菩薩次緣覺

後照聲聞及眾生

而佛本來無動念

四日光等照喻。

譬如生盲不見日

日光亦爲作饒益

令知時節受飲食

永離眾患身安隱

無信眾生不見佛

而佛亦爲興義利

聞名及以觸光明

因此乃至得菩提

五日益生盲喻。

譬如淨月在虛空

能蔽眾星示盈缺

一切水中皆現影

諸有觀瞻悉對前

如來淨月亦復然

能蔽餘乘示修短

普現天人淨心水

一切皆謂對其前

六月光奇特喻。

譬如梵王住自宮

普現三千諸梵處

一切人天咸得見

實不分身向於彼

諸佛現身亦如是

一切十方無不徧

其身無數不可稱

亦不分身不分別

七梵王普現喻。

如有醫王善方術

若有見者病皆愈

命雖已盡藥塗身

令其作務悉如初

最勝醫王亦如是

具足方便一切智

以昔妙行現佛身

眾生見者煩惱滅

八醫王延壽喻。

譬如海中有寶王

普出無量諸光明

眾生觸者同其色

若有見者眼清淨

最勝寶王亦如是

觸其光者悉同色

若有得見五眼開

破諸塵闇住佛地

九摩尼利物喻

譬如如意摩尼寶

隨有所求皆滿足

少福眾生不能見

非是寶王有分別

善逝寶王亦如是

悉滿所求諸欲樂

無信眾生不見佛

非是善逝心棄捨

十寶王滿願喻。

大方廣佛華嚴經綱要卷第五十

大方廣佛華嚴經綱要卷第五十一

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

如來出現品第三十七之二

佛子。菩薩摩訶薩應云何知如來應正等覺音聲。佛子。菩薩摩訶薩應知如來音聲徧至。普徧無量諸音聲。故應知如來音聲隨其心樂。皆令歡喜。說法明了。故應知如來音聲隨其信解。皆令歡喜。心得清涼。故應知如來音聲化不失時。所應聞者無不聞。故應知

如來音聲無生滅。如呼響故。應知如來音聲無主。修習一切業所起故。應知如來音聲甚深。難可度量故。應知如來音聲無邪曲。法界所生故。應知如來音聲無斷絕。普入法界故。應知如來音聲無變易。至於究竟故。

第三出現語業。長行有標釋結。釋中三。初就法略說。二約喻廣說。三以法通結。文有十音以顯無盡。各上句標。下句釋。一普徧者。卽隨類音。然有二義。一約體廣。無聲不至。故云普徧。無量音聲。斯則人天等異。萬類齊聞。上云眾生隨類各得解。二者隨

前一之音。皆能獨徧。如目連不究其邊。一隨樂欲音。謂趣舉。一類音。能隨樂欲說種種法。上經云。如來於一語言中。演說無邊契經海。又云。佛以一妙音。周聞十方國。眾音悉具足。法雨皆充徧。通證前之二義。三隨根解音。謂卽上說中隨說一法。大小各聞。故云隨其信解。寶積云。佛以一音演說法。眾各隨所解。四隨時音。謂卽上大小之法。令聞不聞。皆自在。故云不失時。又兼隨聞一法。欣憂不同。寶積云。或有恐畏。或歡喜。上四多約卽體之用。是圓音義。後六多約卽用之體。顯一音義。謂

五外隨緣叩。我無生滅。六內集緣成。何有主宰。七甚深者。欲言其一。則萬類殊應。欲言其異。一體無生。又欲言其一。隨一音中能具多音。故上云一切眾生語言法。一言演說盡無餘。欲言其異。卽上多音。唯令聞一。故下喻云。譬如天鼓發種種聲。懈怠諸天。唯聞無常覺悟之音。故甚深也。八純稱法界。九橫入無斷。十豎歸一極。此十圓融一味。是如來圓音。是知或謂無聲。隨叩發響。或謂唯一直聲。無宮商等異。皆大地之一塵耳。

佛子。菩薩摩訶薩。應知如來音聲。非量非無量。非主

非無主。非示非無示。

第二約喻廣說中三。初結前生後。次徵後釋。今初收上十聲。要不出三。約相則廣無量。約體則無主宰。約用則有顯示。今並雙非以顯中道。謂莫窮其邊。故非量。隨機隨時有聞不聞。故非無量。多緣集。故非有主。純一法界生。故非無主。當體無生。故無能示。巧顯義理。故非無示。更以四句明體用無礙。謂一以用從體。由體無不在。故能令上十類皆徧一切。非唯徧聲。亦徧一切時處。眾生如來法界等。雖復於色等皆徧。恆不雜亂。若不等徧。則音非圓。

若由等徧失其音曲。則圓非音。今不壞曲而等徧。不動變而差韻。方成圓音。二以體從用。其一音皆具含真性。三用卽體故。上十類聲。皆不可得。唯等一義。永離所執。故法螺恆震。妙音常寂。名寂靜音。如空谷響。有而卽虛。若不卽虛。非但失於一音。亦不得圓融自在。四體卽用。故寂而恆宣。若天鼓無心而應一切。長風隨竅萬吹不同。若不徧同。非但失於能圓。亦非真一。梵音隨緣自在。名爲如來圓音妙音。非是心識思量境界。

何以故。佛子。譬如世界將欲壞時。無主無作。法爾而

出四種音聲。其四者何。一曰汝等當知初禪安樂。離諸欲惡。超過欲界。眾生聞已。自然而得成就初禪。捨欲界身。生於梵天。二曰汝等當知二禪安樂。無覺無觀。超於梵天。眾生聞已。自然而得成就二禪。捨梵天身。生光音天。三曰汝等當知三禪安樂。無有過失。超光音天。眾生聞已。自然而得成就三禪。捨光音身。生徧淨天。四曰汝等當知四禪寂靜。超徧淨天。眾生聞已。自然而得成就四禪。捨徧淨身。生廣果天。是爲四佛子。此諸音聲。無主無作。但從眾生諸善業力之所出生。佛子。如來音聲。亦復如是。無主無作。無有分別。

非入非出。但從如來功德法力。出於四種廣大音聲。其四者何。一曰汝等當知一切諸行。皆悉是苦。所謂地獄苦。畜生苦。餓鬼苦。無福德苦。著我我所苦。作諸惡行苦。欲生人天。當種善根。生人天中。離諸難處。眾生聞已。捨離顛倒。修諸善行。離諸難處。生人天中。二曰汝等當知一切諸行。眾苦熾然。如熱鐵丸。諸行無常。是磨滅法。涅槃寂靜。無爲安樂。遠離熾然。消諸熱惱。眾生聞已。勤修善法。於聲聞乘。得隨順音聲。忍。三曰汝等當知聲聞乘者。隨他語解。智慧狹劣。更有上乘名獨覺乘。悟不由師。汝等應學。樂勝道者。聞此音

已捨聲聞道。修獨覺乘。四曰汝等當知。過二乘位。更有勝道。名爲大乘。菩薩所行。順六波羅蜜。不斷菩薩行。不捨菩提心。處無量生死而不疲厭。過於二乘。名爲大乘。第一乘。勝乘。最勝乘。上乘。無上乘。利益一切眾生乘。若有眾生信解廣大。諸根猛利。宿種善根。爲諸如來神力所加。有勝樂欲。希求佛果。聞此音已。發菩提心。佛子。如來音聲。不從身出。不從心出。而能利益無量眾生。佛子。是爲如來音聲第一相。諸菩薩摩訶薩。應如是知。

第二徵意云。前言無量等。今何雙非。第三舉喻廣。

釋其大意云。性相無礙。體用相卽故。約法難顯。寄喻以明。十喻卽爲十段。段各有三。謂喻合結。今第一劫盡唱聲喻。喻前第六無主。喻中言法爾者。俱舍第二云。生無色界有二種因。一因力。謂近習及數習故。二業力。謂上界後報業果欲至故。若生色界則有三因。謂加法爾力。但器壞時。法爾有聲故。然四種音非是一時。初二火劫將壞欲界及初禪時。三卽水災壞二禪時。四卽風災壞三禪時。四聲各別。故非無主。但從緣生。故非有主。合中明佛欲壞生死世間。亦有四聲說五乘法。

復次佛子。譬如呼響。因於山谷。及音聲起。無有形狀。不可覩見。亦無分別。而能隨逐一切語言。如來音聲。亦復如是。無有形狀。不可覩見。非有方所。非無方所。但隨眾生欲解緣出。其性究竟無言無示。不可宣說。佛子。是爲如來音聲第二相。諸菩薩摩訶薩。應如是知。

第二響聲隨緣喻。喻上第五無生。

復次佛子。譬如諸天。有大法鼓。名爲覺悟。若諸天子。行放逸時。於虛空中。出聲告言。汝等當知一切欲樂。皆悉無常。虛妄顛倒。須臾變壞。但誑愚夫。令其戀著。

汝莫放逸。若放逸者。墮諸惡趣。後悔無及。放逸諸天。聞此音已。生大憂怖。捨自宮中。所有欲樂。詣天王所。求法行道。佛子。彼天鼓音。無主無作。無起無滅。而能利益無量眾生。當知如來亦復如是。爲欲覺悟放逸眾生。出於無量妙法音聲。所謂無著聲。不放逸聲。無常聲。苦聲。無我聲。不淨聲。寂滅聲。涅槃聲。無有量自然智聲。不可壞菩薩行聲。至一切處。如來無功用智地聲。以此音聲。徧法界中。而開悟之。無數眾生聞是音已。皆生歡喜。勤修善法。各於自乘。而求出離。所謂或修聲聞乘。或修獨覺乘。或習菩薩無上大乘。而如

來音。不住方所。無有言說。佛子。是爲如來音聲第三相。諸菩薩摩訶薩應如是知。

第三天鼓開覺喻。喻第九無斷絕聲。徧入法界。化無斷故。譬合各三。一能開覺。二開覺益。三結用歸體。二當知下。合中三者。初合能開覺。別有十一聲。義分四節。而有二意。一初二通五乘。次六通三乘。次一通第一第二乘。後二唯大乘。二者初一節人天。餘三節配三乘。次無數下。合開覺益。後而如來下。合結歸體。由不住方等。故上能普徧。是以莊嚴論云。若佛音聲。是有法非法者。不能徧至十方。

反此故能。

復次佛子。譬如自在天王。有天綵女。名曰善口。於其口中。出一音聲。其聲則與百千種樂而共相應。一一樂中。復有百千差別音聲。佛子。彼善口女。從口一聲。出於如是無量音聲。當知如來亦復如是。於一音中。出無量聲。隨諸眾生心樂差別。皆悉徧至。悉令得解。佛子。是爲如來音聲第四相。諸菩薩摩訶薩。應如是知。

第四天女妙聲喻。喻第三隨信解聲。多音隨樂故。復次佛子。譬如大梵天王。住於梵宮。出梵音聲。一切

梵眾。靡不皆聞。而彼音聲不出眾外。諸梵天眾。咸生是念。大梵天王。獨與我語。如來妙音。亦復如是。道場眾會。靡不皆聞。而其音聲不出眾外。何以故。根未熟者。不應聞故。其聞音者。皆作是念。如來世尊。獨爲我說。佛子。如來音聲。無出無住。而能成就一切事業。是爲如來音聲第五相。諸菩薩摩訶薩。應如是知。

第五梵音及眾喻。喻化不失時。熟者必聞。卽以根熟爲眾。

復次佛子。譬如眾水。皆同一味。隨器異故。水有差別。水無念慮。亦無分別。如來言音。亦復如是。唯是一味。

謂解脫味。隨諸眾生心器異故。無量差別。而無念慮。亦無分別。佛子。是爲如來音聲第六相。諸菩薩摩訶薩。應如是知。

第六眾水一味喻。喻無邪曲聲。從法界生。一體性故。

復次佛子。譬如阿那婆達多龍王。興大密雲。徧閻浮提。普霑甘雨。百穀苗稼。皆得生長。江河泉池。一切盈滿。此大雨水。不從龍王身心中出。而能種種饒益眾生。佛子。如來應正等覺。亦復如是。興大悲雲。徧十方界。普雨無上甘露法雨。令一切眾生皆生歡喜。增長。

善法。滿足諸乘。佛子。如來音聲。不從外來。不從內出。而能饒益一切眾生。是爲如來音聲第七相。諸菩薩摩訶薩。應如是知。

第七降雨滋榮喻。喻歡喜聲。稱根增長故。離佛無聲。不從外來。離機無聲。不從內出。

復次佛子。譬如摩那斯龍王。將欲降雨。未便卽降。先起大雲。彌覆虛空。凝停七日。待諸眾生作務究竟。何以故。彼大龍王有慈悲心。不欲惱亂諸眾生故。過七日已。降微細雨。普潤大地。佛子。如來應正等覺亦復如是。將降法雨。未便卽降。先興法雲。成熟眾生。爲欲

令其心無驚怖。待其熟已。然後普降甘露法雨。演說甚深微妙善法。漸次令其滿足。如來一切智智無上法味。佛子。是爲如來音聲第八相。諸菩薩摩訶薩應如是知。

第八漸降成熟喻。喻無變聲。以皆至究竟故。上先照高山以顯頓圓。此先小後大。卽是漸圓。將降法雨者。思欲說一也。未便卽降者。恐破法墮惡道故。先興法雲。是說方便。方便含實。如雲含水。

復次佛子。譬如海中有大龍王。名大莊嚴。於大海中降雨之時。或降十種莊嚴雨。或百或千。或百千種莊

嚴雨。佛子。水無分別。但以龍王不思議力。令其莊嚴。乃至百千無量差別。如來應正等覺亦復如是。爲諸眾生說法之時。或以十種差別音說。或百。或千。或以百千。或以八萬四千音聲。說八萬四千行。乃至或以無量百千億那由他音聲。各別說法。令其聞者皆生歡喜。如來音聲無所分別。但以諸佛於甚深法界圓滿清淨。能隨眾生根之所宜。出種種言音。皆令歡喜。佛子。是爲如來音聲第九相。諸菩薩摩訶薩應如是知。

第九降。霑難思喻。喻上甚深聲。雖多差別。皆於甚

深法界之所流故。

復次佛子。譬如娑竭羅龍王。欲現龍王大自在力。饒益眾生。咸令歡喜。

第十徧降種種喻。喻普徧聲。非唯普徧四洲。亦徧出多雷音。喻中有總別結。

從四天下。乃至他化自在天處。與大雲網。周而彌覆。其雲色。相無量差別。或閻浮檀金光明色。或毗瑠璃光明色。或白銀光明色。或玻瓈光明色。或牟薩羅光明色。或碼碯光明色。或勝藏光明色。或赤真珠光明色。或無量香光明色。或無垢衣光明色。或清淨水光

明色。或種種莊嚴具光明色。如是雲網周而彌布。既
彌布已。出種種色電光。所謂閻浮檀金色雲。出琉璃
色電光。瑠璃色雲。出金色電光。銀色雲。出玻瓈色電
光。玻瓈色雲。出銀色電光。牟薩羅色雲。出瑪瑙色電
光。碼碯色雲。出牟薩羅色電光。勝藏寶色雲。出赤真
珠色電光。赤真珠色雲。出勝藏寶色電光。無量香色
雲。出無垢衣色電光。無垢衣色雲。出無量香色電光。
清淨水色雲。出種種莊嚴具色電光。種種莊嚴具色
雲。出清淨水色電光。乃至種種色雲。出一色電光。一
色雲。出種種色電光。復於彼雲中。出種種雷聲。隨眾

生心。皆令歡喜。所謂或如天女歌詠音。或如諸天妓樂音。或如龍女歌詠音。或如乾闥婆女歌詠音。或如緊那羅女歌詠音。或如大地震動聲。或如海水波潮聲。或如獸王哮吼聲。或如好鳥鳴轉聲。及餘無量種種音聲。既震雷已。復起涼風。令諸眾生心生悅樂。然後乃降種種諸雨。利益安樂無量眾生。從他化天至於地上。於一切處所雨不同。所謂於大海中。雨清冷水。名無斷絕。於他化自在天。雨簫笛等種種樂音。名爲美妙。於化樂天。雨大摩尼寶。名放大光明。於兜率天。雨大莊嚴具。名爲垂髻。於夜摩天。雨大妙華。名種

種莊嚴具。於三十三天。雨眾妙香。名爲悅意。於四天
王天。雨天寶衣。名爲覆蓋。於龍王宮。雨赤真珠。名涌
出光明。於阿修羅宮。雨諸兵仗。名降伏怨敵。於北鬱
單越。雨種種華。名曰開敷。餘三天下。悉亦如是。然各
隨其處。所雨不同。

從四天下。別中有五。一雲。二電。三雷。四風。五雨。此
與賢首品文有影略。思之。

雖彼龍王。其心平等。無有彼此。但以眾生善根異故。
雨有差別。

後結喻。

佛子。如來應正等覺無上法王。亦復如是。欲以正法教化眾生。先布身雲。彌覆法界。隨其樂欲。爲現不同。所謂或爲眾生現生身雲。或爲眾生現化身雲。或爲眾生現力持身雲。或爲眾生現色身雲。或爲眾生現相好身雲。或爲眾生現福德身雲。或爲眾生現智慧身雲。或爲眾生現諸力不可壞身雲。或爲眾生現無畏身雲。或爲眾生現法界身雲。

合中亦有總別結。別中亦有五。前四各有佛子。一以身合雲。有覆陰等故。卽菩提等十身。中有四身。名異義同。一卽願身。願生兜率故。第四卽意生身。

隨意所生。同世色故。八卽菩提身。具佛十力。成菩提故。九卽威勢。具四無畏。能伏外故。亦可十力降魔爲威勢。無畏爲正覺。有正覺義故。餘六名義俱同。

佛子。如來以如是等無量身。雲普覆十方一切世界。隨諸眾生所樂各別。示現種種光明電光。所謂或爲眾生現光明電光。名無所不至。或爲眾生現光明電光。名無邊光明。或爲眾生現光明電光。名入佛祕密法。或爲眾生現光明電光。名影現光明。或爲眾生現光明電光。名光明照耀。或爲眾生現光明電光。名入

無盡陀羅尼門。或爲眾生現光明電光。名正念不亂。或爲眾生現光明電光。名究竟不壞。或爲眾生現光明電光。名順入諸趣。或爲眾生現光明電光。名滿一切願。皆令歡喜。

第二合電光不出通明無畏。

佛子。如來應正等覺。現如是等無量光明電光已。復隨眾生心之所樂。出生無量三昧雷聲。所謂善覺智三昧雷聲。熾然離垢海三昧雷聲。一切法自在三昧雷聲。金剛輪三昧雷聲。須彌山幢三昧雷聲。海印三昧雷聲。日燈三昧雷聲。無盡藏三昧雷聲。不壞解脫

力三昧雷聲。

第三以三昧合雷聲者。略有三義。一若秋之雷。蟄蟲藏匿。若入三昧。諸惡不行。二若春之雷。則發蟄開萌。猶彼三昧發生功德。三雷是雨之先相。三昧是說之先兆。十名思而釋之。

佛子。如來身雲中出。如是等無量差別三昧雷聲已。將降法雨。先現瑞相。開悟眾生。所謂從無障礙大慈悲心。現於如來大智風輪。名能令一切眾生。生不思議歡喜適悅。

第四以大智合風者。以後得智觀機警覺。加被令

成法器故。

此相現已。一切菩薩及諸眾生身之與心。皆得清涼。然後從如來大法身雲。大慈悲雲。大不思議雲。雨不思議廣大法雨。令一切眾生身心清淨。所謂爲坐菩提場菩薩雨大法雨。名法界無差別。爲最後身菩薩雨大法雨。名菩薩遊戲如來祕密教。爲一生所繫菩薩雨大法雨。名清淨普光明。爲灌頂菩薩雨大法雨。名如來莊嚴具所莊嚴。爲得忍菩薩雨大法雨。名功德寶智慧華開敷。不斷菩薩大悲行。爲住向行菩薩雨大法雨。名入現前變化甚深門。而行菩薩行無休。

息無疲厭。爲初發心菩薩。雨大法雨。名出生如來大慈悲行。救護眾生。爲求獨覺乘。眾生雨大法雨。名深智緣起法。遠離二邊。得不壞解脫果。爲求聲聞乘。眾生雨大法雨。名以大智慧劍。斷一切煩惱怨。爲積集善根。決定不決定。眾生雨大法雨。名能令成就種種法門。生大歡喜。

第五此相現已下。以說法合雨。於中初結前標後。所謂下別有十法者。一將成正覺。念相欲盡。聞斯法雨。細念都忘。得見心性。等虛空界。法界一相。始本無二。契同諸佛平等法身。故云說法界無差別。

二出胎已後。坐道場前後更無身。故名最後。法雨
名遊戲等者。此有二義。一開爲二。爲遊戲。是神通
大用。祕教卽心智所契。二合爲一。令於祕教出沒
自在。故云遊戲。言祕教者。卽詮如來三德涅槃。
故涅槃經云。祕密藏。安住於此。能建大事。神通作
用。故名遊戲。在法華經以體從用。名如來知見。深
固幽遠。名爲祕密。雖初心同稟。而窮究在斯。故亦
爲說。三一生所繫者。謂如彌勒。更一下生故。所以
更一生者。由微細無明。能障所知。故今爲說。令淨
彼細惑。成種智普照。上三皆等覺位。四灌頂菩薩。

卽十地受職位。十方諸佛法水灌頂。墜在佛數。能受如來大法雲雨。令具佛功德智慧。廣作佛事爲莊嚴故。五得忍菩薩。若取忍淨。入地已上。將止此忍。勸滿福智。不斷悲故。若取初得。有說初地卽得爲說信等功德。後後圓淨。十地地智。一一開發。不斷二利故。六住向行三。卽三賢位。令其入證。真如現前。依此變化。爲甚深門。而勝進不息。七初發心者。通信初發心。及信滿發心。旣發上求下化之心。令依願行故。上皆已得本位。故並爲說勝進上位之法。此下八九二門。通有二義。一約初求顯說說

其自乘。二約已住密說。密授大乘。如入緣覺中。約自乘說。則因謝非常果續非斷。逆觀非有。順觀非無。爲離二邊。雖離二邊而不壞二乘之果。約密。十。二因緣。卽是中道。中道者名爲佛性。故曰甚深緣起。是爲上上智觀。故得不壞佛解脫果故。九聲聞中二者。一顯說。由彼厭患苦集。故說人空智劍斷之。二約密說。應以法空斷一切惑。故名大劍。十爲二聚眾生。故云集善根者。其邪定聚未堪法雨。未定。令得名爲成熟。已定。令增種種法門。

佛子。諸佛如來隨眾生心。雨如是等廣大法雨。充滿

一切無邊世界。佛子。如來應正等覺。其心平等。於法無吝。但以眾生根欲不同。所雨法雨。示有差別。是爲如來音聲第十相。諸菩薩摩訶薩。應如是知。

三合上結中有二佛子。初合結數。後合心等。以釋外疑。

復次佛子。應知如來音聲有十種無量。何等爲十。所謂如虛空界無量。至一切處故。如法界無量。無所不徧故。如眾生界無量。令一切心喜故。如諸業無量。說其果報故。如煩惱無量。悉令除滅故。如眾生言音無量。隨解令聞故。如眾生欲解無量。普觀救度故。如三

世無量。無有邊際故。如智慧無量。分別一切故。如佛境界無量。入佛法界故。

三通結十喻皆無分量。文顯可知。

佛子。如來應正等覺音聲成就如是等阿僧祇無量。諸菩薩摩訶薩應如是知。

第三總結音聲出現。

爾時普賢菩薩摩訶薩欲重明此義而說頌言。

第二偈頌頌上十喻喻各二頌。

三千世界將壞時 眾生福力聲告言

四禪寂靜無諸苦 令其聞已悉離欲

十力世尊亦如是

出妙音聲徧法界

爲說諸行苦無常

令其永度生死海

初劫盡唱聲喻，

譬如深山大谷中

隨有音聲皆響應

雖能隨逐他言語

而響畢竟無分別

十力言音亦復然

隨其根熟爲示現

令其調伏生歡喜

不念我今能演說

二響聲隨緣喻。

如天有鼓名能覺

常於空中震法音

誠彼放逸諸天子

令其聞已得離著

十力法鼓亦如是

出於種種妙音聲

覺悟一切諸羣生

令其悉證菩提果

三天鼓開覺喻。

自在天王有寶女

口中善奏諸音樂

一聲能出百千音

一一音中復百千

善逝音聲亦如是

一聲而出一切音

隨其性欲有差別

各令聞已斷煩惱

四天女妙聲喻。

譬如梵王吐一音

能令梵眾皆歡喜

音唯及梵不出外

一一皆言已獨聞

十力梵王亦復然

演一言音充法界

唯霑眾會不遠出

以無信故未能受

五梵音及眾喻。

譬如眾水同一性

入功德味無差別

因地在器各不同

是故令其種種異

一切智音亦如是

法性一味無分別

隨諸眾生行不同

故使聽聞種種異

六眾水一味喻。

譬如無熱大龍王

降雨普洽閻浮地

能令草樹皆生長

而不從身及心出

諸佛妙音亦如是

普雨法界悉充洽

能令生善滅諸惡

不從內外而得有

七降雨滋榮喻。

譬如摩那斯龍王

興雲七日未先雨

待諸眾生作務竟

然後始降成利益

十力演義亦如是

先化眾生使成熟

然後爲說甚深法

令其聞者不驚怖

八漸降成熟喻。

大莊嚴龍於海中

霍於十種莊嚴雨

或百或千百千種

水雖一味莊嚴別

究竟辯才亦如是

說十二諸法門

或百或千至無量

不生心念有殊別

九降霍難思喻。

量勝龍王娑竭羅

興雲普覆四天下

於一切處雨各別

而彼龍心無二念

諸佛法王亦如是

大悲身雲徧十方

爲諸修行雨各異

而於一切無分別

十徧降種種喻。上出現語業竟。

佛子。諸菩薩摩訶薩應云何知如來應正等覺心。佛子。如來心意識俱不可得。但應以智無量故。知如來

心。

第四出現意業。先身次語。後意義次第故。長行中
二。先徵起。後正釋。釋中三。初約法總辯。二寄喻別
顯。三總結勸知。今初言如來心意識俱不可得者
約體遮詮也。但應以智無量知如來心者。寄用表
詮。然此一文。古有多釋。一師云。識等有二。一染二
淨。佛地無彼有漏染心。心所而有淨分心及心所
果位之中。智強識劣。故於王上以顯染無彼約智
所以明無量。若必無王所依何立。故成唯識第二
引如來莊嚴功德經云。如來無垢識。是淨無漏界。

解脫一切障。圓鏡智相應。則有王明矣。言轉識者。智依識轉。非轉識體。一師云。以無積集思量等義。故說心等叵得。就無分別智。以顯無量。非無心體。故攝論第八云。無分別智所依。非心非思義。故亦非非心爲所依止。心種類故。以心爲因。數習勢力。引得此位。名心種類。上之二解。俱明心意識有。初有淨無染。次有體無用。上乃法相宗。一師云。佛果實無心意意識及餘心法。云不可得。唯有大智。故言智無量。故知如來心。故金光明經及梁攝論皆云。唯如如及如智獨存。佛地論中五法攝大覺。

性。唯一真法及四智菩提。不言更有餘法。此無相宗及法性宗。上之二宗。偏取皆妨。若依前有未免增益。亦不能通。不可得言。又此淨分。此何不說。若依後義。未免損減。亦不能通知佛心言。既云以智無量。知如來心。不言無心。可知明非無心矣。又心既是無。智何獨立。非唯違上二論。亦違涅槃滅無常識。獲常識義。若二義雙收。未免相違。若互泯雙非。寧逃戲論。若爾。何以指南。今釋此義。先會前二宗。後消經意。今初。若後宗言唯如智者。以心卽同真性。故曰唯如。照用不失。故曰如智。豈離心外。

而智別有。如是則唯如不乖於有。前宗以純如之體。故有淨心。心卽是如。有之何失。是知卽真之有。與卽有之真。二義相成。有無無礙。後消經意者。言不可得者。以心意深玄。言不及故。寄遮顯深。言但以智知如來心者。託以心所。寄表顯深。故晉經云。但知如來智無量。故知心無量。云何深玄。欲言其有。同如絕相。若言其無。幽靈不竭。欲言其有。萬累斯亡。欲言其淨。不斷性惡。欲言其一。包含無外。欲言其異。一味難分。欲謂有情。無殊色性。欲謂無情。無幽不徹。口欲辯而詞喪。心將緣而慮亡。亦猶果

分不可說故。是知佛心卽有卽無。卽事卽理。卽王卽數。卽一卽多。心中非有意。亦非不有意。意中非有心。亦非不有心。王中非有數。亦非不有數。數非依於王。亦非不依王。一一皆爾。圓融無礙。則令上諸義各隨一理。不爽玄宗。言寄表顯深者。旣心不可以智知。且託智以稱歎。智是心所。尙以十喻明玄。則所依之心。玄又玄矣。故十喻之末。皆結爲心之相。然佛尙不說。凡何敢思。有因緣故。輒憑教理。以示玄宗。望無咎其繁而不要也。

譬如虛空爲一切物所依。而虛空無所依。如來智慧

亦復如是。爲一切世間出世間智所依。而如來智無所依。佛子。是爲如來心第一相。諸菩薩摩訶薩應如是知。

第二寄喻別顯。舉十大喻以喻如來十種大智。十智體用。非一非異。亦文各有三。謂喻合結。今初虛空無依爲依喻。喻佛無思成事智。合中謂諸乘之智。依佛智生。如十地云。此十地智。皆因佛智而有差別。離佛智外無所依學。而佛智果滿更不依他。豈不依心及依理耶。豈不向言王所無二耶。良以佛智照極。無有智外如爲智所依。故智體全如。若

三三
三三
三三
有所依。不名如智。亦猶淨名云。法隨於如。無所隨。故。文殊般若云。若無境界。則無所依。況佛智外。無法可得。以一切法卽佛智故。

復次佛子。譬如法界。常出一切聲聞。獨覺。菩薩。解脫。而法界無增減。如來智慧亦復如是。恆出一切世間。出世間種種智慧。而如來智無增減。佛子。是爲如來心第二相。諸菩薩摩訶薩。應如是知。

第二法界湛然喻。喻佛體無增減智。卽轉釋前依者。依此出故。雖出諸智。亦不減少。菩薩解脫成。佛智時。亦不增長。以同體均故。

復次佛子。譬如大海其水潛流四天下地及八十億諸小洲中。有穿鑿者無不得水。而彼大海不作分別。我出於水。佛智海水亦復如是。流入一切眾生心中。若諸眾生觀察境界。修習法門。則得智慧清淨明了。而如來智平等無二。無有分別。但隨眾生心行異故。所得智慧各各不同。佛子是爲如來心第三相。諸菩薩摩訶薩應如是知。

第三大海潛益喻。喻佛體均益生智。卽雙釋前依及出生義。謂與眾生心同體故。義曰潛流。穿鑿自心得佛智時。卽是見他佛智。是曰依之出生。又由

同體。令外佛加持。資其念力。亦是流入。

復次佛子。譬如大海有四寶珠。具無量德。能生海內一切珍寶。若大海中無此寶珠。乃至一寶亦不可得。何等爲四。一名積集寶。二名無盡藏。三名遠離熾然。四名具足莊嚴佛子。此四寶珠。一切凡夫諸龍神等。悉不得見。何以故。娑竭龍王以此寶珠。端嚴方正。置於宮中深密處故。

第四大寶出生喻。喻佛用興體密智。釋上能生。以何義故。而能生耶。具四寶故。喻中有三。初總明出處體用。次徵列寶名。後結其深勝。合三同喻。

佛子。如來應正等覺大智慧海。亦復如是。於中有四大智寶珠。具足無量福智功德。由此能生一切眾生聲聞獨覺學無學位。及諸菩薩智慧之寶。何等爲四。所謂無染著巧方便大智慧寶。善分別有爲無爲法大智慧寶。分別說無量法而不壞法性大智慧寶。知時非時未曾誤失大智慧寶。

列名中四智寶約四智菩提。一大圓鏡智。以離諸分別。名無染著。所緣行相微細難知。不忘不愚一切境相名巧方便。二平等性智。觀一切法若爲無爲。自他平等。名善分別。三妙觀察智。此智善觀諸

法自相共相無礙而轉。故說無量法而不壞法性。無量法者。卽攝觀無量總持定門等。而言說者。雨大法雨。斷一切疑故。四卽成所作智。知機知時。作所應作故。

若諸如來大智海中無此四寶。有一眾生得入大乘。終無是處。此四智寶。薄福眾生所不能見。何以故。置於如來深密藏故。

三合前深勝。於中先用勝體深。此中用勝。喻在總中。此中體深。同法華髻中明珠。不妄與人。然約下智不及。故稱密藏。不全同喻。故涅槃中明有密

語而無密藏。

此四智寶。平均正直。端潔妙好。普能利益諸菩薩眾。令其悉得智慧光明。佛子。是爲如來心第四相。諸菩薩摩訶薩。應如是知。

次明體勝用深。平均正直。卽平等性智。大慈悲等。恆共相應。故曰平均。一味相續。名爲正直。一端潔。卽大圓鏡智。端者純淨圓德。現種依持故。潔者性相清淨。離諸雜染故。三妙好。卽妙觀察智。四普能利益。卽成所作智。此約別配。今以四智圓融。故四德亦該四寶。況四智乃十中之一。則永異餘宗。

復次佛子。譬如大海。有四熾然光明大寶。布在其底。性極猛熱。常能飲縮百川所注無量大水。是故大海無有增減。何等爲四。一名日藏。二名離潤。三名火燄光。四名盡無餘佛子。若大海中無此四寶。從四天下乃至有頂。其中所有悉被漂沒。佛子。此日藏大寶光明。照觸海水。悉變爲乳。離潤大寶光明。照觸其乳。悉變爲酪。火燄光大寶光明。照觸其酪。悉變爲酥。盡無餘大寶光明。照觸其酥。變成醍醐。如火熾然。悉盡無餘。

第五珠消海水喻。喻佛滅惑成德智。由有前智無

智不生。由有此智。無惑不斷。又前則橫具四智。此則豎具四智。皆是釋前爲依之義。喻中二。先總明體用。後佛子。此日藏下。別顯用相。此爲極教了說。而起世婆沙等說。阿毗地獄在下。火氣上吞。銷鑠海水。蓋是少分方便之說。而俗典云。以沃焦石消海水者。或測度而知。或見寶不辯。謂之石耳。又云。注尾閭壑者。但見其消。以名之耳。

佛子。如來應正等覺。大智慧海。亦復如是。有四種大智慧寶。具足無量威德光明。此智寶光。觸諸菩薩。乃至令得如來大智。何等爲四。所謂滅一切散善波浪。

大智慧寶。除一切法愛。大智慧寶。慧光普照。大智慧寶。與如來平等無邊無功用。大智慧寶。

合中亦二。先合總明體用。

佛子。諸菩薩修集一切助道法時。起無量散善波浪。一切世間天人阿修羅所不能壞。如來以滅一切散善波浪。大智慧寶光明。觸彼菩薩。令捨一切散善波浪。持心一境。住於三昧。又以除一切法愛。大智慧寶光明。觸彼菩薩。令捨離三昧味著。起廣大神通。又以慧光普照。大智慧寶光明。觸彼菩薩。令捨所起廣大神通。住大明功用行。又以與如來平等無邊無功用。

大智慧寶光明。觸彼菩薩。令捨所起大明功用行。乃至得如來平等地。息一切功用。令無有餘。佛子。若無如來此四智寶。大光照觸。乃至有一菩薩得如來地。無有是處。佛子。是爲如來心第五相。諸菩薩摩訶薩。應如是知。

後合別顯用相。然此四智。古有別配。今標其所成。卽是四定。約能成智。應別立名。豎配諸位。尤異昔解。謂佛以卽事而真智。治於地前。成初四地。令得賢守定。以此三昧。能守世出世間賢善法故。前三地爲世。四地爲出世。旣了卽事而真。則卽散而定。

三摩羅刹要卷五十一
二以卽體之用智。治四地未能起用。令得五地入俗。成集福德王定。三以平等無相智。治五地雖能隨俗。未得平等。令得六七地。般若大光功用。後邊成光明定。四以平等無功用智。治七地功用。令入八地。乃至佛果。得首楞嚴定。所作究竟故。果旣具四。因亦通修。且約相顯。爲此豎配。不可偏局。

復次佛子。如從水際。上至非想非非想天。其中所有大千國土。欲色無色眾生之處。莫不皆依虛空而起。虛空而住。何以故。虛空普徧故。雖彼虛空普容三界。而無分別。佛子。如來智慧亦復如是。若聲聞智。若獨

覺智。若菩薩智。若有爲行智。若無爲行智。一切皆依如來智起。如來智住。何以故。如來智慧徧一切故。雖復普容無量智慧。而無分別。佛子。是爲如來心第六相。諸菩薩摩訶薩。應如是知。

第六虛空含受喻。喻佛依持無礙智。亦釋前依義。上但云依。猶通外依他力。今明體徧普容。是則五乘等智。皆是如來大智中物。肇公亦云。夫聖人心。虛冥照理。無不統懷。六合於胷中。而靈鑒有餘。鏡萬有於方寸。其神常虛。卽斯義也。

復次佛子。如雪山頂。有藥王樹。名無盡根。彼藥樹根。

從十六萬八千由旬下盡金剛地水輪際生。彼藥王樹若生根時。令閻浮提一切樹根生。若生莖時。令閻浮提一切樹莖生。枝葉華果。悉皆如是。此藥王樹。根能生莖。莖能生根。根無有盡。名無盡根。佛子。彼藥王樹。於一切處皆令生長。唯於二處不能爲作生長利益。所謂地獄深坑。及水輪中。然亦於彼初無厭捨。

第七藥王生長喻。喻佛窮劫利樂喻。喻中四。初顯體用。二彼藥根下。別顯用相。三此藥王下。得名所由。四佛子下。揀其非處。先揀後收。收者亦不厭。故晉經云不捨生性。

佛子。如來智慧大藥王樹。亦復如是。以過去所發成
就一切智慧善法。普覆一切諸眾生界。除滅一切諸
惡道苦。廣大悲願而爲其根。於一切如來真實智慧
種性中生。堅固不動。善巧方便以爲其莖。徧法界智
諸波羅密。以爲其枝。禪定解脫諸大三昧。以爲其葉。
總持辯才菩提分法。以爲其華。究竟無變諸佛解脫
以爲其果。

合亦四段。而文不次。初合顯體用有六。以一悲願
菩提合根。此爲諸佛之本。深難拔故。二依實智所
生方便爲莖。能幹事故。菩提體故。三依前一智分

爲諸度。旁蔭爲枝。四戒定息熱。別受業名。五辯才道品等親生菩提。開發爲華。六果可知。

佛子。如來智慧大藥王樹。何故得名爲無盡根。以究竟無休息故。不斷菩薩行故。菩薩行卽如來性。如來性卽菩薩行。是故得名爲無盡根。

次合得名所由。窮未來際。故云究竟無休。得果不捨因。故云不斷菩薩行。由是故得因果交徹。展轉相生。

佛子。如來智慧大藥王樹。其根生時。令一切菩薩。生不捨眾生。大慈悲根。其莖生時。令一切菩薩。增長堅

固精進深心莖。其枝生時。令一切菩薩增長。一切諸波羅密枝。其葉生時。令一切菩薩生長。淨戒頭陀功德少欲知足葉。其華生時。令一切菩薩具諸善根。相好莊嚴華。其果生時。令一切菩薩得無生忍。乃至一切佛灌頂忍果。

三合前別顯用相。深心樂修善行。卽前方便淨戒。亦能息熱。相好如華爲嚴。文多影略者。爲分能所成故。

佛子。如來智慧大藥王樹。唯於二處。不能爲作生長利益。所謂二乘墮於無爲廣大深坑。及壞善根非器。

眾生溺大邪見貪愛之水。然亦於彼曾無厭捨。佛子。如來智慧無有增減。以根善安住。生無休息故。佛子是爲如來心第七相。諸菩薩摩訶薩應如是知。

四合揀非器。亦先揀後收。無爲正位。一墮難出。故喻深坑。又無悲水。取灰斷故。如彼地獄。邪見撥無貪愛浸爛。皆喻於水。不容善根。又闕土緣。非生處故。後收言無厭捨者。上據現惡闕緣。令生厭怖。直進一乘。故除二處。而同有佛性。久久當成。故不厭捨。是知現惡明無。則無惡必有。故涅槃云。一闡提人。雖復斷善。猶有佛性。若能發心。非闡提也。法華

云。決了聲聞法。餘諸聲聞眾。亦當復如是。結云。善根安住者。常住大悲故。有引向所揀。證無佛性及定性義。不觀次後不捨之言。況第十喻平等共有。減損佛性。恐毀謗一乘。願諸後學。當戒慎之。無滯權說。

復次佛子。譬如三千大千世界劫火起時。焚燒一切草木叢林。乃至鐵圍大鐵圍山。皆悉熾然。無有遺餘。佛子。假使有人手執乾草投彼火中。於意云何。得不燒不。答言不也。佛子。彼所投草。容可不燒。如來智慧。分別三世一切眾生。一切國土。一切劫數。一切諸法。

無不知者。若言不知。無有是處。何以故。智慧平等。悉明達故。佛子。是爲如來心第八相。諸菩薩摩訶薩。應如是知。

第八劫火燒盡喻。喻佛智無不盡知。由此佛智更無所依。

復次佛子。譬如風災壞世界時。有大風起。名曰散壞。能壞三千大千世界。鐵圍山等。皆成碎末。復有大風。名爲能障。周匝三千大千世界。障散壞風。不令得至。餘方世界。佛子。若令無此能障大風。十方世界無不壞盡。如來應正等覺。亦復如是。有大智風。名爲能滅。

能滅一切諸大菩薩煩惱習氣。有大智風名爲巧持。巧持其根未熟菩薩。不令能滅大智風輪斷其一切煩惱習氣。佛子。若無如來巧持智風。無量菩薩皆墮聲聞辟支佛地。由此智故。令諸菩薩超二乘地。安住如來究竟之位。佛子。是爲如來心第九相。諸菩薩摩訶薩應如是知。

第九劫風持壞喻。喻佛巧令留惑智。非但能斷。亦復能留。謂佛有斯巧。授與根未熟未具萬行菩薩。令留潤生之惑。由此留惑。惑方至盡。得一切智。不同一乘。不爲菩提。心期速出。

復次佛子。如來智慧無處不至。何以故。無一眾生而不具有如來智慧。

第十塵含經卷喻。喻佛性通平等。文中四。謂法喻合結。今初。所以知佛智徧者。無一眾生不有本覺。與佛體無殊故。以上言潛流。則似佛智徧他眾生。今顯眾生自有。此有三意。一明無一眾生不有。則知無性者非眾生數。謂草木等。已過五性之見。二者眾生。生在纏之因。已具出纏之果法。故云有如來智慧。非但有性後方當成。亦非理前智後。是知涅槃對昔方便。且說有性。後學尙謂談有藏無。況聞

等有果智。誰當信者。三彼因中之果智。卽他佛之果智。以圓教宗。自他因果無二體故。不爾。此說眾生有果。何名說佛智耶。斯則玄又玄矣。非華嚴宗。無有斯理。

但以妄想顛倒執著而不證得。

次釋疑。疑云。涅槃云。佛性者。名爲智慧。有智慧時。則無煩惱。今得佛智。那作眾生。釋中先順答前義。謂倒故不證。豈得言無。如壯士迷於額珠。豈謂膚中無寶。

若離妄想。一切智自然智無礙智。則得現前。

次若離下。反以理成。謂若先無。離倒寧有。既離倒。卽現明本不無。如貧得珠。非今授與。是以涅槃恐不修行。故云言定有者。則爲執著。恐不信有。故云若言定無。則爲妄語。乍可執著。不可妄語。言自然智者。自覺聖智也。無礙智者。始本無二。絕二礙也。佛子。譬如有大經卷。量等三千大千世界。書寫三千大千世界中事。一切皆盡。所謂書寫大鐵圍山中事。量等大鐵圍山。書寫大地中事。量等大地。書寫中千世界中事。量等中千世界。書寫小千世界中事。量等小千世界。如是若四天下。若大海。若須彌山。若地天。

宮殿。若欲界空居天宮殿。若色界宮殿。若無色界宮殿。一一書寫。其量悉等。此大經卷。雖復量等大千世界。而全住在一微塵中。如一微塵。一切微塵皆亦如是。時有一人。智慧明達。具足成就清淨天眼。見此經卷在微塵內。於諸眾生無少利益。卽作是念。我當以精進力。破彼微塵。出此經卷。令得饒益。一切眾生。作是念已。卽起方便。破彼微塵。出此大經。令諸眾生普得饒益。如於一塵。一切微塵應知悉然。

第二喻中二。先明大經潛塵。以喻上文妄纏佛智。大經卷者。佛智無涯。性德圓滿也。書各稱境者。智

如理故。潛一塵者。略有三義。一妄覆真故。二小含大故。三一具多故。一切塵者。無一眾生不具佛智。故。後時有一人下。出經益物。喻上離妄現前。

佛子。如來智慧亦復如是。無量無礙。普能利益一切眾生。具足在於眾生身中。但諸凡愚。妄想執著。不知不覺。不得利益。爾時如來以無障礙清淨智眼。普觀法界一切眾生。而作是言。奇哉奇哉。此諸眾生云何。具有如來智慧。愚癡迷惑。不知不見。我當教以聖道。令其永離妄想執著。自於身中得見如來廣大智慧。與佛無異。卽教彼眾生修習聖道。令離妄想。離妄想。

已證得如來無量智慧利益安樂一切眾生佛子。是爲如來心第十相。諸菩薩摩訶薩應如是知。

第三合中亦二。先合大經潛塵。無量無礙。普能利益。合上書寫多事。眾生身及妄想俱合上塵。後爾時如來下。合出經益物。如來合上一人。智眼合上天眼。是知不信眾生等有佛智。智眼未開。復何可怪。然如來藏等經說有九喻。喻如來藏。爲如青蓮華在泥水中。未出泥水人無貴者。又如貧女而懷聖胎。如大價寶垢衣所纏。如摩尼珠落在深廁。如真金像弊衣所覆。如菴摩羅樹華實未成。亦如稻

米在糠糲中。如金在鑛。如像在模。皆是塵中有佛身義。

佛子。菩薩摩訶薩。應以如是等無量無礙不可思議廣大相。知如來應正等覺心。

大文第三。總結上來十喻。初總明無依爲依。二能出生。三能潛徧。四橫具四智。五豎具四能。六體廣包含。七用無終竟。八知無不盡。九巧能攝持。十處處具足。前九直語佛智。後一乃融自他。此十圓融。略顯佛智之相。寄顯如來之心。未盡佛心一毫故。應更以無量無礙等知也。

爾時普賢菩薩摩訶薩欲重明此義而說頌言。

欲知諸佛心 當觀佛智慧

第二偈頌二十二偈分二。初兩句約法總顯。

佛智無依處 如空無所依 眾生種種樂

及諸方便智 皆依佛智慧 佛智無依止

餘頌上喻於中初喻一偈半。後一。四偈。餘八各二偈。並顯可知。

聲聞與獨覺 及諸佛解脫 皆依於法界

法界無增減 佛智亦如是 出生一切智

無增亦無減 無生亦無盡

二頌前二。

如水潛流地 求之無不得 無念亦無盡

功力徧十方 佛智亦如是 普在眾生心

若有勤修行 疾得智光明

三頌前三。

如龍有四珠 出生一切寶 置之深密處

凡人莫能見 佛四智亦然 出生一切智

餘人莫能見 唯除大菩薩

四頌前四。

如海有四寶 能飲一切水 令海不流溢

亦復無增減 如來智亦爾 息浪除法愛

廣大無有邊 能生佛菩薩

五頌前五。

下方至有頂 欲色無色界 一切依虛空

虛空不分別 聲聞與獨覺 菩薩眾智慧

皆依於佛智 佛智無分別

六頌前六。

雪山有藥王 名爲無盡根 能生一切樹

根莖葉華實 佛智亦如是 如來種中生

既得菩提已 復生菩薩行

七頌前七。

如人把乾草 置之於劫燒 金剛猶洞然

此無不燒理 三世劫與刹 及其中眾生

彼草容不燒 此佛無不知

八頌前八。

有風名散壞 能壞於大千 若無別風止

壞及無量界 大智風亦爾 滅諸菩薩惑

別有善巧風 令住如來地

九頌前九。

如有大經卷 量等三千界 在於一塵內

一切塵悉然 有一聰慧人 淨眼悉明見
破塵出經卷 普饒益眾生 佛智亦如是
徧在眾生心 妄想之所纏 不覺亦不知
諸佛大慈悲 令其除妄想 如是乃出現
饒益諸菩薩

四頌頌前十。 上出現意業竟

大方廣佛華嚴經綱要卷第五十一

三ノノノノノノノノ

三ノ

大方廣佛華嚴經綱要卷第五十二

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

如來出現品第三十七之三

第五明出現境界。正顯分齊之境。兼辨所緣之境。依初義者。前約智以顯心。此正明智用分齊。依後意者。前明能知。今辨所緣。由所緣無邊故。顯分齊難思故。方窮所緣之境。二義相成。如函蓋相稱。佛子。菩薩摩訶薩應云何知如來應正等覺境界。

文中長行分三。謂標釋結。

佛子。菩薩摩訶薩。以無障無礙智慧。知一切世間境界。是如來境界。知一切三世境界。一切刹境界。一切法境界。一切眾生境界。真如無差別境界。法界無障礙境界。實際無邊際境界。虛空無分量境界。無境界境界。是如來境界。

釋中二。先法後喻。法中亦二。先廣取所緣。顯分齊境。後近取諸心。以況佛境。前中又二。先列所緣無邊。後顯分齊無量。今初。先令以無障礙智爲能知者。非此不能量佛境故。後正顯所緣。文有十句。一

通舉所化。二化時。三化處。四化法。五所化人。六七
八三。皆明所證。於中真如語其體常一味。故云無
差別。法界生法所依。故云無礙。實際是窮事至實。
故云無邊。九化處分齊。後一徧通。若約二諦境。前
五爲俗。後三爲真。九通真俗。事空理空。俱是空故。
後一雙非。顯前九境卽同無故。若約三諦。空卽是
真。三真爲中道。若以五界攝之。初三是世界無量。
四卽調伏及調伏加行。五卽眾生。次三卽法界。餘
二雙非。

佛子。如一切世間境界無量。如來境界亦無量。如一

聖界卷之三十一
一
切三世境界無量。如來境界亦無量。乃至如無境界
境界無量。如來境界亦無量。如無境界境界一切處
無有。如來境界亦如是。一切處無有。

二顯分齊無量。先約十界以顯分齊。境智相稱。故
皆無量。然約無境顯其非有。乃至真如皆不可得
故。是以諸境雲興而長寂也。如無既爾。如真如等
無變易等亦然。

佛子。菩薩摩訶薩應知心境界是如來境界。如心境
界無量無邊無縛無脫。如來境界亦無量無邊無縛
無脫。何以故。以如是如是思惟分別。如是如是無量

顯現故。

第二近取諸心以況佛境。於中二。先正明。後徵釋。今初。無量無邊。語其相用廣大。無縛無脫。明其體性深寂。次徵意云。何以將心況於佛境。釋意云。菩薩自心隨思卽顯。故無分量。佛境亦爾。隨機顯現。若身若智。豈有量耶。智假思顯。則性無縛脫。不爲相縛。後無脫故。

佛子。如大龍王隨心降雨。其雨不從內出。不從外出。如來境界亦復如是。隨於如是思惟分別。則有如是無量顯現。於十方中。悉無來處。佛子。如大海水。皆從

龍王心力所起。諸佛如來一切智海。亦復如是。皆從如來往昔大願之所生起。

第二喻顯有二喻。前一喻無縛無脫。後一喻無量無邊通前二段。今初。前明降雨無從。喻正喻無縛脫。既無來處。何有縛脫耶。後明海水從心。喻無縛脫所因。水從心力爲因。非定內外。智從昔願緣起。故來卽無來。

佛子。一切智海。無量無邊。不可思議。不可言說。然我今者。略說譬喻。汝應諦聽。

第二海水宏深。喻無量無邊。中三。先標章誠聽。

佛子。此閻浮提。有二千五百河流入大海。西拘耶尼。有五干河。流入大海。東弗婆提。有七千五百河。流入大海。北鬱單越。有一萬河。流入大海。佛子。此四天下。如是二萬五千河。相續不絕。流入大海。於意云何。此水多不。答言甚多。佛子。復有十光明龍王。雨大海中。水倍過前。百光明龍王。雨大海中。水復倍前。大莊嚴龍王。摩那斯龍王。雷震龍王。難陀跋難陀龍王。無量光明龍王。連澍不斷龍王。大勝龍王。大奮迅龍王。如是等八十億諸大龍王。各雨大海。皆悉展轉倍過於前。娑竭羅龍王太子。名閻浮幢。雨大海中。水復倍前。

佛子。十光明龍王。宮殿中水。流入大海。復倍過前。百
光明龍王。宮殿中水。流入大海。復倍過前。大莊嚴龍
王。摩那斯龍王。雷震龍王。難陀跋難陀龍王。無量光
明龍王。連澍不斷龍王。大勝龍王。大奮迅龍王。如是
等八十億諸大龍王。宮殿各別。其中有水。流入大海。
皆悉展轉倍過於前。娑竭羅龍王太子閻浮幢宮殿
中水。流入大海。復倍過前。佛子。娑竭羅龍王連雨大
海。水復倍前。其娑竭羅龍王宮殿中水。涌出入海。復
倍於前。

二喻顯。三佛子應知下法合。喻中三。初別顯水多。

文有四節。一四洲出水。二龍王雨水。三宮殿出水。四娑竭王兼雨兼出。皆後後倍前。以顯深廣。

其所出水。紺瑠璃色。涌出有時。是故大海潮不失時。二通顯水相。湧出故潮上。速爲寶消。故潮下。此爲極說。

佛子。如是大海。其水無量。衆寶無量。衆生無量。所依大地。亦復無量。

三通顯無量。

佛子。於汝意云何。彼大海爲無量不。答言。實爲無量。不可爲喻。佛子。此大海無量。於如來智海無量。百分

不及一。千分不及一。乃至優波尼沙陀分。不及其一。但隨眾生心。爲作譬喻。而佛境界。非譬所及。佛子。菩薩摩訶薩。應知如來智海無量。從初發心。修一切菩薩行。不斷故。應知寶聚無量。一切菩提分法。三寶種不斷故。應知所住眾生無量。一切學無學聲聞獨覺所受用故。應知住地無量。從初歡喜地。乃至究竟無障礙地。諸菩薩所居故。

第二合中二。先合水無量。佛智一念卽無窮盡。況盡三際。周十方乎。重重重重。安可喻顯。一佛子。至應知如來下。合通顯無量。非唯智爲佛境。菩提分

等皆分齊境也。智海合水。餘合寶等可知。

佛子。菩薩摩訶薩爲人無量智慧。利益一切眾生。故於如來應正等覺境界。應如是知。

大文第三總結。卽結云。知意不知佛境。安能利生。爾時普賢菩薩摩訶薩欲重明此義而說頌言。

如心境界無有量

諸佛境界亦復然

如心境界從意生

佛境如是應觀察

第二偈頌。五偈分二。初一頌法說。

如龍不離於本處

以心威力澍大雨

雨水雖無來去處

隨龍心故悉充洽

十力牟尼亦如是 無所從來無所去

若有淨心則現身 量等法界入毛孔

餘頌前喻亦二。初二合頌前二喻。同喻無縛脫。

如海珍奇無有量 眾生大地亦復然

水性一味等無別 於中生者各蒙利

如來智海亦如是 一切所有皆無量

有學無學住地人 悉在其中得饒益

後二頌大海宏深喻。但頌合顯無量。餘文略無。

第六出現之行。前明分齊境智無邊。今彰運用。則

悲皆無盡。雖智海已滿。悲無息故。

佛子。菩薩摩訶薩。應云何知如來應正等覺行。

長行中二。先標舉。後釋相。

佛子。菩薩摩訶薩。應知無礙行。是如來行。應知真如行。是如來行。

釋相中三。初雙標二行。次雙釋二行。後雙結二行。今初義有多含。一無礙行者。卽理之事行。真如行者。卽事之理行。前卽行相。後卽行體。又前是卽智之悲。後是卽悲之智。前卽真之俗。後卽俗之真。融而無礙。爲如來行。

佛子。如真如前際不生。後際不動。現在不起。如來行。

亦如是不生不動不起。

第二雙釋中二。先釋真如行。後釋無礙行。今初。真如之名。言合法喻。文中有三。初牒名以解。明體絕三際。故同真如。契如成行。行即如也。過未非緣。故不生不動。現在離緣。故非起。

佛子。如法界非量非無量。無形故。如來行亦如是。非量非無量。無形故。

二復舉法界無形。明雙非契中。是知實相等皆如來行。

佛子。譬如鳥飛虛空。經於百年。已經過處。未經過處。

皆不可量。何以故。虛空界無邊際故。如來行亦如是。假使有人經百千億那由他劫。分別演說。已說未說。皆不可量。何以故。如來行無邊際故。

三舉鳥飛虛空喻。釋非量義。非量有二。一行廣無量。故云如來行無邊際故。一卽事同真。便無分量。故以空喻。旣無有量。何有無量。若謂無量卽是量。故雙非永寂。爲如來行故。心彌虛。行彌曠。終日行。而未會行。故涅槃云。復有一行。是如來行。所謂大乘大般涅槃。

佛子。如來應正等覺。住無礙行。無有住處。而能普爲

一切眾生示現所行。令其見已。出過一切諸障礙道。
第二釋無礙行。文中二。先約法總明。後以喻別顯。
今初。智無所住。悲示所行。卽悲智無礙。自無二礙。
令他無礙。皆無礙行也。

佛子。譬如金翅鳥王。飛行虛空。迴翔不去。以清淨眼。
觀察海內諸龍宮殿。奮勇猛力。以左右翅鼓揚海水。
悉令兩闢。知龍男女命將盡者。而搏取之。如來應正
等覺。金翅鳥王。亦復如是。住無礙行。以淨佛眼。觀察
法界諸宮殿中一切眾生。若曾種善根已成熟者。如
來奮勇猛十力。以止觀兩翅鼓揚生死大愛水海。使

其兩闕而撮取之。置佛法中。令斷一切妄想戲論。安住如來無分別無礙行。佛子。譬如日月。獨無等侶。周行虛空。利益眾生。不作是念。我從何來。而至何所。諸佛如來亦復如是。性本寂滅。無有分別。示現遊行一切法界。爲欲饒益諸眾生故。作諸佛事。無有休息。不生如是戲論分別。我從彼來。而向彼去。

二別以喻顯。初金翅闢海喻。喻卽智之悲。後日月無私喻。喻悲不失智。

佛子。菩薩摩訶薩。應以如是等無量方便。無量性相。知見如來應正等覺所行之行。

第三雙結二行。性結真如。相結無礙。

爾時普賢菩薩欲重明此義而說頌言。

譬如真如不生滅 無有方所無能見

大饒益者行如是 出過三世不可量

法界非界非非界 非是有量非無量

大功德者行亦然 非量無量無身故

如鳥飛行億千歲 前後虛空等無別

眾劫演說如來行 已說未說不可量

金翅在空觀大海 闕水搏取龍男女

十力能拔善根人 令出有海除眾惑

譬如日月遊虛空

照臨一切不分別

世尊周行於法界

教化眾生無動念

第二偈頌有五。前三頌真如。後二頌無礙。

佛子。諸菩薩摩訶薩。應云何知如來應正等覺。成正覺。

第七出現菩提。圓行之果故。對緣造修。必有成正覺故。文中三。謂徵起。釋相。總結。徵言正覺。略顯五門。一釋名。晉名菩提。存其梵語。此翻爲覺。正揀二乘。成異菩薩。又單言菩提。但是所覺之道。今云成者。卽理智契合之名。二明體性。攝論云。二智二斷。

爲菩提體。智論云。菩提菩提。斷俱名爲菩提。若依此經通一切法。如文具之。三辨種類。或說唯一。如智契合。無二相故。淨名云。夫如者不二不異故。故開爲二。大品明有性淨菩提及修成故。亦名性淨方便淨也。或分爲三。約三乘故。如十地論。或開爲四。涅槃云。下智觀者得聲聞菩提。乃至上上智觀得佛菩提。又四智菩提。亦是四義。或說爲五。如大品智論說發心等。或具明十。如離世間品。唯十爲圓。此是所辨。若業用所現。則無所不收。四明業用。文有十門。而體用參顯。各隨別義立目。今統收之。

謂緣二諦。斷二障。證二空。起二智。印羣機。現萬象。
具十身。徧十方。周於微塵毛端等處。通因及果。業
用無邊。具如下文。五者辨相。卽當釋文。略辨十門。
一總明體相。二印現萬機。三體相甚深。四三輪平
等。五因果交徹。六體離虧盈。七相無增減。八用該
動寂。九周於法界。十普徧諸心。當門別釋。

佛子。菩薩摩訶薩。應知如來成正覺。於一切義無所
觀察。於法平等無所疑惑。無二。無相。無行。無止。無量。
無際。遠離二邊。住於中道。出過一切文字言說。

今且以初爲總。餘九爲別。別雖九門而釋十義。初

釋第一。二釋第十。謂舉初該後。三從第二次第解
釋。第十一門。釋八九二義。至文當知。釋文顯然。不
應異解。今初總明。具有十門。皆含體相用三。一寂
照爲菩提體。故云於一切義者真俗境也。觀極於
無觀。故淨名云。不觀是菩提。離諸緣故。如海無心
而能頓鑒。非無所了。故晉經云。解一切義。解卽是
觀。觀卽無觀。旣觀念斯寂。無惑習種。無觀是體。照
斷爲用。合之爲相。二等同萬法爲菩提體。謂智與
理冥同一圓覺。故云於法平等而不失照。決斷分
明。云無疑惑。旣無所疑。卽所知永寂。三一成一

成不見生佛有異。故云無二。以知一切眾生卽菩提相故。亦是能所不二。淨名云。不二是菩提。離意法故。四總指前三體相。眾生寂滅是菩提。滅諸相故。五卽心行處滅。湛然不遷。亦是不行是菩提。無意念故。六雖覺而常定。不住定故。七有二義。一橫徧十方。廣無量故。二體無生滅。絕分量故。八亦二義。一豎念念成。無際畔故。一一得永常。無後際故。心無初相。冥符於理。無前際故。九離邊契中。謂若染淨縛脫有無。一異等斯邊皆離。不偏住著。故云離邊。非見有邊。邊卽中故。無邊無中。方住中道。十

總顯離言。上九寄言顯深。未盡菩提之奧。故收歸性離。令亡言契之。

知一切眾生心念所行。根性欲樂煩惱染習。舉要言之。於一念中。悉知三世一切諸法。佛子。譬如大海。普能印現四天下中一切眾生色身形像。是故共說以爲大海。諸佛菩提亦復如是。普現一切眾生心念根性樂欲而無所現。是故說名諸佛菩提。

第二知一切眾生下。印現萬機。卽海印三昧。文中三。初法。一念知三世。名一切智。次喻。卽舉海印以喻菩提無心頓現。三合。言無所現者有三義。一無

現故如海。二所現空故如像。三無別體故如水與像不可分異。自體顯現故名爲覺。起信論云。諸佛如來離於見相。無所不徧。心真實故。卽是諸法之性。自體顯照一切妄法。有大智用。斯卽無思顯照同體之境。爲菩提相用。故上文云。於一切義無所觀察。

佛子。諸佛菩提。一切文字所不能宣。一切音聲所不能及。一切言語所不能說。但隨所應方便開示。

三性相甚深。性離言故。理圓言徧故。

佛子。如來應正等覺。成正覺時。得一切眾生量等身。

得一切法量等身。得一切刹量等身。得一切三世量等身。得一切佛量等身。得一切語言量等身。得真如量等身。得法界量等身。得虛空界量等身。得無礙界量等身。得一切願量等身。得一切行量等身。得寂滅涅槃界量等身。

第四三輪平等。釋上於法平等。等諸法故。意輪等故。何所疑哉。文中二。先別舉身等。後類結顯多。今初有十三身。前六等事。次三等理。次一等事理。事無礙。後三等因果。略舉十三。故結云無量。皆言量者。是所等之分量。皆言等者。卽能等之三輪等。

有二義。一等彼事理之量。二等彼事理之體。所以等者。彼諸理事。卽我所證。能所冥合。彼尙卽我等。之何難。是以聖人空洞無象。物無非我。會萬物以成己也。

佛子。如所得身。言語及心。亦復如是。得如是等無量無數清淨三輪。

後類結三輪。

佛子。如來成正覺時。於其身中。普見一切眾生成正覺。乃至普見一切眾生入涅槃。

第五明因果交徹。釋上無二同一性故。文中三。初

標次皆同下。釋三知一切下。結今初入相之中。略舉其二。故云乃至。此文正同淨名云。若彌勒得菩提者。一切眾生皆亦應得。一切眾生卽菩提相。彌勒示迷此旨。但謂理詰之言。不知真得菩提。實如所詰。又前章以我等彼。故徧同彼量。今明以彼等我。故全現我中。是知一性平等。反覆相成。此中之成。爲理爲事。若是事成。何以釋云同一性故。若是理成。何以此云成正覺耶。入涅槃耶。此是華嚴大節圓宗之義。不對諸宗。難以取解。然諸眾生若於人天位中觀之。具足人法二我。小乘唯是五蘊實

法。大乘或說但心所現。或說幻有卽空。人法俱遣。或說唯如來藏。具恆沙性德。故眾生卽在纏法身。法身眾生義一名異。猶據理說。更有說言相本自盡。性本自現。不可說言卽佛不卽佛。若依此宗。舊來成竟。亦涅槃竟。非約同體。此成卽是彼成。若爾何以現有眾生非卽佛耶。若就眾生位看者。尙不見唯心卽空。安見圓教中事。如迷東謂西。正執西故。若諸情頓破。則法界圓現。無不已成。猶彼人悟西處全東。若爾諸佛何以更化眾生。不如是知。所以須化。如是化者是究竟化。如是化者無不化時。

故下結云大悲相續救度眾生。隨門不同。種種有異。約成佛門。一切成也。又此眾生。乃是像上之模。令其去模。則自見己佛。亦見他成。如第十段。

皆同一性。所謂無性。無何等性。所謂無相性。無盡性。無生性。無滅性。無我性。無非我性。無眾生性。無非眾生性。無菩提性。無法界性。無虛空性。亦復無有成正覺性。

二釋中先總釋。同一無性。故得現成。妄性本虛。生元是佛。真性叵得。非今始成。故皆成也。次轉徵所無。無何等性。同菩提性故。後釋所無有十二句。前

四通生及佛。次四緣眾生。彼四唯約佛。非獨妄空。真有亦非妄有真空。以性融相。法界圓現故。由此無性說成正覺。又攝十二總爲六對。一能相所相對。謂染相淨相相待有故。念念之盡。緣所盡故。煩惱永盡。本自盡故。二生滅對。約凡則本自不生。卽涅槃相。不復更滅。約佛菩提非始生故。何有滅耶。三我非我對。有緣無主故。我尙不可得。非我何可得。諸法實相中。無我無非我故。四緣非緣對。攬緣生故。緣尙不可得故。五能所證對。能證菩提。因所證故。所證法界。由智顯故。六合不合對。虛空非合。

因有體故。所以性無。成覺是合。理智契合。卽爲緣起。故非有也。

知一切法皆無性故。得一切智。大悲相續。救度眾生。三結中。物物無性。故成種智。證斯同體而起大悲。一得永常。故曰相續。又只由不知無性。故教化不絕。

佛子。譬如虛空。一切世界若成若壞。常無增減。何以故。虛空無生故。諸佛菩提亦復如是。若成正覺。不成正覺。亦無增減。何以故。菩提無相。無非相。無一無種種故。

第六明體無虧盈。釋上無相。虛空無生故。體無增減。菩提無相。成否寧殊。

佛子。假使有人。能化作恆河沙等心。一一心復化作恆河沙等佛。皆無色無形無相。如是盡恆河沙等劫。無有休息。佛子。於汝意云何。彼人化心化作如來。凡有幾何。如來性起妙德。菩薩言。如我解於仁所說義。化與不化等。無有別。云何問言。凡有幾何。普賢菩薩言。善哉善哉。佛子。如汝所說。設一切眾生於一念中。悉成正覺。與不成正覺等。無有異。何以故。菩提無相故。若無有相。則無增無減。佛子。菩薩摩訶薩。應如是。

知成等正覺同於菩提一相無相。

第七明相無增減。釋上無行。湛然不異。行豈能遷。文中三。初舉喻問答。以化現無形。喻成不異。化多心者。喻修多因。化成多佛。喻證多果。次普賢下。讚善以合。三佛子下。結前生後。

如來成正覺時。以一相方便。入善覺智三昧。入已。於一成正覺廣大身。現一切眾生數等身。住於身中。如一成正覺廣大身。一切成正覺廣大身。悉亦如是。佛子。如來有如是等無量成正覺門。是故應知如來所現身無有量。以無量故。說如來身爲無量界等眾生。

界。

第八用該動寂。釋上無止。不滯定故。文中四。初舉所依三昧。覺不滯寂。故名善覺。覺彼一相。故用爲方便。二入已下。顯一身之用。旣以一相爲方便。則物皆一相。故一卽現多。三如一下。類顯餘身。如來成正覺時。布身雲於法界。一一皆是廣大之身。並如一身之現。四佛子下。總結多門。謂上來所現。一定爲門。餘定亦爾。定門旣然。悲智總持等門亦爾。故有無量界矣。是謂高而無上。廣不可極。

佛子。菩薩摩訶薩。應知如來身一毛孔中。有一切眾

生數等諸佛身。何以故。如來成正覺身。究竟無生滅故。

第九明周於法界。釋上無量。無量有二。一廣多無量。一毛含多。徧法界故。二無分量。皆不生故。文中三。初明一毛含多。釋以不生故。此與前段分有無異。又此唯現佛。卽同類相望。前通多類。則異類相入。又前則住體徧應。此則如理而含。

如一毛孔徧法界。一切毛孔悉亦如是。當知無有少許處。空無佛身。何以故。如來成正覺。無處不至故。

二類顯多毛。但容毛處。卽是毛孔。次徵意云。身契

無生。可許能含法界。虛空無有能契。何能亦含。釋云無處不至。則無非佛身矣。是以大包天地。細入無間。

隨其所能。隨其勢力。於道場菩提樹下。師子座上。以種種身成等正覺。

二釋疑。疑云。若爾。何以要就覺樹。釋云。隨機所能受耳。是知坐菩提樹。多身頓成。尚曰隨宜。有頂鹿園。豈爲真極。

佛子。菩薩摩訶薩。應知自心。念念常有佛成正覺。何以故。諸佛如來不離此心。成正覺故。如自心。一切眾

生心亦復如是。悉有如來成等正覺。

第十明普徧諸心。釋前二門。卽分爲二。初正明普徧。釋上無際。念念常成。無際畔故。後廣大下。總結雙非。釋上遠離二邊。住於中道。今初亦二。先指一心。後如自心下。例一切心。前中先標次徵後釋。釋云不離者有二義。一眾生身卽如來所證故。二全卽佛菩提性故。此卽他果在我之因。非約因人自有佛性。此文正辨佛菩提故。

廣大周徧。無處不有。不離不斷。無有休息。入不思議方便法門。

後總結雙非。不離不斷釋有二義。一不離結上無處不有。不斷生下無有休息。二不離者。生佛非異故。不斷者。生佛非一。不同眾生可斷壞故。是名入不思議法門。是以不得意者。作眾生思。故是不可。設作佛思。是亦不可。卽亦不可。非卽亦不可。當淨智眼。無取諸情。

佛子。菩薩摩訶薩。應如是知。如來成正覺。

第三總結。卽最後佛子。令依此知。曠前十門。無幽不盡。離此。何有真菩提耶。

爾時普賢菩薩摩訶薩。欲重明此義。而說頌言。

善星經卷五十一
後偈有六頌前十門初二次第頌前二門次三如
次頌六七八後一通頌四五九十以同是普現無
量義故其第三門但顯離言故略不頌。

正覺了知一切法 無二離二悉平等

自性清淨如虛空 我與非我不分別

初總明體相。

如海印現眾生身 以此說其爲大海

菩提普印諸心行 是故說名爲正覺

二印現萬機。

譬如世界有成敗 而於虛空不增減

一切諸佛出世間

菩提一相恆無相

三體離虧盈。

如人化心化作佛

化與不化性無異

一切眾生成菩提

成與不成無增減

四相無增減。

佛有三昧名善覺

菩提樹下入此定

放眾生成無量光

開悟羣品如蓮敷

五用該動寂。

如三世劫刹眾生

所有心念及根欲

如是數等身皆現

是故正覺名無量

六通頌四五九十。

佛子。菩薩摩訶薩應云何知如來應正等覺轉法輪。

第八明出現轉法輪得大菩提。理必轉授。長行中。

三。初標徵。次釋相。後總結。

佛子。菩薩摩訶薩應如是知。如來以心自在力。無起無轉而轉法輪。知一切法恆無起故。以三種轉斷所應斷而轉法輪。知一切法離邊見故。離欲際非際而轉法輪。入一切法虛空際故。無有言說而轉法輪。知一切法不可說故。究竟寂滅而轉法輪。知一切法涅槃性故。

就釋相中二。先顯體用。後顯所因。今初分三。初法。次喻。後結勸。今初文有九句。減數十也。皆先標後釋。前五顯體性寂寥。後四辨相用深廣。前一能轉心。二所轉體。三所得果。四能詮教。五所顯理。夫轉法輪不過此五。今皆卽事契真。一能轉心者。由知法無起故。正轉法時。不起心念。言我轉授前人。名心自在。如是爲真能轉也。二所轉體者。卽示勸證。名爲三轉。此三名輪者。摧障惱故。言離邊者。若有惑可摧。未離於常。無惑可摧。寧免於斷。今永離斷常等邊。方爲真能斷所應斷。知與證修亦然。三所

得果者。由斷惑故。得離欲際。由證性空。本無可離。斯際亦遣。四能詮教者。理假言詮。今了本寂滅。不可說故。則終日言而未嘗言也。五所顯理。謂卽寂滅。今了性淨涅槃。法本不然。今則無滅。方爲究竟之滅。是知其輪本來常清淨也。

以一切文字一切言語而轉法輪。如來音聲無處不至故。知聲如響而轉法輪。了於諸法真實性故。於一音中出一切音而轉法輪。畢竟無主故。無遺無盡而轉法輪。內外無著故。

後四相用深廣中。一觸言皆輪。廣也。二卽用而寂。

深也。下二亦深亦廣。三一卽多而無主。四卽橫豎而恆虛。謂橫則無遺。無所不轉。故豎則無盡。窮未來故。而不著內外。則深廣無涯矣。

佛子。譬如一切文字語言。盡未來劫。說不可盡。佛轉法輪。亦復如是。一切文字安立顯示。無有休息。無有窮盡。佛子。如來法輪。悉入一切語言文字。而無所住。譬如書字。普入一切事。一切語。一切算數。一切世間出世間處。而無所住。如來音聲。亦復如是。普入一切處。一切眾生。一切法。一切業。一切報中。而無所住。一切眾生種種語言。皆悉不離如來法輪。何以故。言音

實相卽法輪故。

第二喻中。文有二喻。一文字無盡喻。喻第九無盡。二徧入無住喻。喻六七八。用而常寂故。於中有法喻合。合中二。先合普入一切。以上法中。但云入一切言故。今明入餘法。則觸類皆法輪。豈同三乘。但用佛音聲爲法輪耶。一切眾生種種下。正合前文入一切語。前五易故。略不喻之。

佛子。菩薩摩訶薩。於如來轉法輪。應如是知。

三結勸。

復次佛子。菩薩摩訶薩。欲知如來所轉法輪。應知如

來法輪所出生處。何等爲如來法輪所出生處。佛子。如來隨一切眾生心行欲樂無量差別。出若干音聲而轉法輪。佛子。如來應正等覺有三昧名。究竟無礙無畏。入此三昧已於成正覺。一身一口。各出一切眾生數等言音。一一音中。眾音具足。各各差別。而轉法輪。令一切眾生皆生歡喜。能如是知轉法輪者。當知此人。則爲隨順一切佛法。不如是知。則非隨順。

第二顯法輪所起因。於中三。先辨輪所起因。因機差故。若離物機。佛無說故。次佛子如來下。明因所起輪。物既爲力不同。教須適宜差別。於中說法所

依之定名者。無礙辯才。無所怯畏。得究竟者。唯佛有故。後能如是知下。結其得失可知。

佛子。諸菩薩摩訶薩。應如是知。佛轉法輪。普入無量眾生界故。

第三總結。

爾時普賢菩薩摩訶薩。欲重明此義。而說頌言。

如來法輪無所轉 三世無起亦無得

譬如文字無盡時 十力法輪亦如是

如字普入而無至 正覺法輪亦復然

入諸言音無所入 能令眾生悉歡喜

佛有三昧名究竟

入此定已乃說法

一切眾生無有邊

普出其音令悟解

一一音中復更演

無量言音各差別

於世自在無分別

隨其欲樂普使聞

文字不從內外出

亦不失壞無積聚

而爲眾生轉法輪

如是自在甚奇特

偈有五頌分二。初二偈顯法輪體用。後三偈頌法

輪所因。

佛子。菩薩摩訶薩應云何知如來應正等覺般涅槃。
第九出現涅槃轉化既周。安住祕藏爲物示滅。故

次明之。然大涅槃。蓋眾聖歸宗冥會之所。寂寥無爲。而廣大悉備。形名絕朕。識智難思。今以無名強名。亦爲五別。一釋名。二出體。三顯種類。四彰業用。五釋文。一釋名者。涅槃正名爲滅。取其義類。乃有多方。總以義翻。稱爲圓寂。以義充法界。德備塵沙。曰圓。體窮真性。妙絕相累。爲寂。若約義開。略明三義。一者體大。自性清淨。二者相大。方便修淨。累亡德備故。三者用大。化用無盡故。般者入義。性入真入。示現入故。若圓融無礙。得大涅槃。二出體性。涅槃旣妙絕常數。恬怕希夷。雖迴出百非。而靡所不

在。今以義求。不出三法。卽摩訶般若解脫法身。以爲其體。所以三者。翻三雜染。故成智恩斷。故成法門。法性應化身。故能證大智冥。所證理累。永寂。故然此三種。不離一如。德用分異。卽寂之照。爲般若。卽照之寂。爲解脫。寂照之體。爲法身。如一明淨圓珠。明卽般若。淨卽解脫。圓體法身。約用不同。體不相離。故此三法。不縱不橫。不並不別。如天之目。如世之伊。名祕密藏。爲大涅槃。三顯種類。理無不統。義類塵沙。今自隱之寬。略分一兩。或唯說一。卽大涅槃。或說有二。自有三門。一餘無餘。二性淨方便。

淨三真與應。或分爲三。此有二種。一約三乘。一卽自性真應。或分爲四。一自性清淨涅槃。二有餘依。三無餘依。四無住處。有餘無餘。義通大小。今唯說大。於三種內。不明二乘。餘皆具論。融而無礙。爲大涅槃。四彰業用。囊括終古。導達羣方。靡不度生。靡不成就。故涅槃云。能建大事。則出現法門。皆斯用也。五釋文中二。先徵起。後正顯。今初佛子。菩薩摩訶薩。欲知如來大涅槃者。當須了知根本自性。

正顯中十。一體性真常。二德用圓備。三出沒常湛。

四虧盈不遷。五示滅妙存。六隨緣起盡。七存亡互現。入大用無涯。九體離二邊。十結歸無住。然斯十段。隨義雖殊。皆含體用。互相交徹。顯大涅槃。今初分三。初舉法勸知。二真如下。指理同事。三何以下。釋顯同相。今初。根本自性。卽下所列真如等十。爲真應涅槃之根本。體卽自性清淨涅槃。以出二礙。名方便淨。爲真涅槃。大悲應物。亦自此流。故名爲本。以是本故。但了真如。卽了涅槃。

如真如涅槃。如來涅槃亦如是。如實際涅槃。如來涅槃亦如是。如法界涅槃。如來涅槃亦如是。如虛空涅

槃。如來涅槃亦如是。如法性涅槃。如來涅槃亦如是。
如離欲際涅槃。如來涅槃亦如是。如無相際涅槃。如
來涅槃亦如是。如我性際涅槃。如來涅槃亦如是。如
一切法性際涅槃。如來涅槃亦如是。如真如際涅槃。
如來涅槃亦如是。

次指理同事。皆云如者。如卽同義。能同涅槃。通真
及應。所同如等。卽自性涅槃。故上句皆有涅槃之
稱。真應無本。應非不生。何出現之爲妙。故以本該
末。以體顯用。今皆圓寂爲大涅槃。所以列十名者。
欲明究竟妙道。窮理盡性。無不同故。德無盡故。十

名已如前釋。於中後二加際言者。窮真於無真。爲真如際等故。

何以故。涅槃無生無出故。若法無生無出。則無有滅。後釋顯同相者。向言亦如是者。云何如耶。故云如真如等不生滅故。何以不生。以但了因所顯。非生因所生故。旣無有生。亦非出障。始旣無生。則永常不滅。是知玄道存於妙悟。妙悟在於卽真。卽真則生滅齊觀。齊觀則彼此莫二。所以真如與我同根。法性與我一體。真旣不滅。應滅寧真。是知涅槃名滅者。乃在於無滅者矣。

佛子。如來不爲菩薩說諸如來究竟涅槃。亦不爲彼示現其事。

第二明德用圓備者。如來之身。色相圓備。常現大機前故。文中先標舉。後徵釋。標中約人顯實。云不爲菩薩。明說永滅。是爲二乘。跡盡雙樹。並爲凡小。據此亦名揀異灰斷。

何故。爲欲令見一切如來常住其前。於一念中。見過去未來一切諸佛。色相圓滿。皆如現在。亦不起二不二相。

後徵釋文有二重。初釋之中。自有二義。一令稱實。

見受用身卽同法身常住其前。涅槃云。涅槃不空者。謂有善色常樂我淨故。因滅無常。獲此常故。二於一念下。令見三際應用。亦卽是常。故云皆如現在。涅槃云。吾今此身卽是常身法身。下開旃檀座。佛塔。見三世佛無涅槃者。楞伽亦云。無有佛涅槃。無有涅槃佛。亦不起二不二想者。遠離覺所覺故。謂旣知幽靈不竭。妙色湛然。三際大均。何生滅之動靜。故不起二也。亦不取此一常。故無不二也。何以故。菩薩摩訶薩永離一切諸想著故。

次重徵釋。徵意云。菩薩何以能不起想。釋云。菩薩

由了法空。本無想著故。既無心於動靜。終不謂佛常與非常。

佛子。諸佛如來爲令眾生欣樂故。出現於世。欲令眾生戀慕故。示現涅槃。而實如來無有出世。亦無涅槃。何以故。如來常住清淨法界。隨眾生心示現涅槃。

第三佛子。諸佛如來下。出沒常湛。謂涅槃無爲而無所不爲。無不爲故。能建大事。不礙出沒。以無爲故。住淨法界體常湛然。不礙出沒。故顯迹爲生。卽是有餘。息跡爲滅。卽是無餘。故餘無餘。乃應物之

假號耳。體性湛然。故存不爲有。亡不爲無。是知寂然不動。未嘗無爲。應迹無方。未嘗有爲。豈可隨於見聞。以滯殊應之迹。

佛子。譬如日出。普照世間。於一切淨水器中。影無不現。普徧眾處。而無來往。或一器破。便不現影。佛子。於汝意云何。彼影不現。爲日咎不。答言不也。但由器壞。非日有咎。佛子。如來智日。亦復如是。普現法界。無前無後。一切眾生淨心器中。佛無不現。心器常淨。常見佛身。若心濁器破。則不得見。

第四虧盈不遷。先喻。佛子。如來智日下。後合。然法

身無像。故無器而不形。聖智無心。故無感而不應。佛非我有。自彼器之虧盈。心非我生。豈普現之前後。故攝論第十頌云。眾生罪不見。如月於破器。徧滿諸世間。由法光如日。是以經言非日咎也。持戒器破。定水無依。菩提器破。智水寧止。無信清珠。故心水渾濁。何由見佛耶。然此中雖明現身。卽是三德涅槃所流大用。亦涅槃攝。若爾。寧殊出現之身。然出現身。以法身爲門。而論真應。非無般若解脫。二德。智慧日身。無不照故。永離戲論。卽解脫故。醫王之喻。卽示滅故。此有般若。寧異菩提。若分相說。

菩提爲能證智。涅槃是所證理。唯約修顯。故涅槃中說菩提必從生因所生。涅槃必從了因所顯。若攝相說。菩提是卽理之智。涅槃是卽智之理。卽智之理。不礙摩訶般若。卽理之智。不礙寂滅菩提。智性本有。亦是性淨涅槃。修顯亦方便淨。隨一爲門。則皆收盡。卽大涅槃真菩提也。今以涅槃收之。非唯菩提及身。前後諸門。皆從三德所流。能建大事。佛子。若有眾生。應以涅槃而得度者。如來則爲示現涅槃。而實如來無生無歿。無有滅度。

第五示滅妙存。旣爲物示滅。卽體無滅。

佛子。譬如火大。於一切世間能爲火事。或時一處其
火息滅。於意云何。豈一切世間火皆滅耶。答言不也。
佛子。如來應正等覺亦復如是。於一切世界施作佛
事。或於一世界能事已畢。示入涅槃。豈一切世界諸
佛如來悉皆滅度。

第六隨緣起盡。有喻合結。合中以機喻薪。以涅槃
喻火。眾生善根未熟可熟者。成正覺以熟之。如爲
火事。若所應度者皆已度竟。則現般涅槃。寂無所
爲。如火息滅。故法華云。佛此夜滅度。如薪盡火滅。
然現滅現生。皆是涅槃大用。故攝論第十名涅槃。

如火既起滅在彼則益不可盈損不可虧云云自彼非佛然也。

佛子。菩薩摩訶薩應如是知如來應正等覺大般涅槃。

三結可知。

復次佛子。譬如幻師善明幻術。以幻術力於三千大千世界一切國土城邑聚落。示現幻身。以幻力持經劫而住。然於餘處幻事已訖。隱身不現。佛子。於汝意云何。彼大幻師豈於一處隱身不現。便一切處皆隱滅耶。答言不也。佛子。如來應正等覺亦復如是。善知

無量智慧方便種種幻術。於一切法界普現其身。持
令常住。盡未來際。或於一處。隨眾生心所作事。訖示
現涅槃。豈以一處示入涅槃。便謂一切悉皆滅度。佛
子。菩薩摩訶薩。應如是知。如來應正等覺。大般涅槃。
第七存亡互現。由順機故。此滅彼存。非如來身不
能長久。前喻約見滅見成。此喻約常見不見。

復次佛子。如來應正等覺。示涅槃時。入不動三昧。入
此三昧已。於一一身。各放無量百千億那由他大光
明。一一光明。各出阿僧祇蓮華。一一蓮華。各有不可
說妙寶華藥。一一華藥。有師子座。一一座上。皆有如

來結跏趺坐。其佛身數。正與一切眾生數等。皆具上妙功德莊嚴。從本願力之所生起。若有眾生善根熟者。見佛身已。則皆受化。然彼佛身。盡未來際。究竟安住。隨宜化度一切眾生。未曾失時。

第八大用無涯。謂正示涅槃。而便分身無邊。窮於來際。不動三昧者。究竟寂滅也。由寂無動故。無所不動耳。

佛子。如來身者。無有方處。非實非虛。但以諸佛本誓願力。眾生堪度。則便出現。菩薩摩訶薩。應如是知。如來應正等覺。大般涅槃。

第九體離二邊。身若是實。有不可滅。身若是虛。何能起滅。若有方所。此現彼無。由非實故。起滅無恆。由非虛故。能無不現。無方所故。感處卽形。本願力故。化周法界。隨堪度故。見則不同。

佛子。如來住於無量無礙究竟法界。虛空界真如法性。無生無滅。及以實際。爲諸眾生隨時示現。本願持故。無有休息。不捨一切眾生。一切刹。一切法。

第十結歸無住。上來九門。初門多顯其體。餘八皆體用雙明。今此分二。初至實際。通結九門之體。後爲諸眾生下。通結入門之用。隨時示現。正顯於用。

本願力故。顯何所因。無有休息。皆窮來際。不捨已下。明用分際。誰獨非涅槃而欲捨之耶。是則初住實際故。不住生死。後不捨眾生故。不住涅槃。由雙住故。能俱不住。前卽大智。後卽大悲。般若常所輔翼。爲無住涅槃。自性涅槃。眾生等有。二乘無學。容有前三。唯佛世尊。獨言具四。故就無住總以結之。卽安住涅槃建大事也。

爾時普賢菩薩摩訶薩欲重明此義而說頌言。

如日舒光照法界

器壞水漏影隨滅

最勝智日亦如是

眾生無信見涅槃

偈文有六。初偈頌第四。

如火世間作火事

於一城邑或時息

人中最勝徧法界

化事訖處示終盡

次偈頌第六。

幻師現身一切刹

能事畢處則便謝

如來化訖亦復然

於餘國土常見佛

次頌第七。

佛有三昧名不動

化眾生訖入此定

一念身放無量光

光出蓮華華有佛

佛身無數等法界

有福眾生所能見

如是无數一一身

壽命莊嚴皆具足

次二偈頌第八。

如無生性佛出興

如無滅性佛涅槃

言辭譬喻悉皆斷

一切義成無與等

次一偈頌第十。初句無生之生。次句無滅之滅。次句結歸涅槃無名。後句結其大用無盡。此二無礙。是無住義。餘不頌者。合在此中。第九出現涅槃竟。佛子。菩薩摩訶薩。應云何知於如來應正等覺。見聞親近所種善根。佛子。菩薩摩訶薩。應知於如來所見聞親近所種善根。皆悉不虛。出生無盡覺慧。故離於

一切障難故。決定至於究竟故。無有虛誑故。一切願滿故。不盡有爲行故。隨順無爲智故。生諸佛智故。盡未來際故。成一切種勝行故。到無功用智地故。

第十明出現見聞親近所生善根。前九門出現一期始終。今明於上見聞功深益遠。獎物進修。文中三。初徵起。次正顯。後結示。就正顯中分二。先明見聞信向益。後見聞不信益。前中先法後喻。法中先總後別。今初見等如後喻合中。後出生下。別卽示不虛之相。有十一句。不出智斷恩德。思之。

佛子。譬如丈夫食少金剛。終竟不消。要穿其身。出在

於外何以故。金剛不與肉身雜穢而同止故。於如來所種少善根。亦復如是。要穿一切有爲諸行煩惱身。過到於無爲究竟智處。何以故。此少善根。不與有爲諸行煩惱而共住故。

第二喻中三喻。喻其三德。初少服金剛喻。喻於智德。智慧破惑。如金剛故。以有智慧者。必無煩惱。故不共住。

佛子。假使乾草。積同須彌。投火於中。如芥子許。必皆燒盡。何以故。火能燒故。於如來所種少善根。亦復如是。必能燒盡一切煩惱。究竟得於無餘涅槃。何以故。

此少善根性究竟故。

第二少火燒多喻。喻斷德。性究竟者。了惑本寂故。佛子。譬如雪山有藥王樹。名曰善見。若有見者。眼得清淨。若有聞者。耳得清淨。若有嗅者。鼻得清淨。若有嘗者。舌得清淨。若有觸者。身得清淨。若有眾生取彼地土。亦能爲作除病利益。

第三藥王徧益喻。喻恩德。種種利生故。文中先喻後合。

佛子。如來應正等覺。無上藥王。亦復如是。能作一切。饒益眾生。若有得見。如來色身。眼得清淨。若有得聞。

如來名號耳得清淨。若有得齶如來戒香鼻得清淨。若有得嘗如來法味。舌得清淨。具廣長舌。解語言法。若有得觸如來光者。身得清淨。究竟獲得無上法身。若於如來生憶念者。則得念佛三昧清淨。

二合中二。先明爲六根境界益。合上藥王徧益六根。皆通在世滅後。滅後亦有見故。況憶念等。

若有眾生供養如來。所經土地及塔廟者。亦具善根。滅除一切諸煩惱。患得賢聖樂。

後明遺跡之益。合上取彼地土。所經土地。猶通現滅。其塔廟者。唯約滅後。亦同法華。乃至舉一手等。

皆已成佛道。

佛子。我今告汝。設有眾生見聞於佛。業障纏覆。不生信樂。亦種善根。無空過者。乃至究竟入於涅槃。

第二明不信益者。此明益深。如來祕藏經。明罵藥服之得力。罵沉燒之還香。罵佛猶勝敬諸外道。若爾。豈無罵罪。罵罪非無。今語遠益。故法華云。跋陀婆羅等罵常不輕。千劫於阿鼻地獄受大苦惱。畢是罪已。還遇常不輕菩薩教化涅槃。喻以毒塗之鼓。若聞不聞。無不死者。故菩薩之名。起自聞謗之日。謗尙遠益。況深信耶。況解行耶。況證悟耶。弘

持之者勉思此文。

佛子。菩薩摩訶薩。應如是知於如來所見聞親近所種善根。悉離一切諸不善法。具足善法。

第三結示可知。第十見聞益竟。

佛子。如來以一切譬喻說種種事。無有譬喻能說此法。何以故。心智路絕。不思議故。諸佛菩薩。但隨眾生心。令其歡喜。爲說譬喻。非是究竟。

第二總以結酬揀喻異法。上來性起請說因喻。普賢依請明十出現。皆借象取譬。意顯佛旨深玄。深玄之旨。尚不可以智知。豈言象之能及。故令外忘。

言象內絕思求。則庶幾於出現之旨。

佛子。此法門名爲如來祕密之處。名一切世間所不能知。名入如來印。名開大智門。名示現如來種性。名成就一切菩薩。名一切世間所不能壞。名一向隨順如來境界。名能淨一切諸眾生界。名演說如來根本實性不思議究竟法。

大文第五顯名受持分。於中分二。先長行。後偈頌。今準晉經。此前有諸菩薩發二種問。謂何名此經。云何奉持。今但有答卽分爲二。先顯名。後佛子此法門下。明受持。令知總名。尋名求旨。識受持法。依

之修持故。今初有十名。分爲五對。一內深外絕對。謂內證三德祕藏故。外則凡小不能測故。二證寂開智對。三現果成因對。謂性淨萬德。卽是佛種。今十門出現。卽示現義。四越世順佛對。世尙不知。安能被壞。此十通是佛分齊境。五淨機演實對。知生佛同源。則能淨故。隨緣不變之性。諸佛本故。而性相無礙。因果圓融。爲不思議。過此更無爲究竟法。前九別義。後一總該。

佛子。此法門如來不爲餘眾生說。唯爲趣向大乘菩薩說。唯爲乘不思議乘菩薩說。此法門不入一切餘

三十一
三十一
眾生手。唯除諸菩薩摩訶薩。佛子。譬如轉輪聖王所有七寶。因此寶故。顯示輪王。此寶不入餘眾生手。唯除第一夫人所生太子。具足成就聖王相者。若轉輪王無此太子。具眾德者。王命終後。此諸寶等於七日中悉皆散滅。佛子。此經珍寶亦復如是。不入一切餘眾生手。唯除如來法王真子。生如來家。種如來相。諸善根者。佛子。若無此等佛之真子。如是法門不久散滅。何以故。一切二乘不聞此經。何況受持讀誦書寫分別解說。唯諸菩薩乃能如是。

第二明受持中二。先辨定法器。後是故菩薩下。舉

益勸修。今初。有法喻合。法中二。先標器非器。非器不爲。所謂權小乘。可思議乘。歷次修故。名餘眾生。是器則爲。所謂圓機。不揀凡聖。趣向大乘。揀於小乘。不思議乘。揀於權乘。一運一切運。十信滿心。卽攝諸位圓融無礙。名不思議乘。後此法門下。明受非受。釋上爲不爲。有圓信手。能受眾行。故上爲之。權小於斯。不盡能受。是故不爲。法集經云。是經雖行。闍浮提。於能信深法者。常在如是。眾生心手中。行。亦有以信解行證。皆有手義。以後後破前前。亦是一理。第二喻可知。第三合中。以此經合七寶者。

若無此法。非真佛故。生如來家。合第一夫人所生太子。如來相者。初心頓行佛行故。散滅有二義。一不能受。則教不行故。二不能修行。則行不行故。般若論云。法欲滅時者。修行滅故。下釋散滅所由可知。

是故菩薩摩訶薩聞此法門。應大歡喜。以尊重心恭敬頂受。何以故。菩薩摩訶薩信樂此經。疾得阿耨多羅三藐三菩提故。

第二舉益勸修中三。初略標釋。二佛子設有下。廣釋所由。三佛子至成就如是功德下。總結成益。

佛子。設有菩薩於無量百千億那由他劫。行六波羅蜜。修習種種菩提分法。若未聞此如來不思議大威德法門。或時聞已。不信不解。不順不入。不得名爲真實菩薩。以不能生如來家故。

次廣釋中二。先反顯。後順釋。今初。若不依此經。縱多劫修行。尚非真實。況能疾得菩提。此中設有之言。似當假設。望慈氏讚善財言。餘諸菩薩。於百千萬億那由他劫。乃能滿足菩薩願行。今善財一生。則能淨佛刹等。斯則舉權顯實。非假設也。若實有此不信人者。爲在何位。文無定判。義當三賢。以入

證聖。必信圓故。若約教道。三祇亦未入玄。所以凡夫頓能信者。宿因聞熏。爲種別故。今更不信。當來豈聞。

若得聞此如來無量不可思議無障無礙智慧法門。聞已信解。隨順悟入。當知此人生如來家。隨順一切如來境界。具足一切諸菩薩法。安住一切種智境界。遠離一切諸世間法。出生一切如來所行。通達一切菩薩法性。於佛自在。心無疑惑。住無師法。深入如來無礙境界。

第二順釋中二。先明聞信生家益。後佛子聞此法

已則能下。信聞成行益。今初。先明聞信。後當知下。成益。生如來家者。謂佛法界。於此證會。故名爲生。二以行法爲家。具家法故。三以俗境爲家。世親釋云。由此能令諸佛種性不斷絕故。四遠離非家。五以佛行爲家。十住毗婆沙第一云。今此菩薩行如來道。相續不斷故。六菩薩法性爲家。亦是佛種性故。亦同如來一如境故。七淨當佛家。八住本佛家。九總明因果事理無礙家。前六自分家。後三勝進家。前來初住見心性故。故名生家。四地寄出世故。生道品家。八地無功用故。生無生法忍家。今此通

三兼顯凡夫解心亦名生家。因果無礙故。

佛子。菩薩摩訶薩聞此法已。則能以平等智。知無量法。則能以正直心。離諸分別。則能以勝欲樂。現見諸佛。則能以作意力。入平等虛空界。則能以自在念。行無邊法界。則能以智慧力。具一切功德。則能以自然智。離一切世間垢。則能以菩提心。入一切十方網。則能以大觀察。知三世諸佛同一體性。則能以善根迴向智。普入如是法。不入而入。不於一法而有攀緣。恆以一法觀一切法。

第二信聞成行益。十句分爲五對無礙。一卽觀不

礙於止。二見佛不礙入法。三智行法界。不礙起福。
四智不染世。不礙悲入。五體絕三世。不礙用而迴。
向。不入而入。釋上入義。不於已下。復釋不入而入。
智體卽如。如外無法而可攀緣。故無可入。心行處。
滅。寂然無入。不失照用故。恆以一如而觀諸法。故。
名而入。此二無礙。方爲真人。又一卽是如。便於一。
中已見一切。

佛子。菩薩摩訶薩成就如是功德。少作功力。得無師
自然智。

第三總結可知。

爾時普賢菩薩欲重明此義而說頌言。

見聞供養諸如來 所得功德不可量

於有爲中終不盡 要滅煩惱離眾苦

譬人吞服少金剛 終竟不消要當出

供養十力諸功德 滅惑必至金剛智

如乾草積等須彌 投芥子火悉燒盡

供養諸佛少功德 必斷煩惱至涅槃

雪山有藥名善見 見聞輒觸消眾疾

若有見聞於十力 得勝功德到佛智

第十偈頌。卽屬第十見聞之益。不頌顯名受持。顯

名受持後文自頌。此頌應在揀法異喻之前。以前長行鈎鎖顯名。亦是見聞益故。若迴此偈於現瑞後。與後偈相續。文理甚順。四偈分二。初一頌法說。後三如次頌前三喻。

爾時佛神力故。法如是故。十方各有十不可說百千億那由他世界六種震動。所謂東踊西沒。西踊東沒。南踊北沒。北踊南沒。邊踊中沒。中踊邊沒。十八相動。所謂動。徧動。等徧動。起。徧起。等徧起。踊。徧踊。等徧踊。震。徧震。等徧震。吼。徧吼。等徧吼。擊。徧擊。等徧擊。雨。出。過諸天。一切華雲。一切葢雲。幢雲。幡雲。香雲。鬘雲。塗。

香雲莊嚴具雲。大光明摩尼寶雲。諸菩薩讚歎雲。不可說菩薩各差別身雲。雨成正覺雲。嚴淨不思議世界雲。雨如來言語音聲雲。充滿無邊法界。如此四天下。如來神力。如是示現。令諸菩薩皆大歡喜。周徧十方。一切世界。悉亦如是。

大文第六現瑞證成。於中二。先現瑞。後證成。今初先此界。後類通。動刹等數皆廣多者。法難思故。

是時十方各過八十不可說百千億那由他佛刹微塵數世界外。各有八十不可說百千億那由他佛刹微塵數如來。同名普賢。皆現其前而作是言。善哉佛

子。乃能承佛威力。隨順法性。演說如來出現不思議法。佛子。我等十方八十不可說百千億那由他佛刹微塵數同名諸佛。皆說此法。如我所說。十方世界一切諸佛。亦如是說。

二證成中。先果人證。後因人證。所以具二者。法玄妙故。因果交徹之法故。因圓果滿之法故。前來諸會唯菩薩者。唯因行故。發心品中唯果證者。果之本故。初心成佛。難信受故。隨義各別。所以互無唯斯具二。今初分四。一現身。二而作下。讚說。三佛子我等下。引說證成。兼明結通所說。一說一切說故。

佛子。今此會中十萬佛刹微塵數菩薩摩訶薩。得一切菩薩神通三昧。我等皆與授記。一生當得阿耨多羅三藐三菩提。佛刹微塵數眾生。發阿耨多羅三藐三菩提心。我等亦與授記。於當來世。經不可說佛刹微塵數劫。皆得成佛。同號佛殊勝境界。我等爲令未來諸菩薩聞此法故。皆共護持。如此四天下所度眾生。十方百千億那由他無數無量。乃至不可說不可說法界虛空等一切世界中所度眾生。皆亦如是。

四舉益證成於中四。一得四位果滿益。一生得菩提故。神通三昧。卽十通十定故。二佛刹微塵下得

發心益。與遠記者。不期速成故。又前明一生。卽多之一。此辨多劫。卽一之多。旣一多圓融。何定劫數。妄生多劫。智日不遷。苟執長短。未期成佛。同號佛。殊勝境者。緣佛出現境故。三我等下。護持久遠益。四如此下。結益廣徧。

爾時十方諸佛威神力故。毗盧遮那本願方故。法如是故。善根力故。如來起智不越念故。如來應緣不失時故。隨時覺悟諸菩薩故。往昔所作無失壞故。令得普賢廣大行故。顯現一切智自在故。

第二因人證。於中四。一明集因。前果人證。承前現

瑞之因。故略不敘。今此顯因果別故。廣出集因。文顯可知。

十方各過十不可說百千億那由他佛刹微塵數世界外。各有十不可說百千億那由他佛刹微塵數菩薩。來詣於此。充滿十方一切法界。

二明現身。雖來自十方。而周徧法界。則來無來矣。示現菩薩廣大莊嚴。放大光明網。震動一切十方世界。壞散一切諸魔宮殿。消滅一切諸惡道苦。顯現一切如來威德。歌詠讚歎如來無量差別功德法。普雨一切種種雨。示現無量差別身。領受無量諸佛法。

三辨其德用十句文顯

以佛神力。各作是言。善哉佛子。乃能說此如來不可壞法。佛子。我等一切皆名普賢。各從普光明世界普幢自在如來所而來於此。彼一切處亦說是法。如是文句。如是義理。如是宣說。如是決定。皆同於此。不增不減。我等皆以佛神力故。得如來法故。來詣此處。爲汝作證。如我來此。十方等虛空徧法界一切世界諸四天下。亦復如是。

四發言證成。皆同普賢者。普法同故。界佛名異者。不失主伴故。普光明者常寂光土無不徧故。佛名

普幢自在者。本智高出。無所不摧。事理無礙故。兼示結通所說。

爾時普賢菩薩承佛神力。觀察一切菩薩大眾。欲重明如來出現廣大威德。如來正法不可沮壞。無量善根皆悉不空。諸佛出世。必具一切最勝之法。善能觀察諸眾生心。隨應說法。未曾失時。生諸菩薩無量法光。一切諸佛自在莊嚴。一切如來一身無異。從本大行之所生起。而說頌言。

大文第七以偈總攝。文中二。先敘意。後正頌。前中二。先說儀。後欲重下。辨意。欲重顯前十門出現故。

文有十句。句各一門。而約利生爲次不等。一成正覺。二卽法輪。三是見聞生善。此三正顯益故。四卽出現之法。是前總門。五卽是心約智顯故。六卽圓音。七卽境界。境界無量。生光亦多。八卽涅槃。動寂自在。大般涅槃爲佛莊嚴故。九卽是身約本說一故。十卽是行。果中說因故。

一切如來諸所作

世間譬喻無能及

爲令眾生得悟解

非喻爲喻而顯示

如是微密甚深法

百千萬劫難可聞

精進智慧調伏者

乃得聞此祕奧義

若聞此法生欣慶

彼曾供養無量佛

爲佛加持所攝受

人天讚歎常供養

此爲超世第一財

此能救度諸羣品

此能出生清淨道

汝等當持莫放逸

正頌中四偈。初一頌說分中結酬。以此結包十段
意故。後三頌顯名受持。初句顯名。餘皆勸持。且分
爲三。初偈歎深難聞。次一偈明聞由多善。後偈舉
勝勸持。然此一品。文旨宏奧。能頓能圓。究眾生之
本源。罄諸佛之淵海。根本法輪之內。更處其心。生
在金輪種中。復爲嫡子。妙中之妙。玄中之玄。並居

凡類之心。小功而能速證。安得自欺不受。長淪生死之中。今聞解能欣。尤須自慶昔善。

補義曰。品末顯名受持分。乍觀似結當品諦詳通途大旨。乃都結前七會之文。何以明之。以初會菩提場。舍那如來初成正覺。則踞華藏界。依正二報無盡莊嚴。卽以十身周徧圓音落落無盡無盡。主伴重重。雙垂兩相。二始同時。是則出現十門。一時具足。以此法界圓融性德。生佛等同故。如來證此果德。特爲眾生迷此性德。故特出現世間而爲開導。以不思議事。誠恐眾生難信難入。故此經先舉

果海無礙妙嚴。以勸大心眾生見聞生發信心。所以最初名舉果勸樂生信分也。然於此果德見者聞者雖能生信。且非行不階。若不備解修進之方。則無由取證。故第二會已後。乃最初先開信門。依信發心。備修諸行。故次第行布六位因果。由住行向以登十地。乃至等妙二覺。先則行布位次。爲差別因果。次明依平等法界修普賢行。以至出現妙覺。爲平等因果。故此出現十門。乃都收前二種因行以成極果。以爲究竟。故結云。此如來無量不可思議無障無礙智慧法門。聞已信解隨順悟人。當

知此人生如來家。是則由信生解。然後依解起行。故判前六會爲修因契果生解分。故十信滿心云。知一切法卽心自性。成就慧身。不由他悟。名生如來家。此是因該果海。至此勸修經云。聞信生家。此乃果徹因源。如此一期法會所演法門。始終一貫。因果圓融。則一部始終之義已周。於此都結。故瑞證雙呈。如此深觀。豈結當品而已耶。以此經三遍研窮六位因果。然前但說一往。令其信解而已。未爲實說。故後二分乃進修成行。依人證入。方合信行證四門。以爲一乘因果之究竟也。上解如來

出現品竟 下第八三會普光明殿普賢菩薩說
離世間法門卽離世間品。自第五十三卷起。至第
五十九卷止。共一品經。通爲託法進修成行分。

大方廣佛華嚴經綱要卷第五十二

大方廣佛華嚴經綱要卷第五十三

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

第八三會普光明殿。普賢菩薩說離世間法門。自五十三卷起至五十九卷止。共一品經。卽離世間品。

離世間品第三十八之一

三會普光明殿者。以普光明表佛根本普光明智。始因舍那如來於菩提場初成正覺。現法界身雲。

踞華藏世界。卽依此智光。流演普照法界。修多羅。故法界海會。一時普集。身土自他無盡莊嚴。是爲果滿。欲令大心眾生發心修因。證取此果。故初分明舉果勸樂生信分。乃先舉殊勝之果。勸令發起廣大信樂之心。意在於取此果必仗真因故。二會於普光明殿。卽說六位因果。以修因必以信心爲首。故於此會說十信法門。以文殊爲會首。意在要以果智爲我因心。故就普光而說。其住行向地。乃升四天而說者。蓋未起普光三昧。依差別智建立四十位法門。爲差別之因已。故再會普光明殿說。

等妙二覺差別平等二種因果。是借行布行門以顯圓融之德。故十信滿心。卽名成佛者。正顯原以果覺爲本因心。故一位具足一切位。是爲因該果海。及至出現品末。乃結由信發解。是爲果徹因源。故第二會名修因契果生解分。意以如是之因。乃取如是之果。此第一番研窮六位因果也。今此不起法會。仍在普光明殿。但換說主。故名三會。非是去而後來重會也。且此一品。乃普慧雲興二百問。備問六位之行。故普賢一以答十。瓶瀉二千酬。通顯前六位中之行。非在位也。故沒位之名以顯稱。

普法界圓融之行。以前位雖說圓融而行布森然。未顯圓融妙義。故此特顯一位具足一切位。位位圓融。該羅融攝。是爲普賢妙行。必以此行方契妙果。以正在行。故此分名托法進修行分也。此乃第二番研窮六位因果也。品名離世間者。世間有三。謂眾生世間。器世間。智正覺世間。而言離者。意謂前列行布六位不出三種世間。未顯離相之行。今以普賢妙行。以了法界性空故。普入諸佛刹土而無刹土相。故離器世間。了眾生究竟性空故。不捨眾生而普作度生事業。故離眾生世間之相。雖

證果海。不捨因門。亦離智正覺世間之相。以此平等妙行。乃是取果真因。故二千答處。一一離相。故以品名標之。

爾時世尊在摩竭提國阿蘭若法菩提場中。普光明殿。坐蓮華藏師子之座。妙悟皆滿。二行永絕。達無相法。住於佛住。得佛平等。到無障處。不可轉法。所行無礙。立不思議。普見三世。身恆充徧。一切國土。智恆明達。一切諸法。了一切行。盡一切疑。無能測身。一切菩薩等所求智。到佛無二。究竟彼岸。具足如來平等解脫。證無中邊。佛平等地。盡於法界。等虛空界。與不可

說百千億那由他佛刹微塵數菩薩摩訶薩俱。皆一生當得阿耨多羅三藐三菩提。各從他方種種國土而共來集。悉具菩薩方便智慧。所謂善能觀察一切眾生。以方便力。令其調伏。住菩薩法。善能觀察一切世界。以方便力。普皆往詣。善能觀察涅槃境界。思惟籌量。永離一切戲論分別。而修妙行。無有間斷。善能攝受一切眾生。善入無量諸方便法。知諸眾生空無所有。而不壞業果。善知眾生心。使諸根境界方便種種差別。悉能受持三世佛法。自得解了。復爲他說。於世出世無量諸法。皆善安住。知其真實。於有爲無爲

一切諸法。悉善觀察。知無有二。於一念中。悉能獲得。三世諸佛所有智慧。於念念中。悉能示現。成等正覺。令一切眾生發心成道。於一眾生心之所緣。悉知一切眾生境界。雖入如來一切智地。而不捨菩薩行。諸所作業智慧方便。而無所作。爲一一眾生住無量劫。而於阿僧祇劫。難可值遇。轉正法輪。調伏眾生。皆不唐捐。三世諸佛清淨行願。悉已具足。成就如是無量功德。一切如來於無邊劫。說不可盡。其名曰。普賢菩薩。普眼菩薩。普化菩薩。普慧菩薩。普見菩薩。普光菩薩。普觀菩薩。普照菩薩。普幢菩薩。普覺菩薩。如是等。

三身系要卷之三
十不可說百千億那由他佛刹微塵數。皆悉成就普
賢行願。深心大願。皆已圓滿。一切諸佛出興世處。悉
能往詣。請轉法輪。善能受持諸佛法眼。不斷一切諸
佛種性。善知一切諸佛興世授記次第。名號國土。成
等正覺。轉於法輪。無佛世界。現身成佛。能令一切雜
染眾生。皆悉清淨。能滅一切菩薩業障。入於無礙清
淨法界。爾時普賢菩薩摩訶薩。入廣大三昧。名佛華
莊嚴。入此三昧時。十方所有一切世界。六種十八相
動。出大音聲。靡不皆聞。然後從其三昧而起。

首序云如來初成正覺云云等者。此卽是最初菩

提場中初成正覺。非是別成。且云不離菩提樹而升四天。此普光法會一向未動。豈有更成之現。然十身普現。一音齊演。如此則正當四天說行布法門時。不妨本會說圓融行門。以法在一時。言不頓彰。故此重敘初成。正顯不動本處。如此妙旨。唯在心會。豈可以情量哉。以此品有別行本。名度世經。故不妨重序。

爾時普慧菩薩知眾已集。問普賢菩薩言。佛子。願爲演說何等爲菩薩摩訶薩依。何等爲奇特想。何等爲行。何等爲善知識。何等爲勤精進。何等爲心得安隱。

三、廣釋要義卷之三十三
何等爲成就眾生。何等爲戒。何等爲自知受記。何等爲入菩薩。何等爲入如來。何等爲入眾生心行。何等爲入世界。何等爲入劫。何等爲說三世。何等爲知三世。何等爲發無疲厭心。何等爲差別智。何等爲陀羅尼。何等爲演說佛。

普慧二百問中。初二十句問十信行。

何等爲發普賢心。何等爲普賢行法。以何等故而起大悲。何等爲發菩提心。因緣。何等爲於善知識起尊重心。何等爲清淨。何等爲諸波羅蜜。何等爲智隨覺。何等爲證知。何等爲力。何等爲平等。何等爲佛法實。

義句。何等爲說法。何等爲持。何等爲辯才。何等爲自在。何等爲無著性。何等爲平等心。何等爲出生智慧。何等爲變化。

二。二十句問十住行。

何等爲力持。何等爲得大欣慰。何等爲深入佛法。何等爲依止。何等爲發無畏心。何等爲發無疑惑心。何等爲不思議。何等爲巧密語。何等爲巧分別智。何等爲入三昧。何等爲徧入。何等爲解脫門。何等爲神通。何等爲明。何等爲解脫。何等爲園林。何等爲宮殿。何等爲所樂。何等爲莊嚴。何等爲發不動心。何等爲不

捨深大心。何等爲觀察。何等爲說法。何等爲清淨。何等爲印。何等爲智光照。何等爲無等住。何等爲無下劣心。何等爲如山增上心。何等爲入無上菩提如海智。

三。三十句。問十行行。

何等爲如寶住。何等爲發如金剛大乘誓願心。何等爲大發起。何等爲究竟大事。何等爲不壞信。何等爲授記。何等爲善根迴向。何等爲得智慧。何等爲發無邊廣大心。何等爲伏藏。何等爲律儀。何等爲自在。何等爲無礙用。何等爲眾生無礙用。何等爲刹無礙用。

何等爲法無礙用。何等爲身無礙用。何等爲願無礙用。何等爲境界無礙用。何等爲智無礙用。何等爲神通無礙用。何等爲神力無礙用。何等爲力無礙用。何等爲遊戲。何等爲境界。何等爲力。何等爲無畏。何等爲不共法。何等爲業。何等爲身。

四。二十九句。問十迴向行。

何等爲身業。何等爲身。何等爲語。何等爲淨修語業。何等爲得守護。何等爲成辦大事。何等爲心。何等爲發心。何等爲周徧心。何等爲諸根。何等爲深心。何等爲增上深心。何等爲勤修。何等爲決定解。何等爲決

定解入世界。何等爲決定解入衆生界。何等爲習氣。何等爲取。何等爲修。何等爲成就佛法。何等爲退失佛法道。何等爲離生道。何等爲決定法。何等爲出生佛法道。何等爲大丈夫名號。何等爲道。何等爲無量道。何等爲助道。何等爲修道。何等爲莊嚴道。何等爲足。何等爲手。何等爲腹。何等爲藏。何等爲心。何等爲被甲。何等爲器仗。何等爲首。何等爲眼。何等爲耳。何等爲鼻。何等爲舌。何等爲身。何等爲意。何等爲行。何等爲住。何等爲坐。何等爲卧。何等爲所住處。何等爲所行處。

五。五十句。問十地行。

何等爲觀察。何等爲普觀察。何等爲奮迅。何等爲師
子吼。何等爲清淨施。何等爲清淨戒。何等爲清淨忍。
何等爲清淨精進。何等爲清淨定。何等爲清淨慧。何
等爲清淨慈。何等爲清淨悲。何等爲清淨喜。何等爲
清淨捨。何等爲義。何等爲法。何等爲福德助道具。何
等爲智慧助道具。何等爲明足。何等爲求法。何等爲
明了法。何等爲修行法。何等爲魔。何等爲魔業。何等
爲捨離魔業。何等爲見佛。何等爲佛業。何等爲慢業。
何等爲智業。何等爲魔所攝持。何等爲佛所攝持。何

三身集卷之三十一
等爲法所攝持。何等爲住兜率天所作業。何故於兜率天宮歿。何故現處胎。何等爲現微細趣。何故現初生。何故現微笑。何故示行七步。何故現童子地。何故現處內宮。何故現出家。何故示苦行。云何往詣道場。云何坐道場。何等爲坐道場時奇特相。何故示降魔。何等爲成如來力。云何轉法輪。何故因轉法輪得白淨法。何故如來應正等覺示般涅槃。善哉佛子。如是等法。願爲演說。

六五十一句問因圓果滿行。

爾時普賢菩薩告普慧等諸菩薩言。佛子。菩薩摩訶

薩有十種依。何等爲十。所謂以菩提心爲依。恆不忘失故。以善知識爲依。和合如一故。以善根爲依。修習增長故。以波羅蜜爲依。具足修行故。以一切法爲依。究竟出離故。以大願爲依。增長菩提故。以諸行爲依。普皆成就故。以一切菩薩爲依。同一智慧故。以供養諸佛爲依。信心清淨故。以一切如來爲依。如慈父教誨不斷故。是爲十。若諸菩薩安住此法。則得爲如來無上大智所依處。佛子。菩薩摩訶薩有十種奇特想。何等爲十。所謂於一切善根。生自善根想。於一切善根。生菩提種子想。於一切眾生。生菩提器想。於一切

願。生自願想。於一切法。生出離想。於一切行。生自行想。於一切法。生佛法想。於一切語言法。生語言道想。於一切佛。生慈父想。於一切如來。生無二想。是爲十。若諸菩薩安住此法。則得無上善巧想。佛子。菩薩摩訶薩有十種行。何等爲十。所謂一切眾生行。普令成熟故。一切求法行。咸悉修學故。一切善根行。悉使增長故。一切三昧行。一心不亂故。一切智慧行。無不了知故。一切修習行。無不能修故。一切佛刹行。皆悉莊嚴故。一切善友行。恭敬供養故。一切如來行。尊重承事。故。一切神通行。變化自在故。是爲十。若諸菩薩安

住此法。則得如來無上大智慧行。佛子。菩薩摩訶薩有十種善知識。何等爲十。所謂令住菩提心善知識。令生善根善知識。令行諸波羅蜜善知識。令解說一切法善知識。令成熟一切眾生善知識。令得決定辯才善知識。令不著一切世間善知識。令於一切劫修行無厭倦善知識。令安住普賢行善知識。令入一切佛智所入善知識。是爲十。佛子。菩薩摩訶薩有十種勤精進。何等爲十。所謂教化一切眾生勤精進。深入一切法勤精進。嚴淨一切世界勤精進。修行一切菩薩所學勤精進。滅除一切眾生惡勤精進。止息一切

三惡道苦勤精進。摧破一切眾魔勤精進。願爲一切
眾生作清淨眼。勤精進。供養一切諸佛勤精進。令一
切如來皆悉歡喜勤精進。是爲十。若諸菩薩安住此
法。則得具足如來無上精進。波羅蜜佛子。菩薩摩訶
薩有十種心得安隱。何等爲十。所謂自住菩提心。亦
當令他住菩提心。心得安隱。自究竟離忿諍。亦當令
他離忿諍。心得安隱。自離凡愚法。亦令他離凡愚法。
心得安隱。自勤修善根。亦令他勤修善根。心得安隱。
自住波羅蜜道。亦令他住波羅蜜道。心得安隱。自生
在佛家。亦當令他生於佛家。心得安隱。自深入無自

性真實法。亦令他入無自性真實法。心得安隱。自不
誹謗一切佛法。亦令他不誹謗一切佛法。心得安隱。
自滿一切智菩提願。亦令他滿一切智菩提願。心得
安隱。自深入一切如來無盡智藏。亦令他入一切如
來無盡智藏。心得安隱。是爲十。若諸菩薩安住此法
則得如來無上大智安隱。佛子。菩薩摩訶薩有十種
成就眾生。何等爲十。所謂以布施成就眾生。以色身
成就眾生。以說法成就眾生。以同行成就眾生。以無
染著成就眾生。以開示菩薩行成就眾生。以熾然示
現一切世界成就眾生。以示現佛法大威德成就眾

生以種種神通變現成就眾生。以種種微密善巧方便成就眾生。是爲十。菩薩以此成就眾生界。佛子。菩薩摩訶薩有十種戒。何等爲十。所謂不捨菩提心戒。遠離二乘地戒。觀察利益一切眾生戒。令一切眾生住佛法戒。修一切菩薩所學戒。於一切法無所得戒。以一切善根迴向菩提戒。不著一切如來身戒。思惟一切法離取著戒。諸根律儀戒。是爲十。若諸菩薩安住此法。則得如來無上廣大戒。波羅蜜。佛子。菩薩摩訶薩有十種受記法。菩薩以此自知受記。何等爲十。所謂以殊勝意發菩提心。自知受記。永不厭捨諸菩

薩行。自知受記。住一切劫行菩薩行。自知受記。修一切佛法。自知受記。於一切佛教一向深信。自知受記。修一切善根皆令成就。自知受記。置一切眾生於佛菩提。自知受記。於一切善知識和合無二。自知受記。於一切善知識起如來想。自知受記。恆勤守護菩提本願。自知受記。是爲十。佛子。菩薩摩訶薩有十種入。入諸菩薩。何等爲十。所謂入本願。入行。入聚。入諸波羅蜜。入成就。入差別願。入種種解。入莊嚴佛土。入神力自在。入示現受生。是爲十。菩薩以此普入三世一切菩薩。佛子。菩薩摩訶薩有十種入。入諸如來。何等

爲十。所謂入無邊成正覺。入無邊轉法輪。入無邊方便法。入無邊差別音聲。入無邊調伏眾生。入無邊神力自在。入無邊種種差別身。入無邊三昧。入無邊力無所畏。入無邊示現涅槃。是爲十。菩薩以此普入三世一切如來佛子。菩薩摩訶薩有十種入眾修行。何等爲十。所謂入一切眾生過去行。入一切眾生未來行。入一切眾生現在行。入一切眾生善行。入一切眾生不善行。入一切眾生心行。入一切眾生根行。入一切眾生解行。入一切眾生煩惱習氣行。入一切眾生教化調伏時非時行。是爲十。菩薩以此普入一切諸

眾生行。佛子。菩薩摩訶薩有十種入世界。何等爲十。所謂入染世界。入淨世界。入小世界。入大世界。入微塵中世界。入微細世界。入覆世界。入仰世界。入有佛世界。入無佛世界。是爲十。菩薩以此普入十方一切世界。佛子。菩薩摩訶薩有十種入劫。何等爲十。所謂入過去劫。入未來劫。入現在劫。入可數劫。入不可數劫。入可數劫。卽不可數劫。入不可數劫。卽可數劫。入一切劫。卽非劫。入非劫。卽一切劫。入一切劫。卽一念是爲十。菩薩以此普入一切劫。佛子。菩薩摩訶薩有十種說三世。何等爲十。所謂過去世說過去世。過去

世說未來世。過去世說現在世。未來世說過去世。未來世說現在世。未來世說無盡。現在世說過去世。現在世說未來世。現在世說平等。現在世說三世卽一念。是爲十。菩薩以此普說三世佛子。菩薩摩訶薩有十種知三世。何等爲十。所謂知諸安立。知諸語言。知諸談議。知諸軌則。知諸稱謂。知諸制令。知其假名。知其無盡。知其寂滅。知一切空。是爲十。菩薩以此普知一切三世諸法。佛子。菩薩摩訶薩發十種無疲厭心。何等爲十。所謂供養一切諸佛無疲厭心。親近一切善知識無疲厭心。求一切法無疲厭心。聽聞正法無

疲厭心。宣說正法無疲厭心。教化調伏一切眾生無
疲厭心。置一切眾生於佛菩提無疲厭心。於一一世
界經不可說不可說劫行菩薩行。無疲厭心。遊行一
切世界無疲厭心。觀察思惟一切佛法無疲厭心。是
爲十。若諸菩薩安住此法。則得如來無疲厭無上大
智。佛子。菩薩摩訶薩有十種差別智。何等爲十。所謂
知眾生差別智。知諸根差別智。知業報差別智。知受
生差別智。知世界差別智。知法界差別智。知諸佛差
別智。知諸法差別智。知三世差別智。知一切語言道
差別智。是爲十。若諸菩薩安住此法。則得如來無上

廣大差別智。佛子。菩薩摩訶薩有十種陀羅尼。何等爲十。所謂聞持陀羅尼。持一切法不忘失故。修行陀羅尼。如實巧觀一切法故。思惟陀羅尼。了知一切諸法性故。法光明陀羅尼。照不思議諸佛法故。三昧陀羅尼。普於現在一切佛所聽聞正法。心不亂故。圓音陀羅尼。解了不思議音聲語言故。三世陀羅尼。演說三世不可思議諸佛法故。種種辯才陀羅尼。演說無邊諸佛法故。出生無礙耳陀羅尼。不可說佛所說之法。悉能聞故。一切佛法陀羅尼。安住如來力無畏故。是爲十。若諸菩薩欲得此法。當勤修學。佛子。菩薩摩

訶薩說十種佛。何等爲十。所謂成正覺佛。願佛。業報佛。住持佛。涅槃佛。法界佛。心佛。三昧佛。本性佛。隨樂佛。是爲十。

大文初二百句。答十信十門。文有三段。初十種。依已下九門。明自分行滿。次入諸菩薩已下八門。明勝進行圓。三差別智已下三門。明二行究竟。然第二十門末後結云。說十種佛。正顯十信滿心。使得成正覺。所謂知一切法卽心自性。成就慧身。不由他悟。以彼果智爲我初心。故初心行滿。佛果卽圓。正顯因該果海。果徹因源。全泯位相。但顯圓融無

善廣經要卷五十三
一五
礙之行。向後位位前後交徹。全彰普法界行。妙絕
言思。當以觀心深照。乃得其宗。

佛子。菩薩摩訶薩發十種普賢心。何等爲十。所謂發
大慈心。救護一切眾生故。發大悲心。代一切眾生受
苦故。發一切施心。悉捨所有故。發念一切智爲首心。
樂求一切佛法故。發功德莊嚴心。學一切菩薩行故。
發如金剛心。一切處受生不忘失故。發如海心。一切
白淨法悉流入故。發如大山王心。一切惡言皆忍受
故。發安隱心。施一切眾生無怖畏故。發般若波羅蜜
究竟心。巧觀一切法無所有故。是爲十。若諸菩薩安

住此心疾得成就普賢善巧智。佛子。菩薩摩訶薩有十種普賢行法。何等爲十。所謂願住未來一切劫普賢行法。願供養恭敬未來一切佛普賢行法。願安置一切眾生於普賢菩薩行。普賢行法。願積集一切善根普賢行法。願入一切波羅蜜普賢行法。願滿足一切菩薩行普賢行法。願莊嚴一切世界普賢行法。願生一切佛刹普賢行法。願善觀察一切法普賢行法。願於一切佛國土成無上菩提普賢行法。是爲十。若諸菩薩勤修此法。疾得滿足普賢行願。佛子。菩薩摩訶薩以十種觀眾生而起大悲。何等爲十。所謂觀察

眾生無依無怙而起大悲。觀察眾生性不調順而起
大悲。觀察眾生貧無善根而起大悲。觀察眾生長夜
睡眠而起大悲。觀察眾生行不善法而起大悲。觀察
眾生欲縛所縛而起大悲。觀察眾生沒生死海而起
大悲。觀察眾生長嬰疾苦而起大悲。觀察眾生無善
法欲而起大悲。觀察眾生失諸佛法而起大悲。是爲
十。菩薩恆以此心觀察眾生。佛子。菩薩摩訶薩有十
種發菩提心因緣。何等爲十。所謂爲教化調伏一切
眾生故。發菩提心。爲除滅一切眾生苦聚故。發菩提
心。爲與一切眾生具足安樂故。發菩提心。爲斷一切

眾生愚癡故。發菩提心。爲與一切眾生佛智故。發菩提心。爲恭敬供養一切諸佛故。發菩提心。爲隨如來教。令佛歡喜故。發菩提心。爲見一切佛色身相好故。發菩提心。爲入一切佛廣大智慧故。發菩提心。爲顯現諸佛力無所畏故。發菩提心。是爲十。佛子。若菩薩發無上菩提心。爲悟入一切智智故。親近供養善知識時。應起十種心。何等爲十。所謂起給侍心。歡喜心。無違心。隨順心。無異求心。一向心。同善根心。同願心。如來心。同圓滿行心。是爲十。佛子。若菩薩摩訶薩起如是心。則得十種清淨。何等爲十。所謂深心清淨。到

於究竟無失壞故。色身清淨。隨其所宜爲示現故。音聲清淨。了達一切諸語言故。辯才清淨。善說無邊諸佛法故。智慧清淨。捨離一切愚癡暗故。受生清淨。具足菩薩自在力故。眷屬清淨。成就過去同行眾生諸善根故。果報清淨。除滅一切諸業障故。大願清淨。與諸菩薩性無二故。諸行清淨。以普賢乘而出離故。是爲十。佛子。菩薩摩訶薩有十種波羅蜜。何等爲十。所謂施波羅蜜。悉捨一切諸所有故。戒波羅蜜。淨佛戒故。忍波羅蜜。住佛忍故。精進波羅蜜。一切所作不退轉故。禪波羅蜜。念一境故。般若波羅蜜。如實觀察一

切法故。智波羅蜜。入佛力故。願波羅蜜。滿足普賢諸
大願故。神通波羅蜜。示現一切自在用故。法波羅蜜
普入一切諸佛法故。是爲十。若諸菩薩安住此法。則
得具足如來無上大智波羅蜜。佛子。菩薩摩訶薩有
十種智隨覺。何等爲十。所謂一切世界無量差別智
隨覺。一切眾生界不可思議智隨覺。一切諸法一入
種種。種種入一。智隨覺。一切法界廣大智隨覺。一切
虛空界究竟智隨覺。一切世界入過去世智隨覺。一
切世界入未來世智隨覺。一切世界入現在世智隨
覺。一切如來無量行願。皆於一智而得圓滿智隨覺。

三世諸佛皆同一行而得出離智隨覺是爲十。若諸菩薩安住此法。則得一切法自在光明。所願皆滿。於一念頃。悉能解了一切佛法。成等正覺。佛子。菩薩摩訶薩有十種證知。何等爲十。所謂知一切法一相。知一切法無量相。知一切法在一念。知一切眾生心行無礙。知一切眾生諸根平等。知一切眾生煩惱習氣。知一切眾生心使行。知一切眾生善不善行。知一切菩薩願行自在住持變化。知一切如來具足十力。成等正覺。是爲十。若諸菩薩安住此法。則得一切法善巧方便。佛子。菩薩摩訶薩有十種力。何等爲十。所

謂入一切法自性力。入一切法如化力。入一切法如幻力。入一切法皆是佛法力。於一切法無染著力。於一切法甚明解力。於一切善知識恆不捨離尊重心力。令一切善根順至無上智王力。於一切佛法深信不謗力。令一切智心不退善巧力。是爲十。若諸菩薩安住此法。則具如來無上諸力。佛子菩薩摩訶薩有十種平等。何等爲十。所謂於一切眾生平等。一切法平等。一切刹平等。一切深心平等。一切善根平等。一切菩薩平等。一切願平等。一切波羅蜜平等。一切行平等。一切佛平等。是爲十。若諸菩薩安住此法。則得

一切諸佛無上平等法。佛子。菩薩摩訶薩有十種佛法實義句。何等爲十。所謂一切法但有名。一切法猶如幻。一切法猶如影。一切法但緣起。一切法業清淨。一切法但文字所作。一切法實際。一切法無相。一切法第一義。一切法法界。是爲十。若諸菩薩安住此法。則善入一切智智無上真實義。佛子。菩薩摩訶薩說十種法。何等爲十。所謂說甚深法。說廣大法。說種種法。說一切智法。說隨順波羅蜜法。說出生如來力法。說三世相應法。說令菩薩不退法。說讚歎佛功德法。說一切菩薩學。一切佛平等。一切如來境界相應法。

是爲十。若諸菩薩安住此法。則得如來無上巧說法。佛子。菩薩摩訶薩有十種持。何等爲十。所謂持所集一切福德善根。持一切如來所說法。持一切譬喻。持一切法理趣門。持一切出生陀羅尼門。持一切除疑惑法。持成就一切菩薩法。持一切如來所說平等三昧門。持一切法照明門。持一切諸佛神通遊戲力。是爲十。若諸菩薩安住此法。則得如來無上大智住持力。佛子。菩薩摩訶薩有十種辯才。何等爲十。所謂於一切法無分別辯才。於一切法無所作辯才。於一切法無所著辯才。於一切法了達空辯才。於一切法無

疑暗辯才。於一切法佛加被辯才。於一切法自覺悟
辯才。於一切法文句差別善巧辯才。於一切法真實
說辯才。隨一切眾生心令歡喜辯才。是爲十。若諸菩
薩安住此法。則得如來無上巧妙辯才。佛子。菩薩摩
訶薩有十種自在。何等爲十。所謂教化調伏一切眾
生自在。普照一切法自在。修一切善根行自在。廣大
智自在。無所依戒自在。一切善根迴向菩提自在。精
進不退轉自在。智慧摧破一切眾魔自在。隨所樂欲
令發菩提心自在。隨所應化現成正覺自在。是爲十。
若諸菩薩安住此法。則得如來無上大智自在。佛子。

菩薩摩訶薩有十種無著。何等爲十。所謂於一切世界無著。於一切眾生無著。於一切法無著。於一切所作無著。於一切善根無著。於一切受生處無著。於一切願無著。於一切行無著。於一切菩薩無著。於一切佛無著。是爲十。若諸菩薩安住此法。則能速轉一切眾想。得無上清淨智慧。佛子。菩薩摩訶薩有十種平等心。何等爲十。所謂積集一切功德平等心。發一切差別願平等心。於一切眾生身平等心。於一切眾生意報平等心。於一切法平等心。於一切淨穢國土平等心。於一切眾生解平等心。於一切行無所分別平等心。

等心。於一切佛力無畏平等心。於一切如來智慧平等心。是爲十。若諸菩薩安住其中。則得如來無上大平等心。佛子。菩薩摩訶薩有十種出生智慧。何等爲十。所謂知一切眾生解出生智慧。知一切佛刹種種差別出生智慧。知十方網分齊出生智慧。知覆仰等一切世界出生智慧。知一切法一性種種性廣大住出生智慧。知一切種種身出生智慧。知一切世間顛倒妄想悉無所著出生智慧。知一切法究竟皆以一道出離出生智慧。知如來神力能入一切法界出生智慧。知三世一切眾生佛種不斷出生智慧。是爲十。

若諸菩薩安住此法。則於諸法無不了達。佛子。菩薩摩訶薩有十種變化。何等爲十。所謂一切眾生變化。一切身變化。一切刹變化。一切供養變化。一切音聲變化。一切行願變化。一切教化調伏眾生變化。一切成正覺變化。一切說法變化。一切加持變化。是爲十。若諸菩薩安住此法。則得具足一切無上變化法。

大文第二發普賢心下二十門。答前二十句問。明十住行法。初住有四門。二住二門。三住二門。四住一門。五住一門。六七八九十住各有二門。初住四門中。第一發普賢心。以明初發心住之總相。普賢

心者卽菩提心。謂全以果覺爲本發心之相。前住位中。緣佛十力發心。乃依佛境發廣大心。是依他發。今就果覺。乃自體發。卽見行布圓融之意矣。且初第一發菩提心。則四弘誓願。一念頓發。觀理發心。稱真法界。故爲普發心也。四門通顯發菩提心義。二治地住有二門。明發菩提心。必依善知識。乃得成就。三修行住。具行十度。要在必行故。四證知一門。明生貴住。行。由前修十度。了一切佛法。成等正覺。由了達故。故能證知。證故於聖教中生。故名生貴。五十種力一門。明具足方便住中行。前

十住中云所修諸行。皆爲眾生。不知何行。故此明所修之行。由前了達。故能善入諸法。有大力用。故能具足方便。所謂救護一切眾生也。六有二門。明正心住行。初門十種平等。由前善入諸法。故於一切法平等。以稱真法界一切平等了無二相。故生佛心境事理等。一一融徹等同一味。故名正心。所以等者。以了徧計無實。依他性空。純一圓成。故平等耳。故以第二門佛法實義成之。七有二門。明不退住行。由了達諸法平等。安住真如。故其心不退。而能說自所證法。隨力演說。不但口宣。亦心受持。

故以次門成之。入有二門。明童真住行。由住諸法
平等。證真實義。故得辯才巧妙。得大自在。九有二
門。明王子住中行。由上說法無礙自在。故得無著。
由無著故。深入法際。故得佛平等。前則了法平等。
此則安住平等。故爲學法王處法。

大方廣佛華嚴經綱要卷第五十三

大方廣佛華嚴經綱要卷第五十四

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

上答前二十句問。明十住行法竟。下有三十門答
前十行三十句問。

離世間品第三十八之二

佛子。菩薩摩訶薩有十種力持。何等爲十。所謂佛力
持。法力持。眾生力持。業力持。行力持。願力持。境界力
持。時力持。善力持。智力持。是爲十。若諸菩薩安住此

法。則於一切法得無上自在力持。佛子。菩薩摩訶薩。有十種大欣慰。何等爲十。所謂諸菩薩發如是心。盡未來世所有諸佛出興於世。我當皆得隨逐承事。令生歡喜。如是思惟。心大欣慰。復作是念。彼諸如來出興於世。我當悉以無上供具恭敬供養。如是思惟。心大欣慰。復作是念。我於諸佛所興供養時。彼諸如來。必示誨我法。我悉以深心恭敬聽受。如說修行。於菩薩地。必得已生現生當生。如是思惟。心大欣慰。復作是念。我當於不可說不可說劫。行菩薩行。常與一切諸佛菩薩而得共俱。如是思惟。心大欣慰。復作是念。

我於往昔未發無上大菩提心。有諸怖畏。所謂不活畏。惡名畏。死畏。墮惡道畏。大眾威德畏。自一發心。悉皆遠離。不驚不恐。不畏不懼。不怯不怖。一切眾魔及諸外道。所不能壞。如是思惟。心大欣慰。復作是念。我當令一切眾生成無上菩提。成菩提已。我當於彼佛所。修菩薩行。盡其形壽。以大信心。與所應供佛諸供養具。而爲供養。及涅槃後。各起無量塔。供養舍利。及受持守護所有遺法。如是思惟。心大欣慰。又作是念。十方所有一切世界。我當悉以無上莊嚴而莊嚴之。皆令具足種種奇妙。平等清淨。復以種種大神通力。

住持震動。光明照耀。普使周徧。如是思惟。心大欣慰。
復作是念。我當斷一切眾生疑惑。淨一切眾生欲樂。
啓一切眾生心意。滅一切眾生煩惱。閉一切眾生惡
道門。開一切眾生善趣門。破一切眾生黑闇。與一切
眾生光明。令一切眾生離眾魔業。使一切眾生至安
隱處。如是思惟。心大欣慰。菩薩摩訶薩復作是念。諸
佛如來。如優曇華。難可值遇。於無量劫。莫能一見。我
當於未來世。欲見如來。則便得見。諸佛如來。常不捨
我。恆住我所。令我得見。爲我說法。無有斷絕。旣聞法
已。心意清淨。遠離詔曲。質直無僞。於念念中。常見諸

佛。如是思惟。心大欣慰。復作是念。我於未來當得成佛。以佛神力。於一切世界爲一切眾生各別示現。成等正覺。清淨無畏大師子吼。以本大願。周徧法界。擊大法鼓。雨大法雨。作大法施。於無量劫常演正法。大悲所持。身語意業。無有疲厭。如是思惟。心大欣慰。佛子。是爲菩薩摩訶薩十種大欣慰。若諸菩薩安住此法。則得無上成正覺智慧大欣慰。佛子。菩薩摩訶薩有十種深入佛法。何等爲十。所謂入過去世一切世界。入未來世一切世界。入現在世世界。數世界行。世界說。世界清淨。入一切世界種種性。入一切眾生種

種業報。入一切菩薩種種行。知過去一切佛次第。知未來一切佛次第。知現在十方虛空法界等一切諸佛國土眾會說法調伏。知世間法聲聞法。獨覺法。菩薩法。如來法。雖知諸法皆無分別。而說種種法。悉入法界。無所入故。如其法說。無所取著。是爲十。若諸菩薩安住此法。則得入於阿耨多羅三藐三菩提大智慧甚深性。佛子。菩薩摩訶薩有十種依止。菩薩依此行菩薩行。何等爲十。所謂依止供養一切諸佛。行菩薩行。依止調伏一切眾生。行菩薩行。依止親近一切善友。行菩薩行。依止積集一切善根。行菩薩行。依止

嚴淨一切佛土。行菩薩行。依止不捨一切眾生。行菩薩行。依止深入一切波羅蜜。行菩薩行。依止滿足一切菩薩願。行菩薩行。依止無量菩提心。行菩薩行。依止一切佛菩提。行菩薩行。是爲十。菩薩依此行菩薩行。佛子。菩薩摩訶薩有十種發無畏心。何等爲十。所謂滅一切障礙業。發無畏心。於佛滅後護持正法。發無畏心。降伏一切魔。發無畏心。不惜身命。發無畏心。摧破一切外道邪論。發無畏心。令一切眾生歡喜。發無畏心。令一切眾會皆悉歡喜。發無畏心。調伏一切天龍夜叉。乾闥婆。阿修羅。迦樓羅。緊那羅。摩睺羅伽。

發無畏心。離二乘地。入甚深法。發無畏心。於不可說不可說劫。行菩薩行。心無疲厭。發無畏心。是爲十。若諸菩薩安住此法。則得如來無上大智無所畏心。佛子。菩薩摩訶薩發十種無疑心。於一切佛法。心無疑惑。何等爲十。所謂菩薩摩訶薩發如是心。我當以布施攝一切眾生。以戒忍精進禪定智慧慈悲喜捨攝一切眾生。發此心時。決定無疑。若生疑心。無有是處。是爲第一發無疑心。菩薩摩訶薩又作是念。未來諸佛出興於世。我當一切承事供養。發此心時。決定無疑。若生疑心。無有是處。是爲第二發無疑心。菩薩摩

訶薩又作是念。我當以種種奇妙光明網。周徧莊嚴一切世界。發此心時。決定無疑。若生疑心。無有是處。是爲第三發無疑心。菩薩摩訶薩又作是念。我當盡未來劫。修菩薩行。無數。無量。無邊。無等。不可數。不可稱。不可思。不可量。不可說。不可說。不可說。過諸算數。究竟法界。虛空界。一切眾生。我當悉以無上教化。調伏法而成熟之。發此心時。決定無疑。若生疑心。無有是處。是爲第四發無疑心。菩薩摩訶薩又作是念。我當修菩薩行。滿大誓願。具一切智。安住其中。發此心時。決定無疑。若生疑心。無有是處。是爲第五發無疑

心。菩薩摩訶薩又作是念。我當普爲一切世間行菩薩行。爲一切法清淨光明。照明一切所有佛法。發此心時。決定無疑。若生疑心。無有是處。是爲第六發無疑心。菩薩摩訶薩又作是念。我當知一切法皆是佛法。隨眾生心爲其演說。悉令開悟。發此心時。決定無疑。若生疑心。無有是處。是爲第七發無疑心。菩薩摩訶薩又作是念。我當於一切法得無障礙門。知一切障礙不可得故。其心如是。無有疑惑。住真實性。乃至成於阿耨多羅三藐三菩提。發此心時。決定無疑。若生疑心。無有是處。是爲第八發無疑心。菩薩摩訶薩

又作是念。我當知一切法莫不皆是出世間法。遠離一切妄想顛倒。以一莊嚴而自莊嚴。而無所莊嚴。於此自了。不由他悟。發此心時。決定無疑。若生疑心。無有是處。是爲第九發無疑心。菩薩摩訶薩。又作是念。我當於一切法成最正覺。離一切妄想顛倒故。得一念相應智故。若一若異不可得故。離一切數故。究竟無爲故。離一切言說故。住不可說境界際故。發此心時。決定無疑。若生疑心。無有是處。是爲第十發無疑心。若諸菩薩安住此法。則於一切佛法。心無所疑。佛子。菩薩摩訶薩有十種不可思議。何等爲十。所謂一

切善根不可思議。一切誓願不可思議。知一切法如
幻不可思議。發菩提心。修菩薩行。善根不失。無所分
別。不可思議。雖深入一切法。亦不取滅度。以一切願
未成滿故。不可思議。修菩薩道。而示現降神入胎。誕
生。出家苦行。往詣道場。降伏眾魔。成最正覺。轉正法
輪。入般涅槃。神變自在。無有休息。不捨悲願。救護眾
生。不可思議。雖能示現如來十力神變自在。而亦不
捨等法界心。教化眾生。不可思議。知一切法無相是
相。相是無相。無分別是分別。分別是無分別。非有是
有。有是非有。無作是作。作是無作。非說是說。說是非

說不可思議。知心與菩提等。知菩提與心等。心及菩提與眾生等。亦不生心顛倒。想顛倒。見顛倒。不可思議。於念念中入滅盡定。盡一切漏。而不證實際。亦不盡有漏善根。雖知一切法無漏。而知漏盡。亦知漏滅。雖知佛法卽世間法。世間法卽佛法。而不於佛法中分別世間法。不於世間法中分別佛法。一切諸法悉入法界。無所入故。知一切法皆無二。無變易故。是爲第十不可思議。佛子。是爲菩薩摩訶薩十種不可思議。若諸菩薩安住其中。則得一切諸佛無上不可思議法。佛子。菩薩摩訶薩有十種巧密語。何等爲十。所

謂於一切佛經中巧密語。於一切受生處巧密語。於一切菩薩神通變現成等正覺巧密語。於一切眾生業報巧密語。於一切眾生所起染淨巧密語。於一切法究竟無障礙門巧密語。於一切虛空界一方處。悉有世界。或成或壞。間無空處巧密語。於一切法界一切十方。乃至微細處。悉有如來示現初生。乃至成佛入般涅槃。充滿法界。悉分別見巧密語。見一切眾生平等涅槃。無變易故。而不捨大願。以一切智願未得圓滿。令滿足故。巧密語。雖知一切法不由他悟。而不捨離諸善知識。於如來所。轉加尊敬。與善知識和

合無二。於諸善根。修習種植。迴向安住同一所作。同一體性。同一出離。同一成就。巧密語。是爲十。若諸菩薩安住其中。則得如來無上善巧微密語。佛子。菩薩摩訶薩有十種巧分別智。何等爲十。所謂入一切剎巧分別智。入一切眾生處。巧分別智。入一切眾生心。行巧分別智。入一切眾生根。巧分別智。入一切眾生業報。巧分別智。入一切聲聞行。巧分別智。入一切獨覺行。巧分別智。入一切菩薩行。巧分別智。入一切世間法。巧分別智。入一切佛法。巧分別智。是爲十。若諸菩薩安住其中。則得一切諸佛無上善巧分別諸法。

智佛子。菩薩摩訶薩有十種入三昧。何等爲十。所謂於一切世界入三昧。於一切眾生身入三昧。於一切法入三昧。見一切佛入三昧。住一切劫入三昧。從三昧起。現不思議身入三昧。於一切佛身入三昧。覺悟一切眾生平等入三昧。一念中入一切菩薩三昧。智入三昧。一念中以無礙智成就一切諸菩薩行願。無有休息入三昧。是爲十。若諸菩薩安住其中。則得一切諸佛無上善巧三昧法。佛子。菩薩摩訶薩有十種徧入。何等爲十。所謂眾生徧入。國土徧入。世間種種相徧入。火災徧入。水災徧入。佛徧入。莊嚴徧入。如來

無邊功德身徧入。一切種種說法徧入。一切如來種種供養徧入。是爲十。若諸菩薩安住其中。則得如來無上大智徧入法。佛子。菩薩摩訶薩有十種解脫門。何等爲十。所謂一身周徧一切世界解脫門。於一切世界示現無量種種色相解脫門。以一切世界入一佛刹解脫門。普加持一切眾生界解脫門。以一切佛莊嚴身。充滿一切世界解脫門。於自身中見一切世界解脫門。一念中往一切世界解脫門。於一世界示現一切如來出世解脫門。一身充滿一切法界解脫門。一念中示現一切佛遊戲神通解脫門。是爲十。若

諸菩薩安住其中。則得如來無上解脫門。佛子。菩薩摩訶薩有十種神通。何等爲十。所謂憶念宿命方便智通。天耳無礙方便智通。知他眾生不思議心行方便智通。天眼觀察無有障礙方便智通。隨眾生心現不思議大神通力方便智通。一身普現無量世界方便智通。一念徧入不可說不可說世界方便智通。出生無量莊嚴具。莊嚴不思議世界方便智通。示現不可說變化身方便智通。隨不思議眾生心。於不可說世界現成阿耨多羅三藐三菩提方便智通。是爲十。若諸菩薩安住其中。則得如來無上大善巧神通。爲

一切眾生種種示現。令其修學。佛子。菩薩摩訶薩有十種明。何等爲十。所謂知一切眾生業報善巧智明。知一切眾生境界寂滅清淨。無諸戲論善巧智明。知一切眾生種種所緣。唯是一相。悉不可得。一切諸法皆如金剛善巧智明。能以無量微妙音聲。普聞十方一切世界善巧智明。普壞一切心所染著善巧智明。能以方便示現受生。或不受生善巧智明。捨離一切想受境界善巧智明。知一切法非相非無相。一性無性。無所分別。而能了知種種諸法。於無量劫分別演說。住於法界。成阿耨多羅三藐三菩提善巧智明。菩

薩摩訶薩知一切眾生。生本無有生。了達受生不可得。故而知因。知緣。知事。知境界。知行。知生。知滅。知言說。知迷惑。知離迷惑。知顛倒。知離顛倒。知雜染。知清淨。知生死。知涅槃。知可得。知不可得。知執著。知無執著。知住。知動。知去。知還。知起。知不起。知失壞。知出離。知成熟。知諸根。知調伏。隨其所應。種種教化。未曾忘失。菩薩所行。何以故。菩薩但爲利益眾生。故發阿耨多羅三藐三菩提心。無餘所爲。是故菩薩常化眾生。身無疲倦。不違一切世間所作。是名緣起善巧智明。菩薩摩訶薩於佛無著。不起著心。於法無著。不起著

心。於刹無著。不起著心。於眾生無著。不起著心。不見有眾生而行教化。調伏說法。然亦不捨菩薩諸行。大悲大願。見佛聞法。隨順修行。依於如來種諸善根。恭敬供養。無有休息。能以神力震動十方無量世界。其心廣大等法界故。知種種說法。知眾生數。知眾生差別。知苦生。知苦滅。知一切行皆如影像。行菩薩行。永斷一切受生根本。但爲救護一切眾生。行菩薩行而無所行。隨順一切諸佛種性。發如大山王心。知一切虛妄顛倒。入一切種智門。智慧廣大。不可傾動。當成正覺。於生死海平等濟度。一切眾生善巧智明。是爲

十。若諸菩薩安住其中。則得如來無上大善巧智明。佛子。菩薩摩訶薩有十種解脫。何等爲十。所謂煩惱解脫。邪見解脫。諸取解脫。蘊處界解脫。超二乘解脫。無生法忍解脫。於一切世間一切刹一切眾生一切法離著解脫。無邊住解脫。發起一切菩薩行。入如來無分別地解脫。於一念中。悉能了知一切三世解脫。是爲十。若諸菩薩安住此法。則能施作無上佛事。教化成熟一切眾生。佛子。菩薩摩訶薩有十種園林。何等爲十。所謂生死是菩薩園林。無厭捨故。教化眾生是菩薩園林。不疲倦故。住一切劫是菩薩園林。攝諸

大行故。清淨世界是菩薩園林。自所止住故。一切魔
宮殿是菩薩園林。降伏彼眾故。思惟所聞法。是菩薩
園林。如理觀察故。六波羅密。四攝事。三十七菩提分
法。是菩薩園林。紹繼慈父境界故。十力。四無所畏。十
八不共。乃至一切佛法。是菩薩園林。不念餘法故。示
現一切菩薩威力。自在神通。是菩薩園林。以大神力
轉正法輪。調伏眾生。無休息故。一念於一切處。爲一
切眾生。示成正覺。是菩薩園林。法身周徧。盡虛空一
切世界故。是爲十。若諸菩薩安住此法。則得如來無
上離憂惱大安樂行。佛子。菩薩摩訶薩有十種宮殿。

何等爲十。所謂菩提心是菩薩宮殿。恆不忘失故。十善業道福德智慧是菩薩宮殿。教化欲界眾生故。四梵住禪定是菩薩宮殿。教化色界眾生故。生淨居天是菩薩宮殿。一切煩惱不染故。生無色界是菩薩宮殿。令諸眾生離難處故。生雜染世界是菩薩宮殿。令一切眾生斷煩惱故。現處內宮妻子眷屬是菩薩宮殿。成就往昔同行眾生故。現居輪王護世釋梵是菩薩宮殿。爲調伏自在心眾生故。住一切菩薩行遊戲神通皆得自在。是菩薩宮殿。善遊戲諸禪解脫三昧智慧故。一切佛所受無上自在一切智王灌頂記。是

菩薩宮殿。住十力莊嚴。作一切法王自在。故事是爲十。若諸菩薩安住其中。則得法灌頂。於一切世間神力自在。佛子。菩薩摩訶薩有十種所樂。何等爲十。所謂樂正念。心不散亂故。樂智慧。分別諸法故。樂往詣一切佛所。聽法無厭故。樂諸佛。充滿十方無邊際故。樂菩薩自在。爲諸眾生以無量門而現身故。樂諸三昧門。於一三昧門。入一切三昧門故。樂陀羅尼。持法不忘。轉授眾生故。樂無礙辯才。於一文一句。經不可說劫。分別演說。無窮盡故。樂成正覺。爲一切眾生。以無量門示現於身。成正覺故。樂轉法輪。摧滅一切異

道法故。是爲十。若諸菩薩安住此法。則得一切諸佛如來無上法樂。佛子。菩薩摩訶薩有十種莊嚴。何等爲十。所謂力莊嚴。不可壞故。無畏莊嚴。無能伏故。義莊嚴。說不可說義無窮盡故。法莊嚴。八萬四千法聚。觀察演說無忘失故。願莊嚴。一切菩薩所發弘誓無退轉故。行莊嚴。修普賢行而出離故。刹莊嚴。以一切刹作一刹故。普音莊嚴。周徧一切諸佛世界雨法雨故。方持莊嚴。於一切劫行無數行。不斷絕故。變化莊嚴。於一眾生身。示現一切眾生數等身。令一切眾生悉得知見。求一切智。無退轉故。是爲十。若諸菩薩安

住此法。則得如來一切無上法莊嚴。佛子。菩薩摩訶
薩發十種不動心。何等爲十。所謂於一切所有悉皆
能捨不動心。思惟觀察一切佛法不動心。憶念供養
一切諸佛不動心。於一切眾生誓無惱害不動心。普
攝眾生不揀怨親不動心。求一切佛法無有休息不
動心。一切眾生數等不可說不可說劫。行菩薩行。不
生疲厭。亦無退轉不動心。成就有根信。無濁信。清淨
信。極清淨信。離垢信。明徹信。恭敬供養一切佛信。不
退轉信。不可盡信。無能壞信。大歡喜踊躍信。不動心。
成就出生一切智方便道不動心。聞一切菩薩行法。

信受不謗不動心。是爲十。若諸菩薩安住此法。則得無上一切智不動心。佛子。菩薩摩訶薩有十種不捨深大心。何等爲十。所謂不捨成滿一切佛菩提深大心。不捨教化調伏一切眾生深大心。不捨不斷一切諸佛種性深大心。不捨親近一切善知識深大心。不捨供養一切諸佛深大心。不捨專求一切大乘功德法深大心。不捨於一切佛所修行梵行。護持淨戒深大心。不捨親近一切菩薩深大心。不捨求一切佛法方便護持深大心。不捨滿一切菩薩行願。集一切諸佛法深大心。是爲十。若諸菩薩安住其中。則能不捨

一切佛法。佛子。菩薩摩訶薩有十種智慧觀察。何等爲十。所謂善巧分別說一切法智慧觀察。了知三世一切善根智慧觀察。了知一切諸菩薩行自在變化智慧觀察。了知一切諸法義門智慧觀察。了知一切諸佛威力智慧觀察。了知一切陀羅尼門智慧觀察。於一切世界普說正法智慧觀察。入一切法界智慧觀察。知一切十方不可思議智慧觀察。知一切佛法智慧光明。無有障礙。智慧觀察是爲十。若諸菩薩安住其中。則得如來無上大智慧觀察。佛子。菩薩摩訶薩有十種說法。何等爲十。所謂說一切法皆從緣起。

說一切法皆悉如幻。說一切法無有乖諍。說一切法無有邊際。說一切法無所依止。說一切法猶如金剛。說一切法皆悉如如。說一切法皆悉寂靜。說一切法皆悉出離。說一切法皆住一義。本性成就是爲十。若諸菩薩安住其中。則能善巧說一切法。佛子。菩薩摩訶薩有十種清淨。何等爲十。所謂深心清淨。斷疑清淨。離見清淨。境界清淨。求一切智清淨。辯才清淨。無畏清淨。住一切菩薩智清淨。受一切菩薩律儀清淨。具足成就無上菩提。三十二種百福相。白淨法一切善根清淨。是爲十。若諸菩薩安住其中。則得一切如

來無上清淨法。佛子。菩薩摩訶薩有十種印。何等爲十。所謂菩薩摩訶薩知苦苦。壞苦。行苦。專求佛法。不生懈怠。行菩薩行。無有疲懈。不驚不畏。不恐不怖。不捨大願。求一切智。堅固不退。究竟阿耨多羅三藐三菩提。是爲第一印。菩薩摩訶薩見有眾生愚癡狂亂。或以麤弊惡語而相毀辱。或以刀杖瓦石而加損害。終不以此境界。捨菩薩心。但忍辱柔和。專修佛法。住最勝道。入離生位。是爲第二印。菩薩摩訶薩聞說與一切智相應甚深佛法。能以自智深信忍可。解了趣入。是爲第三印。菩薩摩訶薩又作是念。我發深心。求

一切智。我當成佛。得阿耨多羅三藐三菩提。一切眾生流轉五趣。受無量苦。亦當令其發菩提心。深信歡喜。勤修精進。堅固不退。是爲第四印。菩薩摩訶薩。知如來智無有邊際。不以齊限測如來智。菩薩會於無量佛所。聞如來智無有邊際。故能不以齊限測度。一切世間文字所說。皆有齊限。悉不能知如來智慧。是爲第五印。菩薩摩訶薩。於阿耨多羅三藐三菩提。得最勝欲。甚深欲。廣欲。大欲。種種欲。無能勝欲。無上欲。堅固欲。眾魔外道。并其眷屬。無能壞欲。求一切智不退轉欲。菩薩住如是等欲。於無上菩提。畢竟不退。是

爲第六印。菩薩摩訶薩行菩薩行。不顧身命。無能沮壞。發心趣向一切智故。一切智性常現前故。得一切佛智光明故。終不捨離佛菩提。終不捨離善知識。是爲第七印。菩薩摩訶薩若見善男子善女人趣大乘者。令其增長求佛法心。令其安住一切善根。令其攝取一切智心。令其不退無上菩提。是爲第八印。菩薩摩訶薩令一切眾生得平等心。勸令勤修一切智道。以大悲心而爲說法。令於阿耨多羅三藐三菩提永不退轉。是爲第九印。菩薩摩訶薩與三世諸佛同一善根。不斷一切諸佛種性。究竟得至一切智智。是爲

第十印。佛子。是爲菩薩摩訶薩十種印。菩薩以此速成阿耨多羅三藐三菩提。具足如來一切法無上智印。佛子。菩薩摩訶薩有十種智光照。何等爲十。所謂知定當成阿耨多羅三藐三菩提智光照。見一切佛智光照。見一切眾生生死此生彼智光照。解一切修多羅法門智光照。依善知識發菩提心集諸善根智光照。示現一切諸佛智光照。教化一切眾生悉令安住如來地智光照。演說不可思議廣大法門智光照。善巧了知一切諸佛神通威力智光照。滿足一切諸波羅蜜智光照。是爲十。若諸菩薩安住此法。則得一切

諸佛無上智光照。佛子。菩薩摩訶薩有十種無等住。一切眾生聲聞獨覺悉無與等。何等爲十。所謂菩薩摩訶薩雖觀實際而不取證。以一切願未成滿故。是爲第一無等住。菩薩摩訶薩種等法界一切善根而不於中有少執著。是爲第二無等住。菩薩摩訶薩修菩薩行。知其如化。以一切法悉寂滅故。而於佛法不生疑惑。是爲第三無等住。菩薩摩訶薩雖離世間所有妄想。然能作意於不可說劫。行菩薩行。滿足大願。終不中起疲厭之心。是爲第四無等住。菩薩摩訶薩於一切法無所取著。以一切法性寂滅故。而不證涅

槃。何以故。一切智道未成滿故。是爲第五無等住。菩薩摩訶薩。知一切劫。皆即非劫。而真實說一切劫數。是爲第六無等住。菩薩摩訶薩。知一切法。悉無所作。而不捨作道。求諸佛法。是爲第七無等住。菩薩摩訶薩。知三界唯心。三世唯心。而了知其心無量無邊。是爲第八無等住。菩薩摩訶薩。爲一眾生。於不可說劫。行菩薩行。欲令安住一切智地。如爲一眾生。爲一切眾生。悉亦如是。而不生疲厭。是爲第九無等住。菩薩摩訶薩。雖修行圓滿。而不證菩提。何以故。菩薩作如是念。我之所作。本爲眾生。是故我應久處生死。方便

是念。無上菩提廣大難成。我當修行。悉令圓滿。是爲
第六無下劣心。又作是念。我當以無上教化。無上調
伏。教化調伏一切眾生。是爲第七無下劣心。又作是
念。一切世界種種不同。我當以無量身。成等正覺。是
爲第八無下劣心。又作是念。我修菩薩行時。若有眾
生。來從我乞手足耳鼻血肉骨髓妻子象馬。乃至王
位。如是一切。悉皆能捨。不生一念憂悔之心。但爲利
益一切眾生。不求果報。以大悲爲首。大慈究竟。是爲
第九無下劣心。又作是念。三世所有一切諸佛。一切
佛法。一切眾生。一切國土。一切世界。一切三世。一切

虛空界。一切法界。一切語言施設界。一切寂滅涅槃界。如是一切種種諸法。我當以一念相應慧。悉知悉覺。悉見。悉證。悉修。悉斷。然於其中。無分別。離分別。無種種差別。無功德。無境界。非有非無。非一非二。以不二智。知一切二。以無相智。知一切相。以無分別智。知一切分別。以無異智。知一切異。以無差別智。知一切差別。以無世間智。知一切世間。以無世智。知一切世。以無眾生智。知一切眾生。以無執著智。知一切執著。以無住處智。知一切住處。以無雜染智。知一切雜染。以無盡智。知一切盡。以究竟法界智。於一切世界示。

現身以離言音智。示不可說言音。以一自性智。入於
無自性。以一境界智。現種種境界。知一切法不可說
而現大自在言說。證一切智地。爲教化調伏一切眾
生故。於一切世間。示現大神通變化。是爲第十無下
劣心。佛子。是爲菩薩摩訶薩發十種無下劣心。若諸
菩薩安住此心。則得一切最上無下劣佛法。佛子。菩
薩摩訶薩於阿耨多羅三藐三菩提。有十種如山增
上心。何等爲十。佛子。菩薩摩訶薩常作意勤修一切
智法。是爲第一如山增上心。恆觀一切法本性空無
所得。是爲第二如山增上心。願於無量劫行菩薩行。

修一切白淨法。以住一切白淨法故。知見如來無量智慧。是爲第三如山增上心。爲求一切佛法故。等心敬奉諸善知識。無異希求。無盜法心。唯生尊重。未曾有意。一切所有。悉皆能捨。是爲第四如山增上心。若有眾生罵辱毀謗。打棒屠割。苦其形體。乃至斷命。如是等事。悉皆能受。終不因此生動亂心。生瞋害心。亦不退捨大悲弘誓。更令增長。無有休息。何以故。菩薩於一切法。如實出離捨成就故。證得一切諸如來法。忍辱柔和。已自在故。是爲第五如山增上心。菩薩摩訶薩成就增上大功德。所謂天增上功德。人增上功

德。色。增。上。功。德。力。增。上。功。德。眷。屬。增。上。功。德。欲。增。上。功。德。王。位。增。上。功。德。自。在。增。上。功。德。福。德。增。上。功。德。智。慧。增。上。功。德。雖。復。成。就。如。是。功。德。終。不。於。此。而。生。染。著。所。謂。不。著。味。不。著。欲。不。著。財。富。不。著。眷。屬。但。深。樂。法。隨。法。去。隨。法。住。隨。法。趣。向。隨。法。究。竟。以。法。爲。依。以。法。爲。救。以。法。爲。歸。以。法。爲。舍。守。護。法。愛。樂。法。希。求。法。思。惟。法。佛。子。菩。薩。摩。訶。薩。雖。復。具。受。種。種。法。樂。而。常。遠。離。眾。魔。境。界。何。以。故。菩。薩。摩。訶。薩。於。過。去。世。發。如。是。心。我。當。令。一。切。眾。生。皆。悉。永。離。眾。魔。境。界。住。佛。境。故。是。爲。第。六。如。山。增。上。心。菩。薩。摩。訶。薩。爲。求。阿。耨。

多羅三藐三菩提。已於無量阿僧祇劫。行菩薩道。精
勤匪懈。猶謂我今始發阿耨多羅三藐三菩提心。行
菩薩行。亦不驚。亦不怖。亦不畏。雖能一念卽成阿耨
多羅三藐三菩提。然爲眾生故。於無量劫行菩薩行。
無有休息。是爲第七如山增上心。菩薩摩訶薩。知一
切眾生性不和善。難調難度。不能知恩。不能報恩。是
故爲其發大誓願。欲令皆得心意自在。所行無礙。捨
離惡念。不於他所。生諸煩惱。是爲第八如山增上心。
菩薩摩訶薩。復作是念。非他令我發菩提心。亦不待
人助我修行。我自發心集諸佛法。誓期自勉。盡未來

劫行菩薩道。成阿耨多羅三藐三菩提。是故我今修
菩薩行。當淨自心。亦淨他心。當知自境界。亦知他境
界。我當悉與三世諸佛境界平等。是爲第九如山增
上心。菩薩摩訶薩。作如是觀。無有一法修菩薩行。無
有一法滿菩薩行。無有一法教化調伏一切眾生。無
有一法供養恭敬一切諸佛。無有一法於阿耨多羅
三藐三菩提。已成今成當成。無有一法已說今說當
說。說者及法。俱不可得。而亦不捨阿耨多羅三藐三
菩提願。何以故。菩薩求一切法。皆無所得。如是出生
阿耨多羅三藐三菩提。是故於法雖無所得。而勤修

習增上善業。清淨對治。智慧圓滿。念念增長。一切具足。其心於此不驚不怖。不作是念。若一切法皆悉寂滅。我有何義。求於無上菩提之道。是爲第十如山增上心。佛子。是爲菩薩摩訶薩於阿耨多羅三藐三菩提十種如山增上心。若諸菩薩安住其中。則得如來無上大智。山王增上心。佛子。菩薩摩訶薩有十種入阿耨多羅三藐三菩提如海智。何等爲十。所謂入一切無量眾生界。是爲第一如海智。入一切世界而不起分別。是爲第二如海智。知一切虛空界無量無礙。普入十方一切差別世界網。是爲第三如海智。菩薩

摩訶薩善入法界。所謂無礙入。不斷入。不常入。無量入。不生入。不滅入。一切入。悉了知故。是爲第四如海智。菩薩摩訶薩於過去未來現在諸佛菩薩法師聲聞獨覺及一切凡夫所集善根。已集現集當集。三世諸佛於阿耨多羅三藐三菩提。已成今成當成。所有善根。三世諸佛說法調伏一切眾生。已說今說當說。所有善根。於彼一切。皆悉了知。深信隨喜。願樂修習。無有厭足。是爲第五如海智。菩薩摩訶薩於念念中。入過去世。不可說劫。於一劫中。或百億佛出世。或千億佛出世。或百千億佛出世。或無數。或無量。或無邊。

或無等。或不可數。或不可稱。或不可思。或不可量。或不可說。或不可說。不可說。不可說。超過算數。諸佛世尊。出興於世。及彼諸佛道場。眾會聲聞菩薩。說法調伏一切眾生。壽命延促。法住久近。如是一切。悉皆明見。如一劫。一切諸劫。皆亦如是。其無佛劫。所有眾生。有於阿耨多羅三藐三菩提種。諸善根。亦悉了知。若有眾生。善根熟已。於未來世。當得見佛。亦悉了知。如是觀察。過去世。不可說。不可說。劫。心無厭足。是爲第六。如海智菩薩摩訶薩。入未來世。觀察分別一切諸劫。無量無邊。知何劫有佛。何劫無佛。何劫有幾如來出世。一

一如來名號何等。住何世界。世界名何。度幾眾生。壽命幾時。如是觀察。盡未來際。皆悉了知。不可窮盡。而無厭足。是爲第七如海智。菩薩摩訶薩。入現在世。觀察思惟。於念念中。普見十方無邊品類。不可說世界。皆有諸佛。於無上菩提已。成今成當成。往詣道場。菩提樹下。坐吉祥草。降伏魔軍。成阿耨多羅三藐三菩提。從此起已。入於城邑。升天宮殿。說微妙法。轉大法輪。示現神通。調伏眾生。乃至付囑阿耨多羅三藐三菩提法。捨於壽命。入般涅槃。入涅槃已。結集法藏。令久住世。莊嚴佛塔。種種供養。亦見彼世界所有眾生。

值佛聞法。受持諷誦。憶念思惟。增長慧解。如是觀察。普徧十方。而於佛法無有錯謬。何以故。菩薩摩訶薩。了知諸佛皆悉如夢。而能往詣一切佛所。恭敬供養。菩薩爾時不著自身。不著諸佛。不著世界。不著眾會。不著說法。不著劫數。然見佛聞法。觀察世界。入諸劫數。無有厭足。是爲第八如海智。菩薩摩訶薩於不可說不可說劫。一一劫中。供養恭敬不可說不可說無量諸佛。示現自身。歿此生彼。以出過三界一切供具。而爲供養。并及供養菩薩聲聞一切大眾。一一如來般涅槃後。皆以無上供具。供養舍利。及廣行惠施。滿

足眾生。佛子。菩薩摩訶薩以不可思議心。不求報心。究竟心。饒益心。於不可說不可說劫。爲阿耨多羅三藐三菩提故。供養諸佛。饒益眾生。護持正法。開示演說。是爲第九如海智。菩薩摩訶薩於一切佛所。一切菩薩所。一切法師所。一向專求菩薩所說法。菩薩所學法。菩薩所教法。菩薩修行法。菩薩清淨法。菩薩成熟法。菩薩調伏法。菩薩平等法。菩薩出離法。菩薩總持法。得此法已。受持讀誦。分別解說。無有厭足。令無量眾生。於佛法中。發一切智相應心。入真實相。於阿耨多羅三藐三菩提。得不退轉。菩薩如是於不可說

不可說劫。無有厭足。是爲第十如海智。佛子。是爲菩薩摩訶薩十種入阿耨多羅三藐三菩提如海智。若諸菩薩安住此法。則得一切諸佛無上大智慧海。

大文第三。十種力持下有三十門。答前十行三十句問。次第顯十行中行。第一行有三門。二行三行。各有一門。第四行有二門。第五行有六門。六行七行八行九行四位各有二門。第十行有九門。所以用門多少者。檀在初故具三。戒忍通世間故唯一。定慧尊勝故有多門。智中旣多。故般若中略。餘次勝故。但用二門。然此十行。具修十度。名十波羅蜜。

門以莊嚴佛果。福慧兩足。唯此十行。更無別法。然
三乘別教所修。但云六度。未名波羅蜜。以未稱真
故。今此十行十度。以力持爲首者。由前十住證窮
法界。今稱法界起行。故一一皆稱佛行。以法界全
體力持此行。故如大風輪。有力能持世界。今以法
界起智願力。建立眾行。故先明力持。故疏釋云。力
持又名建立義。以盡法界力。建此行。故雖十度次
第不同。總不出此力持一門。故次一門十種大欣
慰。以前檀度一門。融攝一切諸波羅蜜。由見法界
一一融徹。故凡所施皆稱法界。爲無相真行。其行

既真則預欣當成妙果。決定無疑故。然第三門有十種深入。此則既入法界。何待當成。卽是現證。故此一門。專以法施。故入三世間。知種種剎因果體性。及眾生五性差別。雖法界平等。不妨隨機稱性。說種種法。如此乃名真說法者。故此一度。則諸度圓攝。故結云。得入菩提甚深法性。此三門已滿檀度。故成就歡喜行也。二十種依止一門。明饒益行。成戒度。三十種無畏心一門。明無違逆行。成忍度。以依止法界。得大隨順。故於十種難行能行。難忍能忍。境界如空。又何所違逆耶。四十種無疑心下。

二門。明無屈撓。行成進度。由深證法界。則境界如空。故一切難行難忍之事。無所違逆。以自信其心。猶同全剛。決定能壞一切。決定一切無能壞者。故於出真入俗一切行中。利樂有情。直往無礙。決定無疑。由無疑故。則一切所行。真不能留。俗不能礙。心佛眾生。三無差別。不待更融。當體平等。如此誰能屈撓耶。如此精進勇猛。由無屈撓。故權實雙運。二諦融通。一切所行不可思議。故爲攝善行不可思議也。五有六門。十種蜜語等。明無癡亂行。以成禪度。由前無屈撓。行出真入俗。善能利生無礙。故

此初二門明語密。以顯一言演一切法。智巧則善識機宜。次二門所依定體。以十種三昧普入一切利生之處。一時齊徧。無有先後。如大海潮。應不失時。由此體用雙彰。故後二門明解脫神通利生自在。以智巧故無癡。卽定之慧。以徧入故不亂。卽慈之定。由稱真法界。法爾如然。六有二門。明善現行。成慧度。正顯利生之行體。由前以三昧力。普入一切眾生界。所以入者。爲利生故。故今正明於所入法界教化眾生現種種行。然此妙行。必依根本大智爲體。故以十種善巧智。雙照事理。權實雙行。雖

觀生無生。不捨度生。觀緣離緣。不礙隨緣利物。且盡知眾生心行。隨根調伏。於所行所化。一一皆稱法界性平等教化。故得無礙大解脫門。是善現行也。此解脫與上不同。上但寂照二境。不爲法縛。此就行中名大解脫。七有二門。明無著位中行。以成方便度園林者。所遊樂處。十宮殿者。所安適故。由上利生之行。遊於法界眾生界。如遊園林。以眾生界爲安適處。所以如此者。以得根本大智爲體。權智爲用。故遊居自在。以成無礙解。爲有慧方便。故名無著。八有二門。明難得位中行。以成願度。由上

遊於法界。廣化眾生。樂得所化故。內深願樂。以利他行化功歸己。一一行門。盡成己德。故以利生之德。爲己莊嚴。願以德嚴表裏增勝。真難得也。九有二門。明善法位中行。以成力度。由前願樂益深故。行益廣大。以觸處皆真故。外境不動。悲智益增故。內心不捨。故行彌深大。其力廣大。是爲善法。十有九門。明真實位中行。以成智度。此行位收前九行。統歸一法界心。故有十種智。一觀察智。謂善巧觀察一切佛法。二說法智。以觀善巧故。善能說法。三離障智。以稱法性說故。離障清淨。四審決智。以善

巧智。印定諸法。故心決定成佛無疑。爲十智印。五照徹智。由於一切法審決印定故。智光照徹了法無遺。六無等智。由前照徹。故不偏著。雙住理事。無與等故。七無下劣智。既知無與等者。則望上進。於諸勝事。無怯弱心。故無下劣。八高出智。由無下劣。故萬行迥出。直趣菩提。不可傾動。九深廣智。謂不但求升。且行體深廣。包含融攝。如海納百川。融成一味。故此智度一門。融前九行。九度。一一收歸法界。由此勝進。入迴向心。

大方廣佛華嚴經綱要卷第五十四

大方廣佛華嚴經綱要卷第五十五

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

上答前三十句問十行竟。下二十九門。答二十九句問十迴向位中行。

離世間品第三十八之三

佛子。菩薩摩訶薩於阿耨多羅三藐三菩提。有十種如寶住。何等爲十。佛子。菩薩摩訶薩悉能往詣無數世界諸如來所。瞻覲頂禮承事供養。是爲第一如寶

住。於不思議諸如來所。聽聞正法。受持憶念。不令忘失。分別思惟。覺慧增長。如是所作。充滿十方。是爲第一。如寶住。於此利歿。餘處現生。而於佛法。無所迷惑。是爲第二。如寶住。知從一法。出一切法。而能各各分別演說。以一切法。種種義。究竟皆是一義。故是爲第三。如寶住。知厭離煩惱。知止息煩惱。知防護煩惱。知除斷煩惱。修菩薩行。不證實際。究竟到於實際彼岸。方便善巧。善學所學。令往昔願行。皆得成滿。身不疲倦。是爲第五。如寶住。知一切眾生心。所分別皆無處所。而亦說有種種方處。雖無分別。無所造作。爲欲調

伏一切眾生而有修行。而有所作。是爲第六如寶住。知一切法皆同一性。所謂無性。無種種性。無無量性。無可算數性。無可稱量性。無色無相。若一若多。皆不可得。而決定了。知此是諸佛法。此是菩薩法。此是獨覺法。此是聲聞法。此是凡夫法。此是善法。此是不善法。此是世間法。此是出世間法。此是過失法。此是無過失法。此是有漏法。此是無漏法。乃至此是有爲法。此是無爲法。是爲第七如寶住。菩薩摩訶薩求佛不可得。求菩薩不可得。求法不可得。求眾生不可得。而亦不捨調伏眾生。令於諸法成正覺願。何以故。菩薩

摩訶薩善巧觀察。知一切眾生分別。知一切眾生境界。方便化導。令得涅槃。爲欲滿足化眾生願。熾然修行菩薩行故。是爲第八如寶住。菩薩摩訶薩知善巧說法。示現涅槃爲度眾生。所有方便。一切皆是心想建立。非是顛倒。亦非虛誑。何以故。菩薩了知一切諸法三世平等。如如不動。實際無住。不見有一眾生已受化。今受化。當受化。亦自了知無所修行。無有少法。若生若滅。而可得者。而依於一切法。令所願不空。是爲第九如寶住。菩薩摩訶薩於不思議無量諸佛。一佛所聞不可說不可說授記法。名號各異。劫數不

同。從於一劫。乃至不可說不可說劫。常如是聞。聞已修行。不驚不怖。不迷不惑。知如來智不思議故。如來授記。言無二故。自身行願殊勝力故。隨應受化。令成阿耨多羅三藐三菩提。滿等法界一切願故。是爲第十如寶住。佛子。是爲菩薩摩訶薩於阿耨多羅三藐三菩提十種如寶住。若諸菩薩安住此法。則得諸佛無上大智慧寶。佛子。菩薩摩訶薩發十種如金剛大乘誓願心。何等爲十。佛子。菩薩摩訶薩作如是念。一切諸法無有邊際。不可窮盡。我當以盡三世智。普皆覺了。無有遺餘。是爲第一如金剛大乘誓願心。菩薩

摩訶薩又作是念。於一毛端處。有無量無邊眾生。何況一切法界。我當皆以無上涅槃而滅度之。是爲第一。如金剛大乘誓願心。菩薩摩訶薩又作是念。十方世界無量無邊。無有齊限。不可窮盡。我當以諸佛國土。最上莊嚴。莊嚴如是一切世界。所有莊嚴。皆悉真實。是爲第二。如金剛大乘誓願心。菩薩摩訶薩又作是念。一切眾生無量無邊。無有齊限。不可窮盡。我當以一切善根。迴向於彼。無上智光。照耀於彼。是爲第三。如金剛大乘誓願心。菩薩摩訶薩又作是念。一切諸佛無量無邊。無有齊限。不可窮盡。我當以所種善

根迴向供養。悉令周徧。無所闕少。然後我當成阿耨
多羅三藐三菩提。是爲第五如金剛大乘誓願心。佛
子。菩薩摩訶薩。見一切佛。聞所說法。生大歡喜。不著
自身。不著佛身。解如來身。非實非虛。非有非無。非性
非無性。非色非無色。非相非無相。非生非滅。實無所
有。亦不壞有。何以故。不可以一切性相而取著故。是
爲第六如金剛大乘誓願心。佛子。菩薩摩訶薩。或被
眾生訶罵毀訾。搥打楚撻。或截手足。或割耳鼻。或挑
其目。或級其頭。如是一切。皆能忍受。終不因此生恚
害心。於不可說不可說無央數劫。修菩薩行。攝受眾

生恆無廢捨。何以故。菩薩摩訶薩已善觀察一切諸法。無有二相。心不動亂。能捨自身。忍其苦故。是爲第七。如金剛大乘誓願心。佛子。菩薩摩訶薩又作是念。未來世劫無量無邊。無有齊限。不可窮盡。我當盡彼劫於一世界行菩薩道。教化眾生。如一世界。盡法界。虛空界。一切世界。悉亦如是。而心不驚不怖不畏。何以故。爲菩薩道。法應如是。爲一切眾生而修行故。是爲第八。如金剛大乘誓願心。佛子。菩薩摩訶薩又作是念。阿耨多羅三藐三菩提。以心爲本。心若清淨。則能圓滿一切善根。於佛菩提。必得自在。欲成阿耨多

羅三藐三菩提。隨意卽成。若欲除斷一切取緣。住一向道。我亦能得。而我不斷。爲欲究竟佛菩提故。亦不卽證無上菩提。何以故。爲滿本願。盡一切世界行菩薩行。化眾生故。是爲第九如金剛大乘誓願心。佛子。菩薩摩訶薩。知佛不可得。菩提不可得。菩薩不可得。一切法不可得。眾生不可得。心不可得。行不可得。過去不可得。未來不可得。現在不可得。一切世間不可得。有爲無爲不可得。菩薩如是寂靜住。甚深住。寂滅住。無諍住。無言住。無二住。無等住。自性住。如理住。解脫住。涅槃住。實際住。而亦不捨一切大願。不捨薩婆

若心不捨菩薩行。不捨教化眾生。不捨諸波羅蜜。不捨調伏眾生。不捨承事諸佛。不捨演說諸法。不捨莊嚴世界。何以故。菩薩摩訶薩發大願故。雖復了達一切法相。大慈悲心。轉更增長。無量功德。皆具修行。於諸眾生。心不捨離。何以故。一切諸法。皆無所有。凡夫愚迷。不知不覺。我當令彼悉得開悟。於諸法性。分明照了。何以故。一切諸佛。安住寂滅。而以大悲心。於諸世間。說法教化。曾無休息。我今云何。而捨大悲。又我先發廣大誓願心。發決定利益一切眾生心。發積集一切善根心。發安住善巧迴向心。發出生甚深智慧。

心發含受一切眾生心。發於一切眾生平等心。作真實語。不虛誑語。願與一切眾生無上大法。願不斷一切諸佛種性。今一切眾生未得解脫。未成正覺。未具佛法。大願未滿。云何而欲捨離大悲。是爲第十如金剛大乘誓願心。佛子。是爲菩薩摩訶薩發十種如金剛大乘誓願心。若諸菩薩安住此法。則得如來金剛性無上大神通智。佛子。菩薩摩訶薩有十種大發起。何等爲十。佛子。菩薩摩訶薩作如是念。我當供養恭敬一切諸佛。是爲第一大發起。又作是念。我當長養一切菩薩所有善根。是爲第二大發起。又作是念。我

當於一切如來般涅槃後。莊嚴佛塔。以一切華。一切鬘。一切香。一切塗香。一切末香。一切衣。一切蓋。一切幢。一切幡。而供養之。受持守護彼佛正法。是爲第三大發起。又作是念。我當教化調伏一切眾生。令得阿耨多羅三藐三菩提。是爲第四大發起。又作是念。我當以諸佛國土無上莊嚴。而以莊嚴一切世界。是爲第五大發起。又作是念。我當發大悲心。爲一眾生。於一切世界。一一各盡未來際劫。行菩薩行。如爲一眾生。爲一切眾生。悉亦如是。皆令得佛無上菩提。乃至不生一念疲懈。是爲第六大發起。又作是念。彼諸如

來無量無邊。我當於一如來所。經不思議劫。恭敬供養。如於一如來。於一切如來。悉亦如是。是爲第七大發起。菩薩摩訶薩。又作是念。彼諸如來滅度之後。我當爲一一如來所有舍利。各起寶塔。其量高廣。與不可說諸世界等。造佛形像。亦復如是。於不可思議劫。以一切寶幢旛蓋香華衣服。而爲供養。不生一念厭倦之心。爲成就佛法故。爲供養諸佛故。爲教化眾生故。爲護持正法。開示演說故。是爲第八大發起。菩薩摩訶薩。又作是念。我當以此善根。成無上菩提。得入一切諸如來地。與一切如來體性平等。是爲第九大

發起菩薩摩訶薩復作是念。我當成正覺已。於一切世界不可說劫。演說正法。示現不可思議自在神通身語及意。不生疲倦。不離正法。以佛力所持故。爲一切眾生勤行大願故。大慈爲首故。大悲究竟故。達無相法故。住真實語故。證一切法皆寂滅故。知一切眾生悉不可得。而亦不違諸業所作故。與三世佛同一體故。周徧法界。虛空界故。通達諸法無相故。成就不生不滅故。具足一切佛法故。以大願力調伏眾生。作大佛事。無有休息。是爲第十大發起。佛子。是爲菩薩摩訶薩十種大發起。若諸菩薩安住此法。則不斷菩

薩行。具足如來無上大智。佛子。菩薩摩訶薩有十種
究竟大事。何等爲十。所謂恭敬供養一切如來究竟
大事。隨所念眾生。悉能救護。究竟大事。專求一切佛
法。究竟大事。積集一切善根。究竟大事。思惟一切佛
法。究竟大事。滿足一切誓願。究竟大事。成就一切菩
薩行。究竟大事。奉事一切善知識。究竟大事。往詣一
切世界諸如來所。究竟大事。聞持一切諸佛正法。究
竟大事。是爲十。若諸菩薩安住此法。則得阿耨多羅
三藐三菩提。大智慧。究竟事。佛子。菩薩摩訶薩有十
種不壞信。何等爲十。所謂於一切佛不壞信。於一切

佛法不壞信。於一切聖僧不壞信。於一切菩薩不壞信。於一切善知識不壞信。於一切眾生不壞信。於一切菩薩大願不壞信。於一切菩薩行不壞信。於恭敬供養一切諸佛不壞信。於菩薩巧密方便教化調伏一切眾生不壞信。是爲十。若諸菩薩安住此法。則得諸佛無上大智慧不壞信。佛子。菩薩摩訶薩有十種得授記。何等爲十。所謂內有甚深解得授記。能隨順起菩薩諸善根得授記。修廣大行得授記。現前得授記。不現前得授記。因自心證菩提得授記。成就忍得授記。教化調伏眾生得授記。究竟一切劫數得授記。

一切菩薩行自在得授記。是爲十。若諸菩薩安住此法。則於一切諸佛所而得授記。佛子。菩薩摩訶薩有十種善根迴向。菩薩由此能以一切善根悉皆迴向。何等爲十。所謂以我善根同善知識願。如是成就。莫別成就。以我善根同善知識心。如是成就。莫別成就。以我善根同善知識行。如是成就。莫別成就。以我善根同善知識善根。如是成就。莫別成就。以我善根同善知識平等。如是成就。莫別成就。以我善根同善知識念。如是成就。莫別成就。以我善根同善知識清淨。如是成就。莫別成就。以我善根同善知識所住。如是

成就。莫別成就。以我善根同善知識成滿。如是成就。莫別成就。以我善根同善知識不壞。如是成就。莫別成就。是爲十。若諸菩薩安住此法。則得無上善根迴向。佛子。菩薩摩訶薩有十種得智慧。何等爲十。所謂於施自在得智慧。深解一切佛法得智慧。入如來無邊智得智慧。於一切問答中能斷疑得智慧。入於智者義得智慧。深解一切如來。於一切佛法中言音善巧得智慧。深解於諸佛所。種少善根。必能滿足一切白淨法。獲如來無量智得智慧。成就菩薩不思議住得智慧。於一念中。悉能往詣。不可說佛刹得智慧。覺

一切佛菩提。入一切法界。聞持一切佛所說法。深入一切如來種種莊嚴言音。得智慧。是爲十。若諸菩薩安住此法。則得一切諸佛無上現證智。佛子。菩薩摩訶薩有十種發無量無邊廣大心。何等爲十。所謂於一切諸佛所發無量無邊廣大心。觀一切衆生界發無量無邊廣大心。觀一切刹。一切世。一切法界發無量無邊廣大心。觀察一切法皆如虛空。發無量無邊廣大心。觀察一切菩薩廣大行。發無量無邊廣大心。正念三世一切諸佛發無量無邊廣大心。觀不思議諸業果報。發無量無邊廣大心。嚴淨一切佛刹。發無

量無邊廣大心。徧入一切諸佛大會。發無量無邊廣大心。觀察一切如來妙音。發無量無邊廣大心。是爲十。若諸菩薩安住此心。則得一切佛法無量無邊廣大智慧海。佛子。菩薩摩訶薩有十種伏藏。何等爲十。所謂知一切法是起功德行藏。知一切法是正思惟藏。知一切法是陀羅尼照明藏。知一切法是辯才開演藏。知一切法是不可說善覺真實藏。知一切佛自在神通是觀察示現藏。知一切法是善巧出生平等藏。知一切法是常見一切諸佛藏。知一切不思議劫是善了。皆如幻住藏。知一切諸佛菩薩是發生歡喜。

種自在。何等爲十。所謂命自在。於不可說劫住壽命。故。心自在。智慧能入阿僧祇諸三昧故。資具自在。能以無量莊嚴。莊嚴一切世界故。業自在。隨時受報故。受生自在。於一切世界。示現受生故。解自在。於一切世界。見佛充滿故。願自在。隨欲隨時。於諸刹中。成正覺故。神力自在。示現一切大神變故。法自在。示現無邊諸法門故。智自在。於念念中。示現如來十力無畏。成正覺故。是爲十。若諸菩薩安住此法。則得圓滿一切諸佛諸波羅蜜智慧神力。菩提自在。佛子。菩薩摩訶薩有十種無礙用。何等爲十。所謂眾生無礙用。國

土無礙用。法無礙用。身無礙用。願無礙用。境界無礙用。智無礙用。神通無礙用。神力無礙用。力無礙用。佛子。云何爲菩薩摩訶薩眾生等無礙用。佛子。菩薩摩訶薩有十種眾生無礙用。何者爲十。所謂知一切眾生無礙用。知一切眾生但想所持無礙用。爲一切眾生說法未曾失時無礙用。普化現一切眾生界無礙用。置一切眾生於一毛孔中而不迫隘無礙用。爲一切眾生示現他方一切世界。令其悉見無礙用。爲一切眾生示現釋梵護世諸天身無礙用。爲一切眾生示現聲聞辟支佛寂靜威儀無礙用。爲一切

三身相好一切智力成等正覺無礙用。是爲十。佛子。菩薩摩訶薩有十種國土無礙用。何等爲十。所謂一切刹作一刹無礙用。一切刹入一毛孔無礙用。知一切刹無有盡無礙用。一身結跏坐。充滿一切刹無礙用。一身中現一切刹無礙用。震動一切刹不令眾生恐怖無礙用。以一切刹莊嚴具。莊嚴一刹無礙用。以一切刹莊嚴具。莊嚴一切刹無礙用。以一如來一眾會徧一切佛刹。示現眾生無礙用。一切小刹中刹大刹廣刹深刹。仰刹覆刹。側刹正刹。徧諸方網無量差別。以

此普示一切眾生無礙用。是爲十。佛子。菩薩摩訶薩有十種法無礙用。何等爲十。所謂知一切法入一法。一法入一切法。而亦不違眾生心解無礙用。從般若波羅蜜。出生一切法。爲他解說。悉令開悟無礙用。知一切法離文字。而令眾生皆得悟入無礙用。知一切法入一相。而能演說無量法相無礙用。知一切法離言說能爲他說無邊法門無礙用。於一切法善轉。普門字輪無礙用。以一切法入一法門而不相違。於不可說劫說不窮盡無礙用。以一切法悉入佛法。令諸眾生皆得悟解無礙用。知一切法無有邊際無礙用。

知一切法無障礙際。猶如幻網無量差別。於無量劫爲眾生說。不可窮盡無礙用。是爲十。佛子。菩薩摩訶薩有十種身無礙用。何等爲十。所謂以一切眾生身入己身無礙用。以己身入一切眾生身無礙用。一切佛身入一佛身無礙用。一佛身入一切佛身無礙用。一切刹入己身無礙用。以一身充徧一切三世法。示現眾生無礙用。於一身示現無邊身入三昧無礙用。於一身示現眾生數等身成正覺無礙用。於一切眾生身現一眾生身。於一眾生身現一切眾生身無礙用。於一切眾生身示現法身。於法身示現一切眾生

身無礙用。是爲十。佛子。菩薩摩訶薩有十種願無礙用。何等爲十。所謂以一切菩薩願作自願無礙用。以一切佛成菩提願力。示現自成正覺無礙用。隨所化眾生。自成阿耨多羅三藐三菩提無礙用。於一切無邊際劫。大願不斷無礙用。遠離識身不著智身。以自在願。現一切身無礙用。捨棄自身成滿他願無礙用。普教化一切眾生而不捨大願無礙用。於一切劫行菩薩行而大願不斷無礙用。於一毛孔現成正覺以願力故。充徧一切諸佛國土。於不可說不可說世界爲一一眾生如是示現無礙用。說一句法。徧一切法。

界。興大正法雲。耀解脫電光。震實法雷音。雨甘露味雨。以大願力充洽一切諸眾生界無礙用。是爲十。佛子。菩薩摩訶薩有十種境界無礙用。何等爲十。所謂在法界境界而不捨眾生境界無礙用。在佛境界而不捨魔境界無礙用。在涅槃境界而不捨生死境界無礙用。入一切智境界而不斷菩薩種性境界無礙用。住寂靜境界而不捨散亂境界無礙用。住無去無來無戲論無相狀無體性無言說如虛空境界而不捨一切眾生戲論境界無礙用。住諸力解脫境界而不捨一切諸方所境界無礙用。入無眾生際境界而

不捨教化一切眾生無礙用。住禪定解脫神通明智
寂靜境界。而於一切世界示現受生無礙用。住如來
一切行莊嚴成正覺境界。而現一切聲聞辟支佛寂
靜威儀無礙用。是爲十。佛子。菩薩摩訶薩有十種智
無礙用。何等爲十。所謂無盡辯才無礙用。一切總持
無有忘失無礙用。能決定知決定說一切眾生諸根
無礙用於一念中。以無礙智。知一切眾生心之所行
無礙用。知一切眾生欲樂隨眠習氣煩惱病。隨應授
藥無礙用。一念能入如來十力無礙用。以無礙智。知
三世一切劫。及其中眾生無礙用。於念念中現成正

覺示現眾生無有斷絕無礙用。於一眾生想。知一切
眾生業無礙用。於一眾生音。解一切眾生語無礙用。
是爲十。佛子。菩薩摩訶薩有十種神通無礙用。何等
爲十。所謂於一身示現一切世界身無礙用。於一佛
眾會聽受一切佛眾會中所說法無礙用。於一眾生
心念中。成就不可說無上菩提。開悟一切眾生心無
礙用。以一音現一切世界差別言音。令諸眾生各得
解了無礙用。一念中現盡前際一切劫所有業果種
種差別。令諸眾生悉得知見無礙用。一微塵出現廣
大佛刹。無量莊嚴無礙用。令一切世界具足莊嚴無

礙用。普入一切三世無礙用。放大法光明。現一切諸佛。菩提眾生行願無礙用。善守護一切天龍夜叉乾闥婆。阿修羅。迦樓羅。緊那羅。摩睺羅伽。釋梵護世。聲聞獨覺菩薩。所有如來十力。菩薩善根無礙用。是爲十。若諸菩薩得此無礙用。則能普入一切佛法。佛子。菩薩摩訶薩有十種神力無礙用。何等爲十。所謂以不可說世界置一塵中無礙用。於一塵中現等法界一切佛刹無礙用。以一切大海水置一毛孔。周旋往返十方世界。而於眾生無所觸燒無礙用。以不可說世界內自身中。示現一切神通所作無礙用。以一毛

三摩地經卷第二十三
繫不可數金剛圍山持以遊行一切世界。不令眾生
生恐怖心無礙用。以不可說劫作一劫。一劫作不可
說劫。於中示現成壞差別。不令眾生心有恐怖無礙
用。於一切世界現水火風災種種變壞。而不惱眾生
無礙用。一切世界三災壞時。悉能護持一切眾生資
生之具。不令損缺無礙用。以一手持不思議世界擲
不可說世界之外。不令眾生有驚怖想無礙用。說一
切剎同於虛空。令諸眾生悉得悟解無礙用。是爲十
佛子。菩薩摩訶薩有十種力無礙用。何等爲十。所謂
眾生力無礙用。教化調伏不捨離故。剎力無礙用。示

現不可說莊嚴而莊嚴故。法力無礙用。令一切身入
無身故。劫力無礙用。修行不斷故。佛力無礙用。覺悟
睡眠故。行力無礙用。攝取一切菩薩行故。如來力無
礙用。度脫一切眾生故。無師力無礙用。自覺一切諸
法故。一切智力無礙用。以一切智成正覺故。大悲力
無礙用。不捨一切眾生故。是爲十。佛子。如是名爲菩
薩摩訶薩十種無礙用。若有得此十無礙用者。於阿
耨多羅三藐三菩提。欲成不成。隨意無違。雖成正覺
而亦不斷行菩薩行。何以故。菩薩摩訶薩發大誓願
入無邊無礙用門。善巧示現故。佛子。菩薩摩訶薩有

十種遊戲。何等爲十。所謂以眾生身作刹身。而亦不壞眾生身。是菩薩遊戲。以刹身作眾生身。而亦不壞於刹身。是菩薩遊戲。於佛身。示現聲聞獨覺身。而不損減如來身。是菩薩遊戲。於聲聞獨覺身。示現如來身。而不增長聲聞獨覺身。是菩薩遊戲。於菩薩行身。示現成正覺身。而亦不斷菩薩行身。是菩薩遊戲。於成正覺身。示現修菩薩行身。而亦不減成菩提身。是菩薩遊戲。於涅槃界。示現生死身。而不著生死。是菩薩遊戲。於生死界。示現涅槃。亦不究竟入於涅槃。是菩薩遊戲。入於三昧。而示現行住坐臥一切業。亦不

捨三昧正受。是菩薩遊戲。在一佛所聞法受持。其身不動。而以三昧力。於不可說諸佛會中。各各現身。亦不分身。亦不起定。而聞法受持。相續不斷。如是念念於一一三昧身。各出生不可說不可說三昧身。如是次第一切諸劫。猶可窮盡。而菩薩三昧身不可窮盡。是菩薩遊戲。是爲十。若諸菩薩安住此法。則得如來無上大智遊戲。佛子。菩薩摩訶薩有十種境界。何等爲十。所謂示現無邊法界門。令眾生得入。是菩薩境界。示現一切世界無量妙莊嚴。令眾生得入。是菩薩境界。化往一切眾生界。悉方便開悟。是菩薩境界。於

如來身出菩薩身。於菩薩身出如來身。是菩薩境界。於虛空界現世界。於世界現虛空界。是菩薩境界。於生死界現涅槃界。於涅槃界現生死界。是菩薩境界。於一眾語言中。出生一切佛法語言。是菩薩境界。以無邊身現作一身。一身作一切差別身。是菩薩境界。以一身充滿一切法界。是菩薩境界。於一念中。令一切眾生發菩提心。各現無量身。成等正覺。是菩薩境界。是爲十。若諸菩薩安住此法。則得如來無上大智慧境界。佛子。菩薩摩訶薩有十種力。何等爲十。所謂深心力。不雜一切世情故。增上深心力。不捨一切

佛法故。方便力。諸有所作究竟故。智力。了知一切心
行故。願力。一切所求令滿故。行力。盡未來際不斷故。
乘力。能出生一切乘而不捨大乘故。神變力。於一一
毛孔中。各各示現一切清淨世界。一切如來出興世
故。菩提力。令一切眾生發心成佛。無斷絕故。轉法輪
力。說一句法。悉稱一切眾生諸根性欲故。是爲十。若
諸菩薩安住此法。則得諸佛無上一切智十力。佛子。
菩薩摩訶薩有十種無畏。何等爲十。佛子。菩薩摩訶
薩悉能聞持一切言說。作如是念。設有眾生無量無
邊從十方來。以百千大法而問於我。我於彼問不見

微少難可答相。以不見故。心得無畏。究竟到彼大無畏岸。隨其所問。悉能酬對。斷其疑惑。無有怯弱。是爲菩薩第一無畏。佛子。菩薩摩訶薩得如來灌頂無礙辯才。到於一切文字言音。開示祕密究竟彼岸。作如是念。設有眾生無量無邊從十方來。以無量法而問於我。我於彼問。不見微少難可答相。以不見故。心得無畏。究竟到彼大無畏岸。隨其所問。悉能酬對。斷其疑惑。無有恐懼。是爲菩薩第二無畏。佛子。菩薩摩訶薩知一切法空。離我。離我所。無作。無作者。無知者。無命者。無養育者。無補伽羅。離蘊界處。永出諸見。心如

虛空。作如是念。不見眾生有微妙相。能損惱我身語。意業。何以故。菩薩遠離我我所故。不見諸法有少性相。以不見故。心得無畏。究竟到彼大無畏岸。堅固勇猛。不可沮壞。是爲菩薩第三無畏。佛子。菩薩摩訶薩。佛力所護。佛力所持。住佛威儀。所行真實。無有變易。作如是念。我不見有少分威儀。令諸眾生生訶責相。以不見故。心得無畏。於大眾中。安隱說法。是爲菩薩第四無畏。佛子。菩薩摩訶薩。身語意業皆悉清淨。鮮白柔和。遠離眾惡。作如是念。我不自見身語意業。而有少分可訶責相。以不見故。心得無畏。能令眾生住

於佛法。是爲菩薩第五無畏。佛子。菩薩摩訶薩。金剛力士。天龍。夜叉。乾闥婆。阿修羅。帝釋。梵王。四天王等。常隨侍衛。一切如來護念不捨。菩薩摩訶薩作如是念。我不見有眾魔外道。有見眾生。能來障我行菩薩道。少分之相。以不見故。心得無畏。究竟到彼大無畏岸。發歡喜心。行菩薩行。是爲菩薩第六無畏。佛子。菩薩摩訶薩已得成就第一念根。心無忘失。佛所悅可。作如是念。如來所說成菩提道文字句法。我不於中見有少分忘失之相。以不見故。心得無畏。受持一切如來正法。行菩薩行。是爲菩薩第七無畏。佛子。菩薩

摩訶薩智慧方便。悉已通達。菩薩諸力。皆得究竟。常勤教化一切眾生。恆以願心繫佛菩提。而爲悲愍眾生故。成就眾生故。於煩惱濁世。示現受生。種族尊貴。眷屬圓滿。所欲從心。歡悞快樂。而作是念。我雖與此眷屬聚會。不見少相。而可貪著廢我修行禪定解脫。及諸三昧。總持辯才。菩薩道法。何以故。菩薩摩訶薩於一切法。已得自在。到於彼岸。修菩薩行。誓不斷絕。不見世間有一境界。而能惑亂菩薩道者。以不見故。心得無畏。究竟到彼大無畏岸。以大願力。於一切世界。示現受生。是爲菩薩第八無畏。佛子。菩薩摩訶薩

恆不忘失薩婆若心。乘於大乘。行菩薩行。以一切智
大心勢力。示現一切聲聞獨覺寂靜威儀。作如是念。
我不自見當於二乘而取出離少分之相。以不見故。
心得無畏。到彼無上大無畏岸。普能示現一切乘道。
究竟滿足平等大乘。是爲菩薩第九無畏。佛子。菩薩
摩訶薩成就一切諸白淨法。具足善根圓滿神通。究
竟住於愔佛菩提。滿足一切諸菩薩行。於諸佛所。受
一切智灌頂之記。而常化眾生行菩薩道。作如是念。
我不自見有一眾生。應可成熟而不能現諸佛自在
而成熟相。以不見故。心得無畏。究竟到彼大無畏岸。

不斷菩薩行。不捨菩薩願。隨所應化一切眾生。現佛境界而化度之。是爲菩薩第十無畏。佛子。是爲菩薩摩訶薩十種無畏。若諸菩薩安住此法。則得諸佛無上大無畏。而亦不捨菩薩無畏。佛子。菩薩摩訶薩有十種不共法。何等爲十。佛子。菩薩摩訶薩不由他教。自然修行六波羅蜜。常樂大施。不生慳吝。恆持淨戒。無所毀犯。具足忍辱。心不動搖。有大精進。未曾退轉。善入諸禪。永無散亂。巧修智慧。悉除惡見。是爲第一不由他教。隨順波羅蜜道。修六度不共法。佛子。菩薩摩訶薩普能攝受一切眾生。所謂以財及法而行惠。

施正念現前。和顏愛語。其心歡喜。不如實義。令得悟
解。諸佛菩提。無有憎嫌。平等利益。是爲第二。不由他
教。順四攝道。勤攝眾生。不共法。佛子。菩薩摩訶薩善
巧迴向。所謂不求果報迴向。順佛菩提迴向。不著一
切世間禪定三昧迴向。爲利益一切眾生迴向。爲不
斷如來智慧迴向。是爲第三。不由他教。爲諸眾生發
起善根。求佛智慧。不共法。佛子。菩薩摩訶薩到善巧
方便。究竟彼岸。心恆顧復一切眾生。不厭世俗凡愚
境界。不樂二乘出離之道。不著己樂。唯勤化度。善能
入出禪定解脫。於諸三昧。悉得自在。往來生死。如遊

圍觀。未曾暫起疲厭之心。或住魔宮。或爲釋天梵王。世主一切生處。靡不於中而現其身。或於外道眾中。出家而恆遠離一切邪見。一切世間文詞呪術字印。算數。乃至遊戲歌舞之法。悉皆示現。無不精巧。或時示作端正婦人。智慧才能。世中第一。於諸世間出世間法。能問能說。問答斷疑。皆得究竟。一切世間出世間事。亦悉通達。到於彼岸。一切眾生恆來瞻仰。雖現聲聞辟支佛威儀。而不失大乘心。雖念念中示成正覺。而不斷菩薩行。是爲第四。不由他教方便善巧。究竟彼岸不共法。佛子。菩薩摩訶薩善知權實雙行道。

智慧自在。到於究竟。所謂住於涅槃。而示現生死。知無眾生。而勤行教化。究竟寂滅。而現起煩惱。住一堅密智慧法身。而普現無量諸眾生身。常入深禪定。而示受欲樂。常遠離三界。而不捨眾生。常樂法樂。而現有姝女歌詠嬉戲。雖以眾相好莊嚴其身。而示受醜陋貧賤之形。常積集眾善。無諸過惡。而現生地獄畜生餓鬼。雖已到於佛智彼岸。而亦不捨菩薩智身。菩薩摩訶薩成就如是無量智慧。聲聞獨覺尙不能知。何況一切童蒙眾生。是爲第五不由他教權實雙行不共法。佛子。菩薩摩訶薩身口意業。隨智慧行。皆悉

清淨。所謂具足大慈。永離殺心。乃至具足正解。無有邪見。是爲第六不由他教。身口意業。隨智慧行。不共法。佛子。菩薩摩訶薩。具足大悲。不捨眾生。代一切眾生而受諸苦。所謂地獄苦。畜生苦。餓鬼苦。爲利益故。不生勞倦。唯專度脫一切眾生。未曾耽染五欲境界。常爲精勤滅除眾苦。是爲第七不由他教。常起大悲。不共法。佛子。菩薩摩訶薩。常爲眾生之所樂見。梵王帝釋四天王等。一切眾生。見無厭足。何以故。菩薩摩訶薩。久遠世來。行業清淨。無有過失。是故眾生見者。無厭。是爲第八不由他教。一切眾生皆悉樂見。不共

法。佛子。菩薩摩訶薩。於薩婆若大誓莊嚴。志樂堅固。雖處凡夫聲聞獨覺險難之處。終不退失一切智心。明淨妙寶。佛子。如有寶珠。名淨莊嚴。置泥潦中。光色不改。能令濁水。悉皆澄淨。菩薩摩訶薩。亦復如是。雖在凡愚雜濁等處。終不失壞。求一切智清淨寶心。而能令彼諸惡眾生。遠離妄見煩惱穢濁。得求一切智清淨心寶。是爲第九。不由他教。在眾難處。不失一切智心寶。不共法。佛子。菩薩摩訶薩。成就自覺境界智。無師自悟。究竟自在。到於彼岸。離垢法繪。以冠其首。而於善友。不捨親近。於諸如來。常樂尊重。是爲第十。

不由他教。得最上法。不離善知識。不捨尊重佛。不共法。佛子。是爲菩薩摩訶薩十種不共法。若諸菩薩安住其中。則得如來無上廣大不共法。佛子。菩薩摩訶薩有十種業。何等爲十。所謂一切世界業。悉能嚴淨故。一切諸佛業。悉能供養故。一切菩薩業。同種善根故。一切眾生業。悉能教化故。一切未來業。淨未來際攝取故。一切神力業。不離一世界。徧至一切世界故。一切光明業。放無邊色光明。一一光中。有蓮華座。各有菩薩結跏趺坐而顯現故。一切三寶種不斷業。諸佛滅後。守護住持諸佛法故。一切變化業。於一切世

界說法教化諸眾生故。一切加持業。於一念中。隨諸
眾生心之所欲。皆爲示現。令一切願。悉成滿故。是爲
十。若諸菩薩安住此法。則得如來無上廣大業。佛子。
菩薩摩訶薩有十種身。何等爲十。所謂不來身。於一
切世間不受生故。不去身。於一切世間求不得故。不
實身。一切世間如實得故。不虛身。以如實理。示世間
故。不盡身。盡未來際無斷絕故。堅固身。一切眾魔不
能壞故。不動身。眾魔外道不能動故。具相身。示現清
淨百福相故。無相身。法相究竟悉無相故。普至身。與
三世佛同一身故。是爲十。若諸菩薩安住此法。則得

如來無上無盡之身。

大文第四如寶住下二十九門。答二十九句十迴向位中行問。於中初迴向有四門。二三迴向各有二門。四五六七各一門。第八迴向卽十無礙十門。九迴向有三門。第十迴向有四門。言迴向者卽將前所修十波羅蜜行。一一迴向三處。謂迴向眾生。以捨眾生。則菩薩無修行處。次迴向菩提。以願眾生皆至無上菩提故。三迴向實際。謂若不究竟歸於法界究竟實際。皆未離相。則屬有爲。非菩薩稱法界之行故。以眾生無眾生相。卽是菩提。菩提無

得卽歸究竟法界。此乃以願攝行。令行不虛。有歸趣故。若約行布。則十住入理爲空。十行出俗利生爲假。此迴向會歸一心爲中道。今此圓宗不然。總不離法界體用故。此迴向之大意也。今十位中一融攝。今初救護衆生離衆生相迴向四門。一如寶心。明所迴善根可貴圓滿。二如金剛大乘心。卽大願救護。三普發起。卽迴向所爲。四究竟大事。卽所化成滿。已上四門。總明第一迴向。第二不壞信下二門。明第二不壞迴向。初門正明不壞。次門授記。卽迴向行成。第三十種善根下二門。明等一切

佛善根迴向中行。初門正明等佛。以佛爲真善知識。等者同佛無二故。以悲智二心等同佛故。次門得十種智慧。卽迴向行成。第四廣大心一門。明至一切處迴向中行。以智慧如海。無量無邊故。無不至故。第五十種伏藏一門。明無盡功德藏迴向中行。謂於一切法。蘊斯十義。故名爲藏。惑者不見。故名爲伏。一切各十。是爲無盡功德。第六十種律儀一門。卽隨順堅固一切善根迴向中行。謂三聚戒皆順平等法界故。通一切善根。戒根堅固。爲行本故。故云一切善根。皆令究竟。究竟卽堅固也。第七

十自在一門。卽平等隨順一切眾生迴向中行。以
一一善根皆至究竟堅固之地。故隨順眾生得大
自在。第八十無礙用十門。明真如相迴向中行。謂
一一行。如真如無障礙故。故位果云住於此位。得
一切剎平等平等。此十門中。通顯身土自他。若智
若境。一一融通。無障無礙。是其總相。以顯卽法界
體起大用故。廣有多義。略寄十門以顯無盡。九十
種遊戲下三門。明無縛無著迴向中行。以無縛無
著成就普賢自在智用。初門顯任志行成。遊賞自
在。謂於十法界自在現身。出入往來。遊戲無礙。次

門顯於一境界難量不可思議。後門顯用幹能以稱法界智照徹窮源。染淨融通唯隨智轉。故無縛無脫。十十種無畏下四門。明入法界無量迴向中行。由上無縛無著故。普入法界隨類現身說法。自利利他皆得無畏。所以然者。以得法界聞持故。故得無礙辯才。出入二空。示現威儀。三業清淨。故得十王外護。內具正念。外多方便。具一切智。故所行無畏。以此說法自利利他。一一所作。皆稱法界。故得十不共法。謂不與二乘共。皆依性起。亦不與他共。故權實雙行。故所成德體用具足。以此一一行

門皆悉迴向。故成普賢行法無上莊嚴之身。以成
迴向之行。已得其體。卽依此身爲入地行。故初地
卽依此身以起行也。

大方廣佛華嚴經綱要卷第五十五

大方廣佛華嚴經綱要卷第五十六

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

上答前二十九句問。十迴向位中行竟。下五十門。
答前五十句問。明十地位中行相。

離世間品第三十八之四

佛子。菩薩摩訶薩有十種身業。何等爲十。所謂一身
充滿一切世界身業。於一切眾生前。悉能示現身業。
於一切趣。悉能受生身業。遊行一切世界身業。往詣

一切諸佛眾會身業。能以一手普覆一切世界身業。能以一手摩一切世界金剛圍山。碎如微塵身業。於自身中現一切佛刹成壞。示於眾生身業。以一身容受一切眾生界身業。於自身中普現一切清淨佛刹。一切眾生於中成道身業。是爲十。若諸菩薩安住此法。則得如來無上佛業。悉能覺悟一切眾生。佛子。菩薩摩訶薩復有十種身。何等爲十。所謂諸波羅蜜身。悉正修行故。四攝身。不捨一切眾生故。大悲身。代一切眾生受無量苦無疲厭故。大慈身。救護一切眾生故。福德身。饒益一切眾生故。智慧身。與一切佛身同。

一性故。法身永離諸趣受生故。方便身於一切處現前故。神力身示現一切神變故。菩提身隨樂隨時成正覺故。是爲十。若諸菩薩安住此法。則得如來無上大智慧身。佛子。菩薩摩訶薩有十種語。何等爲十。所謂柔軟語。使一切眾生皆安隱故。甘露語。令一切眾生悉清涼故。不誑語。所有言說皆如實故。眞實語。乃至夢中無妄語故。廣大語。一切釋梵四天王等皆尊敬故。甚深語。顯示法性故。堅固語。說法無盡故。正直語。發言易了故。種種語。隨時示現故。開悟一切眾生語。隨其欲樂令解了故。是爲十。若諸菩薩安住此法。

則得如來無上微妙語。佛子。菩薩摩訶薩有十種淨修語業。何等爲十。所謂樂聽聞如來音聲淨修語業。樂聞說菩薩功德淨修語業。不說一切眾生不樂聞語淨修語業。眞實遠離語四過失淨修語業。歡喜踊躍讚歎如來淨修語業。如來塔所高聲讚佛如實功德淨修語業。以深淨心施眾生法淨修語業。音樂歌頌讚歎如來淨修語業。於諸佛所聽聞正法不惜身命淨修語業。捨身承事一切菩薩及諸法師而受妙法淨修語業。是爲十。若菩薩摩訶薩以此十事淨修語業。則得十種守護。何等爲十。所謂天王爲首。一切

天眾而爲守護。龍王爲首。一切龍眾而爲守護。夜叉王爲首。乾闥婆王爲首。阿修羅王爲首。迦樓羅王爲首。緊那羅王爲首。摩睺羅伽王爲首。梵王爲首。一切皆與自己徒眾而爲守護。如來法王爲首。一切法師皆悉守護。是爲十。佛子。菩薩摩訶薩得此守護已。則能成辦十種大事。何等爲十。所謂一切眾生皆令歡喜。一切世界悉能往詣。一切諸根皆能了知。一切勝解悉令清淨。一切煩惱皆令除斷。一切習氣皆令捨離。一切欲樂皆令明潔。一切深心悉使增長。一切法界悉令周徧。一切涅槃普令明見。是爲十。佛子。菩薩

摩訶薩有十種心。何等爲十。所謂如大地心。能持能長。一切眾生諸善根故。如大海心。一切諸佛無量無邊大智法水悉流入故。如須彌山王心。置一切眾生於出世間最上善根處故。如摩尼寶王心。樂欲清淨無雜染故。如金剛心。決定深入一切法故。如金剛圍山心。諸魔外道不能動故。如蓮華心。一切世法不能染故。如優曇鉢華心。一切劫中難值遇故。如淨日心。破暗障故。如虛空心。不可量故。是爲十。若諸菩薩安住其中。則得如來無上大清淨心。佛子。菩薩摩訶薩有十種發心。何等爲十。所謂發我當度脫一切眾生

心。發我當令一切眾生除斷煩惱心。發我當令一切
眾生消滅習氣心。發我當斷除一切疑惑心。發我當
除滅一切眾生苦惱心。發我當除滅一切惡道諸難
心。發我當敬順一切如來心。發我當善學一切菩薩
所學心。發我當於一切世間一一毛端處。現一切佛
成正覺心。發我當於一切世界。擊無上法鼓。令諸眾
生隨其根。欲悉得悟解心。是爲十。若諸菩薩安住其
中。則得如來無上大發起能事心。佛子。菩薩摩訶薩
有十種周徧心。何等爲十。所謂周徧一切虛空心。發
意廣大故。周徧一切法界心。深入無邊故。周徧一切

三世心。一念悉知故。周徧一切佛出現心。於入胎誕生出家成道轉法輪般涅槃悉明了故。周徧一切眾生心。悉知根欲習氣故。周徧一切智慧心。隨順了知法界故。周徧一切無邊心。知諸幻網差別故。周徧一切無生心。不得諸法自性故。周徧一切無礙心。不住自心他心故。周徧一切自在心。一念普現成佛故。是爲十。若諸菩薩安住其中。則得無量無上佛法。周徧莊嚴。佛子。菩薩摩訶薩有十種根。何等爲十。所謂歡喜根。見一切佛信不壞故。希望根。所聞佛法皆悟解故。不退根。一切作事皆究竟故。安住根。不斷一切苦

薩行故。微細根。入般若波羅蜜微妙理故。不休息根。究竟一切眾生事故。如金剛根。證知一切諸法性故。金剛光燄根。普照一切佛境界故。無差別根。一切如來同一身故。無礙際根。深入如來十種力故。是爲十。若諸菩薩安住其中。則得如來無上大智圓滿根。佛子。菩薩摩訶薩有十種深心。何等爲十。所謂不染一切世間法深心。不雜一切二乘道深心。了達一切佛菩提深心。隨順一切智智道深心。不爲一切眾魔外道所動深心。淨修一切如來圓滿智深心。受持一切所聞法深心。不著一切受生處深心。具足一切微細

智深心。修一切諸佛法深心。是爲十。若諸菩薩安住其中。則得一切智無上清淨深心。佛子。菩薩摩訶薩有十種增上深心。何等爲十。所謂不退轉增上深心。積集一切善根故。離疑惑增上深心。解一切如來密語故。正持增上深心。大願大行所流故。最勝增上深心。深入一切佛法故。爲主增上深心。一切佛法自在故。廣大增上深心。普入種種法門故。上首增上深心。一切所作成辦故。自在增上深心。一切三昧神通變化莊嚴故。安住增上深心。攝受本願故。無休息增上深心。成熟一切眾生故。是爲十。若諸菩薩安住此法

則得一切諸佛無上清淨增上深心。佛子。菩薩摩訶
薩有十種勤修。何等爲十。所謂布施勤修。悉捨一切
不求報故。持戒勤修。頭陀苦行。少欲知足。無所欺故。
忍辱勤修。離自他相。忍一切惡。畢竟不生恚害心故。
精進勤修。身語意業。未曾散亂。一切所作。皆不退轉。
至究竟故。禪定勤修。解脫三昧。出現神通。離一切欲
煩惱鬪諍。諸眷屬故。智慧勤修。修習積聚一切功德。
無厭倦故。大慈勤修。知諸眾生無自性故。大悲勤修。
知諸法空。普代一切眾生受苦。無疲厭故。覺悟如來
十力勤修。了達無礙。示眾生故。不退法輪勤修。轉至

一切眾生心故。是爲十。若諸菩薩安住此法。則得如
來無上大智慧勤修。佛子。菩薩摩訶薩有十種決定
解。何等爲十。所謂最上決定解。種植尊重善根故。莊
嚴決定解。出生種種莊嚴故。廣大決定解。其心未曾
狹劣故。寂滅決定解。能入甚深法性故。普徧決定解。
發心無所不及故。堪任決定解。能受佛力加持故。堅
固決定解。摧破一切魔業故。明斷決定解。了知一切
業報故。現前決定解。隨意能現神通故。紹隆決定解。
一切佛所得記故。自在決定解。隨意隨時成佛故。是
爲十。若諸菩薩安住此法。則得如來無上決定解。佛

子。菩薩摩訶薩有十種決定解。知諸世界。何等爲十。
所謂知一切世界。入一世界。知一世界。入一切世界。
知一切世界。一如來身。一蓮華座。皆悉周徧。知一切
世界。皆如虛空。知一切世界。具佛莊嚴。知一切世界。
菩薩充滿。知一切世界。入一毛孔。知一切世界。入一
眾生身。知一切世界。一佛菩提樹。一佛道場。皆悉周
徧。知一切世界。一音普徧。令諸眾生各別了知。心生
歡喜。是爲十。若諸菩薩安住此法。則得如來無上佛
刹廣大決定解。佛子。菩薩摩訶薩有十種決定解。知
眾生界。何等爲十。所謂知一切眾生界。本性無實。知

一切眾生界悉入一眾生身。知一切眾生界悉入菩薩身。知一切眾生界悉入如來藏。知一眾生身普入一切眾生界。知一切眾生界悉堪爲諸佛法器。知一切眾生界隨其所欲爲現釋梵護世身。知一切眾生界隨其所欲爲現聲聞獨覺寂靜威儀。知一切眾生界爲現菩薩功德莊嚴身。知一切眾生界爲現如來相好寂靜威儀開悟眾生。是爲十。若諸菩薩安住此法。則得如來無上大威力決定解。佛子。菩薩摩訶薩有十種習氣。何等爲十。所謂菩提心習氣。善根習氣。教化眾生習氣。見佛習氣。於清淨世界受生習氣。行

習氣願習氣。波羅蜜習氣。思惟平等法習氣。種種境界差別習氣。是爲十。若諸菩薩安住此法。則永離一切煩惱習氣。得如來大智習氣。非習氣智。佛子。菩薩摩訶薩有十種取。以此不斷諸菩薩行。何等爲十。所謂取一切眾生界。究竟教化故。取一切世界。究竟嚴淨故。取如來修菩薩行爲供養故。取善根積集諸佛相好功德故。取大悲滅一切眾生苦故。取大慈與一切眾生一切智樂故。取波羅蜜積集菩薩諸莊嚴故。取善巧方便於一切處。皆示現故。取菩提得無礙智故。略說菩薩取一切法於一切處。悉以明智而現了。

故是爲十。若諸菩薩安住此取。則能不斷諸菩薩行。得一切如來無上無所取法。佛子。菩薩摩訶薩有十種修。何等爲十。所謂修諸波羅蜜。修學。修慧。修義。修法。修出離。修示現。修勤行。匪懈。修成等正覺。修轉正法輪。是爲十。若諸菩薩安住其中。則得無上修。修一切法。佛子。菩薩摩訶薩有十種成就佛法。何等爲十。所謂不離善知識。成就佛法。深信佛語。成就佛法。不謗正法。成就佛法。以無量無盡善根。迴向成就佛法。信解如來境界。無邊際。成就佛法。知一切世界境界。成就佛法。不捨法界境界。成就佛法。遠離諸魔境界。

成就佛法。正念一切諸佛境界成就佛法。樂求如來十力境界成就佛法。是爲十。若諸菩薩安住此法。則得成就如來無上大智慧。佛子。菩薩摩訶薩有十種退失佛法。應當遠離。何等爲十。所謂輕慢善知識。退失佛法。畏生死苦。退失佛法。厭修菩薩行。退失佛法。不樂住世間。退失佛法。耽著三昧。退失佛法。執取善根。退失佛法。誹謗正法。退失佛法。斷菩薩行。退失佛法。樂二乘道。退失佛法。嫌恨諸菩薩。退失佛法。是爲十。若諸菩薩遠離此法。則入菩薩離生道。佛子。菩薩摩訶薩有十種離生道。何等爲十。所謂出生般若波

羅蜜而恆觀察一切眾生。是爲一。遠離諸見而度脫一切見縛眾生。是爲二。不念一切相而不捨一切著相眾生。是爲三。超過三界而常在一切世界。是爲四。永離煩惱而與一切眾生共居。是爲五。得離欲法而常以大悲哀愍一切著欲眾生。是爲六。常樂寂靜而恆示現一切眷屬。是爲七。離世間生而死此生彼起菩薩行。是爲八。不染一切世間法而不斷一切世間所作。是爲九。諸佛菩提已現其前而不捨菩薩一切願行。是爲十。佛子。是爲菩薩摩訶薩十種離生道。出離世間。不與世共。而亦不雜二乘之行。若諸菩薩安

住此法。則得菩薩決定法。佛子。菩薩摩訶薩有十種決定法。何等爲十。所謂決定於如來種族中生。決定於諸佛境界中住。決定了知菩薩所作事。決定安住諸波羅蜜。決定得預如來眾會。決定能顯如來種性。決定安住如來力。決定深入佛菩提。決定與一切如來同一身。決定與一切如來所住無有二。是爲十。佛子。菩薩摩訶薩有十種出生佛法道。何等爲十。所謂隨順善友。是出生佛法道。同種善根故。深信解。是出生佛法道。知佛自在故。發大誓願。是出生佛法道。其心寬廣故。忍自善根。是出生佛法道。知業不失故。

一切劫修行無厭足。是出生佛法道。盡未來際故。阿僧祇世界皆示現。是出生佛法道。成熟眾生故。不斷菩薩行。是出生佛法道。增長大悲故。無量心。是出生佛法道。一念徧一切虛空界故。殊勝行。是出生佛法道。本所修行無失壞故。如來種。是出生佛法道。令一切眾生樂發菩提心。以一切善法資持故。是爲十。若諸菩薩安住此法。則得大丈夫名號。佛子。菩薩摩訶薩有十種大丈夫名號。何等爲十。所謂名爲菩提薩埵。菩提智所生故。名爲摩訶薩埵。安住大乘故。名爲第一薩埵。證第一法故。名爲勝薩埵。覺悟勝法故。名

爲最勝薩埵。智慧最勝故。名爲上薩埵。起上精進故。名爲無上薩埵。開示無上法故。名爲力薩埵。廣知十力故。名爲無等薩埵。世間無比故。名爲不思議薩埵。一念成佛故。是爲十。若諸菩薩得此名號。則成就菩薩道。佛子。菩薩摩訶薩有十種道。何等爲十。所謂一道是菩薩道。不捨獨一菩提心故。二道是菩薩道。出生智慧及方便故。三道是菩薩道。行空無相無願不著三界故。四行是菩薩道。懺除罪障。隨喜福德。恭敬尊重勸請如來。善巧迴向無休息故。五根是菩薩道。安住淨信。堅固不動。起大精進。所作究竟。一向正念。

無異攀緣。巧知三昧。入出方便。善能分別智慧境界。故六通是菩薩道。所謂天眼。悉見一切世界所有眾。色。知諸眾生死此生彼故。天耳。悉聞諸佛說法。受持。憶念廣爲眾生隨根演暢故。他心智。能知他心自在。無礙故。宿命念。憶知過去一切劫數。增長善根故。神足通。隨所應化一切眾生。種種爲現。令樂法故。漏盡智。現證實際。起菩薩行。不斷絕故。七念是菩薩道。所謂念佛。於一毛孔見無量佛。開悟一切眾生心故。念法。不離一如來眾會。於一切如來眾會中親承妙法。隨諸眾生根性欲樂。而爲演說。令悟入故。念僧。恒相

續見。無有休息。於一切世間見菩薩故。念捨了知一切菩薩捨行。增長廣大布施心故。念戒不捨菩提心。以一切善根迴向眾生故。念天常憶念兜率陀天宮。一生補處菩薩故。念眾生智慧方便教化調伏普及一切無間斷故。隨順菩提入聖道。是菩薩道。所謂行正見道。遠離一切諸邪見故。起正思惟。捨妄分別心。常隨順一切智故。常行正語。離語四過。順聖言故。恆修正業。教化眾生。令調伏故。安住正命。頭陀知足。威儀審正。隨順菩提行四聖種。一切過失皆永離故。起正精進。勤修一切菩薩苦行。入佛十力無罣礙故。心

常正念。悉能憶持一切言音。除滅世間散動心。故心常正定。善入菩薩不思議解脫門。於一三昧中。出生一切諸三昧。故入九次第定。是菩薩道。所謂離欲恚害。而以一切語業說法無礙。滅除覺觀。而以一切智覺觀教化眾生。捨離喜愛。而見一切佛。心大歡喜。離世間樂。而隨順出世菩薩道樂。從此不動入無色定。而亦不捨欲色受生。雖住滅一切想受定。而亦不息菩薩行故。學佛十力。是菩薩道。所謂善知是處非處智。善知一切眾生去來現在業報因果智。善知一切眾生上中下根不同。隨宜說法智。善知一切眾生種

種無量性智。善知一切眾生輒中上解差別。令入法
方便智。徧一切世間一切刹。一切三世一切劫。普現
如來形相威儀。而亦不捨菩薩所行智。善知一切諸
禪解脫及諸三昧。若垢若淨。時與非時。方便出生諸
菩薩解脫門智。知一切眾生於諸趣中死此生彼差
別智。於一念中悉知三世一切劫數智。善知一切眾
生樂欲諸使惑習滅盡智。而不捨離諸菩薩行。是爲
十。若諸菩薩安住此法。則得一切如來無上巧方便
道。佛子。菩薩摩訶薩有無量道。無量助道。無量修道。
無量莊嚴道。佛子。菩薩摩訶薩有十種無量道。何等

爲十。所謂虛空無量故。菩薩道亦無量。法界無邊故。菩薩道亦無量。眾生界無盡故。菩薩道亦無量。世界無際故。菩薩道亦無量。劫數不可盡故。菩薩道亦無量。一切眾生語言法無量故。菩薩道亦無量。如來身無量故。菩薩道亦無量。佛音聲無量故。菩薩道亦無量。如來力無量故。菩薩道亦無量。一切智智無量故。菩薩道亦無量。是爲十。佛子。菩薩摩訶薩有十種無量助道。所謂如虛空界無量。菩薩集助道亦無量。如法界無邊。菩薩集助道亦無邊。如眾生界無盡。菩薩集助道亦無盡。如世界無際。菩薩集助道亦無際。如

劫數說不可盡。菩薩集助道亦一切世間說不能盡。如眾生語言法無量。菩薩集助道出生智慧知語言法亦無量。如如來身無量。菩薩集助道徧一切眾生一切刹。一切世。一切劫亦無量。如佛音聲無量。菩薩出一言音周徧法界。一切眾生無不聞知故。所集助道亦無量。如佛力無量。菩薩承如來力積集助道亦無量。如一切智智無量。菩薩積集助道亦如是無有量。是爲十。若諸菩薩安住此法。則得如來無量智慧。佛子。菩薩摩訶薩有十種無量修道。何等爲十。所謂不來不去。修身語意業無動作故。不增不減修。如本

性故。非有非無修。無自性故。如幻如夢。如影如響。如鏡中像。如熱時燄。如水中月。修離一切執著故。空無相無願無作修。明見三界而集福德。不休息故。不可說無言說。離言說修。遠離施設。安立法故。不壞法界修。智慧現知一切法故。不壞眞如實際修。普入眞如實際。虛空際故。廣大智慧修。諸有所作力無盡故。住如來十力。四無所畏。一切智智平等修。現見一切法無疑惑故。是爲十。若諸菩薩安住此法。則得如來一切智無上善巧修。佛子。菩薩摩訶薩有十種莊嚴道。何等爲十。佛子。菩薩摩訶薩不離欲界。入色界無色

界禪定解脫及諸三昧亦不因此而受彼生。是爲第一莊嚴道。智慧現前入聲聞道。不以此道而取出離。是爲第二莊嚴道。智慧現前入辟支佛道而起大悲。無有休息。是爲第三莊嚴道。雖有人天眷屬圍繞百千綵女歌舞侍從。未會暫捨禪定解脫及諸三昧。是爲第四莊嚴道。與一切眾生受諸欲樂共相娛樂。乃至未曾於一念間捨離菩薩平等三昧。是爲第五莊嚴道。已到一切世間彼岸。於諸世法悉無所著。而亦不捨度眾修行。是爲第六莊嚴道。安住正道正智正見。而能示入一切邪道。不取爲實。不執爲淨。令彼眾

生遠離邪法。是爲第七莊嚴道。常善護持如來淨戒。身語意業無諸過失。爲欲教化犯戒眾生。示行一切凡愚之行。雖已具足清淨福德。住菩薩趣。而示生於一切地獄畜生餓鬼及諸險難貧窮等處。令彼眾生皆得解脫。而實菩薩不生彼趣。是爲第八莊嚴道。不由他教。得無礙辯。智慧光明。普能照了一切佛法。爲一切如來神力所持。與一切諸佛同一法身。成就一切堅固大人明淨密法。安住一切平等諸乘。諸佛境界。皆現其前。具足一切世智光明。照見一切諸眾生界。能爲眾生作知法師。而示求正法。未曾休息。雖實

與眾生作無上師。而示行尊敬闍黎和尚。何以故。菩薩摩訶薩。善巧方便。住菩薩道。隨其所應。皆爲示現。是爲第九莊嚴道。善根具足。諸行究竟。一切如來所共灌頂。到一切法自在彼岸。無礙法繪以冠其首。其身徧至一切世界。普現如來無礙之身。於法自在。最上究竟。轉於無礙清淨法輪。一切菩薩自在之法。皆已成就。而爲眾生故。於一切國土。示現受生。與三世諸佛同一境界。而不廢菩薩行。不捨菩薩法。不懈菩薩業。不離菩薩道。不弛菩薩儀。不斷菩薩取。不息菩薩巧方便。不絕菩薩所作事。不厭菩薩生成用。不止。

菩薩住持力。何以故。菩薩欲疾證阿耨多羅三藐三菩提。觀一切智門。修菩薩行無休息故。是爲第十莊嚴道。若諸菩薩安住此法。則得如來無上大莊嚴道。亦不捨菩薩道。佛子。菩薩摩訶薩有十種足。何等爲十。所謂持戒足。殊勝大願悉成滿故。精進足。集一切菩提分法不退轉故。神通足。隨眾生欲令歡喜故。神力足。不離一佛刹。往一切佛刹故。深心足。願求一切殊勝法故。堅誓足。一切所作咸究竟故。隨順足。不違一切尊者教故。樂法足。聞持一切佛所說法不疲懈故。法雨足。爲眾演說無怯弱故。修行足。一切諸惡悉

遠離故。是爲十。若諸菩薩安住此法。則得如來無上最勝足。若一舉步。悉能徧至一切世界。佛子。菩薩摩訶薩有十種手。何等爲十。所謂深信手。於佛所說一向忍可。究竟受持故。布施手。有來求者。隨其所欲。皆令充滿故。先意問訊手。舒展右掌。相迎引故。供養諸佛手。集眾福德。無疲厭故。多聞善巧手。悉斷一切眾生疑故。令超三界手。授與眾生。拔出欲泥故。置於彼岸手。四暴流中。救溺眾生故。不悞正法手。所有妙法。悉以開示故。善用眾論手。以智慧藥。滅身心病故。恆持智寶手。開法光明。破煩惱闇故。是爲十。若諸菩薩

安住此法。則得如來無上手。普覆十方一切世界。佛子。菩薩摩訶薩有十種腹。何等爲十。所謂離諂曲腹。心清淨故。離幻偽腹。性質直故。不虛假腹。無險誑故。無欺奪腹。於一切物無所貪故。斷煩惱腹。具智慧故。清淨心腹。離諸惡故。觀察飲食腹。念如實法故。觀察無作腹。覺悟緣起故。覺悟一切出離道腹。善成熟深心故。遠離一切邊見垢腹。令一切眾生得入佛腹故。是爲十。若諸菩薩安住此法。則得如來無上廣大腹。悉能容受一切眾生。佛子。菩薩摩訶薩有十種藏。何等爲十。所謂不斷佛種。是菩薩藏。開示佛法無量威

德故。增長法種是菩薩藏。出生智慧廣大光明故。住持僧種是菩薩藏。令其得入不退法輪故。覺悟正定眾生是菩薩藏。善隨其時不踰一念故。究竟成熟不定眾生是菩薩藏。令因相續無有間斷故。爲邪定眾生發起大悲是菩薩藏。令未來因悉得成就故。滿佛十力不可壞因是菩薩藏。具降伏魔軍無對善根故。最勝無畏大師子吼是菩薩藏。令一切眾生皆歡喜故。得佛十八不共法是菩薩藏。智慧普入一切處故。普了知一切眾生。一切刹。一切法。一切佛。是菩薩藏。於一念中悉明見故。是爲十。若諸菩薩安住此法。則

得如來無上善根不可壞大智慧藏。佛子。菩薩摩訶薩有十種心。何等爲十。所爲精勤心。一切所作悉究竟故。不懈心。積集相好福德行故。大勇健心。摧破一切諸魔軍故。如理行心。除滅一切諸煩惱故。不退轉心。乃至菩提終不息故。生清淨心。知心不動無所著故。知眾生心。隨其解欲。令出離故。令入佛法大梵住心。知諸眾生種種解欲。不以別乘而救護故。空無相無願無作心。見三界相不取著故。卍字相金剛堅固勝藏莊嚴心。一切眾生數等魔來。乃至不能動一毛故。是爲十。若諸菩薩安住此法。則得如來無上大智

光明藏心。佛子。菩薩摩訶薩有十種被甲。何等爲十。所謂被大慈甲。救護一切眾生故。被大悲甲。堪忍一切諸苦故。被大願甲。一切所作究竟故。被迴向甲。建立一切佛莊嚴故。被福德甲。饒益一切諸眾生故。被波羅蜜甲。度脫一切諸含識故。被智慧甲。滅一切眾生煩惱闇故。被善巧方便甲。生普門善根故。被一切智心堅固不散亂甲。不樂餘乘故。被一心決定甲。於一切法離疑惑故。是爲十。若諸菩薩安住此法。則被如來無上甲冑。悉能摧伏一切魔軍。佛子。菩薩摩訶薩有十種器仗。何等爲十。所謂布施是菩薩器仗。摧

破一切慳恪故。持戒是菩薩器仗。棄捨一切毀犯故。平等是菩薩器仗。斷除一切分別故。智慧是菩薩器仗。消滅一切煩惱故。正命是菩薩器仗。遠離一切邪命故。善巧方便是菩薩器仗。於一切處示現故。略說貪瞋癡等一切煩惱是菩薩器仗。以煩惱門度眾生故。生死是菩薩器仗。不斷菩薩行教化眾生故。說如實法是菩薩器仗。能破一切執著故。一切智是菩薩器仗。不捨菩薩行門故。是爲十。若諸菩薩安住此法。則能除滅一切眾生長夜所集煩惱結使。佛子。菩薩摩訶薩有十種首。何等爲十。所謂涅槃首。無能見頂。

故。尊敬首。一切人天所敬禮故。廣大勝解首。三千界
中最爲勝故。第一善根首。三界眾生咸供養故。荷戴
眾生首。成就頂上肉髻相故。不輕賤他首。於一切處
常尊勝故。般若波羅蜜首。長養一切功德法故。方便
智相應首。普現一切同類身故。教化一切眾生首。以
一切眾生爲弟子故。守護諸佛法眼首。能令三寶種
不斷絕故。是爲十。若諸菩薩安住此法。則得如來無
上大智慧首。佛子。菩薩摩訶薩有十種眼。所謂肉眼。
見一切色故。天眼。見一切眾生心故。慧眼。見一切眾
生諸根境界故。法眼。見一切法如實相故。佛眼。見如

來十力故。智眼。知見諸法故。光明眼。見佛光明故。出生死眼。見涅槃故。無礙眼。所見無障故。一切智眼。見普門法界故。是爲十。若諸菩薩安住此法。則得如來無上大智慧眼。佛子。菩薩摩訶薩有十種耳。何等爲十。所謂聞讚歎聲。斷除貪愛。聞毀訾聲。斷除瞋恚。聞說二乘。不著不求。聞菩薩道。歡喜踊躍。聞地獄等諸苦難處。起大悲心。發弘誓願。聞說人天勝妙之事。知彼皆是無常之法。聞有讚歎諸佛功德。勤加精進。令速圓滿。聞說六度四攝等法。發心修行。願到彼岸。聞十方世界一切音聲。悉知如響。入不可說甚深妙義。

菩薩摩訶薩從初發心乃至道場常聞正法未曾暫息而恆不捨化眾生事是爲十。若諸菩薩成就此法則得如來無上大智慧耳。佛子。菩薩摩訶薩有十種鼻。何等爲十。所謂聞諸臭物不以爲臭。聞諸香氣不以爲香。香臭俱聞其心平等。非香非臭安住於捨。若聞眾生衣服臥具及其支體所有香臭則能知彼貪恚愚癡等分之行。若聞諸伏藏草木等香皆如對目前分明辨了。若聞下至阿鼻地獄上至有頂眾生之香皆知彼過去所行之行。若聞諸聲聞布施持戒多聞慧香住一切智心不令散動。若聞一切菩薩行香。

以平等慧入如來地。聞一切佛智境界香。亦不廢捨諸菩薩行。是爲十。若諸菩薩成就此法。則得如來無量無邊清淨鼻。佛子。菩薩摩訶薩有十種舌。何等爲十。所謂開示演說無盡眾生行舌。開示演說無盡法門舌。讚歎諸佛無盡功德舌。演暢詞辯無盡舌。開闡大乘助道舌。徧覆十方虛空舌。普照一切佛刹舌。普使眾生悟解舌。悉令諸佛歡喜舌。降伏一切諸魔外道。除滅一切生死煩惱。令至涅槃舌。是爲十。若諸菩薩成就此法。則得如來徧覆一切諸佛國土無上舌。佛子。菩薩摩訶薩有十種身。何等爲十。所謂人身。爲

教化一切諸人故。非人身爲教化。地獄畜生餓鬼故。
天身爲教化。欲界色界無色界眾生故。學身示現學
地故。無學身示現阿羅漢地故。獨覺身教化令入辟
支佛地故。菩薩身令成就大乘故。如來身智水灌頂
故意。生身善巧出生故。無漏法身以無功用示現一
切眾生身故。是爲十。若諸菩薩成就此法。則得如來
無上之身。佛子。菩薩摩訶薩有十種意。何等爲十。所
謂上首意。發起一切善根故。安住意。深信堅固不動
故。深入意。隨順佛法而解故。內了意。知諸眾生心樂
故。無亂意。一切煩惱不雜故。明淨意。客塵不能染著

故。善觀眾生意。無有一念失時故。善擇所作意。未曾一處生過故。密護諸根意。調伏不令馳散故。善入三昧意。深入佛三昧。無我我所故。是爲十。若諸菩薩安住此法。則得一切佛無上意。佛子。菩薩摩訶薩有十種行。何等爲十。所謂聞法行。愛樂於法故。說法行。利益眾生故。離貪恚癡怖畏行。調伏自心故。欲界行。教化欲界眾生故。色無色界三昧行。令速轉還故。趣向法義行。速得智慧故。一切生處行。自在教化眾生故。一切佛刹行。禮拜供養諸佛故。涅槃行。不斷生死相續故。成滿一切佛法行。不捨菩薩法行故。是爲十。若

諸菩薩安住此法。則得如來無來無去行。佛子。菩薩摩訶薩有十種住。何等爲十。所謂菩提心住。曾不忘失故。波羅蜜住。不厭助道故。說法住。增長智慧故。阿蘭若住。證大禪定故。隨順一切智。頭陀知足。四聖種住。少欲少事故。深信住。荷負正法故。親近如來住。學佛威儀故。出生神通住。圓滿大智故。得忍住。滿足授記故。道場住。具足力無畏一切佛法故。是爲十。若諸菩薩安住此法。則得一切智無上住。佛子。菩薩摩訶薩有十種坐。何等爲十。所謂轉輪王坐。與十善道故。四天王坐。於一切世間自在安立佛法故。帝釋坐。與

一切眾生爲勝主故。梵天坐。於自他心得自在故。師子坐。能說法故。正法坐。以總持辯才力而開示故。堅固坐。誓願究竟故。大慈坐。令惡眾生悉歡喜故。大悲坐。忍一切苦不疲厭故。金剛坐。降伏眾魔及外道故。是爲十。若諸菩薩安住此法。則得如來無上正覺坐。佛子。菩薩摩訶薩有十種臥。何等爲十。所謂寂靜臥。身心擔怕故。禪定臥。如理修行故。三昧臥。身心柔軟故。梵天臥。不惱自他故。善業臥。於後不悔故。正信臥。不可傾動故。正道臥。善友開覺故。妙願臥。善巧迴向故。一切事畢臥。所作成辦故。捨諸功用臥。一切慣習

故。是爲十。若諸菩薩安住此法。則得如來無上大法
臥。悉能開悟一切眾生。佛子。菩薩摩訶薩有十種所
住處。何等爲十。所謂以大慈爲所住處。於一切眾生
心平等故。以大悲爲所住處。不輕未學故。以大喜爲
所住處。離一切憂惱故。以大捨爲所住處。於有爲無
爲平等故。以一切波羅蜜爲所住處。菩提心爲首故。
以一切空爲所住處。善巧觀察故。以無相爲所住處。
不出正位故。以無願爲所住處。觀察受生故。以念慧
爲所住處。忍法成滿故。以一切法平等爲所住處。得
授記蒞故。是爲十。若諸菩薩安住此法。則得如來無

上無礙所住處。佛子。菩薩摩訶薩有十種所行處。何等爲十。所謂以正念爲所行處。滿足念處故。以諸趣爲所行處。正覺法趣故。以智慧爲所行處。得佛歡喜故。以波羅蜜爲所行處。滿足一切智智故。以四攝爲所行處。教化眾生故。以生死爲所行處。積集善根故。以與一切眾生雜談戲爲所行處。隨應教化令永離故。以神通爲所行處。知一切眾生諸根境界故。以善巧方便爲所行處。般若波羅蜜相應故。以道場爲所行處。成一切智而不斷菩薩行故。是爲十。若諸菩薩安住此法。則得如來無上大智慧所行處。

大文第五。十種身業下。有五十門。答五十問。明十地位中行相。今依漸次分配十地。初地十門。二地六門。三四各五門。五二門。六一門。七八各三門。九二門。十地十三門。今初十門明歡喜地中行。所言地者。謂一眞如地。乃佛所證究竟法身實際。今爲菩薩所履之地。故以地能厚載。又能出生。謂前三賢所修因種。一向散漫。今收入地中。一一出生莊嚴法身功德。以嚴報身之體。故以地名。故上迴向末後結歸成十種身。是乃攝前眾行歸法身故。今初地卽以身語意三業爲首者。正顯福智二行莊

嚴而成報體。所以初地統前深種善根集助道等。以成十種大智慧身。若非一往稱法界性圓融妙行以爲莊嚴。則何能致果。上十身相海隨好功德。哉。是以初地接前迴向之末。卽得最勝身口意清淨三業。以眾生迷本法身。妄受根身。無量劫來。三業所造無量無邊染污之業。直至此地。乃得清淨。都成功德。以嚴法身故。初二三地。寄人天乘者。正顯位彌高。行彌下。苟有一塵不淨。則障蔽性天。安能稱爲圓滿報身乎。然十門隨文固有多解。大義不出乎此。第二十種深心。下六門。明二地中行。別

教以初地名眞見道。從二地爲修道之首。別前教單修戒。今此圓修。先已契證圓融妙理。故名深心。稱理之行。一一徧周法界故。初二門明發起淨。正顯契理。後四門名自體淨。以顯稱性修。然所修者十度。則總攝三聚淨戒。中攝善法戒。攝律儀戒。其決定解明饒益有情戒。以決定明解眾生法界平等無二。自性清淨。故稱體而修。此一一稱眞如性圓融無礙。故爲修道之首也。第三十種習氣。下五門。明三地中行。言習氣者。由眾生迷一眞性。無明所熏。成一切煩惱習氣。以全體眞如通成染習。今

菩薩以前三賢觀智。修法界行時。不管煩惱何如。但直一味依法界智廣修種種無量妙行。以觀智圓明。更不見有煩惱可斷。故此乃不斷而斷。今既入一真地。融攝前行。將前染習。一一熏成菩提淨習。然非此十種習氣爲成佛種子。則無以取菩提果。故從此已去。凡所修行。皆此十習所熏發起現行。故爲真修。然別教於二地已後。正斷俱生習氣。在此圓宗不必更斷。但只稱此十習而修。則彼習不斷而自斷矣。故修以習氣爲首也。次下十種取者。以眾生染習取生死受五蘊。今菩薩以此十習

而取法身。一一行門。嚴成報身。然非此取。則法界性中無以現報身相好莊嚴也。此乃不取之取。故所取者大。故爲增勝取耳。以前二門爲能厭之行。後三門爲所起厭行。初門正顯修相。次門明修成勝緣。後門明離退失。總此一地。通明修相。故上三地。寄人天乘。後四地。寄出世間。第四離生道。下五門。明四地中行。此地。寄出世間。故言離生地。經此位。修三十七品。故爲離生道。所言生者。謂前三地。以十種習氣。取菩提果。見其有厭有取。猶如生食在腹。未得消故。又爲生澁之生。未純熟故。故外託

勝緣。內防退失。及至五地。則對治清淨。修行增長。故爲出。能離彼生。以離有爲行。得無生故。顯行純。熟離生澁故。名離生道。由修行增長。內德增勝故。外立勝名。名大丈夫。後門正顯對治。地經寄位。廣明三十七品。今約實位。卽此一門。通明對治之法。並是正道。故總收之。五無量道。下二門。明五地中行。然正道助道。皆無量者。以五地聖人。涉俗利生。隨順世間。廣行眾行。以正道契如故。心等法界。旣已無量。則以真如爲所遊履。觸境皆如。道無不在。故所行萬行。資緣皆爲助道故。境愈大。而道亦大。

所以治世語言資生業等。無不稱眞法界。一一無量無邊。所以爲不住道行也。第六無量修道下一門。明六地行。以般若現前爲眞修故。由前五地雖能隨世修無礙行。然未能忘染淨之見。今此六地以般若現前觀察。無染淨法界。生死涅槃平等。故名無量修。以一一行稱法界量故。前地以修此方現前故。第七莊嚴道下三門。明七地中行。以此地已得染淨平等。故權實雙行。以二行交飾。故曰莊嚴。由權實無礙。故自行無染。而能示染隨化。處正入邪。持犯權實故。因體已圓故。生成大用故。得十

足故。無行不至。得十種手取授自在故。此念念進修一切佛法。向佛智故。卽能以四攝廣化眾生。以極法界量中無行不至。故爲遠行。八十種腹下三門。明八地中行。言腹者。世人之腹多含穢惡。今言八地菩薩。已證平等眞如。從上所修一切諸淨功德。畢集於此。以此眞如體。與法界虛空等無不包容。意明無善不集故。藏者。乃腹中之五藏。謂如上一功德。蘊聚法身爲功德藏。亦能出生利益眾生。正定邪定。皆以大悲而攝受故。十種心者。心爲一身之主。謂此所證眞如。乃法身主。一切任運無功用。

行。利樂有情皆大用故。前初地身。具體而微。此則全體大用。無不具足。略舉此三。已見全體故。九地現身說法。皆此大用故。九十種被甲下。明九地中行。此地出真如界。現身說法。而入魔界。故以此十種被甲。以爲防身。以此十種器仗。以爲破敵。所謂與煩惱魔生死魔共戰。苟無防患之具。未有不被傷損者。況轉魔界爲佛界。豈細事乎。第十十種首下。明第十地位中行。初言十首者。以此地菩薩十地德圓。居受職位。首出眾聖。故標其首。此地有三門。先寄六根。以彰德相圓滿。後寄四儀。以顯業

用微細行住二門。以表法界爲所安住。總而言之。以顯三賢所修稱法界行莊嚴法身。以成報體。今第十地報體已圓。德相具足。成就報身。安住法界。以俟妙覺之果。如轉輪王灌頂太子。以爲儲君。故此地菩薩於佛法雲法雨。皆能承受。能行佛事。故如儲君兼理國事也。上十地行竟。下因圓果滿。

大方廣佛華嚴經綱要卷第五十六

大方廣佛華嚴經綱要卷第五十七

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

上答前五十句。問十地行相竟。下五十一門。答前
因果圓滿五十一句問。

離世間品第三十八之五

佛子。菩薩摩訶薩有十種觀察。何等爲十。所謂知諸
業觀察。微細悉見故。知諸趣觀察。不取眾生故。知諸
根觀察。了達無根故。知諸法觀察。不壞法界故。見佛

法觀察。勤修佛眼故。得智慧觀察。如理說法故。無生
忍觀察。決了佛法故。不退地觀察。滅一切煩惱。超出
三界二乘地故。灌頂地觀察。於一切佛法自在不動
故。善覺智三昧觀察。於一切十方施作佛事故。是爲
十。若諸菩薩安住此法。則得如來無上大觀察智。佛
子。菩薩摩訶薩有十種普觀察。何等爲十。所謂普觀
一切諸來求者。以無違心滿其意故。普觀一切犯戒
眾生。安置如來淨戒中故。普觀一切害心眾生。安置
如來忍力中故。普觀一切懈怠眾生。勸令精勤不捨
荷負大乘擔故。普觀一切亂心眾生。令住如來一切

智地。無散動故。普觀一切惡慧眾生。令除疑惑。破有見故。普觀一切平等善友。順其教命。住佛法故。普觀一切所聞之法。疾得證見。最上義故。普觀一切無邊眾生。常不捨離。大悲力故。普觀一切諸佛之法。速得成就一切智故。是爲十。若諸菩薩安住此法。則得如來無上大智慧。普觀察佛子。菩薩摩訶薩有十種奮迅。何等爲十。所謂牛王奮迅。映蔽一切天龍。夜叉。乾闥婆等諸大眾故。象王奮迅。心善調柔。荷負一切諸眾生故。龍王奮迅。興大法密雲。耀解脫電光。震如寶義雷。降諸根力。覺分禪定。解脫三昧。甘露雨故。大金

翅鳥王奮迅。竭貪愛水。破愚癡殼。搏撮煩惱諸惡毒。龍令出生死大苦海故。大獅子王奮迅。安住無畏平等大智。以爲器仗。摧伏眾魔及外道故。勇健奮迅。能於生死大戰陣中。摧滅一切煩惱冤故。大智奮迅。知蘊界處及諸緣起。自在開示一切法故。陀羅尼奮迅。以念慧力。持法不忘。隨眾生根爲宣說故。辯才奮迅。無礙迅疾。分別一切。咸令受益。心歡喜故。如來奮迅。一切智智助道之法。皆悉成滿。以一念相應慧所應得者。一切皆得。所應悟者。一切皆悟。坐師子座。降魔冤敵。成阿耨多羅三藐三菩提故。是爲十。若諸菩薩

安住此法。則得諸佛於一切法無上自在奮迅。佛子。菩薩摩訶薩有十種師子吼。何等爲十。所謂唱言。我當必定成等正覺。是菩提心大師子吼。我當令一切眾生未度者度。未脫者脫。未安者安。未涅槃者令得涅槃。是大悲大師子吼。我當令佛法僧種無有斷絕。是報如來恩大師子吼。我當嚴淨一切佛刹。是究竟堅誓大師子吼。我當除滅一切惡道及諸難處。是自持淨戒大師子吼。我當滿足一切諸佛身語及意。相好莊嚴。是求福無厭大師子吼。我當成滿一切諸佛所有智慧。是求智無厭大師子吼。我當除滅一切眾

五度集經卷之二十一
三

魔及諸魔業。是修正行。斷諸煩惱。大師子吼。我當了知一切諸法。無我。無眾生。無壽命。無補伽羅。空無相。無願。淨如虛空。是無生法。忍。大師子吼。最後生菩薩震動一切諸佛國土。悉令嚴淨。是時一切釋梵四王咸來讚請。唯願菩薩以無生法而現受生。菩薩則以無礙慧眼。普觀世間一切眾生。無如我者。卽於王宮示現誕生。自行七步。大師子吼。我於世間最勝第一。我當永盡生死邊際。是如說而作。大師子吼。是爲十。若諸菩薩安住此法。則得如來無上大師子吼。佛子。菩薩摩訶薩有十種清淨施。何等爲十。所謂平等施。

不揀眾生故。隨意施。滿其所願故。不亂施。令得利益故。隨宜施。知上中下故。不住施。不求果報故。開捨施。心不戀著故。一切施。究竟清淨故。迴向菩提施。遠離有爲無爲故。教化眾生施。乃至道場不捨故。三輪清淨施。於施者受者及以施物。正念觀察。如虛空故。是爲十。若諸菩薩安住此法。則得如來無上清淨廣大施。佛子。菩薩摩訶薩有十種清淨戒。何等爲十。所謂身清淨戒。護身三惡故。語清淨戒。離語四過故。心清淨戒。永離貪瞋邪見故。不破一切學處清淨戒。於一切人天中作尊主故。守護菩提心清淨戒。不樂小乘。

故守護如來所制清淨戒。乃至微細罪生大怖畏故。隱密護持清淨戒。善拔犯戒眾生故。不作一切惡清淨戒。誓修一切善法故。遠離一切有見清淨戒。於戒無著故。守護一切眾生清淨戒。發起大悲故。是爲十。若諸菩薩安住此法。則得如來無上無過失清淨戒。佛子。菩薩摩訶薩有十種清淨忍。何等爲十。所謂安受訾辱清淨忍。護諸眾生故。安受刀杖清淨忍。善護自他故。不生恚害清淨忍。其心不動故。不責卑賤清淨忍。爲上能寬故。有歸咸救清淨忍。捨自身命故。遠離我慢清淨忍。不輕未學故。殘毀不瞋清淨忍。觀察

如幻故。有犯無報。清淨忍不見自他故。不隨煩惱。清淨忍離諸境界故。隨順菩薩真實智。知一切法無生。清淨忍不由他教入。一切智境界故。是為十。若諸菩薩安住其中。則得一切諸佛不由他悟。無上法忍。佛子。菩薩摩訶薩有十種清淨精進。何等為十。所謂身清淨精進。承事供養諸佛菩薩及諸師長。尊重福田。不退轉故。語清淨精進。隨所聞法。廣為他說讚佛功德。無疲倦故。意清淨精進。善能入出慈悲喜捨禪定。解脫及諸三昧。無休息故。正真心清淨精進。無誑無諂。無曲無偽。一切勤修。無退轉故。增勝心清淨精進。

志常趣求。上上智慧。願具一切白淨法故。不唐捐清淨精進。攝取布施戒忍多聞。及不放逸。乃至菩提。無中息故。摧伏一切魔清淨精進。悉能除滅貪欲瞋恚愚癡邪見。一切煩惱諸纏蓋故。成滿智慧光清淨精進。有所施爲。悉善觀察。咸使究竟。不令後悔。得一切佛不共法故。無來無去清淨精進。得如實智。入法界門。身語及心。皆悉平等。了相非相。無所著故。成就法光清淨精進。超過諸地。得佛灌頂。以無漏身。而示殑生。出家成道。說法滅度。具足如是普賢事故。是爲十若諸菩薩。安住此法。則得如來無上大清淨精進。佛

子。菩薩摩訶薩有十種清淨禪。何等爲十。所謂常樂
出家清淨禪。捨一切所有故。得眞善友清淨禪。示教
正道故。住阿蘭若忍風雨等清淨禪。離我我所故。離
憤鬧眾生清淨禪。常樂寂靜故。心業調柔清淨禪。守
護諸根故。心智寂滅清淨禪。一切音聲諸禪定刺。不
能亂故。覺道方便清淨禪。觀察一切。皆現證故。離於
味著清淨禪。不捨欲界故。發起通明清淨禪。知一切
眾生根性故。自在遊戲清淨禪。入佛三昧。知無我故。
是爲十。若諸菩薩安住其中。則得如來無上大清淨
禪。佛子。菩薩摩訶薩有十種清淨慧。何等爲十。所謂

知一切因清淨慧。不壞果報故。知一切緣清淨慧。不
違和合故。知不斷不常清淨慧。了達緣起皆如實故。
拔一切見清淨慧。於眾生相無取捨故。觀一切眾生
心行清淨慧。了知如幻故。廣大辯才清淨慧。分別諸
法。問答無礙故。一切諸魔外道聲聞獨覺所不能知。
清淨慧。深入一切如來智故。見一切佛微妙法身。見
一切眾生本性清淨。見一切法皆悉寂滅。見一切刹
同於虛空清淨慧。知一切相皆無礙故。一切總持辯
才方便波羅蜜清淨慧。令得一切最勝智故。一念相
應金剛智。了一切法平等清淨慧。得一切法最尊智。

故是爲十。若諸菩薩安住其中。則得如來無障礙大智慧。佛子。菩薩摩訶薩有十種清淨慈。何等爲十。所謂等心清淨慈。普攝眾生。無所揀擇故。饒益清淨慈。隨有所作。皆令歡喜故。攝物同己清淨慈。究竟皆令出生死故。不捨世間清淨慈。心常緣念集善根故。能至解脫清淨慈。普使眾生除滅一切諸煩惱故。出生菩提清淨慈。普使眾生發求一切智心故。世間無礙清淨慈。放大光明。平等普照故。充滿虛空清淨慈。救護眾生。無處不至故。法緣清淨慈。證於如如眞實法故。無緣清淨慈。入於菩薩離生性故。是爲十。若諸菩

薩安住此法。則得如來無上廣大清淨慈。佛子。菩薩摩訶薩有十種清淨悲。何等爲十。所謂無儔伴清淨悲。獨發其心故。無疲厭清淨悲。代一切眾生受苦。不以爲勞故。難處受生清淨悲。爲度眾生故。善趣受生清淨悲。示現無常故。爲邪定眾生清淨悲。歷劫不捨弘誓故。不著己樂清淨悲。普與眾生快樂故。不求恩報清淨悲。修潔其心故。能除顛倒清淨悲。說如實法故。菩薩摩訶薩知一切法本性清淨。無染著。無熱惱。以客塵煩惱故而受眾苦。如是知已。於諸眾生而起大悲。名本性清淨。爲說無垢清淨光明法故。菩薩摩

訶薩知一切法如空中鳥跡。眾生癡翳不能照了。觀察於彼。起大悲心。名真實智。爲其開示涅槃法故。是爲十。若諸菩薩安住此法。則得如來無上廣大清淨悲。佛子。菩薩摩訶薩有十種清淨喜。何等爲十。所謂發菩提心清淨喜。悉捨所有清淨喜。不嫌棄破戒眾生。而教化成就清淨喜。能忍受造惡眾生。誓願救度清淨喜。捨身求法。不生悔心清淨喜。自捨欲樂。常樂法樂清淨喜。令一切眾生捨資生樂。常樂法樂清淨喜。見一切佛恭敬供養。無有厭足。法界平等清淨喜。令一切眾生愛樂禪定。解脫三昧。遊戲入出清淨喜。

心樂具行順菩薩道一切苦行證得摩尼寂靜不動
無上定慧清淨喜是爲十。若諸菩薩安住此法則得
如來無上廣大清淨喜。佛子。菩薩摩訶薩有十種清
淨捨。何等爲十。所謂一切眾生恭敬供養不生愛著
清淨捨。一切眾生輕慢毀辱不生瞋恚清淨捨。常行
世間不爲世間八法所染清淨捨。於法器眾生待時
而化於無法器亦不生嫌清淨捨。不求二乘學無學
法清淨捨。心常遠離一切欲樂順煩惱法清淨捨。不
歎二乘厭離生死清淨捨。遠離一切世間語非涅槃
語。非離欲語。不順理語。惱亂他語。聲聞獨覺語。略說

乃至一切障菩薩道語皆悉遠離清淨捨。或有眾生
根已成熟發生念慧而未能知最上之法待時方化
清淨捨。或有眾生菩薩往昔已曾教化。至於佛地方
可調伏。彼亦待時清淨捨。菩薩摩訶薩於彼二人無
高無下。無取無捨。遠離一切種種分別。恆住正定。入
如實法。心得堪忍清淨捨。是爲十。若諸菩薩安住其
中。則得如來無上廣大清淨捨。佛子。菩薩摩訶薩有
十種義。何等爲十。所謂多聞義。堅固修行故。法義善
巧思擇故。空義。第一義空故。寂靜義。離諸眾生諍憤
故。不可說義。不著一切語言故。如實義。了達三世平

等故。法界義。一切諸法一味故。眞如義。一切如來順入故。實際義。了知究竟如實故。大般涅槃義。滅一切苦而修菩薩諸行故。是爲十。若諸菩薩安住此法。則得一切智無上義。佛子。菩薩摩訶薩有十種法。何等爲十。所謂眞實法。如說修行故。離取法。能取所取悉離故。無諍法。無有一切惑諍故。寂滅法。滅除一切熱惱故。離欲法。一切貪欲皆斷故。無分別法。攀緣分別永息故。無生法。猶如虛空不動故。無爲法。離生住滅諸相故。本性法。自性無染清淨故。捨一切烏波提涅槃法。能生一切菩薩行。修習不斷故。是爲十。若諸菩

薩安住其中。則得如來無上廣大法。佛子。菩薩摩訶薩有十種福德助道具。何等爲十。所謂勸眾生起菩提心。是菩薩福德助道具。不斷三寶種故。隨順十種迴向。是菩薩福德助道具。斷一切不善法。集一切善法故。智慧誘誨。是菩薩福德助道具。超過三界福德故。心無疲倦。是菩薩福德助道具。究竟度脫一切眾生故。悉捨內外一切所有。是菩薩福德助道具。於一切物無所著故。爲滿足相好精進不退。是菩薩福德助道具。開門大施。無所限故。上中下三品善根。悉以迴向無上菩提。心無所輕。是菩薩福德助道具。善巧

方便相應故。於邪定下劣不善眾生。皆生大悲。不懷輕賤。是菩薩福德助道具。常起大人弘誓心故。恭敬供養一切如來。於一切菩薩起如來想。令一切眾生皆生歡喜。是菩薩福德助道具。守本志願。極堅牢故。菩薩摩訶薩。於阿僧祇劫。積集善根。自欲取證無上菩提。如在掌中。然悉捨與一切眾生。心無憂惱。亦無悔恨。其心廣大。等虛空界。此是菩薩福德助道具。起大智慧。證大法故。是爲十。若諸菩薩安住其中。則具足如來無上廣大福德聚。佛子。菩薩摩訶薩有十種智慧助道具。何等爲十。所謂親近多聞。眞善知識。恭

敬供養尊重禮拜。種種隨順不違其教。是爲一。一切
正直無虛矯故。永離憍慢。常行謙敬。身語意業。無有
麤獷。柔和善順。不僞不曲。是爲二。其身堪作佛法器
故。念慧隨覺。未曾散亂。慚愧柔和。心安不動。常憶六
念。常行六敬。常隨順住。六堅固法。是爲三。與十種智
爲方便故。樂法樂義。以法爲樂。常樂聽聞。無有厭足。
捨離世論。及世言說。專心聽受。出世間語。遠離小乘。
入大乘慧。是爲四。一心憶念。無散動故。六波羅蜜。心
專荷負。四種梵住。行已成熟。隨順明法。悉善修行。聰
敏智人。皆勤請問。遠離惡趣。歸向善道。心常愛樂。正

念觀察。調伏己情。守護他意。是爲五。堅固修行。真實
行故。常樂出離。不著三有。恆覺自心。會無惡念。三覺
已絕。三業皆善。決定了知心之自性。是爲六。能令自
他心清淨故。觀察五蘊皆如幻事。界如毒蛇。處如空
聚。一切諸法。如幻如燄。如水中月。如夢如影。如響如
像。如空中畫。如旋火輪。如虹蜺色。如日月光。無相無
形。非常非斷。不來不去。亦無所住。如是觀察。知一切
法無生無滅。是爲七。知一切法性空寂故。菩薩摩訶
薩。聞一切法無我。無眾生。無壽者。無補伽羅。無心無
境。無貪瞋癡。無身無物。無主無待。無著無行。如是一

切皆無所有。悉歸寂滅。聞已深信不疑。不謗。是爲八。
以能成就圓滿解故。菩薩摩訶薩善調諸根。如理修
行。恆住止觀。心意寂靜。一切動念皆悉不生。無我無
人。無作無行。無計我想。無計我業。無有瘡疣。無有癩
痕。亦無於此所得之忍。身語意業。無來無去。無有精
進。亦無勇猛。觀一切眾生。一切諸法。心皆平等。而無
所住。非此岸。非彼岸。此彼性離。無所從來。無所至去。
常以智慧如是思惟。是爲九。到分別相彼岸處故。菩
薩摩訶薩見緣起法故。見法清淨。見法清淨故。見國
土清淨。見國土清淨故。見虛空清淨。見虛空清淨故。

見法界清淨。見法界清淨故。見智慧清淨。是爲十。修行積集一切智故。佛子。是爲菩薩摩訶薩十種智慧助道具。若諸菩薩安住此法。則得如來一切法無障礙。清淨微妙智慧聚。佛子。菩薩摩訶薩有十種明足。何等爲十。所謂善分別諸法明足。不取著諸法明足。離顛倒見明足。智慧光照諸根明足。巧發起正精進明足。能深入眞諦智明足。滅煩惱業成就盡智無生智明足。天眼智普觀察明足。宿住念知前際清淨明足。漏盡神通智。斷眾生諸漏明足。是爲十。若諸菩薩安住此法。則得如來於一切佛法無上大光明。佛子。

菩薩摩訶薩有十種求法。何等爲十。所謂直心求法。無有諂誑故。精進求法。遠離懈怠故。一向求法。不惜身命故。爲除一切眾生煩惱求法。不爲名利恭敬故。爲饒益自他一切眾生求法。不但自利故。爲入智慧求法。不樂文字故。爲出生死求法。不貪世樂故。爲度眾生求法。發菩提心故。爲斷一切眾生疑求法。令無猶豫故。爲滿足佛法求法。不樂餘乘故。是爲十。若諸菩薩安住此法。則得不由他教一切佛法大智慧。佛子。菩薩摩訶薩有十種明了法。何等爲十。所謂隨順世俗生長善根。是童蒙凡夫明了法。得無礙不壞信。

覺法自性。是隨信行人明了法。勤修習法。隨順法住。
是隨法行人明了法。遠離八邪。向入正道。是第八人
明了法。除滅眾結。斷生死漏。見真實諦。是須陀洹人
明了法。觀味是患。知無往來。是斯陀含人明了法。不
樂三界。求盡有漏。於受生法。乃至一念不生。愛著是
阿那含人明了法。獲六神通。得入解脫。九定。四辯。悉
皆成就。是阿羅漢人明了法。性樂觀察。一味緣起。心
常寂靜。知足少事。解因自得。悟不由他。成就種種神
通智慧。是辟支佛人明了法。智慧廣大。諸根明利。常
樂度脫。一切眾生。勤修福智。助道之法。如來所有十

力無畏。一切功德具足圓滿。是菩薩人明了法。是爲十。若諸菩薩安住此法。則得如來無上大智明了法。佛子。菩薩摩訶薩有十種修行法。何等爲十。所謂恭敬尊重諸善知識修行法。常爲諸天之所覺悟修行法。於諸佛所常懷慚愧修行法。哀愍眾生不捨生死修行法。事必究竟。心無變動修行法。專念隨逐發大乘心。諸菩薩眾精勤修學修行法。遠離邪見勤求正道修行法。摧破眾魔及煩惱業修行法。知諸眾生根性勝劣而爲說法。令住佛地修行法。安住無邊廣大法界。除滅煩惱。令身清淨修行法。是爲十。若諸菩薩

妄住其中則得如來無上修行法。佛子。菩薩摩訶薩有十種魔。何等爲十。所謂蘊魔。生諸取故。煩惱魔。恆雜染故。業魔。能障礙故。心魔。起高慢故。死魔。捨生處故。天魔。自憍縱故。善根魔。恆執取故。三昧魔。久耽味故。善知識魔。起著心故。菩提法智魔。不願捨離故。是爲十。菩薩摩訶薩應作方便。速求遠離。佛子。菩薩摩訶薩有十種魔業。何等爲十。所謂忘失菩提心。修諸善根。是爲魔業。惡心布施。瞋心持戒。捨惡性人。遠懈怠者。輕慢亂意。譏嫌惡慧。是爲魔業。於甚深法。心生慳吝。有堪化者而不爲說。若得財利恭敬供養。雖非

法器而強爲說是爲魔業。不樂聽聞諸波羅蜜。假使聞說而不修行。雖亦修行。多生懈怠。以懈怠故。志意狹劣。不求無上大菩提法。是爲魔業。遠善知識。近惡知識。樂求二乘。不樂受生。志尙涅槃。離欲寂靜。是爲魔業。於菩薩所起瞋恚心。惡眼視之。求其罪覺。說其過惡。斷彼所有財利供養。是爲魔業。誹謗正法。不樂聽聞。假使得聞。便生毀訾。見人說法。不生尊重。言自說是。餘說悉非。是爲魔業。樂學世論。巧述文詞。開闡二乘。隱覆深法。或以妙義授非其人。遠離菩提。住於邪道。是爲魔業。已得解脫。已安隱者。常樂親近。而供

養之。未得解脫。未安隱者。不肯親近。亦不教化。是爲
魔業。增長我慢。無有恭敬。於諸眾生。多行惱害。不求
正法。眞實智慧。其心弊惡。難可開悟。是爲魔業。是爲
十。菩薩摩訶薩。應速遠離勤求佛業。佛子。菩薩摩訶
薩。有十種捨離魔業。何等爲十。所謂近善知識。恭敬
供養。捨離魔業。不自尊舉。不自讚歎。捨離魔業。於佛
深法。信解不謗。捨離魔業。未曾忘失一切智心。捨離
魔業。勤修妙行。恆不放逸。捨離魔業。常求一切菩薩
藏法。捨離魔業。恆演說法。心無疲倦。捨離魔業。歸依
十方一切諸佛。起救護想。捨離魔業。信受憶念一切

諸佛神力加持捨離魔業。與一切菩薩同種善根。平等無二捨離魔業。是爲十。若諸菩薩安住此法。則能出離一切魔道。佛子。菩薩摩訶薩有十種見佛。何等爲十。所謂於安住世間成正覺佛。無著見。願佛。出生見。業報佛。深信見。住持佛。隨順見。涅槃佛。深入見。法界佛。普至見。心佛。安住見。三昧佛。無量無依見。本性佛。明了見。隨樂佛。普受見。是爲十。若諸菩薩安住此法。則常得見無上如來佛子。菩薩摩訶薩有十種佛業。何等爲十。所謂隨時開導。是佛業。令正修行。故夢中令見。是佛業。覺昔善根。故爲他演說。所未聞經。是

佛業。令生智斷疑故。爲悔纏所纏者。說出離法。是佛業。令離疑心故。若有眾生起慳吝心。乃至惡慧心。二乘心。損害心。疑惑心。散動心。憍慢心。爲現如來眾相。莊嚴身。是佛業。生長過去善根故。於正法難遇時。廣爲說法。令其聞已。得陀羅尼智神通智。普能利益無量眾生。是佛業。勝解清淨故。若有魔事起。能以方便現虛空界等聲。說不損惱他法。以爲對治。令其開悟。眾魔聞已。威光歇滅。是佛業。志樂殊勝威德大故。其心無間。常自守護。不令證入二乘正位。若有眾生根性未熟。終不爲說解脫境界。是佛業。本願所作故。生

死結漏一切皆離。修菩薩行相續不斷。以大悲心攝取眾生。令其起行。究竟解脫。是佛業。不斷修行菩薩行故。菩薩摩訶薩。了達自身。及以眾生本來寂滅。不驚不怖。而勤修福智。無有厭足。雖知一切法無有造作。而亦不捨諸法自相。雖於諸境界永離貪欲。而常樂瞻奉諸佛色身。雖知不由他悟。人於法。而種種方便。求一切智。雖知諸國土皆如虛空。而常樂莊嚴一切佛刹。雖恆觀察無人無我。而教化眾生無有疲厭。雖於法界本來不動。而以神通智力。現眾變化。雖已成就一切智智。而修菩薩行。無有休息。雖知諸法不

可言說。而轉淨法輪。令眾心喜。雖能示現諸佛神力。而不厭捨菩薩之身。雖現入於大般涅槃。而一切處示現受生。能作如是權實雙行法。是佛業。是爲十。若諸菩薩安住其中。則得不由他教。無上無師廣大業。佛子。菩薩摩訶薩有十種慢業。何等爲十。所謂於師僧父母沙門婆羅門住於正道。向正道者。尊重福田。所而不恭敬。是慢業。或有法師。或最勝法。乘於大乘。知出要道。得陀羅尼。演說契經廣大之法。無有休息。而於其所。起高慢心。及於所說法。不生恭敬。是慢業。於眾會中。聞說妙法。不肯歎美。令人信受。是慢業。好

起過慢。自高陵物。不見己失。不知自短。是慢業。好起過過慢。見有德人。應讚不讚。見他讚歎。不生歡喜。是慢業。見有法師爲人說法。知是法。是律。是眞實。是佛語。爲嫌其人。亦嫌其法。自起誹謗。亦令他謗。是慢業。自求高座。自稱法師。應受供給。不應執事。見有耆舊久修行人。不起逢迎。不肯承事。是慢業。見有德人。顰蹙不喜。言辭麤獷。伺其過失。是慢業。見有聰慧知法之人。不肯親近恭敬供養。不肯諮問。何等爲善。何等不善。何等應作。何等不應作。作何等業。於長夜中。而得種種利益安樂。愚癡頑很。我慢所吞。終不能見出。

要之道。是慢業。復有眾生慢心所覆。諸佛出世。不能親近恭敬供養。新善不起。舊善消滅。不應說而說。不應諍而諍。未來必墮險難深坑。於百千劫。尚不值佛。何況聞法。但以曾發菩提心故。終自醒悟。是慢業。是爲十。若諸菩薩離此慢業。則得十種智業。何等爲十。所謂信解業報。不壞因果。是智業。不捨菩提心。常念諸佛。是智業。近善知識。恭敬供養。其心尊重。終無厭怠。是智業。樂法樂義。無有厭足。遠離邪念。勤修正念。是智業。於一切眾生。離於我慢。於諸菩薩。起如來想。愛重正法。如惜己身。尊奉如來。如護己命。於修行者。

生諸佛想。是智業。身語意業無諸不善。讚美賢聖。隨順菩提。是智業。不壞緣起。離諸邪見。破暗得明。照一切法。是智業。十種迴向。隨順修行。於諸波羅蜜。起慈母想。於善巧方便。起慈父想。以深淨心。入菩提舍。是智業。施戒多聞。止觀福慧。如是一切助道之法。常勤積集。無有厭倦。是智業。若有一業。爲佛所讚。能破眾魔煩惱鬪諍。能離一切障蓋纏縛。能教化調伏一切眾生。能隨順智慧。攝取正法。能嚴淨佛刹。能發起通明。皆勤修習。無有懈怠。是智業。是爲十。若諸菩薩安住其中。則得如來一切善巧方便。無上大智業。佛子。

菩薩摩訶薩有十種魔所攝持。何等爲十。所謂懈怠心魔所攝持。志樂狹劣。魔所攝持。於少行生足。魔所攝持。受一非餘。魔所攝持。不發大願。魔所攝持。樂處寂滅。斷除煩惱。魔所攝持。永斷生死。魔所攝持。捨菩薩行。魔所攝持。不化眾生。魔所攝持。疑謗正法。魔所攝持。是爲十。若諸菩薩能棄捨此魔所攝持。則得十種佛所攝持。何等爲十。所謂初始能發菩提之心。佛所攝持。於生生中持菩提心。不令忘失。佛所攝持。覺諸魔事。悉能遠離。佛所攝持。聞諸波羅蜜。如說修行。佛所攝持。知生死苦而不厭惡。佛所攝持。觀甚深法。

得無量果。佛所攝持。爲諸眾生說。二乘法。而不證取。彼乘解脫。佛所攝持。樂觀無爲法。而不住其中。於有爲無爲。不生二想。佛所攝持。至無生處。而現受生。佛所攝持。雖證得一切智。而起菩薩行。不斷菩薩種。佛所攝持。是爲十。若諸菩薩安住其中。則得諸佛無上攝持力。佛子。菩薩摩訶薩。有十種法。所攝持。何等爲十。所謂知一切行無常。法所攝持。知一切行苦。法所攝持。知一切行無我。法所攝持。知一切法寂滅涅槃。法所攝持。知諸法從緣起。無緣則不起。法所攝持。知不正思惟故。起於無明。無明起故。乃至老死起。不正

思惟滅故。無明滅。無明滅故。乃至老死滅。法所攝持。知三解脫門。出生聲聞乘。證無諍法。出生獨覺乘。法所攝持。知六波羅蜜。四攝法。出生大乘法。所攝持。知一切刹。一切法。一切眾生。一切世。是佛智境界。法所攝持。知斷一切念。捨一切取。離前後際。隨順涅槃。法所攝持。是爲十。若諸菩薩安住其中。則得一切諸佛無上法。所攝持。

大文第六觀察下五十一門。答前因圓果滿五十一句問。卽分爲二。初三十二門。明因圓究竟。卽明等覺位行。後十種住兜率。下一十九門。明現果圓。

滿行卽妙覺位。前中分三。初一十四門。明因行體性。二十種義。下八門。明方便造修。三十種魔。下十門。明因行除障。初四門。起行方便。二十種施。下十度行體。前中初二門。意業觀察。次一門。身業自在。後一門。語業宣暢。然等覺之初。首明三業者。以十地位滿。以圓報身之體。當紹佛位。但未盡知佛之行事。故此等覺位中。猶用方便造修者。乃習佛果位中。利生事業。譬如太子儲君。必習幹國之事也。初中四門。爲起行方便者。以佛現高大身。王法國土。必先三業。以爲表率。故先以意業觀察。解其方

便。達其通塞。知其可否。初但觀察。乃觀已分中事業。如太子但知太子分中之事。次普觀察者。乃觀察佛果位中利生之事。窮盡法界。無所不知。一一審慮周徧。方明利生之事。廣行六度。攝生而治。其蔽猶如盡知天下國家之事業。用人之賢否。然後乃得君聖臣良。而無壅蔽。故曰普觀察。次身業奮迅者。謂如王自在。謂內德充實。威德外溢。如太子監國。率土瞻仰也。後師子吼語業宣暢者。謂身既勇健無畏。則語宣暢。說無畏法。故如大師子吼也。第二十門明行體者。謂六度四等。此蓋前因中差

別之行。今於等覺位中。更無別行。卽以此十以爲行體。但以法界圓融。融成一味。將入果海。轉爲果中。因行將爲利生之用。故以此行爲體。故疏通以三緣攝其四等。三緣者。謂眾生緣。法緣。無緣。此顯果中。以此三緣爲起行之用耳。由此名同義別。故皆以無上廣大清淨結之。正指果上之用。非前因也。二十義下八門明造修方便。於中前五門明自分行。後三門明勝進行。前五門中。初二門謂修法義法。謂諸法任持自性。軌生物解。謂但是法。皆具此二。所言義者。謂法各有義。謂此位中所修。以觀

法義爲首。以觀諸法。法無不窮。以觀其義。義無不
徹。若事若理。無不證入源底。以佛果位中說法。以
此爲首。故先修之。次二門修福智二嚴。以前諸位
所修。皆隨位漫修。今將會入果海。以成二嚴。故福
智爲助道具。謂此福智爲助菩提正道之緣。故是
止觀雙運。成一切種智故。後一門明足者。謂修福
智以趣果海。至此已圓。爲明行足。故稱佛爲兩足
尊。又云明行足。於此位中。以此五門爲正行。故五
種積集。一切智圓。然此所修。不同前諸位。前但云
菩薩法。至此一一結云如來無上法。以前所修。皆

積集於此。故云修集種智。然皆果中利生之行。二十義下八門。明造修方便行。謂此等覺位中。依前法體以普賢智起行造修。以爲入妙之方便故。八中前五門爲自分正行。然正行中所修者。初修法義以滿果海中知法知義。一一證窮。次二明福智。以果滿上福智二嚴成兩足尊故。後一圓足稱明行足。此乃正屬等覺自分之行。後三爲勝進。以前所修之行圓滿。盡法界量。將入果海。故爲勝進。三者一更求法要。以彰法行無盡。二得已明了。謂從凡小以至菩薩一切諸行。一一明了。以便利生。若

不明了。求之何用。三如說修行方得佛法。一一如法造修以成一切種智。故云勝進。三有十種魔。下十門明離障行。前五門明離障行。後五門明離障加持。然十種魔者。謂蘊魔。煩惱魔。業魔。心魔。死魔。天魔。善根魔。三昧魔。善知識魔。菩提法智魔。然此十種魔。在等覺高位。猶作障道因緣。所以楞嚴云。將躋覺位而淪之者。甚可懼也。然此十魔。於法界性中。何所不融。普賢觀智。何所不照。而猶作障道耶。其實法界無所不融。但未見法界性於此事起執著見故。不順法性。所以作障耳。此十種通爲障。

體。次十種魔業。正成魔之業用。壞法界家。喪失法身。天折慧命。皆此十魔之業用。第一忘失菩提心。而修諸善根。二惡心布施。瞋心持戒。捨惡性人。遠懈怠者。輕慢亂意。譏嫌惡慧。三於甚深法。心生慳悋。有堪化者。而不爲說。若得財利恭敬供養。雖非法器。而強爲說。四不樂聽聞。諸波羅蜜。假使聞說。而不修行。雖亦修行。多生懈怠。以懈怠故。志意狹劣。不求無上大菩提法。五遠善知識。近惡知識。樂求二乘。不樂受生。志尙涅槃。離欲寂靜。六於菩薩所起。瞋恚心。惡眼視之。求其罪釁。說其過惡。斷彼

所有財利供養。七誹謗正法。不樂聽聞。假使得聞。便生毀訾。見人說法。不生尊重。言自說是。餘說悉非。八樂學世論。巧述文詞。開闡二乘。隱覆深法。或以妙義授非其人。遠離菩提。住於邪道。九已得解脫。已安隱者。常樂親近。而供養之。未得解脫。未安隱者。不肯親近。亦不教化。十增長我慢。無有恭敬。於諸眾生。多行惱害。不求正法。眞實智慧。其心弊惡。難可開悟等。一一皆云。是爲魔業。而破壞正法。無出此者。卽已入正覺。萬一有此一法。亦成破壞。所以此位。重當遠離。若欲捨離此魔。當修十種正。

行以爲方便。其十行者。所謂一近善知識恭敬供養。二不自尊大。不自讚歎。三於佛深法。信解不謗。四不忘智心。五勤修妙行。恆不放逸。六常求一切法藏。七恆演說法。心無疲厭。八歸依十方一切諸佛。九憶念一切諸佛神力加持。十與一切菩薩同種善根。平等無二。非此十行。決不離魔業。故應常勤修習。以對修治。故云捨離。然迷法界故。十身佛盡變爲魔。而法界大用。盡爲魔業。今悟法界。則見佛十身。故魔盡是佛。斯則佛魔同體。邪正相依。端在著與不著。而魔佛於是乎辨矣。此雖修離障之

行。若不明見佛十身窮盡法界之理。亦不能離。故下顯能捨魔業。卽得見佛十身以成究竟之行。爲入妙之方便也。二有十種佛業。卽是成行。以前見佛體故。行順佛行。故名佛業。佛以利生爲事業。故迷時轉法界大用而魔造生死業。今悟見佛身。則轉一切魔業。盡作佛利生事業矣。故由此離障行成。二有十慢。下五門明離障加持行。初二門內成離障行。後三門外得加持行。前中初門正舉障。所言障者乃慢也。此慢論說有多種。謂七慢八慢九慢。今經中義開十慢。此慢正障等覺高位不得入。

妙故應離之。問曰。起信論說等覺後心。斷最初一念不覺。爲生相無明。斷此無明。卽入妙覺。何以今經說斷慢障。且慢乃麤惑。何以障此高位耶。答曰。此經不同他宗說次第斷惑。亦不說斷無明。以無明卽是普光明智。更無可斷。然所修行。但以普賢妙行融成一味。以一切煩惱。卽法界性故。其所斷者。唯瞋與慢二種而已。以普賢行爲眾生故。連稱性大悲。以度自性之眾生。若起一念瞋心。則盡障大悲。故經云。一念瞋心起。百萬障門開。以瞋正障悲。妨普賢行。故須斷之。然慢障等覺後心。不得入

妙者以慢雖多種。但以我慢爲主。然以一我則上
不見佛。下不見眾生。故與佛作對。故圓覺經云。乃
至證於無上涅槃。皆名我相。由是觀之。則生相無
明。正是我相根本。以有此慢。故不得入妙。旣存一
我。則種種諸慢皆依之而起。故此高位所斷。唯此
一惑。此未得未證所應大懼者。此見佛後所起之
障也。是則前十種魔。但是障理。此十種慢。正是障
智。故在見佛後起。顯智未融理。故不得入妙耳。故
次門有十種智業。以爲對治。然經未顯一一敵體
對治。蓋意在但能修此十智。則一切慢障自然遠

離矣。二魔攝持下三門。辨外加持行。問。然上十魔
已有對治。何以又說魔所攝持。答。此魔所攝持。從
前慢障起。意謂雖以十智治其慢障。若慢障不淨。
則內行乖理。斯外魔得便。卽爲魔所攝持矣。是則
慢爲內魔。故內以智治之。今外魔得便。爲其攝持。
己力不能治。必外仗佛力。法力二種加持。乃能破
也。故楞伽云。等覺後心。若不蒙佛加持。不得入妙。
正此意也。故此障一離。則究竟因圓。有深旨矣。修
行之士。可不懼哉。上三十二門通辨。因圓。明等
覺位行竟。下十九門通辨。果滿。

大方廣佛華嚴經綱要卷第五十七

大方廣佛華嚴經綱要卷第五十八

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

上三十二門通辨因圓。明等覺位行竟。下十九門
通辨果滿。

離世間品第三十八之六

佛子。菩薩摩訶薩。住兜率天。有十種所作業。何等爲
十。所謂爲欲界諸天子說厭離法。言一切自在。皆是
無常。一切快樂。悉當衰謝。勸彼諸天發菩提心。是爲

第一所作業。爲色界諸天說入出諸禪解脫三昧。若於其中而生愛著。因愛復起身見邪見無明等者。則爲其說如實智慧。若於一切色非色法。起顛倒想。以爲清淨。爲說不淨。皆是無常。勸其令發菩提之心。是爲第二所作業。菩薩摩訶薩。住兜率天。入三昧名光明莊嚴。身放光明。徧照三千大千世界。隨眾生心。以種種音。而爲說法。眾生聞已。信心清淨。命終生於兜率天中。勸其令發菩提之心。是爲第三所作業。菩薩摩訶薩。在兜率天。以無障礙眼。普見十方兜率天中。一切菩薩。彼諸菩薩。皆亦見此。互相見已。論說妙法。

謂降神母胎。初生出家。往詣道場。具大莊嚴。而復示現。往昔已來所行之行。以彼行故。成此大智。所有功德。不離本處。而能示現。如是等事。是爲第四所作業。菩薩摩訶薩。住兜率天。十方一切兜率天宮諸菩薩眾。皆悉來集。恭敬圍繞。爾時菩薩摩訶薩。欲令彼諸菩薩。皆滿其願。生歡喜故。隨彼菩薩所應住地。所行所斷。所修所證。演說法門。彼諸菩薩聞說法已。皆大歡喜。得未曾有。各還本土。所住宮殿。是爲第五所作業。菩薩摩訶薩。住兜率天時。欲界主天魔波旬。爲欲壞亂菩薩業故。眷屬圍繞。詣菩薩所。爾時菩薩爲摧

伏魔軍故。住金剛道所攝般若波羅蜜方便善巧智
慧門。以柔軟麤獷二種語而爲說法。令魔波旬不得
其便。魔見菩薩自在威力。皆發阿耨多羅三藐三菩
提心。是爲第六所作業。菩薩摩訶薩住兜率天。知欲
界諸天子不樂聞法。爾時菩薩出大音聲徧告之言。
今日菩薩當於宮中現希有事。若欲見者宜速往詣。
時諸天子聞是語已。無量百千億那由他皆來集會。
爾時菩薩見諸天眾皆來集已。爲現宮中諸希有事。
彼諸天子曾未見聞。既得見已。皆大歡喜。其心醉沒。
又於樂中出聲告言。諸仁者。一切諸行皆悉無常。一

一切諸行皆悉是苦。一切諸法皆悉無我。涅槃寂滅。又復告言。汝等皆應修菩薩行。皆當圓滿一切智智。彼諸天子聞此法音。憂歎咨嗟。而生厭離。靡不皆發菩提之心。是爲第七所作業。菩薩摩訶薩住兜率宮。不捨本處。悉能往詣十方無量一切佛所。見諸如來親近禮拜。恭敬聽法。爾時諸佛欲令菩薩獲得最上灌頂法故。爲說菩薩地名一切神通。以一念相應慧。具足一切最勝功德。入一切智智位。是爲第八所作業。菩薩摩訶薩住兜率宮。爲欲供養諸如來故。以大神力。興起種種諸供養具。名殊勝可樂徧法界。虛空界。

一切世界供養諸佛。彼世界中無量眾生。見此供養。皆發阿耨多羅三藐三菩提心。是爲第九所作業。菩薩摩訶薩。住兜率天。出無量無邊如幻如影法門。周徧十方一切世界。示現種種色。種種相。種種形體。種種威儀。種種事業。種種方便。種種譬喻。種種言說。隨眾生心。皆令歡喜。是爲第十所作業。佛子。是爲菩薩摩訶薩。住兜率天十種所作業。若諸菩薩成就此法。則能於後下生人間。佛子。菩薩摩訶薩於兜率天將下生時。現十種事。何等爲十。佛子。菩薩摩訶薩於兜率天下生之時。從於足下放大光明。名安樂莊嚴普

照三千大千世界一切惡趣諸難眾生觸斯光者莫
不皆得離苦安樂。得安樂已。悉知將有奇特大人出
興於世。是爲第一所示現事。佛子。菩薩摩訶薩於兜
率天下生之時。從於眉間白毫相中放大光明。名曰
覺悟。普照三千大千世界。照彼宿世一切同行諸菩
薩身。彼諸菩薩蒙光照已。咸知菩薩將欲下生。各各
出興無量供具。詣菩薩所而爲供養。是爲第二所示
現事。佛子。菩薩摩訶薩於兜率天將下生時。於右掌
中放大光明。名清淨境界。悉能嚴淨一切三千大千
世界。其中若有已得無漏諸辟支佛。覺斯光者。卽捨

壽命。若不覺者。光明力故。徙置他方。餘世界中。一切諸魔及諸外道。有見眾生。皆亦徙置他方世界。唯除諸佛神力所持。應化眾生。是爲第三所示現事。佛子。菩薩摩訶薩。於兜率天將下生時。從其兩膝。放大光明。名清淨莊嚴。普照一切諸天宮殿。下從護世上至淨居。靡不周徧。彼諸天等。咸知菩薩於兜率天將欲下生。俱懷戀慕。悲歎憂惱。各持種種華鬘衣服。塗香末香。幡蓋妓樂。詣菩薩所。恭敬供養。隨逐下生。乃至涅槃。是爲第四所示現事。佛子。菩薩摩訶薩。在兜率天將下生時。於卍字金剛莊嚴心藏中。放大光明。名

無能勝幢。普照十方一切世界。金剛力士時有百億。金剛力士皆悉來集。隨逐侍衛。始於下生。乃至涅槃。是爲第五所示現事。佛子。菩薩摩訶薩於兜率天將下生時。從其身上一切毛孔。放大光明。名分別眾生。普照一切大千世界。徧觸一切諸菩薩身。復觸一切諸天世人。諸菩薩等咸作是念。我應住此供養如來。教化眾生。是爲第六所示現事。佛子。菩薩摩訶薩於兜率天將下生時。從大摩尼寶藏殿中放大光明。名善住觀察。照此菩薩當生之處。所託王宮。其光照已。諸餘菩薩皆共隨逐。下閻浮提。若於其家。若其聚落。

若其城邑而現受生爲欲教化諸眾生故。是爲第七
所示現事。佛子。菩薩摩訶薩於兜率天臨下生時。從
天宮殿及大樓閣諸莊嚴中放大光明名一切宮殿
清淨莊嚴。照所生母腹。光明照已。令菩薩母安隱快
樂。具足成就一切功德。其母腹中自然而有廣大樓
閣。大摩尼寶而爲莊嚴。爲欲安處菩薩身故。是爲第
八所示現事。佛子。菩薩摩訶薩於兜率天臨下生時。
從兩足下放大光明。名爲善住。若諸天子及諸梵天
其命將終。蒙光照觸。皆得住壽。供養菩薩。從初下生
乃至涅槃。是爲第九所示現事。佛子。菩薩摩訶薩於

兜率天臨下生時從隨好中放大光明名曰月莊嚴
示現菩薩種種諸業時諸人天或見菩薩住兜率天
或見入胎或見初生或見出家或見成道或見降魔
或見轉法輪或見入涅槃是爲第十所示現事佛子
菩薩摩訶薩於身於座於宮殿於樓閣中放如是一
百萬阿僧祇光明悉現種種諸菩薩業現是業已具
足一切功德法故從兜率天下生人間佛子菩薩摩
訶薩示現處胎有十種事何等爲十佛子菩薩摩訶
薩爲欲成就小心劣解諸眾生故不欲令彼起如是
念今此菩薩自然化生智慧善根不從修得是故菩

薩示現處胎是爲第一事。菩薩摩訶薩爲成熟父母及諸眷屬宿世同行眾生善根示現處胎。何以故。彼皆應以見於處胎成熟所有諸善根故。是爲第二事。菩薩摩訶薩入母胎時正念正知無有迷惑住母胎已。心恆正念亦無錯亂。是爲第三事。菩薩摩訶薩在母胎中常演說法。十方世界諸大菩薩釋梵四王皆來集會。悉令獲得無量神力。無邊智慧。菩薩處胎成就如是辯才勝用。是爲第四事。菩薩摩訶薩在母胎中集大眾會。以本願力教化一切諸菩薩眾。是爲第五事。菩薩摩訶薩於人中成佛。應具人間最勝受生

以此示現處於母胎。是爲第六事。菩薩摩訶薩在母胎中。三千大千世界眾生悉見菩薩。如明鏡中見其面像。爾時大心天龍。夜叉。乾闥婆。阿修羅。迦樓羅。緊那羅。摩睺羅伽。人。非人等。皆詣菩薩恭敬供養。是爲第七事。菩薩摩訶薩在母胎中。他方世界一切最後生菩薩在母胎者。皆來共會。說大集法門。名廣大智慧藏。是爲第八事。菩薩摩訶薩在母胎時。入離垢藏三昧。以三昧力。於母胎中現大宮殿。種種嚴飾。悉皆妙好。兜率天宮不可爲比。而令母身安隱無患。是爲第九事。菩薩摩訶薩住母胎時。以大威力興供養具。

名開大福德離垢藏。普徧十方一切世界。供養一切諸佛如來。彼諸如來咸爲演說無邊菩薩住處法界藏。是爲第十事。佛子是。是爲菩薩摩訶薩示現處胎十種事。若諸菩薩了達此法。則能示現甚微細趣。佛子。菩薩摩訶薩有十種甚微細趣。何等爲十。所謂在母胎中。示現初發菩提心。乃至灌頂地。在母胎中。示現住兜率天。在母胎中。示現初生。在母胎中。示現童子地。在母胎中。示現處王宮。在母胎中。示現出家。在母胎中。示現苦行。往詣道場。成等正覺。在母胎中。示現轉法輪。在母胎中。示現般涅槃。在母胎中。示現大微

細謂一切菩薩行一切如來自在神力無量差別門。佛子是爲菩薩摩訶薩在母胎中十種微細趣。若諸菩薩安住此法則得如來無上大智慧微細趣。佛子。菩薩摩訶薩有十種生。何等爲十。所謂遠離愚癡正念正知生。放大光明網普照三千大千世界生。住最後有。更不受後身生。不生不起生。知三界如幻生。於十方世界普現身生。證一切智智身生。放一切佛光明。普覺悟一切眾生身生。入大智觀察三昧身生。佛子。菩薩生時震動一切佛刹。解脫一切眾生。除滅一切惡道。暎蔽一切諸魔。無量菩薩皆來集會。佛子。是

爲菩薩摩訶薩十種生。爲調伏眾生故。如是示現佛子。菩薩摩訶薩以十事故。示現微笑心自誓。何等爲十。所謂菩薩摩訶薩念言。一切世間沒在欲泥。除我一人無能勉濟。如是知己。熙怡微笑心自誓。復念言。一切世間煩惱所盲。唯我今者具足智慧。如是知己。熙怡微笑心自誓。又念言。我今因此假名身故。當得如來充滿三世無上法身。如是知己。熙怡微笑心自誓。菩薩爾時以無障礙眼。徧觀十方所有梵天。乃至一切大自在天。作是念言。此等眾生皆自謂爲有大智力。如是知己。熙怡微笑心自誓。菩薩爾時觀諸眾

生久種善根。今皆退沒。如是知己。熙怡微笑心自誓。菩薩觀見世間種子。所種雖少。獲果甚多。如是知己。熙怡微笑心自誓。菩薩觀見一切眾生。蒙佛所教。必得利益。如是知己。熙怡微笑心自誓。菩薩觀見過去世中同行菩薩。染著餘事。不得佛法廣大功德。如是知己。熙怡微笑心自誓。菩薩觀見過去世中共同集會諸天人等。至今猶在凡夫之地。不能捨離。亦不疲厭。如是知己。熙怡微笑心自誓。菩薩爾時爲一切如來光明所觸。倍加欣慰。熙怡微笑心自誓。是爲十佛子。菩薩爲調伏眾生。故如是示現。佛子。菩薩摩訶薩。

以十事故示行七步。何等爲十。所謂現菩薩力故示行七步。現施七財故示行七步。滿地神願故示行七步。現超三界相故示行七步。現菩薩最勝行。超過象王。王牛王師子王行故示行七步。現金剛地相故示行七步。現欲與眾生勇猛力故示行七步。現修行七覺寶故示行七步。現所得法不由他教故示行七步。現於世間最勝無比故示行七步。是爲十。佛子。菩薩爲調伏眾生故如是示現。佛子。菩薩摩訶薩以十事故現處童子地。何等爲十。所謂爲現通達一切世間文字。算計圖書印璽種種業故。處童子地。爲現通達一

切世間象馬車乘弧矢劒戟種種業故處童子地。爲
現通達一切世間文筆談論博奕嬉戲種種事故處
童子地。爲現遠離身語意業諸過失故處童子地。爲
現入定住涅槃門。周徧十方無量世界故處童子地。
爲現其力超過一切天龍夜叉乾闥婆阿修羅迦樓
羅緊那羅摩睺羅伽釋梵護世人非人等故處童子
地。爲現菩薩色相威光超過一切釋梵護世故處童
子地。爲令耽著欲樂眾生歡喜樂法故處童子地。爲
尊重正法勤供養佛。周徧十方一切世界故處童子
地。爲現得佛加被蒙法光明故處童子地。是爲十。佛

子。菩薩摩訶薩現童子地已。以十事故現處王宮。何等爲十。所謂爲令宿世同行眾生善根成熟故現處王宮。爲顯示菩薩善根力故現處王宮。爲諸人天耽著樂具。示現菩薩大威德樂具故現處王宮。順五濁世眾生心故現處王宮。爲現菩薩大威德力。能於深宮入三昧故現處王宮。爲令宿世同願眾生滿其意故現處王宮。欲令父母親戚眷屬滿所願故現處王宮。欲以妓樂出妙法音供養一切諸如來故現處王宮。欲於宮內住微妙三昧。始從成佛乃至涅槃皆示現故現處王宮。爲隨順守護諸佛法故現處王宮。是

爲十。最後身菩薩如是示現處王宮已。然後出家。佛子。菩薩摩訶薩以十事故示現出家。何等爲十。所謂爲厭居家故示現出家。爲著家眾生令捨離故示現出家。爲隨順信樂聖人道故示現出家。爲宣揚讚歎出家功德故示現出家。爲顯永離二邊見故示現出家。爲令眾生離欲樂我樂故示現出家。爲先現出三界相故示現出家。爲現自在不屬他故示現出家。爲顯當得如來十力無畏法故示現出家。最後菩薩法應爾故示現出家。是爲十。菩薩以此調伏眾生。佛子。菩薩摩訶薩爲十種事故示行苦行。何等爲十。所謂

爲成就劣解眾生故示行苦行。爲拔邪見眾生故示行苦行。爲不信業報眾生令見業報故示行苦行。爲隨順雜染世界法應爾故示行苦行。示能忍劬勞勤修道故示行苦行。爲令眾生樂求法故示行苦行。爲著欲樂我樂眾生故示行苦行。爲顯菩薩起行殊勝乃至最後生猶不捨勤精進故示行苦行。爲令眾生樂寂靜法增長善根故示行苦行。爲諸天世人諸根未熟待時成熟故示行苦行。是爲十。菩薩以此方便調伏一切眾生。佛子。菩薩摩訶薩往詣道場。有十種事。何等爲十。所謂詣道場時照耀一切世界。詣道場

時震動一切世界。詣道場時於一切世界普現其身。詣道場時覺悟一切菩薩及一切宿世同行眾生。詣道場時示現道場一切莊嚴。詣道場時隨諸眾生心之所欲而爲現身種種威儀及菩提樹一切莊嚴。詣道場時現見十方一切如來。詣道場時舉足下足常入三昧。念念成佛無有超隔。詣道場時一切天龍夜叉。乾闥婆。阿修羅。迦樓羅。緊那羅。摩睺羅伽。釋梵護世一切諸王。各不相知而與種種上妙供養。詣道場時以無礙智普觀一切諸佛如來於一切世界修菩薩行而成正覺。是爲十。菩薩以此教化眾生佛子。菩

薩摩訶薩坐道場有十種事。何等爲十。所謂坐道場時種種震動一切世界。坐道場時平等照耀一切世界。坐道場時除滅一切諸惡趣苦。坐道場時合一切世界金剛所成。坐道場時普現一切諸佛如來師子之座。坐道場時心如虛空無所分別。坐道場時隨其所應現身威儀。坐道場時隨順安住金剛三昧。坐道場時受一切如來神力所持清淨妙處。坐道場時自善根力悉能加被一切眾生。是爲十。佛子。菩薩摩訶薩坐道場時。有十種奇特未曾有事。何等爲十。佛子。菩薩摩訶薩坐道場時。十方世界一切如來皆現其

前咸舉右手而稱讚言。善哉善哉。無上導師。是爲第一。未曾有事。菩薩摩訶薩坐道場時。一切如來皆悉護念。與其威力。是爲第二。未曾有事。菩薩摩訶薩坐道場時。宿世同行諸菩薩眾。悉來圍繞。以種種莊嚴具。恭敬供養。是爲第三。未曾有事。菩薩摩訶薩坐道場時。一切世界草木叢林。諸無情物。皆曲身低影。歸向道場。是爲第四。未曾有事。菩薩摩訶薩坐道場時。入三昧。名觀察法界。此三昧力。能令菩薩一切諸行。悉得圓滿。是爲第五。未曾有事。菩薩摩訶薩坐道場時。得陀羅尼。名最上離垢妙光海藏。能受一切諸佛。

如來大雲法雨是爲第六未曾有事。菩薩摩訶薩坐道場時。以威德力與上妙供具。徧一切世界。供養諸佛。是爲第七未曾有事。菩薩摩訶薩坐道場時。住最勝智。悉現了知一切眾生諸根意行。是爲第八未曾有事。菩薩摩訶薩坐道場時。入三昧名善覺。此三昧力。能令其身充滿三世盡虛空界一切世界。是爲第九未曾有事。菩薩摩訶薩坐道場時。得離垢光明無礙大智。令其身業。普入三世。是爲第十未曾有事。佛子。是爲菩薩摩訶薩坐道場時十種奇特未曾有事。佛子。菩薩摩訶薩坐道場時。觀十種義。故示現降魔。

何等爲十。所謂爲濁世眾生樂於鬪戰欲顯菩薩威德力故示現降魔。爲諸天世人有懷疑者斷彼疑故示現降魔。爲教化調伏諸魔軍故示現降魔。爲欲令諸天世人樂軍陣者咸來聚觀心調伏故示現降魔。爲顯示菩薩所有威力世無能敵故示現降魔。爲欲發起一切眾生勇猛力故示現降魔。爲哀愍末世諸眾生故示現降魔。爲欲顯示乃至道場猶有魔軍而來觸惱此後乃得超魔境界故示現降魔。爲顯煩惱業用羸劣大慈善根勢力強盛故示現降魔。爲欲隨順濁惡世界所行法故示現降魔。是爲十。佛子。菩薩

摩訶薩有十種成如來力。何等爲十。所謂超過一切
眾魔煩惱業。故成如來力。具足一切菩薩行。遊戲一
切菩薩三昧門。故成如來力。具足一切菩薩廣大禪
定。故成如來力。圓滿一切白淨助道法。故成如來力。
得一切法智慧光明。善思惟分別。故成如來力。其身
周徧一切世界。故成如來力。所出言音。悉與一切眾
生心等。故成如來力。能以神力加持一切。故成如來
力。與三世諸佛身語意業等。無有異。於一念中了三
世法。故成如來力。得善覺智三昧具。如來十力。所謂
是處非處智力。乃至漏盡智力。故成如來力。是爲十。

若諸菩薩具此十力。則名如來。應正等覺佛子。如來應正等覺轉大法輪。有十種事。何等爲十。一者具足清淨四無畏智。二者出生四辯。隨順音聲。三者善能開闡四眞諦相。四者隨順諸佛無礙解脫。五者能令眾生心皆淨信。六者所有言說皆不唐捐。能拔眾生諸苦毒箭。七者大悲願力之所加持。八者隨出音聲。普徧十方一切世界。九者於阿僧祇劫說法不斷。十者隨所說法。皆能生起根力覺道禪定解脫三昧等法。佛子。諸佛如來轉於法輪。有如是等無量種事。佛子。如來應正等覺轉法輪時。以十事故。於眾生心中。

種白淨法無空過者。何等爲十。所謂過去願力故。大悲所持故。不捨眾生故。智慧自在。隨其所樂爲說法故。必應其時。未曾失故。隨其所宜。無妄說故。知三世智善了知故。其身最勝。無與等故。言辭自在。無能測故。智慧自在。隨所發言。悉開悟故。是爲十。佛子。如來應正等覺。作佛事已。觀十種義。故示般涅槃。何等爲十。所謂示一切行實無常故。示一切有爲非安隱故。示大涅槃是安隱處。無怖畏故。以諸人天樂著色身。爲現色身。是無常法。令其願住淨法身故。示無常力不可轉故。示一切有爲不隨心住。不自在故。示一切

三有皆如幻化不堅牢故。示涅槃性究竟堅牢不可壞故。示一切法無生無起而有聚集散壞相故。佛子。諸佛世尊作佛事已。所願滿已。轉法輪已。應化度者。皆化度已。有諸菩薩應受尊號成記。前已法應如是入於不變大般涅槃。佛子。是爲如來應正等覺觀十義。故示般涅槃。佛子。此法門名菩薩廣大清淨行。無量諸佛所共宣說。能令智者了無量義。皆生歡喜。令一切菩薩大願大行。皆得相續。

大文第二住兜率下有十九門。明果用圓滿行。多約入相顯果用者。明是普賢大用之果。不就淨土

實報處說。又顯實報不可說故。又顯八相通因果故。此是疏義。據實而論。如前五位因終所感平等之果。如出現品一一具明。今既普賢稱法界因圓。而所感之果。以前福智莊嚴。應說報身報土之果。此中但明化身示現。不說報果者。若以因圓之果。則前出現已明。若據實報莊嚴。則如初分舉果勸樂。已明依正種種莊嚴。若此具說。不無重繁。此其一也。然此處處皆說果滿。十身齊作。但是普法界用而未克定。所示現事。故此品因圓。但舉一化身。約八相成道。以顯稱法界用之一班耳。如觀一葉。

見無邊春。如覩一隙。見無際空。故卽以住兜率天。一門觀之。此中十門。皆是法界之大用。是則要人了知化身從法報起。爲化身之源。以示三身平等。非若諸教。但說斷惑所成之佛也。故觀教者。不可不識此源頭也。今十九門合爲十門。初一門住天。二一門示沒。三一門入胎。四一門住胎。五三門初生。六二門在家。七二門出家。八五門成道。九二門轉法輪。十有一門入涅槃。初之二門合屬第三。故是八相。初住天一門而有十事。故爲果中之行。一化欲天。二化色天。三化大千。四同類共談。五爲同

類說法。六善巧降魔。七樂音說法。八詣佛聞法。九
供養多佛。十多身益生。由住天宮有此十種作業。
故爲果中之行。要顯果中不捨因行。於此示生。乃
能見之。此乃一處現身之用。況遍法界處處現身。
種種作用。豈可得而思議耶。諦觀向下門門作用。
微細難知。足可徵矣。上來至大願大行皆得相
續。通答二百問說分竟。

大方廣佛華嚴經綱要卷第五十八

大方廣佛華嚴經綱要卷第五十九

唐于闐國三藏沙門實又難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

上來至大願大行皆得相續通答普慧二百問說
分竟下結勸修學

離世間品第三十八之七

佛子。若有眾生得聞此法。聞已信解。解已修行。必得
疾成阿耨多羅三藐三菩提。何以故。以如說修行故。
佛子。若諸菩薩不如說行。當知是人於佛菩提則爲

永離。是故菩薩應如說行。佛子。此一切菩薩功德行處。決定義華。普入一切法。普生一切智。超諸世間。離二乘道。不與一切諸眾生共。悉能照了一切法門。增長眾生出世善根。離世間法門品。應尊重。應聽受。應誦持。應思惟。應願樂。應修行。若能如是。當知是人。疾得阿耨多羅三藐三菩提。說此品時。佛神力故。及此法門法如是故。十方無量無邊阿僧祇世界。皆大震動。大光普照。爾時十方諸佛。皆現普賢菩薩前。讚言善哉善哉。佛子。乃能說此諸菩薩摩訶薩功德行處。決定義華。普入一切佛法出世間法門品。佛子。汝已

善學此法。善說此法。汝以威力護持此法。我等諸佛悉皆隨喜。如我等諸佛隨喜於汝。一切諸佛悉亦如是。佛子。我等諸佛悉共同心護持此經。令現在未來諸菩薩眾。未曾聞者皆當得聞。爾時普賢菩薩摩訶薩。承佛神力。觀察十方一切大眾。洎於法界而說頌言。

於無量劫修苦行

從無量佛正法生

令無量眾住菩提

彼無等行聽我說

供無量佛而捨著

廣度羣生不作想

求佛功德心無依

彼勝妙行我今說

離三界魔煩惱業

具勝功德最勝行

滅諸癡惑心寂然

我今說彼所行道

永離世間諸誑幻

種種變化示眾生

心生住滅現眾事

說彼所能令眾喜

見諸眾生老死

煩惱憂橫所纏迫

欲令解脫教發心

彼功德行應聽受

施戒忍進禪智慧

方便慈悲喜捨等

百千萬劫常修行

彼人功德仁應聽

千萬億劫求菩提

所有身命皆無吝

願益羣生不爲己

彼慈愍行我今說

無量億劫演其德 如海一滴未爲少

功德無比不可喻 以佛威神今略說

其心不高下 求道無厭倦 普使諸眾生

住善增淨法 智慧普饒益 如樹如河泉

亦如於大地 一切所依處 菩薩如蓮華

慈根安隱莖 智慧爲眾藥 戒品爲香潔

佛放法光明 令彼得開敷 不著有爲水

見者皆欣樂 菩薩妙法樹 生於直心地

信種慈悲根 智慧以爲身 方便爲枝幹

五度爲繁密 定葉神通華 一切智爲果

最上力爲薦 垂陰覆三界 菩薩師子王

白淨法爲身 四諦爲其足 正念以爲頸

慈眼智慧首 頂繫解脫繒 勝義空谷中

吼法怖眾魔 菩薩爲商主 普見諸羣生

在生死曠野 煩惱險惡處 魔賊之所攝

癡盲失正道 示其正直路 令人無畏城

菩薩見眾生 三毒煩惱病 種種諸苦惱

長夜所煎迫 爲發大悲心 廣說對治門

入萬四千種 滅除眾苦患 菩薩爲法王

正道化眾生 令遠惡修善 專求佛功德

一切諸佛所 灌頂受尊記 廣施眾聖財
菩提分珍寶 菩薩轉法輪 如佛之所轉
戒轂三昧輞 智莊慧爲劍 旣破煩惱賊
亦殄眾魔怨 一切諸外道 見之無不散
菩薩智慧海 深廣無涯際 正法味盈洽
覺分寶充滿 大心無邊岸 一切智爲潮
眾生莫能測 說之不可盡 菩薩須彌山
超出於世間 神通三昧峰 大心安不動
若有親近者 同其智慧色 迴絕眾境界
一切無不覩 菩薩如金剛 志求一切智

信心及苦行 堅固不可動 其心無所畏

饒益諸羣生 眾魔與煩惱 一切悉摧滅

菩薩大慈悲 譬如重密雲 三明發電光

神足震雷音 普以四辯才 雨入功德水

潤洽於一切 令除煩惱熱 菩薩正法城

般若以爲牆 慚愧爲深澗 智慧爲卻敵

廣開解脫門 正念恆防守 四諦坦王道

六通集兵仗 復建大法幢 周迴徧其下

三有諸魔眾 一切無能入 菩薩迦樓羅

如意爲堅足 方便勇猛翅 慈悲明淨眼

住一切智樹 觀三有大海 搏撮天人龍
安置涅槃岸 菩薩正法日 出現於世間
戒品圓滿輪 神足速疾行 照以智慧光
長諸根力藥 滅除煩惱闇 消竭愛欲海
菩薩智光月 法界以爲輪 遊於畢竟空
世間無不見 三界識心內 隨時有增減
二乘星宿中 一切無儔匹 菩薩大法王
功德莊嚴身 相好皆具足 人天悉瞻仰
方便清淨日 智慧金剛杵 於法得自在
以道化羣生 菩薩大梵王 自在超三有

業惑悉皆斷 慈捨靡不具 處處示現身

開悟以法音 於彼三界中 拔諸邪見根

菩薩自在天 超過生死地 境界常清淨

智慧無退轉 絕彼下乘道 受諸灌頂法

功德智慧具 名稱靡不聞 菩薩智慧心

清淨如虛空 無性無依處 一切不可得

有大自在力 能成世間事 自具清淨行

令眾生亦然 菩薩方便地 饒益諸眾生

菩薩慈悲水 浣滌諸煩惱 菩薩智慧火

燒諸惑習薪 菩薩無住風 遊行三有空

菩薩如珍寶 能濟貧窮厄 菩薩如金剛

能摧顛倒見 菩薩如瓔珞 莊嚴三有身

菩薩如摩尼 增長一切行 菩薩德如華

常發菩提分 菩薩願如鬘 恆繫眾生首

菩薩淨戒香 堅持無缺犯 菩薩智塗香

普熏於三界 菩薩力如帳 能遮煩惱塵

菩薩智如幢 能摧我慢敵 妙行爲繒綵

莊嚴於智慧 慚愧作衣服 普覆諸羣生

菩薩無礙乘 巾之出三界 菩薩大力象

其心善調伏 菩薩神足馬 騰步超諸有

菩薩說法龍 普雨眾生心 菩薩優曇華

世間難值遇 菩薩大勇將 眾魔悉降伏

菩薩轉法輪 如佛之所轉 菩薩燈破闇

眾生見正道 菩薩功德河 恆順正道流

菩薩精進橋 廣度諸羣品 大智與弘誓

共作堅牢船 引接諸眾生 安置菩提岸

菩薩遊戲園 真實樂眾生 菩薩解脫華

莊嚴智宮殿 菩薩如妙藥 滅除煩惱病

菩薩如雪山 出生智慧藥 菩薩等於佛

覺悟諸羣生 佛心豈有他 正覺覺世間

如佛之所來 菩薩如是來 亦如一切智
以智入普門 菩薩善開導 一切諸羣生
菩薩自然覺 一切智境界 菩薩無量力
世間莫能壞 菩薩無畏智 知眾生及法
一切諸世間 色相各差別 音聲及名字
悉能分別知 雖離於名色 而現種種相
一切諸眾生 莫能測其道 如是等功德
菩薩悉成就 了性皆無性 有無無所著
如是一切智 無盡無所依 我今當演說
令眾生歡喜 雖知諸法相 如幻悉空寂

而以悲願心 及佛威神力 現神通變化

種種無量事 如是諸功德 汝等應聽受

一身能示現 無量差別身 無心無境界

普應一切眾 一音中具演 一切諸言音

眾生語言法 隨類皆能作 永離煩惱身

而現自在身 知法不可說 而作種種說

其心常寂滅 清淨如虛空 而普莊嚴刹

示現一切眾 於身無所著 而能示現身

一切世間中 隨應而受生 雖生一切處

亦不住受生 知身如虛空 種種隨心現

菩薩身無邊 普現一切處 常恭敬供養
最勝兩足尊 香華眾妓樂 幢幡及寶蓋
恆以深淨心 供養於諸佛 不離一佛會
普在諸佛所 於彼大眾中 問難聽受法
聞法入三昧 一一無量門 起定亦復然
示現無窮盡 智慧巧方便 了世皆如幻
而能現世間 無邊諸幻法 示現種種色
亦現心及語 入諸想網中 而恆無所著
或現初發心 利益於世間 或現久修行
廣大無邊際 施戒忍精進 禪定及智慧

四梵四攝等 一切最勝法 或現行成滿

得忍無分別 或現一生繫 諸佛與灌頂

或現聲聞相 或復現緣覺 處處般涅槃

不捨菩提行 或現為帝釋 或現為梵王

或天女圍繞 或時獨宴默 或現為比丘

寂靜調其心 或現自在王 統理世間法

或現巧術女 或現修善行 或現受五欲

或現入諸禪 或現初始生 或少或老死

若有思議者 心疑發狂亂 或現在天宮

或現始降神 或入或住胎 成佛轉法輪

或生或涅槃 或現入學堂 或在娑女中
或離俗修禪 或坐菩提樹 自然成正覺
或現轉法輪 或現始求道 或現爲佛身
宴坐無量刹 或修不退道 積集菩提具
深入無數劫 皆悉到彼岸 無量劫一念
一念無量劫 一切劫非劫 爲世示現劫
無來無積集 成就諸劫事 於一微塵中
普見一切佛 十方一切處 無處而不有
國土眾生法 次第悉皆見 經無量劫數
究竟不可盡 菩薩知眾生 廣大無有邊

彼一眾生身 無量因緣起 如知一無量

一切悉亦然 隨其所通達 教諸未學者

悉知眾生根 上中下不同 亦知根轉移

應化不應化 一根一切根 展轉因緣力

微細各差別 次第無錯亂 又知其欲解

一切煩惱習 亦知去來今 所有諸心行

了達一切行 無來亦無去 既知其行已

爲說無上法 雜染清淨行 種種悉了知

一念得菩提 成就一切智 住佛不思議

究竟智慧心 一念悉能知 一切眾生行

菩薩神通智 功力已自在 能於一念中
往詣無邊刹 如是速疾往 盡於無數劫
無處而不周 莫動毫端分 譬如工幻師
示現種種色 於彼幻中求 無色無非色
菩薩亦如是 以方便智幻 種種皆示現
充滿於世間 譬如淨日月 皎鏡在虛空
影現於眾水 不爲水所雜 菩薩淨法輪
當知亦如是 現世間心水 不爲世所雜
如人睡夢中 造作種種事 雖經億千歲
一夜未終盡 菩薩住法性 示現一切事

無量劫可極 一念智無盡 譬如山谷中
及以宮殿間 種種皆響應 而實無分別
菩薩住法性 能以自在智 廣出隨類音
亦復無分別 如有見陽燄 想之以爲水
馳逐不得飲 展轉更增渴 眾生煩惱心
應知亦如是 菩薩起慈愍 救之令出離
觀色如聚沫 受如水上泡 想如熱時燄
諸行如芭蕉 心識猶如幻 示現種種事
如是知諸蘊 智者無所著 諸處悉空寂
如機關動轉 諸界性永離 妄現於世間

菩薩住眞實 寂滅第一義 種種廣宣暢
而心無所依 無來亦無去 亦復無有住
煩惱業苦因 三種恆流轉 緣起非有無
非實亦非虛 如是入中道 說之無所著
能於一念中 普現三世心 欲色無色界
一切種種事 隨順三律儀 演說三解脫
建立三乘道 成就一切智 了達處非處
諸業及諸根 界解與禪定 一切至處道
宿命念天眼 滅除一切惑 知佛十種力
而未能成就 了達諸法空 而常求妙法

教化諸含識	修行最勝行	如大地一塵	窮於無數劫	得成如是行	大慈愍眾生	觀慧無損減	無謬無違道	而以度眾生	不與煩惱合
安住淨戒中	具足大慈悲	依於佛智住	說彼行無盡	我說其少分	一切無障礙	三聚皆清淨	亦不失正念	於此得無畏	而亦不盡漏
具諸授記行	精勤自安隱	起於奇特想	我今說少分	功德莊嚴義	由入此法門	三世悉明達	精進欲三昧	不捨修諸行	廣知出離道

能入佛功德 眾生行及刹 劫世悉亦知
無有疲厭想 差別智總持 通達真實義
思惟說無比 寂靜等正覺 發於普賢心
及修其行願 慈悲因緣力 趣道意清淨
修行波羅蜜 究竟隨覺智 證知力自在
成無上菩提 成就平等智 演說最勝法
能持具妙辯 逮得法王處 遠離於諸著
演說心平等 出生於智慧 變化得菩提
住持一切劫 智者大欣慰 深入及依止
無畏無疑惑 了達不思議 巧密善分別

善入諸三昧 普見智境界 究竟諸解脫

遊戲諸通明 纏縛悉永離 園林恣遊處

白法爲宮殿 諸行可欣樂 現無量莊嚴

於世心無動 深心善觀察 妙辯能開演

清淨菩提印 智光照一切 所住無等比

其心不下劣 立智如大山 種德若深海

如寶安住法 被甲誓願心 發起於大事

究竟無能壞 得授菩提記 安住廣大心

祕藏無窮盡 覺悟一切法 世智皆自在

妙用無障礙 眾生一切刹 及以種種法

身願與境界 智慧神通等 示現於世間
無量百千億 遊戲及境界 自在無能制
力無畏不共 一切業莊嚴 諸身及身業
語及淨修語 以得守護故 成辦十種事
菩薩心初發 及以心周徧 諸根無散動
獲得最勝根 深心增勝心 遠離諸諂誑
種種決定解 普入於世間 捨彼煩惱習
取茲最勝道 巧修使圓滿 逮成一切智
離退入正位 決定證寂滅 出生佛法道
成就功德號 道及無量道 乃至莊嚴道

次第善安住	悉皆無所著	手足及腹藏
金剛以爲心	被以慈哀甲	具足眾器仗
智首明達眼	菩提行爲耳	清淨戒爲鼻
滅闇無障礙	辯才以爲舌	無處不至身
最勝智爲心	行住修諸業	道場師子座
梵臥空爲住	所行及觀察	普照如來境
徧觀眾生行	奮迅及哮吼	離貪行淨施
捨慢持淨戒	不瞋常忍辱	不懈恆精進
禪定得自在	智慧無所行	慈濟悲無倦
喜法捨煩惱	於諸境界中	知義亦知法

福德悉成滿	智慧如利劍	普照樂多聞
明了趣向法	知魔及魔道	誓願咸捨離
見佛與佛業	發心皆攝取	離慢修智慧
不爲魔力持	爲佛所攝持	亦爲法所持
現住兜率天	又現彼命終	示現住母胎
亦現微細趣	現生及微笑	亦現行七步
示修眾技術	亦示處深宮	出家修苦行
往詣於道場	端坐放光明	覺悟諸羣生
降魔成正覺	轉無上法輪	所現悉已終
入於大涅槃	彼諸菩薩行	無量劫修習

廣大無有邊 我今說少分 雖令無量眾

安住佛功德 眾生及法中 畢竟無所取

具足如是行 遊戲諸神通 毛端置眾刹

經於億千劫 掌持無量刹 徧往身無倦

還來置本處 眾生不知覺 菩薩以一切

種種莊嚴刹 置於一毛孔 眞實悉令見

復以一毛孔 普納一切海 大海無增減

眾生不燒害 無量鐵圍山 手執碎爲塵

一塵下一刹 盡此諸塵數 以此諸塵刹

復更末爲塵 如是塵可知 菩薩智難量

於一毛孔中 放無量光明 日月星宿光
摩尼珠火光 及以諸天光 一切皆映蔽
滅諸惡道苦 爲說無上法 一切諸世間
種種差別音 菩薩以一音 一切皆能演
決定分別說 一切諸佛法 普使諸羣生
聞之大歡喜 過去一切劫 安置未來今
未來現在劫 迴置過去世 示現無量刹
燒然及成住 一切諸世間 悉在一毛孔
去來及現在 一切十方佛 靡不於身中
分明而顯現 深知變化法 善應眾生心

示現種種身	而皆無所著	或現於六趣
一切眾生身	釋梵護世身	諸天人眾身
聲聞緣覺身	諸佛如來身	或現菩薩身
修行一切智	善入輓中上	眾生諸想網
示現成菩提	及以諸佛刹	了知諸想網
於想得自在	示修菩薩行	一切方便事
示現如是等	廣大諸神變	如是諸境界
舉世莫能知	雖現無所現	究竟轉增上
隨順眾生心	令得真實道	身語及與心
平等如虛空	淨戒爲塗香	眾行爲衣服

法繪嚴淨髻 一切智摩尼 功德靡不周

灌頂升王位 波羅蜜爲輪 諸通以爲象

神足以爲馬 智慧爲明珠 妙行爲姝女

四攝主藏神 方便爲主兵 菩薩轉輪王

三昧爲城郭 空寂爲宮殿 慈甲智慧劍

念弓明利箭 高張神力蓋 迴建智慧幢

忍力不動搖 直破魔王軍 總持爲平地

衆行爲河水 淨智爲涌泉 妙慧作樹林

空爲澄淨池 覺分菡萏華 神力自莊嚴

三昧常娛樂 思惟爲姝女 甘露爲美食

解脫味爲漿 遊戲於三乘 此諸菩薩行

微妙轉增上 無量劫修行 其心不厭足

供養一切佛 嚴淨一切刹 普令一切眾

安住一切智 一切刹微塵 悉可知其數

一切虛空界 一沙可度量 一切眾生心

念念可數知 佛子諸功德 說之不可盡

欲具此功德 及諸上妙法 欲使諸眾生

離苦常安樂 欲令身語意 悉與諸佛等

應發金剛心 學此功德行

大文第七結勸修學。經云。此法門名菩薩廣大清

淨行。無量諸佛所共宣說。此舉名法義。又云。若有
眾生聞此法門。信解修行。必疾得菩提。此勸信修
行。後云。增長眾生出世善根。離世間法門品。此結
名也。後十方世界震動放光。乃現瑞證。成十方諸
佛菩薩共讚。乃人讚證。後護持流通末世得聞。此
結一會之談。爲究竟法。是則此品以爲全部華嚴
矣。後頌有二百一十五偈半。隨疏可知。上離世
間品。乃第二遍明六位因果。下第九會逝多林說
入法界法門。卽入法界品。自六十卷起至八十卷
終。乃第三遍明六位因果。通爲依人證入成德分。

離世間品竟

大方廣佛華嚴經綱要卷第五十九

大方廣佛華嚴經綱要卷第六十

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

第九逝多園林重閣會說

入法界品第三十九之一

初辨分來者。名依人證入成德分。由前兩番研窮六位因果。以依信發解。行起解絕。苟無證入之人。則前解行俱爲虛設。夫行因證立。證藉行深。前旣託法進修行成。故此依人證入。亦爲遠答解脫海。

問故。有此分來。

次言會來者。乃在逝多園林。此是人間舍衛國中。祇陀太子與給孤長者同捨園林。請佛說法之處。乃化佛釋迦牟尼現前說法之所。然前因位行門。俱在普光及天上而說。而此證入深法界門。在人間常居而說者。有其二義。一要依人證入。如裴公云。修羅方瞋。諸天耽樂。可以整心慮。趨菩提。唯人道爲能耳。若欲依人。必要在人間。以便親近知識。請問法門。卽善財南詢百十一城。參五十三大善知識。非在人間廣參知識。博問先賢。何以能成己。

德。故此一品有本末二會。本會顯示所證法界。末會顯能證之人。此一義也。二者盧舍那佛是報身佛。所居報土。乃華藏莊嚴微妙佛刹。現法界身。雲說此法界圓融無障礙法門。然二乘在座。猶如盲如聾。況五濁業垢眾生。而能堪此法耶。所以居此說者。正顯圓融法界染淨融通。卽此娑婆。便是華藏。卽此化身。便是報身。正顯真應不二。染淨融通。生佛平等。意在直指現前此法。皆是法界無障礙境。但隨機所見不同故。佛及菩薩所見者。卽此重閣。廣博包含。量周法界。卽此園林莊嚴。全是華藏。

十方海會無盡重重。而二乘與人見之。但是人間尋常園林重閣。而法會所集。直是人天八部而已。此是下文經中所說二乘不見說喻可知。所以如此顯示者。只就諸人直下頓證。頓入無障礙法界。不離目前。不離日用。全是一真佛境界耳。卽此說法之會。全彰法界理事事事圓融之妙。不必向外馳求也。故此一品。疏分本末二會。然本會意顯頓證。末會意在漸修。本末一際。頓漸圓融。此會之來意也。品名入法界者。人乃能入之智行。法界乃所入之境界。若依人爲能證者。卽文殊根本之大智。

普賢法界之妙行。及諸佛菩薩善友知識。已能證入之人。一一皆以淨信正解正修行三門爲能入之具。今善財乃未證之人。今從文殊發起淨信。參多知識。決擇正解。一一皆得一種解脫。是爲正修行路。一一隨行證入。是爲證得。直至見普賢。方證圓滿。故疏首列淨信正解修行證得圓滿五者爲能入之人與法也。然所入之法界。義有多門。難以具列。若究其宗本。唯以一真無障礙法界爲宗。通一法身而爲其體。良以法身普徧一切處。一切眾生及國土。是上至諸佛。下及六道一切眾生。內而

正報根身。外而依報世界。皆依法身建立。以有聖凡。依正理事之分。一一區別不同。故轉法身之名。而爲法界。不出理事二種。故疏釋理法界。而有五義。一者性義。以法身流轉五道。名爲眾生。故在有情而爲佛性。一切眾生卽法界。故在無情是爲法性。卽諸法之實體。以一切世界。依眞而立。故二者因義。一切聖人四念處等法。緣此而生。故三者藏義。爲諸妄法之隱覆。非凡夫小乘所能緣。故四者眞實義。以是眾生之佛性。諸法之實相。故五者甚深義。以聖凡平等。依正互融。無障無礙。故爲甚深。

上乃理法界也。若約事法界。復有持義。謂一一能持自性。又持諸法之差別種類。不相雜亂。又種族義。卽十八界。上通理事。又分齊義。卽緣起事法。各各區分。不相雜亂。此上通言理事二種法界也。今經所明。有四重法界。謂一理法界。二事法界。三理事無礙法界。四事事無礙法界。謂一真之理。全成有相之事。卽十法界。聖凡依正因果等事。由事攬理成。故理不礙事。理能隨緣。故事卽理。如全波卽水。全水卽波。不相妨礙。故爲理事無礙法界。四事事無礙法界者。謂具顯圓融。以理所成之事。卽事

事皆理。故理既徧而事亦徧。是以一塵一毛能含無盡之事。由事事卽理。故一一事法隨理而融通。是以一塵一毛不但能含亦能隨理而徧。故一一塵毛由此含徧之力。故一塵一毛一一皆能含能徧。能攝能容。故重重重重無障無礙。以六相圓融具顯十重立門。故成事事無礙法界。正是今經所說法界深玄妙極於此。是爲毘盧遮那所證之法界。故文殊之大智所照者。照此法界。普賢之妙行依此而修。依此而證。故曰無不從此法界流。無不還歸此法界。是爲此經之宗極。然善財之所證。如

下入彌勒樓閣。入普賢身等皆一生頓證此無障礙法界。故名所入之法界也。然前信解成行兩番因果。皆依此無障礙法界而說。故今證入亦入此而已。若欲窮源。具載本疏及法界觀門。然疏多義亦不出此。就本會中長科十分。一序分。至十無涯大用分。今初。雖義貫末會。以從處別。獨判在初。

爾時世尊在室羅筏國逝多林給孤獨園大莊嚴重閣。與菩薩摩訶薩五百人俱。普賢菩薩。文殊師利菩薩。而爲上首。其名曰。光燄幢菩薩。須彌幢菩薩。寶幢菩薩。無礙幢菩薩。華幢菩薩。離垢幢菩薩。日幢菩薩。

妙幢菩薩。離塵幢菩薩。普光幢菩薩。地威力菩薩。寶
威力菩薩。大威力菩薩。金剛智威力菩薩。離塵垢威
力菩薩。正法日威力菩薩。功德山威力菩薩。智光影
威力菩薩。普吉祥威力菩薩。地藏菩薩。虛空藏菩薩。
蓮華藏菩薩。寶藏菩薩。日藏菩薩。淨德藏菩薩。法印
藏菩薩。光明藏菩薩。齋藏菩薩。蓮華德藏菩薩。善眼
菩薩。淨眼菩薩。離垢眼菩薩。無礙眼菩薩。普見眼菩
薩。善觀眼菩薩。青蓮華眼菩薩。金剛眼菩薩。寶眼菩
薩。虛空眼菩薩。喜眼菩薩。普眼菩薩。天冠菩薩。普照
法界智慧冠菩薩。道場冠菩薩。普照十方冠菩薩。一

切佛藏冠菩薩。超出一切世間冠菩薩。普照冠菩薩。不可壞冠菩薩。持一切如來師子座冠菩薩。普照法界虛空冠菩薩。梵王髻菩薩。龍王髻菩薩。一切化佛光明髻菩薩。道場髻菩薩。一切願海音寶王髻菩薩。一切佛光明摩尼髻菩薩。示現一切虛空平等相摩尼王莊嚴髻菩薩。示現一切如來神變摩尼王幢網垂覆髻菩薩。出一切佛轉法輪音髻菩薩。說三世一切名字音髻菩薩。大光菩薩。離垢光菩薩。寶光菩薩。離塵光菩薩。燄光菩薩。法光菩薩。寂靜光菩薩。日光菩薩。自在光菩薩。天光菩薩。福德幢菩薩。智慧幢菩薩。

薩。法幢菩薩。神通幢菩薩。光幢菩薩。華幢菩薩。摩尼
幢菩薩。菩提幢菩薩。梵幢菩薩。普光幢菩薩。梵音菩
薩。海音菩薩。大地音菩薩。世主音菩薩。山相擊音菩
薩。徧一切法界音菩薩。震一切法海雷音菩薩。降魔
音菩薩。大悲方便雲雷音菩薩。息一切世間苦安慰
音菩薩。法上菩薩。勝上菩薩。智上菩薩。福德須彌上
菩薩。功德珊瑚上菩薩。名稱上菩薩。普光上菩薩。大
慈上菩薩。智海上菩薩。佛種上菩薩。光勝菩薩。德勝
菩薩。上勝菩薩。普明勝菩薩。法勝菩薩。月勝菩薩。虛
空勝菩薩。寶勝菩薩。幢勝菩薩。智勝菩薩。娑羅自在

王菩薩。法自在王菩薩。象自在王菩薩。梵自在王菩薩。山自在王菩薩。眾自在王菩薩。速疾自在王菩薩。寂靜自在王菩薩。不動自在王菩薩。勢力自在王菩薩。最勝自在王菩薩。寂靜音菩薩。無礙音菩薩。地震音菩薩。海震音菩薩。雲音菩薩。法光音菩薩。虛空音菩薩。說一切眾生善根音菩薩。示一切大願音菩薩。道場音菩薩。須彌光覺菩薩。虛空覺菩薩。離染覺菩薩。無礙覺菩薩。善覺菩薩。普照三世覺菩薩。廣大覺菩薩。普明覺菩薩。法界光明覺菩薩。如是等菩薩摩訶薩五百人俱。此諸菩薩皆悉成就普賢行願境界。

無礙。普徧一切諸佛刹故。現身無量。親近一切諸如來故。淨眼無障見一切佛神變事故。至處無限。一切如來成正覺所。恆普詣故。光明無際。以智慧光普照一切實法海故。說法無盡。清淨辯才無邊際。劫無窮盡故。等虛空界。智慧所行。悉清淨故。無所依止。隨眾生心。現色身故。除滅癡翳。了眾生界。無眾生故。等虛空智。以大光網照法界故。

室羅筏卽舍衛國。此云聞物。以此國中多出聰明博達名聞人物故。逝多卽祇陀。此云戰勝。太子之名也。給孤獨。梵云須達多。此云賑濟無依。長者之

名。以長者能行惠施賑濟孤貧故。得此美稱。五百菩薩。此法會之伴眾。以名標德。各有所表。文殊乃大智。普賢乃大行。正是入法界之主故。下列名有一百四十一人。前四十一人通表住等四位。初十幢表十向。次有九威力表十行。次十藏表十地。次有十二眼表十住。所以不次者。欲表圓融之位無前後故。次天冠下一百人。表行布十地。十波羅蜜。然每地有十者。顯一一地中。具足一切諸地功德。以彰圓融故。此諸菩薩。皆是已入法界之人。故下歎德云。皆悉成就普賢之妙行。各具文殊之大智。

等歎德有十一句。初句爲總。餘十句別。前六明智用普周。後四明智用離障。

及與五百聲聞眾俱。悉覺眞諦。皆證實際。深入法性。永出有海。依佛功德。離結使縛。住無礙處。其心寂靜。猶如虛空。於諸佛所。永斷疑惑。於佛智海。深信趣入。此列在會聲聞眾也。問曰。此華嚴法會所說最上一乘圓融法門。獨被上根。何以列有聲聞之眾耶。況下如盲如聾。既不聞見。卽非當機。又何必列此。答曰。此甚深妙義。最難通會。若據此經宗趣。則是佛以稱法界身雲。一時普現。一音說法。異類齊解。

本無權實之分。此稱本法界之大用也。若約建化門頭。則此法門獨被上上根人。二乘絕分。則所化不啻。故曰唯有一門而復狹小。若欲普度三根。必須應身。故前示現八相成道。下生人間。乃特爲接引三根。齊成佛道之意也。然佛雖化身。乃卽法報所垂之化身。而在座當機。豈博地凡夫無信聞提。而能鼓揚法化耶。故須大乘菩薩。示現聲聞。以爲輔翼。乃能節拍咸合。所以靈山上首。皆大權示現。故疏於歎德中。以本跡二門釋之。又引如來不思議境界經云。復有無量百千億菩薩。現聲聞形而

來會座。其名曰舍利弗等。由是觀之。靈山一會。不獨十大上首。卽凡所示現者。皆大權也。故特先建言此會。以爲垂跡之張本。所謂垂絲千尺。意在深潭。然若逆若順。若邪若正。皆法界之大用。誠種種方便。引入佛慧也。

及與無量諸世主俱。悉會供養無量諸佛。常能利益一切眾生。爲不請友。恆勤守護。誓願不捨。入於世間殊勝智門。從佛教生。護佛正法。起於大願。不斷佛種。生如來家。求一切智。

此集世主眾也。然此法會廣大無邊。而所集世主。

略標而已者。以初會世尊初成正覺。法界人天世
主普會道場。而經初所列異生之類。有四十眾。一
一具佛一德。是大會已集矣。今此九會祇圓未起
初會之處。是則一會儼然。今略標者。但新集而已。

上序
分竟

時諸菩薩大德聲聞世間諸王。并其眷屬咸作是念。
此下正宗初請分也。眾集本爲聞法。故皆念請。然
聲聞下如盲聾。而此亦念請者。且此念請。總標菩
薩以爲上首。應爲請主。而聲聞在座。無論知與不
知。不妨同舉。今在本門。亦當同請。

如來境界。如來智行。如來加持。如來力。如來無畏。如來三昧。如來所住。如來自在。如來身。如來智。

此下列念所請也。請文有六十句。初十句。後二十句。乃所請之法。中三十句。但是請儀。其所請法。多同初會四十句問。皆果海中之德。前初會所請者。通一部始終以答。乃已成之果德。今所問意雖同。而意在本會之所證者。乃當成之果德。卽由前智行爲能證。此果爲所證故。今初念德中十句。正念果法。然此果法前出現及不思議法品已答初問。俱一一答明。疏引對辨智者詳之。

佛力爲緣。容有可入之機。故前一一法門。皆云承佛神力。

唯願世尊。隨順我等。及諸眾生。種種欲。種種解。種種智。種種語。種種自在。種種住地。種種根。清淨。種種意。方便。種種心境界。種種依止。如來功德。種種聽受。諸所說法。

此十句請佛隨機。宜隨器所堪。種種方便。而爲說之。此請雖在當會。而意在普攝三根。開權之意。已兆於此。故法華云。我以無量無數方便。種種因緣。而爲開示。但爲一乘。引入佛慧。皆由於此。

顯示如來往昔趣求一切智心。往昔所起菩薩大願。往昔所淨諸波羅蜜。往昔所入菩薩諸地。往昔圓滿諸菩薩行。往昔成就方便。往昔修行諸道。往昔所得出離法。往昔所作神通事。往昔所有本事因緣。

此十句請說佛之往因。修習行門及本事等。意在知佛所行當依之造修。其中之義。疏引配初會十海。可以意得。

及成等正覺。轉妙法輪。淨佛國土。調伏眾生。開一切智法城。示一切眾生道。入一切眾生所住。受一切眾生所施。爲一切眾生說布施功德。爲一切眾生現諸

佛影像。如是等法。願皆爲說。

此十句問佛果用。以初成正覺。終至變化度生。皆果用之事。今並問者。旣知佛之往修勝行。則當知佛之利生妙用。乃菩薩所當學。當修當成者。故一一問之。疏引此十對。初會十海。其名雖異。其義多同。對詳可知。然上諸問。具在後。如來現相以答。以果海離言。但示相以顯要。人目擊現證而已。

爾時世尊。知諸菩薩心之所念。大悲爲身。大悲爲門。大悲爲首。以大悲法而爲方便。充徧虛空。入師子頻申三昧。

大文第三爾時世尊下三昧現相分。酬其念請示相以答。於中先明三昧。後入此三昧下。明所現淨土。正示相以答。然問佛所證果海中事。未形於言。但以念請而佛所答亦未顯說。但以三昧神力示相而已。然而畢竟無言說者。正顯果海究竟離言不可說示。但在觸事而真。目前一一無非法身之大用。故世尊既知菩薩心之所念。未答之先。敘四種大悲而爲方便者。正顯法身湛然不動。倏因大眾作念求法。以此熏動法身而起同體大悲。以爲方便。爲眾一指示耳。然全體法身全成大悲。以起

大用。故以悲爲身。法界平等。了無出入。今以悲接引令入。故以悲爲門。法身應物。必以大悲爲前導。故以悲爲首。由是全以大悲而爲方便。由法身充滿虛空。故悲亦充徧。此通敘同體大悲起利物之用也。言入師子頻申三昧者。此三昧以喻爲名。然師子乃獸中之王。有大力用。凡一舉動。百獸皆畏。故以喻佛無畏之德。言頻申亦云奮迅。乃是師子舉身動轉之狀。自在遊行。以師子調兔卽一頻一欠。皆用全力。今以喻佛將起利生之用者。然法身法界寂滅如如。如師子安臥窟中。今從法身起用。

將現說法。如師子出窟。法界全體而爲迴轉。大自在用。如師子奮迅。若法身普現。則徧法界山河大地。草木叢林。皆是法身全體獨露。故下因此三昧。則樓閣園林。虛空一一莊嚴。與法界等。故一一皆是教道。以皆是平等無障法界。令諸菩薩觀此現相。皆了如來果中所證之境。更不待言。所以爲現相答也。

入此三昧已。一切世間普皆嚴淨。於時此大莊嚴樓閣。忽然廣博。無有邊際。金剛爲地。寶王覆上。無量寶華。及諸摩尼。普散其中。處處盈滿。琉璃爲柱。眾寶合

成。大光摩尼之所莊嚴。閻浮檀金。如意寶王。周置其上。以爲嚴飾。危樓迴帶。閣道傍出。棟宇相承。牕闥交映。堦墀軒檻。種種備足。一切皆以妙寶莊嚴。其寶悉作人天形像。堅固妙好。世中第一。摩尼寶網。彌覆其上。於諸門側。悉建幢幡。咸放光明。普周法界。道場之外。階墜欄楯。其數無量。不可稱說。靡不咸以摩尼所成。爾時復以佛神力故。其逝多林。忽然廣博。與不可說佛刹微塵數諸佛國土。其量正等。一切妙寶間錯莊嚴。不可說寶徧布其地。阿僧祇寶。以爲垣牆。寶多羅樹。莊嚴道側。其間復有無量香河。香水盈滿。湍激

洞瀆。一切寶華隨流右轉。自然演出佛法音聲。不思議寶芬陀利華。菡萏芬敷。彌布水上。眾寶華樹。列植其岸。種種臺榭不可思議。皆於岸上次第行列。摩尼寶網之所彌覆。阿僧祇寶放大光明。阿僧祇寶莊嚴其地。燒眾妙香。香氣氤復。建無量種種寶幢。所謂寶香幢。寶衣幢。寶幡幢。寶繪幢。寶華幢。寶瓔珞幢。寶鬘幢。寶鈴幢。摩尼寶蓋幢。大摩尼寶幢。光明徧照摩尼寶幢。出一切如來名號音聲。摩尼王幢。師子摩尼王幢。說一切如來本事。海摩尼王幢。現一切法界影像。摩尼王幢。徧十方。行列莊嚴。時逝多林上虛空。

之中。有不思議天宮殿雲。無數香樹雲。不可說須彌山雲。不可說妓樂雲。出美妙音。歌讚如來。不可說寶蓮華雲。不可說寶座雲。敷以天衣。菩薩坐上。歎佛功德。不可說諸天王形像摩尼寶雲。不可說白真珠雲。不可說赤珠樓閣莊嚴具雲。不可說兩金剛堅固珠雲。皆住虛空。周布徧滿。以爲嚴飾。何以故。如來善根。不思議故。如來白法。不思議故。如來威力。不思議故。如來能以一身自在變化。徧一切世界。不思議故。如來能以神力。令一切佛及佛國莊嚴。皆入其身。不思議故。如來能於一微塵內。普現一切法界影像。不思

議故。如來能於一毛孔中。示現過去一切諸佛。不思議故。如來隨放一一光明。悉能徧照一切世界。不思議故。如來能於一毛孔中。出一切佛刹微塵數變化雲。充滿一切諸佛國土。不思議故。如來能於一毛孔中。普現一切十方世界。成住壞劫。不思議故。如於此逝多林。給孤獨園。見佛國土清淨莊嚴。十方一切盡法界。虛空界一切世界。亦如是見。所謂見如來身。住逝多林。菩薩眾會。皆悉徧滿。見普雨一切莊嚴雲。見普雨一切寶光明照耀雲。見普雨一切摩尼寶雲。見普雨一切莊嚴蓋彌覆佛刹雲。見普雨一切天身雲。

見普雨一切華樹雲。見普雨一切衣樹雲。見普雨一切寶鬘瓔珞相續不絕。周徧一切大地雲。見普雨一切莊嚴具雲。見普雨一切如眾生形種種香雲。見普雨一切微妙寶華網。相續不斷雲。見普雨一切諸天女持寶幢幡。於虛空中周旋來去雲。見普雨一切眾寶蓮華。於華葉間。自然而出種種樂音雲。見普雨一切師子座寶網瓔珞而爲莊嚴雲。

此入此三昧所現淨土。正示佛之境界。令其目擊現前證入也。卽此所現淨土。具答前三十問。且從相顯。此中先答果體十問。餘二十問。在後集眾中。

答。今初所現境界。答如來境界問。四種大悲爲眾生現。卽答如來智行問。令眾證見。卽答加持問。知是如來威力。答佛力問。三昧之用。答無畏問。正入三昧。答三昧問。淨法界土。答住處問。令大小融攝。卽答自在問。見如來身徧於法界。答佛身問。則見如來大悲方便。答智慧問。卽此世間嚴淨已下。若樓閣若地若園。乃至虛空中。一一皆是法身境界。不可思議果中之法。前念請者。卽此現相俱已畢。答。更不待言說。此皆師子奮迅三昧威神自在之力也。今人法界所證者。唯此一現相而已。深矣玄。

矣。微妙哉。誠不可思議之法門也。世間有二。此上器世間嚴。次何以故下。智正覺世間嚴。後集眾卽眾生世間嚴。

爾時東方過不可說佛刹微塵數世界。海外有世界名金燈雲幢。佛號毘盧遮那勝德王。彼佛眾中。有菩薩名毘盧遮那願光明。與不可說佛刹微塵數菩薩俱。來向佛所。悉以神力興種種雲。所謂天華雲。天香雲。天末香雲。天鬘雲。天寶雲。天莊嚴具雲。天寶蓋雲。天微妙衣雲。天寶幢幡雲。天一切妙寶諸莊嚴雲。充滿虛空。至佛所已。頂禮佛足。卽於東方化作寶莊嚴。

樓閣及普照十方寶蓮華藏師子之座。如意寶網。羅
覆其身。與其眷屬。結加趺坐。南方過不可說佛刹微
塵數世界海外。有世界名金剛藏。佛號普光明無勝
藏王。彼佛眾中。有菩薩名不可壞精進王。與不可說
佛刹微塵數菩薩俱。來向佛所。持一切寶香網。持一
切寶瓔珞。持一切寶華帶。持一切寶鬘帶。持一切金
剛瓔珞。持一切摩尼寶網。持一切寶衣帶。持一切寶
瓔珞帶。持一切最勝光明摩尼帶。持一切師子摩尼
寶瓔珞。悉以神力。充徧一切諸世界海。到佛所已。頂
禮佛足。卽於南方。化作徧照世間摩尼寶莊嚴樓閣。

三
及普照十方寶蓮華藏師子之座。以一切寶華網羅
覆其身。與其眷屬。結加趺坐。西方過不可說佛刹微
塵數世界海外。有世界名摩尼寶燈。須彌山幢。佛號
法界智燈。彼佛眾中。有菩薩名普勝無上威德王。與
世界海微塵數菩薩俱。來向佛所。悉以神力。與不可
說佛刹微塵數種種塗香。燒香。須彌山雲。不可說佛
刹微塵數種種色香水。須彌山雲。不可說佛刹微塵
數一切大地微塵等光明摩尼寶王。須彌山雲。不可
說佛刹微塵數種種光燄輪莊嚴幢。須彌山雲。不可
說佛刹微塵數種種色金剛藏摩尼王莊嚴。須彌山

雲不可說佛刹微塵數普照一切世界閻浮檀摩尼
寶幢須彌山雲不可說佛刹微塵數現一切法界摩
尼寶須彌山雲不可說佛刹微塵數現一切諸佛相
好摩尼寶王須彌山雲不可說佛刹微塵數現一切
如來本事因緣說諸菩薩所行之行。摩尼寶王須彌
山雲不可說佛刹微塵數現一切佛坐菩提場摩尼
寶王須彌山雲充滿法界。至佛所已。頂禮佛足。卽於
西方化作一切香王樓閣。眞珠寶網彌覆其上。及化
作帝釋影幢寶蓮華藏師子之座。以妙色摩尼網羅
覆其身。心王寶冠以嚴其首。與其眷屬結加趺坐。北

方過不可說佛刹微塵數世界海外有世界名寶衣
光明幢佛號照虛空法界大光明。彼佛眾中有菩薩
名無礙勝藏王。與世界海微塵數菩薩俱來向佛所。
悉以神力興一切寶衣雲。所謂黃色寶光明衣雲。種
種香所熏衣雲。日幢摩尼王衣雲。金色熾然摩尼衣
雲。一切寶光燄衣雲。一切星辰像上妙摩尼衣雲。白
玉光摩尼衣雲。光明徧照殊勝赫奕摩尼衣雲。光明
徧照威勢熾盛摩尼衣雲。莊嚴海摩尼衣雲。充徧虛
空。至佛所已頂禮佛足。卽於北方化作摩尼寶海莊
嚴樓閣。及毘琉璃寶蓮華藏師子之座。以師子威德

摩尼王網羅覆其身。清淨寶王爲髻明珠。與其眷屬結加趺坐。東北方過不可說佛刹微塵數世界海外。有世界名一切歡喜清淨光明網。佛號無礙眼。彼佛眾中有菩薩名化現法界願月王。與世界海微塵數菩薩俱來向佛所。悉以神力興寶樓閣雲。香樓閣雲。燒香樓閣雲。華樓閣雲。栴檀樓閣雲。金剛樓閣雲。摩尼樓閣雲。金樓閣雲。衣樓閣雲。蓮華樓閣雲。彌覆十方一切世界。至佛所已。頂禮佛足。卽於東北方化作一切法界門大摩尼樓閣。及無等香王蓮華藏師子之座。摩尼華網羅覆其身。著妙寶藏摩尼王冠。與其

眷屬結加趺坐。東南方過不可說佛刹微塵數世界
海外。有世界名香雲莊嚴幢。佛號龍自在王。彼佛眾
中。有菩薩名法慧光燄王。與世界海微塵數菩薩俱
來向佛所。悉以神力。興金色圓滿光明雲。無量寶色
圓滿光明雲。如來毫相圓滿光明雲。種種寶色圓滿
光明雲。蓮華藏圓滿光明雲。眾寶樹枝圓滿光明雲。
如來頂髻圓滿光明雲。同浮檀金色圓滿光明雲。日
色圓滿光明雲。星月色圓滿光明雲。悉徧虛空。到佛
所已。頂禮佛足。卽於東南方化作毘盧遮那最上寶
光明樓閣。金剛摩尼蓮華藏師子之座。眾寶光燄摩

尼王網羅覆其身。與其眷屬結加趺坐。西南方過。不可說佛刹微塵數世界海外。有世界名曰光摩尼藏。佛號普照諸法智月王。彼佛眾中有菩薩名摧破一切魔軍智幢王。與世界海微塵數菩薩俱來向佛所。於一切毛孔中。出等虛空界華燄雲。香燄雲。寶燄雲。金剛燄雲。燒香燄雲。電光燄雲。毘盧遮那摩尼寶燄雲。一切金光燄雲。勝藏摩尼王光燄雲。等三世如來海光燄雲。一一皆從毛孔中出。徧虛空界。到佛所已。頂禮佛足。卽於西南方化作普現十方法界光明網。大摩尼寶樓閣。及香燈燄寶蓮華藏師子之座。以離

垢藏摩尼網羅覆其身。著出一切眾生發趣音。摩尼
王嚴飾冠。與其眷屬結加趺坐。西北方過不可說佛
刹微塵數世界。海外有世界名毘盧遮那願摩尼王
藏佛號普光明最勝須彌王。彼佛眾中有菩薩名願
智光明幢。與世界海微塵數菩薩俱。來向佛所。於念
念中一切相好。一切毛孔。一切身分。皆出三世一切
如來形像雲。一切菩薩形像雲。一切如來眾會形像
雲。一切如來變化身形像雲。一切如來本生身形像
雲。一切聲聞辟支佛形像雲。一切如來菩提場形像
雲。一切如來神變形像雲。一切世間主形像雲。一切

清淨國土形像雲。充滿虛空。至佛所已頂禮佛足。卽於西北方化作普照十方摩尼寶莊嚴樓閣及普照世間寶蓮華藏師子之座。以無能勝光明眞珠網羅覆其身。著普光明摩尼寶冠。與其眷屬結加趺坐。下方過不可說佛刹微塵數世界海外。有世界名一切如來圓滿光普照。佛號虛空無礙相智幢王。彼佛眾中有菩薩名破一切障勇猛智王。與世界海微塵數菩薩俱。來向佛所。於一切毛孔中。出說一切眾生語言海音聲雲。出說一切三世菩薩修行方便海音聲雲。出說一切菩薩所起願方便海音聲雲。出說一切

菩薩成滿清淨波羅蜜方便海音聲雲，出說一切菩薩成就自
薩圓滿行，徧一切刹音聲雲，出說一切菩薩成就自
在用音聲雲，出說一切如來往詣道場，破魔軍眾，成
等正覺，自在用音聲雲，出說一切如來轉法輪契經
門名號海音聲雲，出說一切隨應教化調伏眾生法
方便海音聲雲，出說一切隨時隨善根隨願力，普令
眾生證得智慧方便海音聲雲，到佛所已，頂禮佛足，
卽於下方化作現一切如來宮殿形像眾寶莊嚴樓
閣，及一切寶蓮華藏師子之座，著普現道場影摩尼
寶冠，與其眷屬結加趺坐，上方過不可說佛刹微塵

數世界海外有世界名說佛種性無有盡佛號普智
輪光明音彼佛眾中有菩薩名法界差別願與世界
海微塵數菩薩俱發彼道場來向此娑婆世界釋迦
牟尼佛所於一切相好一切毛孔一切身分一切支
節一切莊嚴具一切衣服中現毗盧遮那等過去一
切諸佛未來一切諸佛已得授記未授記者現在十
方一切國土一切諸佛并其眾會亦現過去行檀那
波羅蜜及其一切受布施者諸本事海亦現過去行
尸羅波羅蜜諸本事海亦現過去行羼提波羅蜜割
截支體心無動亂諸本事海亦現過去行精進波羅

蜜勇猛不退諸本事海。亦現過去求一切如來禪波羅蜜海。而得成就諸本事海。亦現過去求一切佛所轉法輪。所成就法。發勇猛心。一切皆捨諸本事海。亦現過去樂見一切佛。樂行一切菩薩道。樂化一切眾生界。諸本事海。亦現過去所發一切菩薩大願。清淨莊嚴諸本事海。亦現過去菩薩所成力。波羅蜜勇猛清淨諸本事海。亦現過去一切菩薩所修圓滿智波羅蜜諸本事海。如是一切本事海。悉皆徧滿廣大法界。至佛所已。頂禮佛足。卽於上方化作一切金剛藏莊嚴樓閣。及帝青金剛王蓮華藏師子之座。以一切

寶光明摩尼王網羅覆其身以演說三世如來名摩
尼寶王爲髻明珠與其眷屬結加趺坐。

大文第四爾時東方下明集新眾分卽遠集同證
亦三昧神力令十方諸大菩薩皆來歸附文中有
三初別集十方後如是十方一切下通讚德行未
後如是等下一行經總結集因然此十方齊集雖
爲證法其實皆以毗盧遮那如來三昧神力加持
而來其所現相乃答前三十問中次隨機演法二
十句問是知所現種種境界無非教體其來主伴
及所獻種種微妙供養皆表依正因果無礙法界

自在之德故菩薩之名皆稱德立各有所表通顯
答前神通一問至第九下方於一切毛孔中出說
一切眾生語言海音聲等十句乃正答前因中五
問果中五問疏配甚明及第十上方相好等十句
通答因問中本事因緣兼答波羅蜜及所入諸地
等然前問如來因中本事而今於上方遠來菩薩
現相以答者正顯法界性中因果一致三世體同
自他平等以果事難思藉因以顯自性離言假他
以示總彰如來因果一際德用難思皆稱法界大
自在用故是知盡法界中一切因人所行眾行皆

是毗盧遮那之本事故。此又豈可言議而心思耶。故但借示現相特示一班耳。若以六相十玄圓融。乃見自他因果之妙。如上十方所現境界。皆如來三昧力之所加持也。

如是十方一切菩薩。并其眷屬。皆從普賢菩薩行願中生。

第二如是十方下。通讚德行。此讚諸來菩薩之德。卽是毗盧遮那因行中德。故初一句總讚云。皆從普賢行願中生。

以淨智眼。見三世佛。普聞一切諸佛如來所轉法輪。

修多羅海。已得至於一切菩薩自在彼岸。於念念中。現大神變。親近一切諸佛如來。一身充滿一切世界。一切如來眾會道場。

次別讚眾德中有三十五句。分三段。初五句明上近諸佛德。二於一塵中下十五句。下攝眾生德。三一切菩薩神通下十五句。讚大用自在德。今初五句。淨眼見佛是意業。二聞如來法。卽淨修語業。餘三句並顯三業自在。

於一塵中。普現一切世間境界。教化成就一切眾生。未曾失時。一毛孔中。出一切如來說法音聲。知一切

眾生悉皆如幻。知一切佛。悉皆如影。知一切諸趣受
生。悉皆如夢。知一切業報。如鏡中像。知一切諸有生
起。如熱時燄。知一切世界。皆如變化。成就如來十力
無畏。勇猛自在。能師子吼。深入無盡辯才大海。得一
切眾生。言辭海。諸法智。於虛空法界。所行無礙。知一
切法。無有障礙。

二讚攝眾生德。中有十五句。初三句明微細化生。
次知一切眾生下七句。明攝眾生之智。次勇猛自
在下五句。明攝生語業。於中初師子吼。總顯決定
說。下四句顯四無礙辯。

一切菩薩神通境界。悉已清淨。勇猛精進。摧伏魔軍。恆以智慧了達三世。知一切法。猶如虛空。無有違諍。亦無取著。雖勤精進。而知一切智終無所來。雖觀境界。而知一切有。悉不可得。以方便智入一切法界。以平等智入一切國土。以自在力。令一切世界展轉相入。於一切世界處處受生。見一切世界種種形相。於微細境現廣大。剎於廣大境現微細。剎於一佛所一念之頃。得一切佛威神所加。普見十方。無所迷惑。於剎那頃。悉能往詣。如是等一切菩薩滿逝多林。皆是如來威神之力。

第三大用自在德有十五句。初二句摧伏魔軍。總明三業自在。次恆以智慧下六句。明意業自在。皆權實雙行故。以自在力下七句。明身業自在。如是等下。總結集因。皆是如來三昧威神之力之所加持也。此示相以答大眾之念請者。以眾不言而問。如來以無言而答。欲令大心行者。觸境明心。默契乎無礙圓融之境。於言外。以顯無邊刹境。自他不隔於毫端。十世古今。始終不離於當念。是以如來曠劫所修之因行。只在三昧中一念之頃。頓現。此正證不思議之境界也。法界全體因果理事。盡在

此三昧中耳。如此不思議事。豈二乘劣解之所知耶。宜乎二乘如盲如聾也。

於時上首諸大聲聞。舍利弗。大目犍連。摩訶迦葉。離婆多。須菩提。阿菟樓駄。難陀。劫賓那。迦旃延。富樓那等。諸大聲聞。在逝多林。皆悉不見如來神力。如來嚴好如來境界。如來遊戲。如來神變。如來尊勝。如來妙行。如來威德。如來住持。如來淨刹。亦復不見不可思議菩薩境界。菩薩大會。菩薩普入。菩薩普至。菩薩普詣。菩薩神變。菩薩遊戲。菩薩眷屬。菩薩方所。菩薩莊嚴。師子座。菩薩宮殿。菩薩住處。菩薩所入三昧自在。

菩薩觀察。菩薩頻申。菩薩勇猛。菩薩供養。菩薩受記。
菩薩成熟。菩薩勇健。菩薩法身清淨。菩薩智身圓滿。
菩薩願身示現。菩薩色身成就。菩薩諸相具足清淨。
菩薩常光。眾色莊嚴。菩薩放大光網。菩薩起變化雲。
菩薩身徧十方。菩薩諸行圓滿。如是等事。一切聲聞
諸大弟子。皆悉不見。何以故。以善根不同故。本不修
習。見佛自在善根故。本不讚說十方世界一切佛刹
清淨功德故。本不稱歎諸佛世尊種種神變故。本不
於生死流轉之中。發阿耨多羅三藐三菩提心故。本
不令他住菩提心故。本不能令如來種性不斷絕故。

本不攝受諸眾生故。本不勸他修習菩薩波羅蜜故。
本在生死流轉之時。不勸眾生求於最勝大智眼故。
本不修習生一切智諸善根故。本不成就如來出世
諸善根故。本不得嚴淨佛刹神通智故。本不得諸菩
薩眼所知境故。本不求超出世間不共菩提諸善根
故。本不發一切菩薩諸大願故。本不從如來加被之
所生故。本不知諸法如幻。菩薩如夢故。本不得諸大
菩薩廣大歡喜故。如是皆是普賢菩薩智眼境界。不
與一切二乘所共。以是因緣。諸大聲聞不能見。不能
知。不能聞。不能入。不能得。不能念。不能觀察。不能籌

量不能思惟。不能分別。是故雖在逝多林中。不見如
來。諸大神變。復次諸大聲聞。無如是善根故。無如是
智眼故。無如是三昧故。無如是解脫故。無如是神通
故。無如是威德故。無如是勢力故。無如是自在故。無
如是住處故。無如是境界故。是故於此不能知。不能
見。不能入。不能證。不能住。不能解。不能觀察。不能忍
受。不能趣向。不能遊履。又亦不能廣爲他人開闡解
說。稱揚示現。引導勸進。令其趣向。令其修習。令其安
住。令其證入。何以故。諸大弟子。依聲聞乘。而出離故。
成就聲聞道。滿足聲聞行。安住聲聞果。於無有諦得。

決定智。常住實際。究竟寂靜。遠離大悲。捨於眾生。住於自事。於彼智慧。不能積集。不能修行。不能安住。不能願求。不能成就。不能清淨。不能趣入。不能通達。不能知見。不能證得。是故雖在逝多林中。對於如來。不見如是廣大神變。

大文第五於時上首下。明諸大聲聞。雖在逝多林中。對面不見如來。如上神通境界等事。疏名舉失顯得分。亦名舉劣顯勝。明佛神通境界。皆是普賢智眼之境界。不與一切二乘所共故。然舉上首十人。乃靈山會上各稱第一者。今於此會。不見如來。

境界者。不見何等境界耶。經云。不見如來神力。如來嚴好。如來境界。如來遊戲。如來神變。如來尊勝。如來妙行。如來威德。如來住持。如來淨刹等十句。卽前念請果中之十事。亦復不見不可思議菩薩境界。下八行經文。明不見菩薩因行之事。故結云。如是等一切皆悉不見。次何以故。以善根不同。故已下。明闕昔因。故不見。前八行經。明闕見佛果之因。本不得諸菩薩眼所知境界。下。明闕見菩薩之因。以此佛菩薩之因。乃稱法界普賢境界。不與一切二乘共故。以是因緣。下四行經文。結闕如是之

因故不見如來諸大神變耳。復次諸大聲聞無如是善根故已下。明闕現緣故不見。初七行經明無勝德行故不見。次何以故下五行經文。明住自乘故不見。以既無昔因。又闕現緣。是故於佛境界絕分矣。故經結云是故雖在逝多林中。對於如來不見。如來廣大神變也。下以十喻以喻不見之所以。佛子。如恆河岸。有百千億無量餓鬼。裸形饑渴。舉體焦然。烏鷲豺狼。競來搏撮。爲渴所逼。欲求水飲。雖住河邊。而不見河。設有見者。見其枯竭。何以故。深厚業障之所覆。故彼大聲聞亦復如是。雖復住在逝多林

中不見如來廣大神力。捨一切智。無明翳膜覆其眼。故不曾種植薩婆若地。諸善根故。譬如有人於大會中昏睡安寢。忽然夢見須彌山頂帝釋所住善見大城宮殿園林。種種嚴好。天子天女百千萬億。普散天華。徧滿其地。種種衣樹。出妙衣服。種種華樹。開敷妙華。諸音樂樹。奏天音樂。天諸采女。歌詠美音。無量諸天。於中戲樂。其人自見著天衣服。普於其處住止。周旋其大會中。一切諸人。雖同一處。不知不見。何以故。夢中所見。非彼大眾所能見故。一切菩薩世間諸王。亦復如是。以久積集善根力故。發一切智廣大願故。

學習一切佛功德故。修行菩薩莊嚴道故。圓滿一切
智智法故。滿足普賢諸行願故。趣入一切菩薩智地
故。遊戲一切菩薩所住諸三昧故。已能觀察一切菩
薩智慧境界無障礙故。是故悉見如來世尊不可思
議自在神變。一切聲聞諸大弟子。皆不能見。皆不能
知。以無菩薩清淨眼故。譬如雪山具眾藥草。良醫詣
彼。悉能分別。其諸捕獵放牧之人。恆住彼山。不見其
藥。此亦如是。以諸菩薩入智境界。具自在力。能見如
來廣大神變。諸大弟子。唯求自利。不欲利他。唯求自
安。不欲安他。雖在林中。不知不見。譬如地中有諸寶

藏種種珍異。悉皆充滿。有一丈夫。聰慧明達。善能分別一切伏藏。其人復有大福德力。能隨所欲自在而取。奉養父母。賑卹親屬。老病窮乏。靡不均贍。其無智慧無福德人。雖亦至於寶藏之處。不知不見。不得其益。此亦如是。諸大菩薩有淨智眼。能入如來不可思議甚深境界。能見佛神力。能入諸法門。能遊三昧海。能供養諸佛。能以正法開悟眾生。能以四攝攝受眾生。諸大聲聞不能得見如來神力。亦不能見諸菩薩。眾譬如盲人。至大寶洲。若行若住。若坐若臥。不能得見一切眾寶。以不見故。不能採取。不得受用。此亦如

是諸大弟子。雖在林中親近世尊。不見如來自在神力。亦不得見菩薩大會。何以故。無有菩薩無礙淨眼。不能次第悟入法界。見於如來自在力故。譬如有人得清淨眼。名離垢光明。一切闇色不能爲障。爾時彼人。於夜闇中。處在無量百千萬億人眾之內。或行或住。或坐或臥。彼諸人眾。形相威儀。此明眼人。莫不具見。其明眼者。威儀進退。彼諸人眾。悉不能覩。佛亦如是。成就智眼。清淨無礙。悉能明見一切世間。其所示現神通變化。大菩薩眾所共圍繞。諸大弟子。悉不能見。譬如比丘。在大眾中。入徧處定。所謂地徧處定。水

徧處定。火徧處定。風徧處定。青徧處定。黃徧處定。赤徧處定。白徧處定。天徧處定。種種眾生身徧處定。一切語言音聲徧處定。一切所緣徧處定。入此定者。見其所緣。其餘大眾悉不能見。唯除有住此三昧者。如來所現不可思議諸佛境界。亦復如是。菩薩具見。聲聞莫覩。譬如有人。以翳形藥。自塗其眼。在於眾會。去來坐立。無能見者。而能悉覩眾會中事。應知如來亦復如是。超過於世。普見世間。非諸聲聞所能得見。唯除趣向一切智境諸大菩薩。如人生已。則有二天恆相隨逐。一曰同生。二曰同名。天常見人。人不見天。應

知如來亦復如是。在諸菩薩大集會中。現大神通。諸大聲聞。悉不能見。譬如比丘。得心自在。入滅盡定。六根作業。皆悉不行。一切語言。不知不覺。定力持故。不般涅槃。一切聲聞。亦復如是。雖復住在逝多林中。具足六根。而不知不見。解不入。如來自在。菩薩眾會諸所作事。何以故。如來境界。甚深廣大。難見難知。難測難量。超諸世間。不可思議。無能壞者。非是一切二乘境界。是故如來自在神力。菩薩眾會及逝多林。普徧一切清淨世界。如是等事。諸大聲聞。悉不知見。非其器故。

大文第二佛子如恆河下喻顯。文有十喻。隨一一喻。總喻不見如來因果等境。亦喻不見菩薩境界等。然喻各有通別二義。喻二種德。初恆河餓鬼喻。通喻不見佛及菩薩潤益甚深德。別喻不見如來神力及菩薩境界。意顯二乘有所知障。故不見佛境界。如餓鬼業力故不見水。二夢遊天宮喻。通喻佛及菩薩高顯廣大德。別喻如來遊戲神變及菩薩大會種種莊嚴等事。以夢喻菩薩實證。則二乘如未夢見。三雪山良藥喻。通喻如來菩薩幽邃難見德。別喻菩薩安住大悲救度眾生。故如良醫。二

乘無悲故不見。四伏藏難知喻。通喻如來祕密難知德。別喻菩薩所入三昧觀察。如明智人知寶。有福能取。二乘不種福德。又無智眼。故不得見。五盲人。不見寶洲喻。通喻如來迥絕難思德。別喻如來妙行。積行圓妙。菩薩善根成熱。故得受記。二乘無此善根。故如盲人。不見洲寶。六淨眼無障喻。通喻如來智照難量德。別喻如來威德。菩薩智眼明淨。乃見如來自在。二乘智眼不明。故不見如來自在。七徧處定境喻。通喻如來周徧難思德。別喻如來淨刹莊嚴。菩薩入此三昧。故見。二乘無此三昧。故

不見。八妙藥翳形喻。通喻如來隱顯超世德。別喻如來住持菩薩能起變化德。二乘無此解脫故不見。九二天隨人喻。通喻如來嚴好菩薩身徧十方。諸行圓滿德。二乘無悲捨生故不見。十滅定不行喻。此單喻聲聞安住自乘。絕無成就眾生淨佛國土之念。以未有如佛菩薩之因。故今不見如來菩薩勝妙境界耳。末後總結云。何故二乘不見耶。經云。如來境界甚深廣大。難知難測難量。超諸世間。不可思議無能壞者。非是一切二乘境界。是故如來自在神力。菩薩眾會及逝多林。普徧一切清淨。

世界如是等事。諸大聲聞悉不知見。非其器故。此結歸本法界門。決非二乘所知見者。以非其器故也。問曰。此經圓頓一乘。獨被上上根人。既云二乘非器。何容在座。既已在座而不聞見。果何意耶。答曰。此有二義。一以華嚴平等法界。一切眾生具有如來智慧。若二乘果然畢竟絕分。則佛性有不徧之過。今列在座者。正顯平等佛慧。不捨一眾生故。然在座而不見聞者。以二乘人樂住自乘。不種勝上善根。正是妄想執著之過。而不證得。心智下劣。故非其器。此一義也。二者佛慧既是平等。若中下

根無成佛之分。則佛有捨眾生絕同體大悲之過。今彼劣根。既於大法無緣。必假種種方便而誘引之。故云我以無量無數方便引導眾生。欲令一切人皆得成佛。方滿本願。既一乘難度。必要開權。將一乘法分別說三。此則雙垂兩相現應化身。必不得已者。若如來現身人間。縱與人同事。然其所說之法。在博地凡夫及外道邪見。若無方便。亦未易化。必假大權菩薩內祕外現。示爲同事。漸漸引入佛慧。是則靈山會上諸聲聞人。先從外道而來歸者。皆是此會之大菩薩。權現聲聞爲影響眾。鼓簧

法化。故先埋根於此本門。預爲權現之機。意在與佛同垂化迹。必從此始。將爲攝末之本。此二義也。然此二義。猶是約迹而論。若據華嚴法界。佛則十身充滿。法則一音演說。異類齊聞。本來平等。但隨機大小見聞有異。如是則如來正在祇園。卽是端然華藏。菩薩見者乃法界身。劣機見者但見丈六。一音說法。則菩薩聞者唯是一乘。小根聞者說三乘法。斯則同時同會。異見殊聞。不待示權。如一雨普霑。三根受潤。各別如此。則在座聲聞。實是劣機。如經所說。實如盲聾。如是知解。方入圓宗。然約雙

垂兩相。二始同時。但是約機所見耳。疏云。既非其器。本不合列。爲顯法勝。大權菩薩。示爲盲聾。是知盲聾於勝有力。能顯勝故。方是深玄。若約後文。舍利弗令六千比丘觀文殊德。卽得頓證。卽是示現爲開權之本。權實無礙。法圓融。本無定故。

爾時毗盧遮那願光明菩薩承佛神力。觀察十方而說頌言。

汝等應觀察 佛道不思議 於此逝多林
示現神通力 善逝威神力 所現無央數
一切諸世間 迷惑不能了 法王深妙法

無量難思議 所現諸神通 舉世莫能測

以了法無相 是故名爲佛 而具相莊嚴

稱揚不可盡 今於此林內 示現大神力

甚深無有邊 言辭莫能辯 汝觀大威德

無量菩薩眾 十方諸國土 而來見世尊

所願皆具足 所行無障礙 一切諸世間

無能測量者 一切諸緣覺 及彼大聲聞

皆悉不能知 菩薩行境界 菩薩大智慧

諸地悉究竟 高建勇猛幢 難摧難可動

諸大名稱士 無量三昧力 所現諸神變

法界悉充滿

爾時不可壞精進王菩薩承佛神力觀察十方而說
頌言。

汝觀諸佛子 智慧功德藏 究竟菩提行

安隱諸世間 其心本明達 善入諸三昧

智慧無邊際 境界不可量 今此逝多林

種種皆嚴飾 菩薩眾雲集 親近如來住

汝觀無所著 無量大眾海 十方來詣此

坐寶蓮華座 無來亦無住 無依無戲論

離垢心無礙 究竟於法界 建立智慧幢

堅固不動搖 知無變化法 而現變化事
十方無量刹 一切諸佛所 同時悉往詣
而亦不分身 汝觀釋師子 自在神通力
能令菩薩眾 一切俱來集 一切諸佛法
法界悉平等 言說故不同 此眾咸通達
諸佛常安住 法界平等際 演說差別法
言辭無有盡

爾時普勝無上威德王菩薩承佛神力觀察十方而
說頌言。

汝觀無上士 廣大智圓滿 善達時非時

爲眾演說法 摧伏眾外道 一切諸異論

普隨眾生心 爲現神通力 正覺非有量

亦復非無量 若量若無量 牟尼悉超越

如日在虛空 照臨一切處 佛智亦如是

了達三世法 譬如十五夜 月輪無減缺

如來亦復然 白法悉圓滿 譬如空中日

運行無暫已 如來亦如是 神變恆相續

譬如十方刹 於空無所礙 世燈現變化

於世亦復然 譬如世間地 羣生之所依

照世燈法輪 爲依亦如是 譬如猛疾風

所行無障礙 佛法亦如是 速徧於世間

譬如大水輪 世界所依住 智慧輪亦爾

三世佛所依

爾時無礙勝藏王菩薩承佛神力。觀察十方而說頌
言。

譬如大寶山 饒益諸含識 佛山亦如是

普益於世間 譬如大海水 澄淨無垢濁

見佛亦如是 能除諸渴愛 譬如須彌山

出於大海中 世間燈亦爾 從於法海出

如海具眾寶 求者皆滿足 無師智亦然

見者悉開悟 如來甚深智 無量無有數
是故神通力 示現難思議 譬如工幻師
示現種種事 佛智亦如是 現諸自在刀
譬如如意寶 能滿一切欲 最勝亦復然
滿諸清淨願 譬如明淨寶 普照一切物
佛智亦如是 普照羣生心 譬如八面寶
等鑒於諸方 無礙燈亦然 普照於法界
譬如水清珠 能清諸濁水 見佛亦如是
諸根悉清淨

爾時化現法界願月王菩薩承佛神力觀察十方而

說頌言。

譬如帝青寶 能青一切色 見佛者亦然

悉發菩提行 一一微塵內 佛現神通力

令無量無邊 菩薩皆清淨 甚深微妙力

無邊不可知 菩薩之境界 世間莫能測

如來所現身 清淨相莊嚴 普入於法界

成就諸菩薩 難思佛國土 於中成正覺

一切諸菩薩 世主皆充滿 釋迦無上尊

於法悉自在 示現神通力 無邊不可量

菩薩種種行 無量無有盡 如來自在力

爲之悉示現 佛子善修學 甚深諸法界
成就無礙智 明了一切法 善逝威神力
爲眾轉法輪 神變普充滿 令世皆清淨
如來智圓滿 境界亦清淨 譬如大龍王
普濟諸羣生

爾時法慧光燄王菩薩承佛神力觀察十方而說頌
言。

三世諸如來 聲聞大弟子 悉不能知佛
舉足下足事 去來現在世 一切諸緣覺
亦不知如來 舉足下足事 況復諸凡天

結使所纏縛	無明覆心識	而能知導師
正覺無礙智	超過語言道	其量不可測
孰有能知見	譬如明月光	無能測邊際
佛神通亦爾	莫見其終盡	一一諸方便
念念所變化	盡於無量劫	思惟不能了
思惟一切智	不可思議法	一一方便門
邊際不可得	若有於此法	而興廣大願
彼於此境界	知見不爲難	勇猛勤修習
難思大法海	其心無障礙	入此方便門
心意已調伏	志願亦寬廣	當獲大菩提

最勝之境界

爾時破一切魔軍智幢王菩薩承佛神力觀察十方而說頌言。

智身非是身 無礙難思議 設有思議者
一切無能及 從不思議業 起此清淨身
殊特妙莊嚴 不著於三界 光明照一切
法界悉清淨 開佛菩提門 出生眾智慧
譬如世間日 普放慧光明 遠離諸塵垢
滅除一切障 普淨三有處 永絕生死流
成就菩薩道 出生無上覺 示現無邊色

此色無依處 所現雖無量 一切不思議

菩提一念頃 能覺一切法 云何欲測量

如來智邊際 一念悉明達 一切三世法

故說佛智慧 無盡無能壞 智者應如是

專思佛菩提 此思難思議 思之不可得

菩提不可說 超過語言路 諸佛從此生

是法難思議

爾時願智光明幢王菩薩承佛神力觀察十方而說
頌言。

若能善觀察 菩提無盡海 則得離癡念

決定受持法	若得決定心	則能修妙行
禪寂自思慮	永斷諸疑惑	其心不疲倦
亦復無懈怠	展轉增進修	究竟諸佛法
信智已成就	念念令增長	常樂常觀察
無得無依法	無量億千劫	所修功德行
一切悉迴向	諸佛所求道	雖在於生死
而心無染著	安住諸佛法	常樂如來行
世間之所有	蘊界等諸法	一切皆捨離
專求佛功德	凡夫嬰妄惑	於世常流轉
菩薩心無礙	救之令解脫	菩薩行難稱

舉世莫能思 徧除一切苦 普與羣生樂

已獲菩提智 復愍諸羣生 光明照世間

度脫一切眾

爾時破一切障勇猛智王菩薩承佛神力觀察十方

而說頌言。

無量億千劫 佛名難可聞 況復得親近

永斷諸疑惑 如來世間燈 通達一切法

普生三世福 令眾悉清淨 如來妙色身

一切所欽歎 億劫常瞻仰 其心無厭足

若有諸佛子 觀佛妙色身 必捨諸有著

迴向菩提道 如來妙色身 恆演廣大音
辯才無障礙 開佛菩提門 曉悟諸眾生
無量不思議 令入智慧門 授以菩提記
如來出世間 爲世大福田 普導諸含識
令其集福行 若有供養佛 永除惡道畏
消滅一切苦 成就智慧身 若見兩足尊
能發廣大心 是人恆值佛 增長智慧力
若見人中勝 決意向菩提 是人能自知
必當成正覺

爾時法界差別願智神通王菩薩承佛神力觀察十

方而說頌言。

釋迦無上尊 具一切功德 見者心清淨

迴向大智慧 如來大慈悲 出現於世間

普爲諸羣生 轉無上法輪 如來無數劫

勤苦爲眾生 云何諸世間 能報大師恩

寧於無量劫 受諸惡道苦 終不捨如來

而求於出離 寧代諸眾生 備受一切苦

終不捨於佛 而求得安樂 寧在諸惡趣

恆得聞佛名 不願生善道 暫時不聞佛

寧生諸地獄 一一無數劫 終不遠離佛

而求出惡趣 何故願久住 一切諸惡道
以得見如來 增長智慧故 若得見於佛
除滅一切苦 能入諸如來 大智之境界
若得見於佛 捨離一切障 長養無盡福
成就菩提道 如來能永斷 一切眾生疑
隨其心所樂 普皆令滿足

大文第六十方新集菩薩說偈讚佛。每方各說十
偈。通讚如來三昧神變境界種種功德。總顯雲集
皆神力加持。疏各有義在文可知。

大方廣佛華嚴經綱要卷第六十

大方廣佛華嚴經綱要卷第六十一

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

入法界品第三十九之二

爾時普賢菩薩摩訶薩普觀一切菩薩眾會

大文第七爾時普賢下。普賢開發分。所言開發者。以前海眾念請果中業用。如來現相以答。意令大眾了達。觸境皆真。欲眾親證。妙契於不言之表。而十方新集菩薩。雖說偈稱讚。但略傍通一線而已。

以此三昧所現法界。乃普賢所主。是已證入之人。若不親爲開發。顯示。則諸觀者。雖見總相。亦不能窮所入甚深微細境界。亦不知能入之方便。故此普觀眾會。仰法情殷。特爲開發能入之方便。所入之境界。一一法門。不唯令此法會頓證頓入。抑爲將來入法界者。具得其門。此華嚴一會之始終。究竟入於果海之極致。故證入之義。盡在此本會一章。爲正宗大法之歸趣。自此已後。卽爲流通。凡我學佛法者。能入此門。可謂成佛真種矣。故疏判此分的有指歸。

以等法界方便等。虛空界方便等。眾生界方便等。三世等一切劫等。一切眾生業等。一切眾生欲等。一切眾生解等。一切眾生根等。一切眾生成熟時等。一切法光影方便。爲諸菩薩。以十種法句。開發顯示。照明演說。此師子頻申三昧。何等爲十。所謂演說能示現等法界一切佛刹微塵中諸佛出興次第。諸刹成壞次第法句。演說能示現等虛空界一切佛刹中盡未來劫讚歎如來功德音聲法句。演說能示現等虛空界一切佛刹中如來出世無量無邊成正覺門法句。演說能示現等虛空界一切佛刹中佛坐道場菩薩

眾會法句。演說於一切毛孔。念念出現等三世一切佛變化身。充滿法界法句。演說能令一身充滿十方一切刹海平等顯現法句。演說能令一切諸境界中普現三世諸佛神變法句。演說能令一切佛刹微塵中。普現三世一切佛刹微塵數佛種種神變。經無量劫法句。演說能令一切毛孔出生三世一切諸佛大願海音。盡未來際。開發化導一切菩薩法句。演說能令佛師子座量同法界。菩薩眾會道場莊嚴等無差別。盡未來劫。轉於種種微妙法輪法句。佛子。此十爲首。有不可說佛刹微塵數法句。皆是如來智慧境界。

爾時普賢菩薩欲重宣此義。承佛神力。觀察如來。觀察眾會。觀察諸佛。難思境界。觀察諸佛。無邊三昧。觀察不可思議諸世界海。觀察不可思議如幻法智。觀察不可思議三世諸佛。悉皆平等。觀察一切無量無邊諸言辭法。而說頌言。

一一毛孔中 微塵數刹海 悉有如來坐

皆具菩薩眾 一一毛孔中 無量諸刹海

佛處菩提座 如是徧法界 一一毛孔中

一切刹塵佛 菩薩眾圍繞 爲說普賢行

佛坐一國土 充滿十方界 無量菩薩雲

咸來集其所 億刹微塵數 菩薩功德海

俱從會中起 徧滿十方界 悉住普賢行

皆遊法界海 普現一切刹 等入諸佛會

安坐一切刹 聽聞一切法 一一國土中

億劫修諸行 菩薩所修行 普明法海行

入於大願海 住佛境界地 了達普賢行

出生諸佛法 具佛功德海 廣現神通事

身雲等塵數 充徧一切刹 普雨甘露法

令眾住佛道

二以等法界下。明能開之方便。又有十一句。初句

爲總首一以字貫下十句。謂師子頻申三昧業用深廣。要以此十無分齊之方便。方能開顯。次爲諸菩薩下一行經。文云以十法句。正明開顯。先指所開顯者。乃師子頻申三昧所現之境耳。後何等下十四行經文。乃別列十法句。此十法句。望前十方便。卽是所用。望三昧境界。卽是能開。故此十法句。一一皆用前十種方便。一一方便。皆演斯十句。然此十法句所開者。卽前念請果用之十句。亦卽三昧所現之境界。然以境界甚深微細。難解難入。雖此十方方便法句。一一互相發明。但略舉少分。其實

不可思議。故後結云。此十爲首。有不可說佛刹微塵數法句。皆是如來智慧境界。其難思之義。具在頌中。故後爾時普賢菩薩重宣此義。而說頌言。文有十偈。頌十法句。一一具顯塵毛無數刹海。互相融攝。無盡無盡。不可思議。皆三昧所現境界中事。以六相十玄會取。乃見圓融之妙。

爾時世尊欲令諸菩薩安住如來師子頻申廣大三昧故。從眉間白毫相放大光明。其光名普照三世法界門。以不可說佛刹微塵數光明而爲眷屬。普照十方一切世界海諸佛國土。時逝多林菩薩大眾悉見。

一切盡法界。虛空界。一切佛刹。一一微塵中。各有一切佛刹。微塵數諸佛國土。種種名。種種色。種種清淨。種種住處。種種形相。如是一切諸國土中。皆有大菩薩坐於道場師子座上。成等正覺。菩薩大眾前後圍繞。諸世間主而爲供養。或見於不可說佛刹量大眾會中。出妙音聲。充滿法界。轉正法輪。或見在天宮殿龍宮殿。夜叉宮殿。乾闥婆阿修羅迦樓羅緊那羅摩睺羅伽人非人等諸宮殿中。或在人間村邑聚落王都大處。現種種姓。種種名。種種身。種種相。種種光明。住種種威儀。入種種三昧。現種種神變。或時自以種

種言音。或令種種諸菩薩等。在於種種大眾會中。種種言辭說種種法。如此會中菩薩大眾。見於如是諸佛如來甚深三昧大神通力。如是盡法界虛空界東西南北四維上下一切方海中。依於眾生心想而住。始從前際。至今現在。一切國土身。一切眾生身。一切虛空道。其中一一毛端量處。一一各有微塵數刹。種種業起。次第而住。悉有道場菩薩眾會。皆亦如是見佛神力。不壞三世。不壞世間。於一切眾生心中。現其影像。隨一切眾生心樂。出妙言音。普入一切眾會中。普現一切眾生前。色相有別。智慧無異。隨其所應。開

示佛法教化調伏一切眾生。未曾休息。其有見此佛
神力者。皆是毗盧遮那如來。於往昔時善根攝受。或
昔曾以四攝所攝。或是見聞憶念親近之所成熟。或
是往昔教其令發阿耨多羅三藐三菩提心。或是往
昔於諸佛所。同種善根。或是過去以一切智善巧方
便教化成熟。是故皆得入於如來不可思議甚深三
昧。盡法界虛空界大神通力。或入法身。或入色身。或
入往昔所成就行。或入圓滿諸波羅蜜。或入莊嚴清
淨行輪。或入菩薩諸地。或入成正覺力。或入佛所住
三昧無差別大神變。或入如來力無畏智。或入佛無

礙辯才海。彼諸菩薩。以種種解。種種道。種種門。種種入。種種理趣。種種隨順。種種智慧。種種助道。種種方便。種種三昧。入如是等。十不可說。佛刹微塵數。佛神變。海方便門。云何種種三昧。所謂普莊嚴法界三昧。普照一切三世無礙境界三昧。法界無差別智光明三昧。入如來境界不動轉三昧。普照無邊虛空三昧。入如來力三昧。佛無畏勇猛奮迅莊嚴三昧。一切法界旋轉藏三昧。如月普現一切法界。以無礙音大開演三昧。普清淨法光明三昧。無礙繪法王幢三昧。一境界中悉見一切諸佛海三昧。於一切世間悉現

身三昧。入如來無差別身境界三昧。隨一切世間轉
大悲藏三昧。知一切法無有跡三昧。知一切法究竟
寂滅三昧。雖無所得而能變化。普現世間三昧。普入
一切刹三昧。莊嚴一切佛刹成正覺三昧。觀一切世
間主色相差別三昧。觀一切眾生境界無障礙三昧。
能出生一切如來母三昧。能修行入一切佛海功德
道三昧。一一境界中。出現神變盡未來際三昧。入一
切如來本事海三昧。盡未來際護持一切如來種性
三昧。以決定解力。令現在十方一切佛刹海皆清淨
三昧。一念中普照一切佛所住三昧。入一切境界無

礙際三昧。令一切世界爲一佛刹三昧。出一切佛變
化身三昧。以金剛王智。知一切諸根海三昧。知一切
如來同一身三昧。知一切法界所安立悉住心念際
三昧。於一切法界廣大國土中。示現涅槃三昧。令住
最上處三昧。於一切佛刹現種種眾差别身三昧。
普入一切佛智慧三昧。知一切法性相三昧。一念普
知三世法三昧。念念中普現法界身三昧。以師子勇
猛智。知一切如來出興次第三昧。於一切法界境界
慧眼圓滿三昧。勇猛趣向十力三昧。放一切功德圓
滿光明。普照世間三昧。不動藏三昧。說一法普入一

切法三昧。於一法以一切言音差別訓釋三昧。演說一切佛無二法三昧。知三世無礙際三昧。知一切劫無差別三昧。入十力微細方便三昧。於一切劫成就一切菩薩行不斷絕三昧。十方普現身三昧。於法界自在成正覺三昧。生一切安隱受三昧。出一切莊嚴具。莊嚴虛空界三昧。念念中出等眾生數變化身雲三昧。如來淨空月光明三昧。常見一切如來住虛空三昧。開示一切佛莊嚴三昧。照明一切法義燈三昧。照十力境界三昧。三世一切佛幢相三昧。一切佛一密藏三昧。念念中所作皆究竟三昧。無盡福德藏三

昧。見無邊佛境界三昧。堅住一切法三昧。現一切如
來變化悉令知見三昧。念念中佛日常出現三昧。一
日中悉知三世所有法三昧。普音演說一切法性寂
滅三昧。見一切佛自在力三昧。法界開敷蓮華三昧。
觀諸法如虛空無住處三昧。十方海普入一方三昧。
入一切法界無源底三昧。一切法海三昧。以寂靜身
放一切光明三昧。一念中現一切神通大願三昧。一
切時一切處成正覺三昧。以一莊嚴入一切法界三
昧。普現一切諸佛身三昧。知一切眾生廣大殊勝神
通智三昧。一念中其身徧法界三昧。現一乘淨法界

三昧。入普門法界。示現大莊嚴三昧。住持一切佛法。輪三昧。以一切法門莊嚴一法門三昧。以因陀羅網願行。攝一切眾生界三昧。分別一切世界門三昧。乘蓮華自在遊步三昧。知一切眾生種種差別神通智三昧。令其身恆現一切眾生前三昧。知一切眾生差別音聲言辭海三昧。知一切眾生差別智神通三昧。大悲平等藏三昧。一切佛入如來際三昧。觀察一切如來解脫處。師子嚙申三昧。菩薩以如是等不可說佛刹微塵數三昧。入毗盧遮那如來念念充滿一切法界三昧。神變海。其諸菩薩皆悉具足大智神通明。

利自在。住於諸地。以廣大智。普觀一切。從諸智慧。種性而生。一切智智。常現在前。得離癡翳。清淨智眼。爲諸眾生。作調御師。住佛平等。於一切法。無有分別。了達境界。知諸世間。性皆寂滅。無有依處。普詣一切諸佛國土。而無所著。悉能觀察一切諸法。而無所住。徧入一切妙法宮殿。而無所來。教化調伏一切世間。普爲眾生。現安隱處。智慧解脫。爲其所行。恆以智身。住離貪際。超諸有海。示真實際。智光圓滿。普見諸法。住於三昧。堅固不動。於諸眾生。恆起大悲。知諸法門。悉皆如幻。一切眾生。悉皆如夢。一切如來。悉皆如影。一

切言音悉皆如響。一切諸法悉皆如化。善能積集殊勝行願。智慧圓滿。清淨善巧。心極寂靜。善入一切總持境界。具三昧力。勇猛無怯。獲明智眼。住法界際。到一切法無所得處。修習無涯智慧大海。到智波羅蜜。究竟彼岸。爲般若波羅蜜之所攝持。以神通波羅蜜。普入世間。依三昧波羅蜜。得心自在。以不顛倒智。知一切義。以巧分別智。開示法藏。以現了智。訓釋文辭。以大願力。說法無盡。以無所畏。大師子吼。常樂觀察。無依處法。以淨法眼。普觀一切。以淨智月。照世成壞。以智慧光。照真實諦。福德智慧。如金剛山。一切譬喻。

所不能及。善觀諸法。慧根增長。勇猛精進。摧伏眾魔。無量智慧。威光熾盛。其身超出一切世間。得一切法。無礙智慧。善能悟解。盡無盡際。住於普際。入真實際。無相觀智。常現在前。善巧成就諸菩薩行。以無二智。知諸境界。普見一切世間諸趣。徧往一切諸佛國土。智燈圓滿。於一切法。無諸闇障。放淨法光照十方界。爲諸世間真實福田。若見若聞。所願皆滿。福德高大。超諸世間。勇猛無畏。摧諸外道。演微妙音。徧一切刹。普見諸佛。心無厭足。於佛法身。已得自在。隨所應化。而爲現身。一身充滿一切佛刹。已得自在清淨神通。

乘大智舟。所往無礙。智慧圓滿。周徧法界。譬如日出。普照世間。隨眾生心。現其色像。知諸眾生根性欲樂。入一切法無諍境界。知諸法性無生無起。能令小大自在相入。決了佛地甚深之趣。以無盡句。說甚深義。於一句中。演說一切修多羅海。獲大智慧陀羅尼身。凡所受持。永無忘失。一念能憶無量劫事。一念悉知三世一切諸眾生智。恆以一切陀羅尼門。演說無邊諸佛法海。常轉不退清淨法輪。令諸眾生皆生智慧。得佛境界。智慧光明。入於善見甚深三昧。入一切法無障礙際。於一切法。勝智自在。一切境界。清淨莊嚴。

普入十方一切法界。隨其方所。靡不咸至。一一塵中。現成正覺。於無色性。現一切色。以一切方。普入一方。其諸菩薩。具如是等無邊福智功德之藏。常爲諸佛之所稱歎。種種言辭。說其功德。不能令盡。靡不咸在。逝多林中。深入如來功德大海。悉見於佛光明所照。爾時諸菩薩。得不思議正法光明。心大歡喜。各於其身。及以樓閣諸莊嚴具。并其所坐師子之座。徧逝多林一切物中。化現種種大莊嚴雲。充滿一切十方法界。所謂於念念中。放大光明雲。充滿十方。悉能開悟一切眾生。出一切摩尼寶鈴雲。充滿十方。出微妙音。

稱揚讚歎三世諸佛一切功德。出一切音樂雲。充滿十方。音中演說一切眾生諸業果報。出一切菩薩種種願行色相雲。充滿十方。說諸菩薩所有大願。出一切如來自在變化雲。充滿十方。演出一切諸佛如來語言音聲。出一切菩薩相好莊嚴身雲。充滿十方。說諸如來於一切國土出興次第。出三世如來道場雲。充滿十方。現一切如來成等正覺功德莊嚴。出一切龍王雲。充滿十方。雨一切諸香。出一切世主身雲。充滿十方。演說普賢菩薩之行。出一切寶莊嚴清淨佛刹雲。充滿十方。現一切如來轉正法輪。是諸菩薩以

得不思議法光明故。法應如是出興。此等不可說佛刹微塵數大神變莊嚴雲。

大文第八爾時世尊下。毫光下益分。令尋智光爲能證故。意謂雖是普賢以言開發。海眾已知其趣。若欲實證。苟非法界普光明智。亦不能真得其益。名眉間白毫。表中道果智。佛欲大眾實證。故放此果光。要依此卽法界中道之智光。爲現證之因緣。方能證前所現之法界。亦如法華助發之意。卽此一光。爲入法界之門矣。以三昧境界不可思議。故能入之智光。有不可說佛刹微塵數之眷屬。一一普

照無分齊故。林中大眾承此光明。徧見法界之塵刹。一一刹中。皆有徧法界之大會。轉正法輪。教化人天。所現化生之威儀。神通三昧。自在言音。節前念請果用之境界。一一盡見。如此林中大眾。因光照見。得入如來甚深三昧大神通力。如是盡十方塵刹中微細大會。並同此會之見。而亦各住本位。不壞不雜。如此皆是毗盧遮那往昔因中。以四攝法教化成熟。以爲今日現見現證之因緣。故前念請中亦云有緣得見。返顯二乘之機。無此因緣。故不見耳。然此會大眾。因見得法。故云皆得入於如

來不可思議甚深三昧一一境界乃至如佛無礙
辯才海亦以前能入之十種方便頓入十不可說
佛刹塵數佛神變海方便門及種種三昧故下列
一百一種三昧皆能入之三昧盡是師子頻申三
昧大用之別義但是略列更以多多三昧方能總
入一頻申三昧之境界故後結云菩薩以如是等
不可說佛刹塵數三昧入毗盧遮那如來念念充
滿一切法界三昧神變海三昧一門既爾解等九
門皆然其諸菩薩既具能入之方便故證所入之
多德向下初列具足十種德一智位高深德次具

調伏眾生無染德。三具足成滿諸度德。四具足智力無畏德。五具成就昔行德。六具法身圓滿德。七具色身自在德。八具辯才自在德。九具三昧神變德。十具成等正覺德。故後結云其諸菩薩具如是等無邊福智功德之藏。說不能盡者。靡不咸在逝多林中。深入如來功德大海。悉見於佛光明所照。惟此眉間一光照徹法界之源底。令前念請諸大會眾。一齊頓證法界之極則。此乃華嚴一會之究竟。所謂依人證入成德分者。極盡於一光之中耳。如是深玄妙旨。豈劣解可能入耶。故後文爾時諸

菩薩得不思議正法光明。心大歡喜。各各獻供。以表慶法之誠。以盡念請一段因緣也。

爾時文殊師利菩薩。承佛神力。欲重宣此逝多林中諸神變事。觀察十方。而說頌言。

汝應觀此逝多林。以佛威神廣無際。

一切莊嚴皆示現。十方法界悉充滿。

十方一切諸國土。無邊品類大莊嚴。

於其座等境界中。色像分明皆顯現。

從諸佛子毛孔出。種種莊嚴寶燄雲。

及發如來微妙音。徧滿十方一切刹。

寶樹華中現妙身

其身色相等梵王

從禪定起而遊步

進止威儀恆寂靜

如來一一毛孔內

常現難思變化身

皆如普賢大菩薩

種種諸相爲嚴好

逝多林上虛空中

所有莊嚴發妙音

普說三世諸菩薩

成就一切功德海

逝多林中諸寶樹

亦出無量妙音聲

演說一切諸羣生

種種業海各差別

林中所有眾境界

悉現三世諸如來

一一皆起大神通

十方刹海微塵數

十方所有諸國土

一切剎海微塵數

悉入如來毛孔中

次第莊嚴皆現觀

所有莊嚴皆現佛

數等眾生徧世間

一一咸放大光明

種種隨宜化羣品

香燄眾華及寶藏

一切莊嚴殊妙雲

靡不廣大等虛空

徧滿十方諸國土

十方三世一切佛

所有莊嚴妙道場

於此園林境界中

一一色像皆明現

一切普賢諸佛子

百千劫海莊嚴剎

其數無量等眾生

莫不於此林中見

大文第九爾時文殊下。文殊述德分。光後文殊述德者。以光表如來中道果智。文殊爲智主。故光後述德。光本令證三昧。智本爲顯法界。尋智得理。故述歎林中之德。又前普賢門以行顯理。此則以解顯理。解行無二。方能入故。通明卽以文殊權實無二之大智。普賢體用平等之理行。此二無二。共顯如來三昧之果德。故述德說頌中有十三偈。通讚一會三種世間自在之用。分之爲六。初二偈總歎。次一偈歎眾生世間。三有二偈讚依正互在。四有三偈。述上林空。五有三偈。述於正覺依正無盡。末

有二偈總顯普收。

爾時彼諸菩薩。以佛三昧光明照故。卽時得入如是三昧。一一皆得不可說佛刹微塵數大悲門。利益安樂一切眾生。於其身上。一一毛孔。皆出不可說佛刹微塵數光明。一一光明。皆化現不可說佛刹微塵數菩薩。其身形相。如世諸主。普現一切眾生之前。周而徧滿十方世界。種種方便。教化調伏。或現不可說佛刹微塵數諸天宮殿。無常門。或現不可說佛刹微塵數一切眾生受生門。或現不可說佛刹微塵數一切菩薩修行門。或現不可說佛刹微塵數夢境門。或現

不可說佛刹微塵數菩薩大願門。或現不可說佛刹
微塵數震動世界門。或現不可說佛刹微塵數分別
世界門。或現不可說佛刹微塵數現生世界門。或現
不可說佛刹微塵數檀波羅蜜門。或現不可說佛刹
微塵數一切如來修諸功德種種苦行尸波羅蜜門。
或現不可說佛刹微塵數割截支體羸提波羅蜜門。
或現不可說佛刹微塵數勤修毗梨耶波羅蜜門。或
現不可說佛刹微塵數一切菩薩修諸三昧禪定解
脫門。或現不可說佛刹微塵數佛道圓滿智光明門。
或現不可說佛刹微塵數勤求佛法爲一文一句故。

捨無數身命門。或現不可說佛刹微塵數親近一切佛。諮問一切法。心無疲厭門。或現不可說佛刹微塵數隨諸眾生時節欲樂。往詣其所。方便成熟。令住一切智海光明門。或現不可說佛刹微塵數降伏眾魔。制諸外道顯現菩薩福智力門。或現不可說佛刹微塵數知一切工巧明智門。或現不可說佛刹微塵數知一切眾生差別明智門。或現不可說佛刹微塵數知一切法差別明智門。或現不可說佛刹微塵數知一切眾生心樂差別明智門。或現不可說佛刹微塵數知一切眾生根行煩惱習氣明智門。或現不可說

佛刹微塵數知一切眾生種種業明智門。或現不可說佛刹微塵數開悟一切眾生門。以如是等不可說佛刹微塵數方便門。往詣一切眾生住處而成熟之。所謂或往天宮。或往龍宮。或往夜叉乾闥婆阿修羅迦樓羅緊那羅摩睺羅伽宮。或往梵王宮。或往人王宮。或往閻羅王宮。或往畜生餓鬼地獄之所住處。以平等大悲。平等大願。平等智慧。平等方便。攝諸眾生。或有見已而調伏者。或有聞已而調伏者。或有憶念而調伏者。或聞音聲而調伏者。或聞名號而調伏者。或見圓光而調伏者。或見光網而調伏者。隨諸眾生。

心之所樂。皆詣其所。令其獲益。佛子。此逝多林一切菩薩。爲欲成熟諸眾生故。或時現處種種嚴飾諸宮殿中。或時示現住自樓閣寶師子座。道場眾會所共圍繞。周徧十方。皆令得見。然亦不離此逝多林如來之所。佛子。此諸菩薩。或時示現無量化身雲。或現其身。獨一無侶。所謂或現沙門身。或現婆羅門身。或現苦行身。或現充盛身。或現醫王身。或現商主身。或現淨命身。或現妓樂身。或現奉事諸天身。或現工巧技術身。往詣一切村營城邑王都聚落諸眾生所。隨其所應。以種種形相。種種威儀。種種音聲。種種言論。種

種住處於一切世間。猶如帝網。行菩薩行。或說一切世間工巧事業。或說一切智慧。照世明燈。或說一切眾生業力所莊嚴。或說十方國土。建立諸乘位。或說智燈所照一切法境界。教化成就一切眾生。而亦不離此逝多林如來之所。

大文第十爾時彼諸下無涯大用分。聞必得益。益必利生。意顯林中大會。因光照得益。已證法界之體。故必依體起無涯利生之大用。其用乃卽體之悲。謂由佛三昧。各各得於此三昧。成此悲門。故有大用。次於其身上下。總明依體起用中二。初別明。

毛孔世王化。後通顯分身多類化。初中分二。初總明。二或現下別顯。於中又四。一明能化法。總有二十五門。初八門雜明欣厭等門化。餘門明十度化。於中前六門各一度可知。次三門明方便度。次降魔一門是力度。餘七門皆智度。前欣厭中已明於願。故此畧無。二以如是等下明所化處。三以平等大悲下明能化心。四或有見已下明所化益。次佛子此逝多林下通顯多類化。初三行半文明佳處化異。結不離逝多林者。明不動而普徧繁興而恆靜。末不離本。故向下文殊遊行。亦不離於本會。次

佛子此諸菩薩下。明化身異。此中多同善財所見。故知善財所參諸友。卽此會之菩薩。二往詣下化處異。三隨其下。化類異。四或說下。化法異。五教化下。總結末不離本。上來本會竟。

太文第二末會起。亦卽一部流通分。前本會總顯頓證。下末會通顯漸證。前則但示法界甚深。後則因人證入。人法融會。意在弘通。夫圓滿教海。攝法無遺。頓漸該羅。本末交映。故非頓無以顯圓。非漸無以階進。非本無以垂末。非末無以顯本。非人無以證法。非法無以成人。故前明不異漸之頓。多門

而眾人同契。後明不異頓之漸。一人而歷位圓修。前則不異末之本。雖卷而恆舒。後則不異本之末。雖舒而恆卷。本末無礙。同入法界。今托人進修。以軌後徒。使大教弘通。法匪虛設。卽斯本意。疏判末會。義有多門。若約所攝之機。統收。唯有三會。一比丘會。二諸乘人會。三善財會。比丘一會。卽文殊從善住閣出。六千比丘頓悟於林中。諸乘人會。卽大塔廟處。無數眾生各得調伏。善財會。卽從文殊指往參五十三大知識。各有義類。

疏此文殊出閣已下。至經終。通判爲五相。一寄

位修行相。謂自文殊已下。善財所參知識四十一人。謂依人求解顯修行故。二從摩耶已下十一人。明會緣入實相。卽會前住等成普別兩行契證法界故。初得幻智。後得幻住。該於中間如幻之緣。入一實故。三慈氏一人。名攝德成因相。會前二門之德。並爲證入之因故。四後文殊。名智照無二相。謂行圓究竟。朗悟在懷。照前行等。唯一圓智。更無前後。明昧等殊。五普賢一人。名顯因廣大相。謂始覺同本。圓覺現前。稱周法界。無不包含故。今從別義。寄法顯異。布之前後。且爲五相。若圓攝始終。據實

圓融一位卽一切位。乃至無盡。故所歷差別。乃一中之多。一多同時。無有障礙。如此所說。義有多門。後隨文略提。以見大綱。今初比丘一會。

爾時文殊師利童子。從善住樓閣出。與無量同行菩薩。及常隨侍衛諸金剛神。普爲眾生供養諸佛諸身眾神。久發堅誓願。常隨從諸足行神。樂聞妙法主地神。常修大悲主水神。智光照耀主火神。摩尼爲冠主風神。明練十方一切儀式主方神。專勤除滅無明黑闇主夜神。一心匪懈闡明佛日主晝神。莊嚴法界一切虛空主空神。普度眾生超諸有海主海神。常勤積

集趣一切智助道善根高大如山主山神常勤守護
一切眾生菩提心城主城神常勤守護一切智智無
上法城諸大龍王常勤守護一切眾生諸夜叉王常
令眾生增長歡喜乾闥婆王常勤除滅諸餓鬼趣鳩
槃茶王恒願拔濟一切眾生出諸有海迦樓羅王願
得成就諸如來身高出世間阿脩羅王見佛歡喜曲
躬恭敬摩睺羅伽王常厭生死恒樂見佛諸大天王
尊重於佛讚歎供養諸大梵王文殊師利與如是等
功德莊嚴諸菩薩眾出自住處來詣佛所右繞世尊
經無量而以諸供具種種供養供養畢已辭退南行

往於人間。

今末會之初文殊出閣者。正顯從本垂末之義也。由前本門正位法界幽玄。初海眾念請。則如來以頻申三昧現相以答。似未能忘言。故普賢特爲開顯。以言宣暢。猶未徹其源。故如來眉間光照。已窮法界之量。而文殊具述讚揚。如此重重顯示。而諸二乘人畢竟如盲如聾。是則獨被上上根人。而三乘之機終絕分矣。斯則平等佛慧。何由而入耶。此則曲垂方便之門。決不可已。而權智之用大矣。故前歎等法界之方便。皆爲入法界之門。今文將顯

法界之大用無涯。故依根本實智而起權智之大用。故從善住樓閣而出也。善者寂義。謂文殊寂然安住法界體中。如住於閣。今從體起用。故云出也。然所隨之眾。同生一人。異生有多眾者。正顯法界差別之用。一時相應而起。以明般若輔導萬行。故云諸足行等。詣佛作禮興供而後行者。正顯依本垂末之意。往於人間。乃入鄜垂手。出真入俗之義也。

爾時尊者舍利弗承佛神力。見文殊師利菩薩與諸菩薩眾會莊嚴。出逝多林。往於南方。遊行人間。作如

是念。我今當與文殊師利俱往南方。時尊者舍利弗。與六千比丘。前後圍繞。出自住處。來詣佛所。頂禮佛足。具白世尊。世尊聽許。右繞三匝。辭退而去。往文殊師利所。此六千比丘。是舍利弗自所同住。出家未久。所謂海覺比丘。善生比丘。福光比丘。大童子比丘。電生比丘。淨行比丘。天德比丘。君慧比丘。梵勝比丘。寂慧比丘。如是等其數六千。悉會供養。無量諸佛。深植善根。解力廣大。信眼明徹。其心寬博。觀佛境界。了法本性。饒益眾生。常樂勤求諸佛功德。皆是文殊師利說法教化之所成就。爾時尊者舍利弗在行道中。觀

諸比丘。告海覺言。海覺。汝可觀察文殊師利菩薩清淨之身。相好莊嚴。一切天人莫能思議。汝可觀察文殊師利圓光。映徹。令無量眾生發歡喜心。汝可觀察文殊師利光網莊嚴。除滅眾生無量苦惱。汝可觀察文殊師利眾會具足。皆是菩薩往昔善根之所攝受。汝可觀察文殊師利所行之路。左右八步。平坦莊嚴。汝可觀察文殊師利所住之處。周迴十方。常有道場。隨逐而轉。汝可觀察文殊師利所行之路。具足無量福德莊嚴。左右兩邊。有大伏藏。種種珍寶。自然而出。汝可觀察文殊師利會供養佛善根所流。一切樹間。

出莊嚴藏。汝可觀察文殊師利。諸世間主。兩供具雲。頂禮恭敬。以爲供養。汝可觀察文殊師利。十方一切諸佛如來。將說法時。悉放眉間白毫相光。來照其身。從頂上入。爾時尊者舍利弗。爲諸比丘稱揚讚歎。開示演說文殊師利童子。有如是等無量功德。具足莊嚴。彼諸比丘。聞是說已。心意清淨。信解堅固。喜不自持。舉身踊躍。形體柔軟。諸根悅豫。憂苦悉除。垢障咸盡。常見諸佛。深求正法。具菩薩根。得菩薩力。大悲大願。皆自出生。入於諸度。甚深境界。十方佛海。常現在前。於一切智。深生信樂。卽白尊者舍利弗言。唯願大

師將引我等往詣於彼勝人之所。時舍利弗。卽與俱行。至其所已。白言。仁者。此諸比丘。願得奉覲。爾時文殊師利童子。無量自在菩薩圍繞。并其大眾。如象王迴觀諸比丘。時諸比丘頂禮其足。合掌恭敬。作如是言。我今奉見恭敬禮拜。及餘所有一切善根。唯願仁者文殊師利和尚舍利弗。世尊釋迦牟尼。皆悉證知。如仁所有如是色身。如是音聲。如是相好。如是自在。願我一切悉當具得。爾時文殊師利菩薩告諸比丘言。比丘。若善男子。善女人。成就十種趣大乘法。則能速入如來之地。況菩薩地。何者爲十。所謂積集一切。

善根。心無疲厭。見一切佛承事供養。心無疲厭。求一切佛法。心無疲厭。行一切波羅蜜。心無疲厭。成就一切菩薩三昧。心無疲厭。次第入一切三世。心無疲厭。普嚴淨十方佛刹。心無疲厭。教化調伏一切眾生。心無疲厭。於一切刹一切劫中。成就菩薩行。心無疲厭。爲成就一眾生故。修行一切佛刹微塵數波羅蜜。成就如來十力。如是次第爲成熟一切眾生界。成就如來一切力。心無疲厭。比丘。若善男子善女人。成就深信。發此十種無疲厭心。則能長養一切善根。捨離一切諸生死趣。超過一切世間種性。不墮聲聞辟支佛。

地生一切如來。具一切菩薩願。學習一切如來功德。修行一切菩薩諸行。得如來力。摧伏眾魔。及諸外道。亦能除滅一切煩惱。入菩薩地。近如來地。時諸比丘聞此法已。則得三昧。名無礙眼。見一切佛境界。得此三昧故。悉見十方無量無邊一切世界諸佛如來。及其所有道場眾會。亦悉見彼十方世界一切諸趣。所有眾生。亦悉見彼一切世界種種差別。亦悉見彼一切世界所有微塵。亦悉見彼諸世界中一切眾生。所住宮殿。以種種寶而爲莊嚴。及亦聞彼諸佛如來種種言音演說諸法。文辭訓釋。悉皆解了。亦能觀察。

彼世界中一切眾生諸根心欲亦能憶念彼世界中
一切眾生前後十生亦能憶念彼世界中過去未來
各十劫事亦能憶念彼諸如來十本生事十成正覺
十轉法輪十種神通十種說法十種教誡十種辯才
又卽成就十千菩提心十千三昧十千波羅蜜悉皆
清淨得大智慧圓滿光明得菩薩十神通柔軟微妙
住菩薩心堅固不動爾時文殊師利菩薩勸諸比丘
住普賢行住普賢行已入大願海入大願海已成就
大願海以成就大願海故心清淨心清淨故身清淨
身清淨故身輕利身清淨輕利故得大神通無有退

轉得此神通故。不離文殊師利足下。普於十方一切佛所。悉現其身。具足成就一切佛法。

此比丘一會而尊者舍利弗爲唱導之首。疏云顯迴小入大故。然法界海會盡是法身大士。元無權機。何以遽有迴小向大。若非迴小向大。何以前者在會如盲如聾。今則便爲唱導之首。此意幽玄。誠難會通。請言其要。然迴小向大者。乃化佛以三乘法化。而劣機獨取偏空。故佛四十年中種種方便。彈呵淘汰。後乃迴心向大。故法華一一授記。此化佛門頭事也。且舍利弗等十大弟子。皆靈山得記。

之傳也。今初在座盲聾。而此卽云迴心。則靈山又何爲耶。究論平等佛慧。眾生同具。根機不一。宿種已深。苟非隨宜。何能引歸法界。故前正證菩薩。一以種種方便。入微細塵刹。調伏眾生。乃法爾隨宜。皆是如來頻申三昧威神之力。是則三七思惟。將一乘法分別說三。猶是掩耳偷鈴。向癡人前說夢也。是知前之盲聾若約法界。真是盲聾若約能化。乃是正證菩薩。蚤示權於此會。此猶約情見。若約一音異解。權實齊彰。兩相之談。都在一時一處。故世尊現坐祇園。而身子示爲權現。權實同時。本

迹一際。此法界同一緣起也。是則今文殊出閣。乃示卽實之權智。身子乃卽權卽實之真機。故盲聾於園中。唱導於閣外。而所引六千比丘。已爲靈山授記之前旌。而文殊爲眾所說之法門。已攝釋迦四十年之談。此正八相成道利生已畢。四十九年未離如來普光明智刹那際三昧也。以此觀法。方見法界平等一際。智者請深觀之。釋義敘六千比丘。皆是文殊教化之所成就。言各具根本實智也。諸佛放光入文殊頂者。顯卽體之用也。比丘聞讚文殊之德。而心意清淨。深生信樂者。顯宿因已深。

也。一覲文殊卽願如文殊者。此機緣偶會。目擊道存也。而文殊說法。一一皆教云無疲厭者。此正爲劣機怖佛道長遠。多生疲厭之心。斯顯化城之設。特爲疲厭而設也。後誠云若能成就十種無疲厭心。乃至能除一切煩惱。入菩薩地。近如來者。此正寶處在近也。比丘聞已。則得三昧。名無礙眼。見佛境界者。此正示佛知見。又得十千菩提心者。此正悟佛知見。勸入普賢大願海等者。此正入佛知見。是爲靈山四十年之談。盡在文殊目前現證。但以眾生情見有差。所謂眾生各各隨所見耳。上來

初比丘會竟

大方廣佛華嚴經綱要卷第六十一

三才圖會卷之六十一

字表

大方廣佛華嚴經綱要卷第六十二

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

入法界品第三十九之三

爾時文殊師利菩薩勸諸比丘發阿耨多羅三藐三菩提心已。漸次南行。經歷人間。至福城東。住莊嚴幢娑羅林中。往昔諸佛會所止住教化眾生大塔廟處。亦是世尊於往昔時修菩薩行能捨無量難捨之處。是故此林名稱普聞無量佛刹。此處常爲天龍夜叉。

三摩利曼那
乾闥婆阿修羅迦樓羅緊那羅摩睺羅伽人與非人
之所供養時文殊師利與其眷屬到此處已卽於其
處說普照法界修多羅百萬億那由他修多羅以爲
眷屬說此經時於大海中有無量百千億諸龍而來
其所聞此法已深厭龍趣正求佛道咸捨龍身生天
人中一萬諸龍於阿耨多羅三藐三菩提得不退轉
復有無量無數眾生於三乘中各得調伏。

第二文殊師利菩薩勸諸比丘發菩提心已以下
乃第二諸乘人會以方便化生豈獨聲聞一類之
機若約靈山五時攝化盡收五性之機若不陟人

間何處求大心凡夫耶。是以文殊業已垂權。而復往人間也。漸次南行。顯非頓化。明正爲南方盡南矣。福城者。疏釋順福分善。乃表十信入道之初分。婆羅林云高遠。林木森聳。表萬行莊嚴。亦表菩薩說法。先觀眾生十種稠林。故云住林中。以此權智。乃十方諸佛所共。故云往昔佛所止住。大塔廟表常住法身。爲權智之本。諸佛修行。依性起修。修無不極。故是佛昔修行捨難捨之處。此法身眞際。乃人天八部之所依歸。故常爲供養處。文殊於此處說普照法界修多羅。卽顯應機之法。乃從法界所

流。是知四十九年之談。皆普照法界修多羅之眷屬。故云百萬那由他修多羅。以爲眷屬也。說此法時。獨舉海中龍王聞法捨龍身而生天中。於三菩提得不退轉者。畜生難中。瞋毒難化。今得益之速如此。顯法勝益。足徵地獄中人。三重頓圓十地。信可徵矣。復云無量眾生於三乘中各得調伏者。此則釋迦出世一化始終。盡見於文殊出閣之頃也。

上諸乘人會竟。下三善財會。

時福城人聞文殊師利童子。在莊嚴幢娑羅林中。大塔廟處。無量大眾。從其城出來詣其所。時有優婆塞

名曰大智。與五百優婆塞眷屬俱。所謂須達多優婆塞。婆須達多優婆塞。福德光優婆塞。有名稱優婆塞。施名稱優婆塞。月德優婆塞。善慧優婆塞。大慧優婆塞。賢護優婆塞。賢勝優婆塞。如是等五百優婆塞俱。來詣文殊師利童子所。頂禮其足。右繞三匝。退坐一面。復有五百優婆夷。所謂大慧優婆夷。善光優婆夷。妙身優婆夷。可樂身優婆夷。賢優婆夷。賢德優婆夷。賢光優婆夷。幢光優婆夷。德光優婆夷。善目優婆夷。如是等五百優婆夷。來詣文殊師利童子所。頂禮其足。右繞三匝。退坐一面。復有五百童子。所謂善財童

子。善行童子。善戒童子。善威儀童子。善勇猛童子。善思童子。善慧童子。善覺童子。善眼童子。善臂童子。善光童子。如是等五百童子。來詣文殊師利童子所。頂禮其足。右繞三匝。退坐一面。復有五百童女。所謂善賢童女。大智居士女童女。賢稱童女。美顏童女。堅慧童女。賢德童女。有德童女。梵授童女。德光童女。善光童女。如是等五百童女。來詣文殊師利童子所。頂禮其足。右繞三匝。退坐一面。爾時文殊師利童子。知福城人悉已來集。隨其心樂。現自在身。威光赫奕。蔽諸大眾。以自在大慈。令彼清涼。以自在大悲。起說法心。

以自在智慧。知其心樂。以廣大辯才。將爲說法。復於是時。觀察善財。以何因緣。而有其名。知此童子。初入胎時。於其宅內。自然而出。七寶樓閣。其樓閣下。有七伏藏。於其藏上。地自開裂。生七寶牙。所謂金銀瑠璃。玻瓈。眞珠。碑磔。碼碯。善財童子。處胎十月。然後誕生。形體支分。端正具足。其七大藏。縱廣高下。各滿七肘。從地涌出。光明照耀。復於宅中。自然而有五百寶器。種種諸物。自然盈滿。所謂金剛器中。盛一切香。於香器中。盛種種衣。美玉器中。盛滿種種上味。飲食。摩尼器中。盛滿種種殊異珍寶。金器盛銀。銀器盛金。金銀

器中盛滿瑠璃及摩尼寶。玻璃器中盛滿碑磬。碑磬器中盛滿玻瓈。碼碯器中盛滿眞珠。眞珠器中盛滿碼碯。火摩尼器中盛滿水摩尼。水摩尼器中盛滿火摩尼。如是等五百寶器自然出現。又雨眾寶及諸財物。一切庫藏悉令充滿。以此事故。父母親屬及善相師共呼此兒。名曰善財。又知此童子已曾供養過去諸佛。深種善根。信解廣大。常樂親近諸善知識。身語意業皆無過失。淨菩薩道。求一切智。成佛法器。其心清淨。猶如虛空。迴向菩提。無所障礙。爾時文殊師利菩薩如是觀察善財童子已。安慰開喻而爲演說一

切佛法。所謂說一切佛積集法。說一切佛相續法。說一切佛次第法。說一切佛眾會清淨法。說一切佛法輪化導法。說一切佛色身相好法。說一切佛法身成就法。說一切佛言辭辯才法。說一切佛光明照耀法。說一切佛平等無二法。爾時文殊師利童子。爲善財童子及諸大眾。說此法已。殷勤勸喻增長勢力。令其歡喜。發阿耨多羅三藐三菩提心。又令憶念過去善根。作是事已。卽於其處。復爲眾生隨宜說法。然後而去。

時福城人下。三善財會。然文殊出閣已已下。至經

終通顯六位因果。在善財所參知識五十四人。約位則文殊一人表信位。以信未成位。故但一人。餘四十人各以十人寄一位。二從德雲至慈行寄十住位。三善見至徧行寄十行位。四鬻香長者至安住地神寄十向位。五婆珊夜神至瞿波寄十地位。摩耶至天主光等十一人寄等覺位。彌勒普賢寄妙覺位。今善財初參文殊表依佛根本果智爲發行之本。故單表十信。以後諸位皆依信建立。故初福城人聞文殊菩薩住在林中。故相聚而來。時優婆塞名曰大智爲上首者。表人中發心。必依智爲

本也。四眾人等一時來詣文殊頂禮者。此人間化導之眾。最爲初機。文殊見眾來集。卽現殊勝三業。爲攝化之方便也。獨觀察善財因緣。此以妙觀察智。知機知時。隨應說法也。故細觀善財生時之外緣。及所稟之內因。委是法器。故卽爲說一切佛法。後所謂下列十句。則已將一乘因果理事。盡爲宣說。無餘蘊矣。此表說頓教大乘也。於其餘眾生。則隨宜說法。各稱其機。五乘因果。俱是隨宜。卽立刻之間。已盡化佛一代之化法矣。

爾時善財童子從文殊師利所聞佛如是種種功德。

一心勤求阿耨多羅三藐三菩提。隨文殊師利而說
頌曰。

三有爲城郭	憍慢爲垣墻	諸趣爲門戶
愛水爲池塹	愚癡闇所覆	貪恚火熾然
魔王作君主	童蒙依止住	貪愛爲徽纆
諂誑爲轡勒	疑惑蔽其眼	趣入諸邪道
慳嫉憍盈故	入於三惡處	或墮諸趣中
生老病死苦	妙智清淨日	大悲圓滿輪
能竭煩惱海	願賜少觀察	妙智清淨月
大慈無垢輪	一切悉施安	願垂照察我

一切法界王 法寶爲先導 遊空無所礙
願垂教敕我 福智大商主 勇猛求菩提
普利諸羣生 願垂守護我 身被忍辱甲
手提智慧劍 自在降魔軍 願垂拔濟我
住法須彌頂 定女常恭侍 滅惑阿修羅
帝釋願觀我 三有凡愚宅 惑業地趣因
仁者悉調伏 如燈示我道 捨離諸惡趣
清淨諸善道 超諸世間者 示我解脫門
世間顛倒執 常樂我淨想 智眼悉能離
開我解脫門 善知邪正道 分別心無怯

一切決了人 示我菩提路 住佛正見地

長佛功德樹 雨佛妙法華 示我菩提道

去來現在佛 處處悉周徧 如日出世間

為我說其道 善知一切業 深達諸乘行

智慧決定人 示我摩訶衍 願輪大悲轂

信軸堅忍轄 功德寶莊校 令我載此乘

總持廣大箱 慈愍莊嚴蓋 辯才鈴震響

使我載此乘 梵行為茵褥 三昧為姝女

法鼓震妙音 願與我此乘 四攝無盡藏

功德莊嚴寶 慚愧為羈鞅 願與我此乘

常轉布施輪	恆塗淨戒香	忍辱牢莊嚴
令我載此乘	禪定三昧箱	智慧方便軌
調伏不退轉	令我載此乘	大願清淨輪
總持堅固力	智慧所成就	令我載此乘
普行爲周校	悲心作徐轉	所向皆無怯
令我載此乘	堅固如金剛	善巧如幻化
一切無障礙	令我載此乘	廣大極清淨
普與眾生樂	虛空法界等	令我載此乘
淨諸業惑輪	斷諸流轉苦	摧魔及外道
令我載此乘	智慧滿十方	莊嚴徧法界

普洽眾生願 令我載此乘 清淨如虛空

愛見悉除滅 利益一切眾 令我載此乘

願力速疾行 定心安隱住 普運諸含識

令我載此乘 如地不傾動 如水普饒益

如是運眾生 令我載此乘 四攝圓滿輪

總持清淨光 如是智慧日 願示我令見

已入法王位 已著智王冠 已繫妙法繒

願能慈顧我

善財一聞法要卽一心勤求無上菩提者此表上
根受化之易也。然善財既悟一乘而又廣參知識

者。此正頓悟漸修。以至實證而後已也。善財陳情說偈有三十四頌。初四偈。傷已沉溺。自勉不能。後三十頌。仰德依人。請垂拔濟。疏有多義。

爾時文殊師利菩薩。如象王迴觀善財童子。作如是言。善哉善哉。善男子。汝已發阿耨多羅三藐三菩提心。復欲親近諸善知識。問菩薩行。修菩薩道。善男子。親近供養諸善知識。是諸一切智最初因緣。是故於此勿生疲厭。善財白言。惟願聖者。廣爲我說。菩薩應云何學。菩薩行。應云何修。菩薩行。應云何趣。菩薩行。應云何行。菩薩行。應云何淨。菩薩行。應云何入。菩薩

行。應云何成就菩薩行。應云何隨順菩薩行。應云何
憶念菩薩行。應云何增廣菩薩行。應云何令普賢行
速得圓滿。爾時文殊師利菩薩爲善財童子而說頌
言。

善哉功德藏 能來至我所 發起大悲心

勤求無上覺 已發廣大願 除滅眾生苦

普爲諸世間 修行菩薩行 若有諸菩薩

不厭生死苦 則具普賢道 一切無能壞

福光福威力 福處福淨海 汝爲諸眾生

願修普賢行 汝見無邊際 十方一切佛

皆悉聽聞法 受持不忘失 汝於十方界

普見無量佛 成就諸願海 具足菩薩行

若入方便海 安住佛菩提 能隨導師學

當成一切智 汝徧一切刹 微塵等諸劫

修行普賢行 成就菩提道 汝於無量刹

無邊諸劫海 修行普賢行 成滿諸大願

此無量眾生 聞汝願歡喜 皆發菩提意

願學普賢乘

爾時文殊師利菩薩說此頌已。告善財童子言。善哉善哉。善男子。汝已發阿耨多羅三藐三菩提心。求菩

薩行。善男子。若有眾生能發阿耨多羅三藐三菩提心。是事爲難。能發心已。求菩薩行。倍更爲難。善男子。若欲成就一切智智。應決定求真善知識。善男子。求善知識。勿生疲懈。見善知識。勿生厭足。於善知識。所有教誨。皆應隨順。於善知識。善巧方便。勿見過失。善男子。於此南方有一國土。名爲勝樂。其國有山。名曰妙峯。於彼山中。有一比丘。名曰德雲。汝可往問菩薩云何學菩薩行。菩薩云何修菩薩行。乃至菩薩云何於普賢行。疾得圓滿。德雲比丘當爲汝說。爾時善財童子聞是語已。歡喜踊躍。頭頂禮足。繞無數匝。殷勤

瞻仰。悲泣流淚。辭退南行。

爾時文殊師下。大聖重教。成其勝進之行。故先教以親近善知識爲第一。所謂菩提因緣。莫先善友。然歷事多時。易生疲怠。靡不有初。鮮克有終。故特教云。勿生疲懈。下善財請問云。何學菩薩道。修菩薩行。乃至云。何令普賢行速得圓滿。此問從初發心。以至成佛之行。有十一句問。文殊說偈以答。有十偈。初二偈讚其發心。次一偈特教不厭生死苦。意謂修行求道。但有厭苦之心。則行廢而魔作矣。次一偈但讚發心之德。後五偈具答十一句問。大

聖乃總教諸法。顯十信爲諸位之總。故後諸善友各別教示。現入位之後。別修別證。旣說偈已。長行又總教云。發心之難。若求而能行。此又倍難。此堅其志也。若求菩提。決定要求真善知識。故特教以求善知識。勿生疲懈。於所聞法。勿生厭足。於所教誨。皆應隨順。若見善知識善巧方便逆行。勿見過失。此苦口叮嚀。勸誠求善知識之切要法門。意謂但能求友離過。則前諸問皆圓。故指示後友。勸教往問。善財悲淚辭退南行。悵戀德音。故悲淚而往。向勝樂國。登妙峯山。於其山上。東西南北四維上下。

觀察求覓。渴仰欲見德雲比丘。經於七日。見彼比丘。在別山上。徐步經行。見已往詣。頂禮其足。右繞三匝。於前而住。作如是言。聖者。我已先發阿耨多羅三藐三菩提心。而未知菩薩云何學菩薩行。云何修菩薩行。乃至應云何於普賢行。疾得圓滿。我聞聖者善能誘誨。唯願垂慈。爲我宣說云何菩薩而得成就阿耨多羅三藐三菩提。時德雲比丘告善財言。善哉善哉。善男子。汝已能發阿耨多羅三藐三菩提心。復能請問諸菩薩行。如是之事。難中之難。所謂求菩薩行。求菩薩境界。求菩薩出離道。求菩薩清淨道。求菩薩清

淨廣大心。求菩薩成就神通。求菩薩示現解脫門。求菩薩示現世間所作業。求菩薩隨順眾生心。求菩薩生死涅槃門。求菩薩觀察有爲無爲。心無所著。善男子。我得自在決定解力。信眼清淨。智光照耀。普觀境界。離一切障。善巧觀察。普眼明徹。具清淨行。往詣十方一切國土。恭敬供養一切諸佛。常念一切諸佛。如來。總持一切諸佛正法。常見一切十方諸佛。所謂見於東方一佛。二佛。十佛。百佛。千佛。百千佛。億佛。百億佛。千億佛。百千億佛。那由他億佛。百那由他億佛。乃至見無數無量無那由他億佛。百千那由他億佛。乃至見無數無量無

邊無等。不可數。不可稱。不可思。不可量。不可說。不可說。不可說。佛。乃至見閻浮提微塵數佛。四天下微塵數佛。千世界微塵數佛。二千世界微塵數佛。三千世界微塵數佛。佛刹微塵數佛。乃至不可說不可說佛刹微塵數佛。如東方。南西北方四維上下。亦復如是。一一方中所有諸佛。種種色相。種種形貌。種種神通。種種遊戲。種種眾會。莊嚴道場。種種光明。無邊照耀。種種國土。種種壽命。隨諸眾生。種種心樂。示現種種成正覺門。於大眾中而師子吼。善男子。我唯得此憶念一切諸佛境界智慧光明普見法門。豈能了知諸

大菩薩無邊智慧清淨行門。所謂智光普照念佛門。
常見一切諸佛國土種種宮殿。悉嚴淨故。令一切眾
生念佛門。隨諸眾生心之所樂。皆令見佛得清淨故。
令安住力念佛門。令入如來十力中故。令安住法念
佛門。見無量佛。聽聞法故。照耀諸方念佛門。悉見一
切諸世界中等無差別諸佛海故。入不可見處念佛
門。悉見一切微細境中諸佛自在神通事故。住於諸
劫念佛門。一切劫中。常見如來諸所施爲。無暫捨故。
住一切時念佛門。於一切時。常見如來親近同住不
捨離故。住一切刹念佛門。一切國土咸見佛身。超過

一切無與等故。住一切世念佛門。隨於自心之所欲
樂。普見三世諸如來故。住一切境念佛門。普於一切
諸境界中。見諸如來次第現故。住寂滅念佛門。於一
念中。見一切刹。一切諸佛示涅槃故。住遠離念佛門。
於一日中。見一切佛從其所住而出去故。住廣大念
佛門。心常觀察一一佛身。充徧一切諸法界故。住微
細念佛門。於一毛端。有不可說如來出現。悉至其所
而承事故。住莊嚴念佛門。於一念中。見一切刹。皆有
諸佛成等正覺。現神變故。住能事念佛門。見一切佛
出現世間。放智慧慧光。轉法輪故。住自在心念佛門。知

隨自心所有欲樂。一切諸佛現其像故。住自業念佛門。知隨眾生所積集業現其影像。令覺悟故。住神變念佛門。見佛所坐廣大蓮華。周徧法界而開敷故。住虛空念佛門。觀察如來所有身雲莊嚴法界虛空界故。而我云何能知能說彼功德行。善男子。南方有國名曰海門。彼有比丘名爲海雲。汝往彼問菩薩云何學菩薩行。修菩薩道。海雲比丘能分別說。發起廣大善根因緣。善男子。海雲比丘當令汝入廣大助道位。當令汝生廣大善根力。當爲汝說發菩提心因。當令汝生廣大乘光明。當令汝修廣大波羅蜜。當令汝入

廣大諸行海。當令汝滿廣大誓願輪。當令汝淨廣大莊嚴門。當令汝生廣大慈悲力。時善財童子禮德雲比丘足。右繞觀察辭退而去。

大文第二向勝樂國下有十善友。寄十住位。卽爲十段。每段六節。初依教趣求。二見敬咨問。三陳已發心。四稱讚授法。五謙已推勝。六指示後友。今初向勝樂國。乃依教趣求。見心陟位。故曰登山。智鑒位行爲觀察。七覺助道爲七日。忘所住位。故見在別山。定慧雙遊爲徐步。此修習已行般舟三昧也。見已頂禮。卽見敬咨請。作如是言。一行經。乃申已。

發心而未知菩薩下一行半經。正陳所問。應有前十一句問。今舉首尾者。譯人略也。我聞聖者一行半經。歎德請說。時德雲下稱讚授法。卽正入法界。先讚發心之難。次所謂下別牒前問。有十一句。次善男子。下二行經。是正示法界。卽念佛三昧。於中決定解力。正教入念佛三昧之方。普觀境界。釋上信眼清淨。謂念佛三昧。以信爲首要。乃內因也。往詣十方四句。乃具外緣。下常念一切諸佛二句。正教念佛。以不念而持也。下常見一切十方諸佛。下八行經。明念佛之效。以心契佛心。故得見多佛。次

一一方中下三行半經。明所見之差別事相。然十方多佛及多種境界。皆從念佛心中顯現。此念佛之成功也。然德雲比丘寄初住一位。名發心住。乃十信滿心。知一切法卽心自性。成就慧身。不由他悟。以此位剗見法身。故知識開示念佛法門。卽得見十方多佛。從此直至等覺。總不離此所念佛境界。但隨位增進。漸漸徧周法界。圓融自在。以極法界之量。是知三賢十聖所修。總不離念佛法門。故云一行三昧。今人妄議爲劣行。可不悲哉。次善男子。我唯得此憶念一切諸佛境界。智慧光普見法。

門。此謙已略知念佛法門如此而已。然此法門甚深廣大。故下云豈能了知諸大菩薩無邊智慧清淨行門。此言已所不能者。又當推勝友也。且念佛得無邊智慧清淨。又豈可以參禪較勝劣哉。固在念者何如耳。故下文所謂下。舉二十一種念佛法門。意顯三身不離一念。三土存乎一心。三佛不離目前。三土直在足下。無窮妙旨。盡攝此宗。故德雲言所不知者。蓋在乎此。故云而我云何能知能說彼功德行。故疏委釋多門。門含多義。欲令行者志有所歸。次善男子南方有國。二行經指示後友。海

雲比丘下五行經歎友勝德預指後說時善財童子辭退而去。戀德禮辭下海雲卽第二治地住善友也。海門國者彼國正當南海口故表觀心海深廣爲治心地之門。比丘海雲者觀海爲法門以普眼法門潤一切故表治地中觀生起十種心深廣悲雲故以卽由前念佛法門觀心海深廣起大悲雲潤覆一切卽爲治心地之妙行。

爾時善財童子。一心思惟善知識教。正念觀察智慧光明門。正念觀察菩薩解脫門。正念觀察菩薩三昧門。正念觀察菩薩大海門。正念觀察諸佛現前門。正

念觀察諸佛方所門。正念觀察諸佛軌則門。正念觀察諸佛等虛空界門。正念觀察諸佛出現次第門。正念觀察諸佛所入方便門。漸次南行。至海門國。

善財既蒙指授法門。往參海雲。故途中思惟善知識教。正念觀察者。正是隨聞而思。以思卽修。故得隨門證入。正念觀察卽是觀慧。謂惺寂雙流。沈浮兩捨。此隨入之正行。有五行。皆敘觀察之行爲。所入之方便門。以此漸次南行。至海門國。

向海雲比丘所。頂禮其足。右繞畢。於前合掌。作如是言。聖者。我已先發阿耨多羅三藐三菩提心。欲入一

切無上智海。而未知菩薩云何能捨世俗家生如來家。云何能度生死海。入佛智海。云何能離凡夫地。入如來地。云何能斷生死流。入菩薩行流。云何能破生死輪。成菩薩願輪。云何能滅魔境界。顯佛境界。云何能竭愛欲海。長大悲海。云何能閉眾難惡趣門。開諸大涅槃門。云何能出三界城。入一切智城。云何能棄捨一切玩好之物。悉以饒益一切眾生。

善財頂禮海雲見敬咨請。自陳已發菩提心。而未知下六行經。正請法要。不出智悲二門。然所請者亦隨位增進。但陳已所不知。而善友所授之法。卽

隨自所證一種法門以答。但隨善財所悟之淺深隨法門所修約理以寄位之次第。殊非善財按次而問也。然其所問一一皆通因果。故云入無上智海。而所答亦是圓融行門。應知交徹始終不可作行布解。故疏云正示法界。

時海雲比丘告善財言。善男子。汝已發阿耨多羅三藐三菩提心耶。善財言。唯。我已先發阿耨多羅三藐三菩提心。海雲言。善男子。若諸眾生不種善根。則不能發阿耨多羅三藐三菩提心。要得普門善根光明。具真實道三昧智光。出生種種廣大福海。長白淨法。

無有懈怠。事善知識。不生疲厭。不顧身命。無所藏積。等心如地。無有高下。性常慈愍。一切眾生。於諸有趣。專念不捨。恆樂觀察。如來境界。如是乃能發菩提心。發菩提心者。所謂發大悲心。普救一切眾生故。發大慈心。等祐一切世間故。發安樂心。令一切眾生滅諸苦故。發饒益心。令一切眾生離惡法故。發哀愍心。有怖畏者。咸守護故。發無礙心。捨離一切諸障礙故。發廣大心。一切法界咸徧滿故。發無邊心。等虛空界無不往故。發寬博心。悉見一切諸如來故。發清淨心。於三世法智無違故。發智慧心。普入一切智慧海故。善

男子。我住此海門國十有二年。常以大海爲其境界。所謂思惟大海廣大無量。思惟大海甚深難測。思惟大海漸次深廣。思惟大海無量眾寶奇妙莊嚴。思惟大海積無量水。思惟大海水色不同。不可思議。思惟大海無量眾生之所住處。思惟大海容受種種大身眾生。思惟大海能受大雲所雨之雨。思惟大海無增無減。善男子。我思惟時。復作是念。世間之中。頗有廣博過此海不。頗有無量過此海不。頗有甚深過此海不。頗有殊特過此海不。善男子。我作是念時。此海之下。有大蓮華。忽然出現。以無能勝。因陀羅尼羅寶爲

莖。吠瑠璃寶爲藏。閻浮檀金爲葉。沈水爲臺。碼碯爲
鬚。芬敷布濩。彌覆大海。百萬阿脩羅王執持其莖。百
萬摩尼寶莊嚴網。彌覆其上。百萬龍王。雨以香水。百
萬迦樓羅王。銜諸纓絡及寶繪帶。周而垂下。百萬羅
刹王。慈心觀察。百萬夜叉王。恭敬禮拜。百萬乾闥婆
王。種種音樂讚歎供養。百萬天王。雨諸天華。天鬘天
香。天燒香。天塗香。天末香。天妙衣服。天幢旛蓋。百萬
梵王。頭頂禮敬。百萬淨居天。合掌作禮。百萬轉輪王。
各以七寶莊嚴供養。百萬海神。俱時出現。恭敬頂禮。
百萬味光摩尼寶。光明普照。百萬淨福摩尼寶。以爲

莊嚴百萬普光摩尼寶。爲清淨藏。百萬殊勝摩尼寶。其光赫奕。百萬妙藏摩尼寶。光照無邊。百萬閻浮幢摩尼寶。次第行列。百萬金剛師子摩尼寶。不可破壞。清淨莊嚴。百萬日藏摩尼寶。廣大清淨。百萬可樂摩尼寶。具種種色。百萬如意摩尼寶。莊嚴無盡。光明照耀。此大蓮華。如來出世善根所起。一切菩薩皆生信樂。十方世界。無不現前。從如幻法生。如夢法生。清淨業生。無諍法門之所莊嚴。入無爲印。住無礙門。充滿十方一切國土。隨順諸佛甚深境界。於無數百千劫。歎其功德不可得盡。我時見彼蓮華之上。有一如來。

結加趺坐。其身從此上至有頂。寶蓮華座。不可思議。道場眾會。不可思議。諸相成就。不可思議。隨好圓滿。不可思議。神通變化。不可思議。色相清淨。不可思議。無見頂相。不可思議。廣長舌相。不可思議。善巧言說。不可思議。圓滿音聲。不可思議。無邊際力。不可思議。清淨無畏。不可思議。廣大辯才。不可思議。又念彼佛。往修諸行。不可思議。自在成道。不可思議。妙音演法。不可思議。普門示現。種種莊嚴。不可思議。隨其左右。見各差別。不可思議。一切利益。皆令圓滿。不可思議。時此如來。卽申右手。而摩我頂。爲我演說普眼法門。

尼光明。趣入無數品。以無邊旋陀羅尼光明。普入無
數品。以隨地觀察陀羅尼光明。分別無數品。以威力
陀羅尼光明。普攝無數品。以蓮華莊嚴陀羅尼光明。
引發無數品。以清淨言音陀羅尼光明。開演無數品。
以虛空藏陀羅尼光明。顯示無數品。以光聚陀羅尼
光明。增廣無數品。以海藏陀羅尼光明。辯析無數品。
若有眾生從十方來。若天。若天王。若龍。若龍王。若夜
叉。若夜叉王。若乾闥婆。若乾闥婆王。若阿修羅。若阿
修羅王。若迦樓羅。若迦樓羅王。若緊那羅。若緊那羅
王。若摩睺羅伽。若摩睺羅伽王。若人。若人王。若梵。若

梵王。如是一切來至我所。我悉爲其開示解釋。稱揚讚歎。咸令愛樂趣入。安住此諸佛菩薩行光明普眼法門。善男子。我唯知此普眼法門。如諸菩薩摩訶薩。深入一切菩薩行海。隨其願力而修行故。入大願海。於無量劫。住世間故。入一切眾生海。隨其心樂廣利益故。入一切眾生心海。出生十力無礙智光故。入一切眾生根海。應時教化。悉令調伏故。入一切刹海。成滿本願。嚴淨佛刹故。入一切佛海。願常供養諸如來故。入一切法海。能以智慧咸悟入故。入一切功德海。一一修行。令具足故。入一切眾生言辭海。於一切刹。

轉正法輪故。而我云何能知能說彼功德行。善男子。從此南行六十由旬。楞伽道邊。有一聚落。名爲海岸。彼有比丘。名曰善住。汝詣彼問菩薩云何淨菩薩行。時善財童子禮海雲足。右繞瞻仰。辭退而去。

海雲初見善財。先卽審定發心者。以見發菩提心之難也。善財答云已發。自陳決定不虛。則知爲法器。故下五行半經讚能發心者。深言有大善根。乃能發菩提心。後發菩提心下七行經顯發心之相。以大慈悲心爲首。以入一切智慧海爲行。後善男子我住此下六行經。正示法要。言觀大海者。觀法

海也。謂由前念佛深入法性海。故此深觀法海流
潤起大悲心。蓋依智海而興悲海。故以大海爲所
觀境。深入法性。以大悲利生。卽是宏傳法化。眾生
性空。卽是菩提。故後二行經云。頗有殊特過此海
不。是故由眾生海卽入智慧海。故後明卽得見佛
聞法。卽得受持無盡法門。乃至轉化眾生。如此是
爲普眼法門。謂普見眾生法性平等無礙故。其後
經文我作是念。下三行經言。由觀慧故。表自心發
悟之相。百萬阿修羅。下十四行經。顯心開悟。卽得
外嚴之相。此大蓮華。下四行半經。舉因顯勝之相。

我時見彼下九行半經。明見佛正報之相。時此如
來下。明得聞法海中說法者。表從悲智海之所流
故。若有眾生。下六行經。明以法轉授教化眾生。此
上自利利他。皆由觀眾生性海。而入智海悲海。是
爲平等法界。故疏明初善友明佛。此明法也。後我
唯知此普眼法門。下八行半經。先謙己不知。後從
此南行下二行經。指示後友。六十由旬至海岸者。
表修六度。淨六根。可達法海邊際。故善財辭退而
去。

爾時善財童子。專念善知識教。專念普眼法門。專念

佛神力。專持法句雲。專入法海門。專思法差別。深入法漩澗。普入法虛空。淨持法翳障。觀察法寶處。漸次南行。至楞伽道邊海岸聚落。觀察十方。求覓善住。見此比丘於虛空中。來往經行。無數諸天。恭敬圍繞。散諸天華。作天妓樂。旛幢繪綺。悉各無數。徧滿虛空。以爲供養。諸大龍王。於虛空中。興不思議。沈水香雲。震雷激電。以爲供養。緊那羅王。奏眾樂音。如法讚美。以爲供養。摩睺羅伽王。以不思議。極微細衣。於虛空中。周迴布設。心生歡喜。以爲供養。阿脩羅王。興不思議。摩尼寶雲。無量光明。種種莊嚴。徧滿虛空。以爲供養。

迦樓羅王作童子形。無量采女之所圍繞。究竟成就。無殺害心。於虛空中。合掌供養。不思議數諸刹羅王。無量羅刹之所圍繞。其形長大。甚可怖畏。見善住比丘。慈心自在。曲躬合掌。瞻仰供養。不思議數諸夜叉王。各各悉有白眾圍繞。四面周匝。恭敬守護。不思議數諸梵天王。於虛空中。曲躬合掌。以人間法稱揚讚歎。不思議數諸淨居天。於虛空中。與宮殿俱。恭敬合掌。發弘誓願。時善財童子見是事已。心生歡喜。合掌敬禮。作如是言。聖者。我已先發阿耨多羅三藐三菩提心。而未知菩薩云何修行佛法。云何積集佛法。云

何備具佛法。云何熏習佛法。云何增長佛法。云何總攝佛法。云何究竟佛法。云何淨治佛法。云何深淨佛法。云何通達佛法。我聞聖者善能誘誨。唯願慈哀。爲我宣說。菩薩云何不捨見佛。常於其所精勤修習。菩薩云何不捨菩薩。與諸菩薩同一善根。菩薩云何不捨佛法。悉以智慧而得明證。菩薩云何不捨大願。能普利益一切眾生。菩薩云何不捨眾行。住一切劫。心無疲厭。菩薩云何不捨佛刹。普能嚴淨一切世界。菩薩云何不捨佛力。悉能知見如來自在。菩薩云何不捨有爲。亦復不住。普於一切諸有趣中。猶如變化。示

受生死。修菩薩行。菩薩云何不捨聞法。悉能領受諸佛正教。菩薩云何不捨智光。普入三世智所行處。

第三善財參善住比丘寄修行住。初依教趣求。先念前友之教。有四行經。念前所示聞佛說法。及思入海觀事。攝法觀修。以此漸次趣求。至海岸聚落求覓善住。次見此比丘於虛空中來往經行。下有十五行餘經。見敬咨問。先見空中行者表修無住行故。次作如是言。下十四行經。先自陳發心。次而未知。下正陳請問。於中三。初總問於法起行。二我聞下結前請後。三菩薩云何下別問行起勝用。

時善住比丘告善財言。善哉善哉。善男子。汝已能發
阿耨多羅三藐三菩提心。今復發心求問佛法。一切
智法。自然者法。善男子。我已成就菩薩無礙解脫門。
若來若去。若行若止。隨順思惟修習觀察。卽時獲得
智慧光明。名究竟無礙。得此智慧光明故。知一切眾
生心行。無所障礙。知一切眾生歿生。無所障礙。知一
切眾生宿命。無所障礙。知一切眾生未來劫事。無所
障礙。知一切眾生現在世事。無所障礙。知一切眾生
言語音聲種種差別。無所障疑。決一切眾生所有疑
問。無所障礙。知一切眾生諸根。無所障礙。隨一切眾

生應受化時。悉能往赴。無所障礙。知一切剎那羅婆
牟呼栗多。日夜時分。無所障礙。知三世海流轉次第。
無所障礙。能以其身徧往十方一切佛刹。無所障礙。
何以故。得無住無作神通力故。善男子。我以得此神
通力故。於虛空中。或行或住。或坐或臥。或隱或顯。或
現一身。或現多身。穿度牆壁。猶如虛空。於虛空中。結
加趺坐。往來自在。猶如飛鳥。入地如水。履水如地。徧
身上下。普出煙燄。如大火聚。或時震動一切大地。或
時以手摩觸日月。或現其身高至梵宮。或現燒香雲
或現實燄雲。或現變化雲。或現光網雲。皆悉廣大彌

覆十方。或一念中過於東方一世界。二世界。百世界。千世界。百千世界。乃至無量世界。乃至不可說不可說世界。或過閻浮提微塵數世界。或過不可說不可說佛刹微塵數世界。於彼一切諸佛國土。佛世尊前。聽聞說法。一一佛所。現無量佛刹微塵數差別身。一。一身。兩無量佛刹微塵數供養雲。所謂一切華雲。一切香雲。一切鬘雲。一切末香雲。一切塗香雲。一切蓋雲。一切衣雲。一切幢雲。一切旛雲。一切帳雲。以一切身雲而爲供養。一一如來所有宣說。我皆受持。一一國土所有莊嚴。我皆憶念。如東方。南西北方。四維上。

下亦復如是。如是一切諸世界中所有眾生。若見我形。皆決定得阿耨多羅三藐三菩提。彼諸世界一切眾生。我皆明見。隨其大小勝劣苦樂。示同其形。教化成就。若有眾生親近我者。悉令安住。如是法門。善男子。我唯知此。普速疾供養諸佛。成就眾生。無礙解脫門。如諸菩薩。持大悲戒。波羅蜜戒。大乘戒。菩薩道相應戒。無障礙戒。不退墮戒。不捨菩提心戒。常以佛法爲所緣戒。於一切智常作意戒。如虛空戒。一切世間無所依戒。無失戒。無損戒。無缺戒。無雜戒。無濁戒。無悔戒。清淨戒。離塵戒。離垢戒。如是功德。而我云何能

知能說善男子。從此南方有國。名達里鼻茶。城名自在。其中有人。名曰彌伽。汝詣彼問。菩薩云何學菩薩行。修菩薩道。時善財童子。頂禮其足。右繞瞻仰。辭退而行。

善住下稱讚授法。先讚牒其所問之法。次我已下。正授法要。自所證者。唯無礙解脫門耳。若來若去。下一行半經。正示修習之法。得此智慧光明。下八行半經。明別示顯法功用之相。然所證者。卽得六神通。故後徵釋云。得無住無作神通力故。以不住不作。故得無礙。次我以得此下。六行半經。別明神

通十八變之相。次或一念下。有十三行半經。明由
此神通。卽能遍至十方世界。供養諸佛。亦能現形
益物。結云。若有眾生親近我者。悉令安住。如是法
門。此備示無礙解門。故結云。我唯知此解脫門。如
此而已。故次如諸菩薩下。謙已所不知者。推後勝
友。然所不知。皆言戒者。意顯無礙解脫。皆由持別
解脫戒爲本。非戒不能修治心故。次從此南方下
指示後友。名曰彌伽。寄生貴住。善財頂禮辭退而
行。

大方廣佛華嚴經綱要卷第六十二

大方廣佛華嚴經綱要卷第六十三

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

入法界品第三十九之四

爾時善財童子一心正念法光明法門。深信趣入。專念於佛。不斷三寶。歎離欲性。念善知識。普照三世。憶諸大願。普救眾生。不著有爲。究意思惟。諸法自性。悉能嚴淨。一切世界。於一切佛。眾會道場。心無所著。漸次南行。至自在城。求覓彌伽。乃見其人。於市肆中。坐

於說法師子之座。十千人眾所共圍繞。說輪字莊嚴法門。時善財童子頂禮其足。繞無量匝。於前合掌而作是言。聖者。我已先發阿耨多羅三藐三菩提心。而我未知菩薩云何學菩薩行。云何修菩薩道。云何流轉於諸有趣。常不忘失菩提之心。云何得平等意。堅固不動。云何獲清淨心。無能沮壞。云何生大悲力。恆不勞疲。云何入陀羅尼。普得清淨。云何發生智慧廣大光明。於一切法離諸闇障。云何具無礙解辯才之力。決了一切甚深義藏。云何得正念力。憶持一切差別法輪。云何得淨趣力。於一切趣普演諸法。云何得

智慧力於一切法。悉能決定分別其義。

第四彌伽寄生貴住。生貴者。謂生佛法家。亦云生菩提心家。種性尊貴。故意顯善財由聞前法光明。深信趣入。故得生佛家。初四行經。明起觀修。漸次南行。趣求後友。乃見其人於市肆中說法。善財頂禮見敬。次陳已發心。次而我未知。下七行半經。正陳所問。乃修證之相。

爾時彌伽告善財言。善男子。汝已發阿耨多羅三藐三菩提心耶。善財言。唯。我已先發阿耨多羅三藐三菩提心。彌伽遽卽下師子座。於善財所。五體投地。散

金銀華。無價寶珠。及以上妙碎末梅檀。無量種衣。以覆其上。復散無量種種香華。種種供具。以爲供養。然後起立而稱歎言。善哉善哉。善男子。乃能發阿耨多羅三藐三菩提心。善男子。若有能發阿耨多羅三藐三菩提心。則爲不斷一切佛種。則爲嚴淨一切佛刹。則爲成熟一切眾生。則爲了達一切法性。則爲悟解一切業種。則爲圓滿一切諸行。則爲不斷一切大願。則如實解離貪種性。則能明見三世差別。則令信解永得堅固。則爲一切如來所持。則爲一切諸佛憶念。則與一切菩薩平等。則爲一切賢聖讚喜。則爲一切

梵王禮覲。則爲一切天主供養。則爲一切夜叉守護。則爲一切羅刹侍衛。則爲一切龍王迎接。則爲一切緊那羅王歌詠讚歎。則爲一切諸世間主稱揚慶悅。則令一切諸眾生界悉得安隱。所謂令捨惡趣故。令出難處故。斷一切貧窮根本故。生一切天人快樂故。遇善知識親近故。聞廣大法受持故。生菩提心故。淨菩提心故。照菩薩道故。入菩薩智故。住菩薩地故。善男子。應知菩薩所作甚難。難出難值。見菩薩者倍更難有。菩薩爲一切眾生恃怙。生長成就故。爲一切眾生拯濟。拔諸苦難故。爲一切眾生依處。守護世間故。

爲一切眾生救護。令免怖畏故。菩薩如風輪。持諸世間。不令墮落惡趣故。如大地增長眾生善根故。如大海。福德充滿無盡故。如淨日。智慧光明普照故。如須彌。善根高出故。如明月。智光出現故。如猛將。摧伏魔軍故。如君主。佛法城中得自在故。如猛火。燒盡眾生我愛心故。如大雲。降霑無量妙法雨故。如時雨。增長一切信根芽故。如船師。示導法海津濟處故。如橋梁。令其得度生死海故。

第三爾時彌伽下。稱讚授法。初審定發心。次彌伽遽卽下師子座。先禮善財。而後方授法者。意顯上

善財所問之法。乃依事造修。將明攝俗之行。故先
致敬而後授法。亦顯菩提心乃最尊上心。固當重
故下然後起立廣讚菩提。因心深廣。所謂發心畢
竟二無別。如是二心先心難。由此故得十王敬護。
廣益眾生。故下結示云。應知菩薩所作甚難。以善
知識難出難遇。而堪受法器。師資雅合。更難之難。
此所以極言其難者。固其增進之心耳。次菩薩爲
一切眾生下九行經。別讚善知識之大益。申其難
遇之所以。文有十喻。極讚知識之大利。

彌伽如是讚歎善財。令諸菩薩皆歡喜已。從其面門

出種種光普照三千大千世界。其中眾生遇斯光已。諸龍神等乃至梵天悉皆來至彌伽之所。彌伽大士卽以方便爲開示演說分別解釋輪字品莊嚴法門。彼諸眾生聞此法已皆於阿耨多羅三藐三菩提得不退轉。彌伽於是還升本座告善財言。善男子我已獲得妙音陀羅尼能分別知三千大千世界中諸天語言。諸龍夜叉乾闥婆阿修羅迦樓羅緊那羅摩睺羅伽人與非人及諸梵天所有語言。如此三千大千世界十方無數乃至不可說不可說世界悉亦如是。善男子我唯知此菩薩妙音陀羅尼光明法門如諸

菩薩摩訶薩能普入一切眾生種種想海。種種施設海。種種名號海。種種語言海。能普入說一切深密法句海。說一切究竟法句海。說一所緣中。有一切三世所緣法句海。說上法句海。說上上法句海。說差別法句海。說一切差別法句海。能普入一切世間呪術海。一切音聲莊嚴輪。一切差別字輪際。如是功德。我今云何能知能說。善男子。從此南行。有一聚落。名曰住林。彼有長者。名曰解脫。汝詣彼問。菩薩云何修菩薩行。菩薩云何成菩薩行。菩薩云何集菩薩行。菩薩云何思菩薩行。爾時善財童子。以善知識故。於一切智。

法深生尊重。深植淨信。深自增益。禮彌伽足。涕泗悲泣。繞無量而戀慕瞻仰。辭退而行。

第二彌伽如是讚歎已下。授已法門。先五行經。從其面門放種種光。乃現通益物。光中演說輪字品莊嚴法門。卽彌伽之所證也。輪字品者。謂從字母音聲旋轉無礙。入法性海。此蓋約文字性空以顯總持法門也。彌伽現通已畢。於是還升本座。告善財言。但云我已獲得妙音陀羅尼。分別語言三昧。於三千大千世界中。諸天及人所有語言音聲。一切皆是入法界之門。意顯入此法門。則一切善惡

麤細音聲。皆是說法之聲。無一言音而非入理之門。若上善財所問修進法光明門。卽從此音聲三昧而入。故彌伽答善財處。但只放此一光全體顯示。更不容聲。正欲目擊而道存也。故彌伽卽告善財云。我唯知此菩薩妙音陀羅尼光明法門而已。若諸菩薩能普入一切眾生想海。乃至一切音聲莊嚴輪。一切差別輪。則非我所知。然所不知者。初舉種種想。末結一切音聲差別者。意顯一切語言音聲。皆由妄想而發。以眾生有種種妄想。故有種種語言音聲。若了妄想本空。則音聲無體。如此則

一切語言。皆入法界之法門矣。故爲文字總持法門也。上旣謙已不能。故指示後友。名解脫長者。善財依教辭退而去。

爾時善財童子。思惟諸菩薩無礙解陀羅尼光明莊嚴門。深入諸菩薩語言海門。憶念諸菩薩知一切眾生微細方便門。觀察諸菩薩清淨心門。成就諸菩薩善根光明門。淨治諸菩薩教化眾生門。明利諸菩薩攝眾生智門。堅固諸菩薩廣大志樂門。任持諸菩薩殊勝志樂門。淨治諸菩薩種種信解門。思惟諸菩薩無量善心門。誓願堅固心無疲厭。以諸甲冑而自莊

嚴。精進深心。不可退轉。具不壞信。其心堅固。猶如金剛。及那羅延。無能壞者。守持一切善知識教。於諸境界。得不壞智。普門清淨。所行無礙。智光圓滿。普照一切。具足諸地。總持光明。了知法界種種差別。無依無住。平等無二。自性清淨。而普莊嚴。於諸所行。皆得究竟。智慧清淨。離諸執著。知十方差別法。智無障礙。往十方差別處。身不疲懈。於十方差別業。皆得明了。於十方差別佛。無不現見。於十方差別時。悉得深入。清淨妙法。充滿其心。普知三昧。明照其心。心恆普入平等境界。如來智慧之所照觸。一切智流。相續不斷。若

身若心。不離佛法。一切諸佛神力所加。一切如來光明所照。成就大願。願身周徧一切刹網。一切法界。普入其身。漸次遊行。十有二年。至住林城。周徧推求解脫長者。既得見已。五體投地。起立合掌。白言。聖者。我今得與善知識會。是我獲得廣大善利。何以故。善知識者。難可得見。難可得聞。難可出現。難得奉事。難得親近。難得承接。難可逢值。難得共居。難令喜悅。難得隨逐。我今會遇。爲得善利。聖者。我已先發阿耨多羅三藐三菩提心。爲欲事一切佛故。爲欲值一切佛故。爲欲見一切佛故。爲欲觀一切佛故。爲欲知一切佛

故。爲欲證一切佛平等故。爲欲發一切佛大願故。爲
欲滿一切佛大願故。爲欲具一切佛智光故。爲欲成
一切佛眾行故。爲欲得一切佛神通故。爲欲具一切
佛諸力故。爲欲獲一切佛無畏故。爲欲聞一切佛法
故。爲欲受一切佛法故。爲欲持一切佛法故。爲欲解
一切佛法故。爲欲護一切佛法故。爲欲與一切諸菩
薩眾同一體故。爲欲與一切菩薩善根等無異故。爲
欲圓滿一切菩薩波羅蜜故。爲欲成就一切菩薩所
修行故。爲欲出生一切菩薩清淨願故。爲欲得一切
諸佛菩薩威神藏故。爲欲得一切菩薩法藏無盡智

慧大光明故。爲欲得一切菩薩三昧廣大藏故。爲欲成就一切菩薩無量無數神通藏故。爲欲以大悲藏教化調伏一切眾生。皆令究竟到邊際故。爲欲顯現神變藏故。爲於一切自在藏中。悉以自心得自在故。爲欲入於清淨藏中。以一切相而莊嚴故。聖者。我今以如是心。如是意。如是樂。如是欲。如是希求。如是思惟。如是尊重。如是方便。如是究竟。如是謙下。至聖者所。我聞聖者。善能誘誨諸菩薩眾。能以方便闡明所得。示其道路。與其津梁。授其法門。令除迷倒障。拔猶豫箭。截疑惑網。照心稠林。浣心垢濁。令心潔白。使心

清淨。正心。諂曲。絕心。生死。止心。不善。解心。執著。於執著處。令心解脫。於染愛處。使心動轉。令其速入一切智境。使其疾到無上法城。令住大悲。令住大慈。令入菩薩行。令修三昧門。令入證位。令觀法心。令增長力。令修習行。普於一切。其心平等。唯願聖者。爲我宣說。疾得明了。

第五解脫長者。寄具足方便住。然具足方便者。正明帶真隨俗。習無量善巧。化生無住之行也。由得入上妙音陀羅尼門。故能入俗利生無住。故善財

依教趣求。先思念前後。一一從思證入。有六行經。十一句皆所思之法門。次誓願堅固。下十二行半經。顯修之益。漸次遊行。十有二年。周徧推求解脫。長者意顯深窮。十二因緣。故令根塵十二。皆徧法界。一一皆解脫門。故然後乃見。既得見已。善財極言善知識難見。難聞。難出。難事。難近。難接。難逢。難共。難悅。難隨。如此深言十難者。以入法既深。感恩彌重。求教益切。爲法之心益深矣。故自慶如此之難。幸而得見。以希望多年故也。上申見敬。後方咨請。先陳自己發心。次爲欲事一切佛下。別陳發心。

之相有三。初五行經陳欲上窮佛境。二爲欲下二行經。欲罄盡法源。後爲欲與一切下九行經。欲齊菩薩行。亦是僧寶。以善財入法既深。故請問亦有。序。故此特以三寶爲問。欲顯已有荷負之願。故次聖者我今以如是心者。結前發心之相。爲發問之端。次我聞聖者下九行經。讚能誘誨。故請決所疑。時解脫長者以過去善根力。佛威神力。交殊師利童子憶念力故。卽入菩薩三昧門。名普攝一切佛刹無邊旋陀羅尼。入此三昧。已得清淨身。於其身中。顯現十方各十佛刹微塵數佛。及佛國土眾會道場種種。

光明諸莊嚴事。亦現彼佛往昔所行神通變化。一切大願助道之法。諸出離行。清淨莊嚴。亦見諸佛威等正覺轉妙法輪。教化眾生。如是一切。於其身中。悉皆顯現。無所障礙。種種形相。種種次第。如本而住。不相雜亂。所謂種種國土。種種眾會。種種道場。種種嚴飾。其中諸佛。現種種神力。立種種乘道。示種種願門。或於一世界。處兜率宮而作佛事。或於一世界。沒兜率宮而作佛事。如是。或有住胎。或復誕生。或處宮中。或復出家。或詣道場。或破魔軍。或諸天龍恭敬圍繞。或諸世主。勸請說法。或轉法輪。或般涅槃。或分舍利。或

起塔廟。彼諸如來。於種種眾會。種種世間。種種趣生。
種種家族。種種欲樂。種種業行。種種語言。種種根性。
種種煩惱。隨眠習氣。諸眾生中。或處微細道場。或處
廣大道場。或處一由旬量道場。或處十由旬量道場。
或處不可說不可說佛刹微塵數由旬量道場。以種
種神通。種種言辭。種種音聲。種種法門。種種總持門。
種種辯才門。以種種聖諦海。種種無畏大師子吼。說
諸眾生種種善根。種種憶念。授種種菩薩記。說種種
諸佛法。彼諸如來所有言說。善財童子悉能聽受。亦
見諸佛及諸菩薩不可思議三昧神變。爾時解脫長

者從三昧起。告善財童子言。善男子。我已入出如來
無礙莊嚴解脫門。善男子。我入出此解脫門時。卽見
東方閻浮檀金光明世界龍自在王如來。應正等覺
道場眾會之所圍繞。毗盧遮那藏菩薩而爲上首。又
見南方速疾力世界普香如來。應正等覺道場眾會
之所圍繞。心王菩薩而爲上首。又見西方香光世界
須彌燈王如來。應正等覺道場眾會之所圍繞。無礙
心菩薩而爲上首。又見北方袈裟幢世界不可壞金
剛如來。應正等覺道場眾會之所圍繞。金剛步勇猛
菩薩而爲上首。又見東北方一切上妙寶世界無所

得境界眼如來應正等覺道場眾會之所圍繞。無所得善變化菩薩而爲上首。又見東南方香燄光音世界香燈如來應正等覺道場眾會之所圍繞。金剛燄慧菩薩而爲上首。又見西南方智慧日普光明世界法界輪幢如來應正等覺道場眾會之所圍繞。現一切變化幢菩薩而爲上首。又見西北方普清淨世界一切佛寶高勝幢如來應正等覺道場眾會之所圍繞。法幢王菩薩而爲上首。又見上方佛次第出現無盡世界無邊智慧光圓滿幢如來應正等覺道場眾會之所圍繞。法界門幢王菩薩而爲上首。又見下方

佛光明世界無礙智幢如來應正等覺道場眾會之所圍繞。一切世間刹幢王菩薩而爲上首。

第三時解脫下。正示法界。初入定默示。後出定言答。卽入普攝一切佛刹無邊旋陀羅尼三昧者。謂普攝十方佛刹在於身中。由唯心之智。稱性總持。令如體用旋轉無礙。故以爲名。此顯唯心觀成。普攝無邊差別諸佛境界。頓入平等法界。故下文入此三昧已。下有二十一行經。皆示三昧中所攝境界。全現長者一身之中。卽所現境界中。諸佛說法所有言說。及不可說三昧神變。是所謂諸佛法身。

入我性。我身還共如來合。皆令善財親聞親見。卽此三昧。已彰無盡無盡法界。以明定之業用。將以默示善財所問也。後爾時解脫長者從三昧起下。方以言答。乃告之曰。我已入出如來無礙莊嚴解脫門。疏釋此解脫。總有五義。一。一切如來。各具一切無礙莊嚴。二。一如來。互徧無礙。三。一切如來。莊嚴悉入長者之身。四。長者徹見十方佛海。五。長者智持。不以爲礙。此正所謂先以定動。後以智拔。故次我出入此下有二十行經。歷見十方佛眾會道場。皆入長者之身。正明定之業用。卽此三昧中。

境界。通身全彰。入法界之門矣。

善男子。我見如是等十方各十佛刹微塵數如來。彼諸如來不來至此。我不往彼。我若欲見安樂世界阿彌陀如來。隨意卽見。我若欲見栴檀世界金剛光明如來。妙香世界寶光明如來。蓮華世界寶蓮華光明如來。妙金世界寂靜光如來。妙喜世界不動如來。善住世界師子如來。鏡光明世界月覺如來。寶師子莊嚴世界毗盧遮那如來。如是一切悉皆卽見。然彼如來不來至此。我身亦不往詣於彼。知一切佛及與我心悉皆如夢。知一切佛猶如影像。自心如水。知一切

佛所有色相。及以自心。悉皆如幻。知一切佛。及以自心。悉皆如響。我如是知。如是憶念。所見諸佛。皆由自心。善男子。當知菩薩修諸佛法。淨諸佛刹。積集妙行。調伏眾生。發大誓願。入一切智。自在遊戲。不可思議。解脫之門。得佛菩提。現大神通。徧往一切十方世界。以微細智。普入諸劫。如是一切。悉由自心。是故善男子。應以善法。扶助自心。應以法水。潤澤自心。應於境界。淨治自心。應以精進。堅固自心。應以忍辱。坦蕩自心。應以智證。潔白自心。應以智慧。明利自心。應以佛自在。開發自心。應以佛平等。廣大自心。應以佛十力。

觀察自心。善男子。我唯於此如來無礙莊嚴解脫門而得入出。如諸菩薩摩訶薩。得無礙智。住無礙行。得常見一切佛三昧。得不住涅槃際三昧。了達三昧普門境界。於三世法。悉皆平等。能善分身徧一切刹。住於諸佛平等境界。十方境界。皆悉現前。智慧觀察。無不明了。於其身中。悉現一切世界成壞。而於己身及諸世界。不生二想。如是妙行。而我云何能知能說。善男子。從此南行。至閻浮提畔。有一國土。名摩利伽羅。彼有比丘。名曰海幢。汝詣彼問。菩薩云何學菩薩行。修菩薩道。時善財童子頂禮解脫長者足。右繞觀察。

稱揚讚歎。思惟戀仰。悲泣流淚。一心憶念。依善知識。事善知識。敬善知識。由善知識。見一切智。於善知識。不生違逆。於善知識。心無諂誑。於善知識。心常隨順。於善知識。起慈母想。捨離一切無益法故。於善知識。起慈父想。出生一切諸善法故。辭退而去。

四善男子。我見如是下。彰定體相。卽唯心觀門。此明涉俗利生之行。次前法門而示唯心觀者。正顯利生之要。先了達眾生無邊境界。皆唯心顯。以顯心佛眾生。三無差別。乃入平等法界。故次示唯心觀門。十方佛境。平等顯現。故見彼十方如來。不來

至此。我不往彼。故次五行經。廣顯隨心見佛。初明
要見卽見。次然彼如來下。正顯唯心念佛觀體。意
謂見佛無來往之相者。其故何耶。以知一切佛與
我心。皆悉如夢。一切佛如影像。若水清月現。鏡明
像顯。了自心如幻。知一切佛及己善。皆悉如響。以
此五種觀門。故知如是念佛。皆由自心。大哉念佛
法門。爲涉俗利生之第一妙行。故特於長者以示
之。然念佛必唯心爲要。故示於長者所親證。嗟哉
今人。薄念佛而不爲者。豈知圓宗廣大無礙之法
界。必欲漸證。當以念佛爲第一也。故善財首參德

雲。卽開示念佛。今將利生。特委示念佛之三昧。末法緇白有志者。可不敬哉。故後廣讚唯心法門。非但念佛一門。以心該萬法。卽佛果體用。菩薩萬行。通依一心建立。故次指示當知菩薩修諸佛法等。悉由自心。故後結示以十種治心之法。以爲修觀入門之要。二利之行。無踰唯心觀門。故後長者謙己云。我唯於此如來無礙莊嚴解脫門而得出入。若如諸菩薩下。皆己所不能。故推後勝友。從此南行至閻浮提岸有海幢比丘。當往詣彼問善財頂禮長者戀慕悲泣。依教而往。辭退而去。

爾時善財童子一心正念彼長者教。觀察彼長者教。憶念彼不思議菩薩解脫門。思惟彼不思議菩薩智光明。深入彼不思議法界門。趣向彼不思議菩薩普入門。明見彼不思議如來神變。解了彼不思議普入佛刹。分別彼不思議佛力莊嚴。思惟彼不思議菩薩三昧。解脫境界分位。了達彼不思議差別世界究竟無礙。修行彼不思議菩薩堅固深心。發起彼不思議菩薩大願淨業。漸次南行。至閻浮提畔摩利聚落。周徧求覓海幢比丘。乃見其在經行地側結加趺坐。入于三昧。離出入息。無別思覺。身安不動。從其足下。出

無數百千億長者居士婆羅門眾皆以種種諸莊嚴具莊嚴其身。悉著寶冠。頂繫明珠。普往十方一切世界。雨一切寶。一切纓絡。一切衣服。一切飲食。如法上味。一切華。一切鬘。一切香。一切塗香。一切欲樂資生之具。於一切處。救攝一切貧窮眾生。安慰一切苦惱眾生。皆令歡喜。心意清淨。成就無上菩提之道。從其兩膝。出無數百千億刹帝利婆羅門眾。皆悉聰慧。種種色相。種種形貌。種種衣服。上妙莊嚴。普徧十方一切世界。愛語同事。攝諸眾生。所謂貧者令足。病者令愈。危者令安。怖者令止。有憂苦者。咸使快樂。復以方

便而勸導之。皆令捨惡安住善法。從其腰間。出等眾
生數。無量仙人。或服草衣。或樹皮衣。皆執澡瓶。威儀
寂靜。周旋往返十方世界。於虛空中。以佛妙音。稱讚
如來。演說諸法。或說清淨梵行之道。令其修習。調伏
諸根。或說諸法。皆無自性。使其觀察。發生智慧。或說
世間言論軌則。或復開示一切智智。出要方便。令隨
次第。各修其業。從其兩脇。出不思議龍。不思議龍女。
示現。不思議諸龍神變。所謂雨。不思議香雲。不思議
華雲。不思議鬘雲。不思議寶蓋雲。不思議寶旛雲。不
思議妙寶莊嚴具雲。不思議大摩尼寶雲。不思議寶

纓絡雲。不思議寶座雲。不思議寶宮殿雲。不思議寶蓮華雲。不思議寶冠雲。不思議天身雲。不思議采女雲。悉徧虛空而爲莊嚴。充滿一切十方世界。諸佛道場。而爲供養。令諸眾生皆生歡喜。從胸前卍字中。出無數百千億阿修羅王。皆悉示現不可思議自在幻力。令百世界皆大震動。一切海水自然涌沸。一切山王互相衝擊。諸天宮殿無不動搖。諸魔光明無不隱蔽。諸魔兵眾無不摧伏。普令眾生捨憍慢心。除怒害心。破煩惱山。息眾惡法。長無鬪諍。永共和善。復以幻力開悟眾生。令滅罪惡。令怖生死。令出諸趣。令離染

著。令住無上菩提之心。令修一切諸菩薩行。令住一切諸波羅蜜。令入一切諸菩薩地。令觀一切微妙法門。令知一切諸佛方便。如是所作。周徧法界。從其背上。爲應以二乘而得度者。出無數百千億聲聞獨覺。爲著我者說無有我。爲執常者說一切行皆悉無常。爲貪行者說不淨觀。爲瞋行者說慈心觀。爲癡行者說緣起觀。爲等分行者說與智慧相應境界法。爲樂著境界者說無所有法。爲樂著寂靜處者說發大誓願普饒益一切眾生法。如是所作。周徧法界。從其兩肩。出無數百千億諸夜叉羅刹王。種種形貌。種種色

相。或長或短。皆可怖畏。無量眷屬。而自圍繞。守護一切行善眾生。并諸賢聖菩薩眾會。若向正住。及正住者。或時現作執金剛神。守護諸佛及佛住處。或徧守護一切世間。有怖畏者。令得安隱。有疾病者。令得除差。有苦惱者。令得免離。有過惡者。令其厭悔。有災橫者。令其息滅。如是利益一切眾生。皆悉令其捨生死輪轉正法輪。從其腹出無數百千億緊那羅王。各有無數緊那羅女。前後圍繞。又出無數百千億乾闥婆王。各有無數乾闥婆女。前後圍繞。各奏無數百千天樂。歌詠讚歎諸法實性。歌詠讚歎一切諸佛。歌詠讚

歎發菩提心。歌詠讚歎修菩薩行。歌詠讚歎一切諸佛成正覺門。歌詠讚歎一切諸佛轉法輪門。歌詠讚歎一切諸佛現神變門。開示演說一切諸佛教門。開示演說令一切眾生皆歡喜門。開示演說嚴淨一切諸佛刹門。開示演說顯示一切微妙法門。開示演說捨離一切諸障礙門。開示演說發生一切諸善根門。如是周徧十方。法界。從其面門。出無數百千億轉輪聖王。七寶具足。四兵圍繞。放大捨光。雨無量寶。諸貧乏者。悉使充足。令其永斷不與取行。端正采女。無數百千。悉以捨施。

心無所著。令其永斷邪淫之行。令生慈心。不斷生命。令其究竟常真實語。不作虛誑無益談說。令攝他語不行離間。令柔軟語無有麤惡。令常演說甚深決定明了之義。不作無義綺飾言辭。爲說少欲。令除貪愛。心無瑕垢。爲說大悲。令除忿怒。意得清淨。爲說實義。令其觀察一切諸法。深入因緣。善明諦理。拔邪見刺。破疑惑山。一切障礙悉皆除滅。如是所作。充滿法界。從其兩目。出無數百千億日輪。普照一切諸大地獄。及諸惡趣。皆令離苦。又照一切世界中間。令除黑闇。又照一切十方眾生。皆令捨離愚癡翳障。於垢濁國。

土。放清淨光。白銀國土。放黃金色光。黃金國土。放白
銀色光。瑠璃國土。放玻璃色光。玻璃國土。放瑠璃色
光。砮磈國土。放碼碯色光。碼碯國土。放砮磈色光。帝
青國土。放日藏摩尼王色光。日藏摩尼王國土。放帝
青色光。赤眞珠國土。放月光網藏摩尼王色光。月光
網藏摩尼王國土。放赤眞珠色光。一寶所成國土。放
種種寶色光。種種寶所成國土。放一寶色光。照諸眾
生心之稠林。辦諸眾生無量事業。嚴飾一切世間境
界。令諸眾生心得清涼。生大歡喜。如是所作。充滿法
界。從其眉間白毫相中。出無數百千億帝釋。皆於境

界而得自在。摩尼寶珠。繫其頂上。光照一切諸天宮殿。震動一切須彌山王。覺悟一切諸天大眾。歎福德力。說智慧力。生其樂力。持其志力。淨其念力。堅其所發。菩提心力。讚樂見佛。令除世欲。讚樂聞法。令厭世境。讚樂觀智。令絕世染。止修羅戰。斷煩惱諍。滅怖死心。發降魔願。興立正法。須彌山王。成辦眾生一切事業。如是所作。周徧法界。從其額上。出無數百千億梵天。色相端嚴。世間無比。威儀寂靜。言音美妙。勸佛說法。歎佛功德。令諸菩薩。悉皆歡喜。能辦眾生無量事業。普徧一切十方世界。從其頭上。出無量佛刹微塵。

數諸菩薩眾。悉以相好莊嚴其身。放無邊光。說種種行。所謂讚歎布施。令捨慳貪。得眾妙寶。莊嚴世界。稱揚讚歎持戒功德。令諸眾生永斷諸惡。住於菩薩大慈悲戒。說一切有悉皆如夢。說諸欲樂。無有滋味。令諸眾生離煩惱縛。說忍辱力。令於諸法。心得自在。讚金色身。令諸眾生離瞋恚垢。起對治行。絕畜生道。歎精進行。令其遠離世間放逸。皆悉勤修無量妙法。又爲讚歎禪波羅蜜。令其一切心得自在。又爲演說般若波羅蜜。開示正見。令諸眾生樂自在智。拔諸見毒。又爲演說隨順世間種種所作。令諸眾生雖離生死。

而於諸趣自在受生。又爲示現神通變化。說壽命自在。令諸眾生發大誓願。又爲演說成就總持力。出生大願力。淨治三昧力。自在受生力。又爲演說種種諸智。所謂普知眾生諸根智。普知一切心行智。普知如來十力智。普知諸佛自在智。如是所作周徧法界。從其頂上。出無數百千億如來身。其身無等。諸相隨好。清淨莊嚴。威光赫奕。如真金山。無量光明。普照十方。出妙音聲。充滿法界。示現無量大神通力。爲一切世間普雨法雨。所謂爲坐菩提道場諸菩薩。雨普知平等法雨。爲灌頂位諸菩薩。雨入普門法雨。爲法王子

位諸菩薩。雨普莊嚴法雨。爲童子位諸菩薩。雨堅固
山法雨。爲不退位諸菩薩。雨海藏法雨。爲成就正心
位諸菩薩。雨普境界法雨。爲方便具足位諸菩薩。雨
自性門法雨。爲生貴位諸菩薩。雨隨順世間法雨。爲
修行位諸菩薩。雨普悲愍法雨。爲新學諸菩薩。雨積
集藏法雨。爲初發心諸菩薩。雨攝眾生法雨。爲信解
諸菩薩。雨無盡境界普現前法雨。爲色界諸眾生。雨
普門法雨。爲諸梵天。雨普藏法雨。爲諸自在天。雨生
力法雨。爲諸魔眾。雨心幢法雨。爲諸化樂天。雨淨念
法雨。爲諸兜率天。雨生意法雨。爲諸夜摩天。雨歡喜

法雨。爲諸忉利天。雨疾莊嚴虛空界法雨。爲諸夜叉王。雨歡喜法雨。爲諸乾闥婆王。雨金剛輪法雨。爲諸阿修羅王。雨大境界法雨。爲諸迦樓羅王。雨無邊光明法雨。爲諸緊那羅王。雨一切世間殊勝智法雨。爲諸人王。雨無樂著法雨。爲諸龍王。雨歡喜幢法雨。爲諸摩睺羅伽王。雨大休息法雨。爲諸地獄眾生。雨正念莊嚴法雨。爲諸畜生。雨智慧藏法雨。爲閻羅王界眾生。雨無畏法雨。爲諸厄難處眾生。雨普安慰法雨。悉令得入賢聖眾會。如是所作。充滿法界。海幢比丘。又於其身一切毛孔。一一皆出阿僧祇佛刹微塵數。

光明網。一一光明網。具阿僧祇色相。阿僧祇莊嚴。阿僧祇境界。阿僧祇事業。充滿十方一切法界。爾時善財童子。一心觀察海幢比丘。深生渴仰。憶念彼三昧解脫。思惟彼不思議菩薩三昧。思惟彼不思議利益眾生方便海。思惟彼不思議無作用普莊嚴門。思惟彼莊嚴法界清淨智。思惟彼受佛加持智。思惟彼出生菩薩自在力。思惟彼堅固菩薩大願力。思惟彼增廣菩薩諸行力。如是住立。思惟觀察。經一日一夜。乃至經於七日七夜。半月一月。乃至六月。復經六日。過此已後。海幢比丘從三昧出。善財童子讚言。聖者。希

有奇特。如此三昧最爲甚深。如此三昧最爲廣大。如此三昧境界無量。如此三昧神力難思。如此三昧光明無等。如此三昧莊嚴無數。如此三昧威力難制。如此三昧境界平等。如此三昧普照十方。如此三昧利益無限。以能除滅一切眾生無量苦故。所謂能令一切眾生離貧苦故。出地獄故。免畜生故。閉諸難門故。開人天道故。令人天眾生喜樂故。令其愛樂禪境界故。能令增長有爲樂故。能爲顯示出有樂故。能爲引發菩提心故。能使增長福智行故。能令增長大悲心故。能令生起大願力故。能令明了菩薩道故。能使莊

嚴究竟智故。能令趣入大乘境故。能令照了普賢行故。能令證得諸菩薩地智光明故。能令成就一切菩薩諸願行故。能令安住一切智智境界中故。聖者。此三昧者。名爲何等。海幢比丘言。善男子。此三昧名普眼捨得。又名般若波羅蜜境界清淨光明。又名普莊嚴清淨門。善男子。我以修習般若波羅蜜故。得此普莊嚴清淨三昧等百萬阿僧祇三昧。善財童子言。聖者。此三昧境界。究竟唯如是耶。海幢言。善男子。入此三昧時。了知一切世界無所障礙。往詣一切世界無所障礙。超過一切世界無所障礙。莊嚴一切世界無

所障礙。修治一切世界無所障礙。嚴淨一切世界無所障礙。見一切佛無所障礙。觀一切佛廣大威德。無所障礙。知一切佛自在神力。無所障礙。證一切佛諸廣大。力無所障礙。入一切佛諸功德海。無所障礙。受一切佛無量妙法。無所障礙。入一切佛法中修習妙行。無所障礙。證一切佛轉法輪平等智。無所障礙。入一切諸佛眾會道場海。無所障礙。觀十方佛法無所障礙。大悲攝受十方眾生。無所障礙。常起大慈。充滿十方。無所障礙。見十方佛心。無厭足。無所障礙。入一切眾生海。無所障礙。知一切眾生根海。無所障礙。知

一切眾生諸根差別智無所障礙。善男子。我唯知此
一般若波羅蜜三昧光明。如諸菩薩入智慧海。淨法
界境。達一切趣。徧無量刹。總持自在。三昧清淨。神通
廣大。辯才無盡。善說諸地。爲眾生依。而我何能知其
妙行。辯其功德。了其所行。明其境界。究其願力。入其
要門。達其所證。說其道分。住其三昧。見其心境。得其
所有平等智慧。善男子。從此南行。有一住處。名曰海
潮。彼有園林。名普莊嚴。於其園中。有優婆夷。名曰休
捨。汝往彼問菩薩云。何學菩薩行。修菩薩道。時善財
童子。於海幢比丘所。得堅固身。獲妙法財。入深境界。

智慧明徹。三昧照耀。住清淨解。見甚深法。其心安住。諸清淨門。智慧光明。充滿十方。心生歡喜。踴躍無量。五體投地。頂禮其足。繞無量匝。恭敬瞻仰。思惟觀察。咨嗟戀慕。持其名號。想其容止。念其音聲。思其三昧。及彼大願所行境界。受其智慧清淨光明。辭退而行。第六海幢比丘。寄正心住。初念長者教觀察思惟。隨修證入。漸次南行。至閻浮提岸。周徧尋求海幢比丘。乃見在經行路側。結加趺坐。入於三昧。初見未及問。以在定故。但見定中所現業用境界。以從足至頂。一十四處所現人天八部修羅帝釋梵王。

乃至聲聞菩薩以至於佛皆在一身中現。經文有十四段。後於頂上所現佛出妙音聲普雨法雨。有三十二種法雨。初十二種法雨。特爲菩薩。後二十種法雨。普及人天雜類。上至色界梵天。下及地獄三途。無不充足。如是所作充滿法界。又於其身一切毛孔。皆出阿僧祇佛刹微塵數光明網。一一光明網。具阿僧祇色相莊嚴境界事業。如是充滿十方一切法界。比丘定中。具現如是相用。善財見已。一心觀察。深生渴仰。憶念彼三昧解脫。思惟彼不思議境界。如是住立思惟觀察。日夜不已。以至六

月六日。未曾暫捨。比丘過此已後。乃從三昧起。善財乃作禮讚言。聖者希有奇特。如此三昧。甚深廣大。利益等有十三行經讚已。然後乃問聖者。此三昧名爲何等。比丘答言。此三昧名普眼捨得。又名般若波羅蜜境界清淨光明。又名普莊嚴清淨門。以修習般若波羅蜜故。得此三昧。有百萬阿僧祇三昧。言三昧名普眼捨得者。謂以般若智圓照法界。故名普眼。般若之體清淨光明。一法不受。故云捨得。以此般若。生佛平等。聖凡一際。故圓現法界事相。此卽顯示前唯心觀門之體用耳。似不必局

於滅受想定也。善財童子既聞三昧之名。因問此三昧境界。究竟如何。此問其實際也。比丘答言。入此三昧時。則智正覺世間。器世間。眾生世間。此三種世間。一際平等。一一融通。無所障礙。如此而已。此直指唯心觀門。究竟實際也。故比丘告善財言。我唯知此一般若波羅蜜三昧光明而已。若諸菩薩。入智慧海。淨法界境。乃至平等智慧。則非我所知。乃推後友云。從此南行。有一住處。名曰海潮。有優婆夷。名曰休捨。汝可往問。時善財童子於海幢比丘所。得堅固身等種種法門。故感恩戀慕。持其

名號。想其容止。念其音聲。思其三昧。受其智慧。得
其清淨光明。於此法門。有深證矣。辭退而行。

大方廣佛華嚴經綱要卷第六十三

大方廣佛華嚴經綱要卷第六十四

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

入法界品第三十九之五

爾時善財童子蒙善知識力。依善知識教。念善知識語。於善知識深心愛樂。作是念言。因善知識。令我見佛。因善知識。令我聞法。善知識者。是我師傅。示導於我。諸佛法故。善知識者。是我眼目。令我見佛如虛空故。善知識者。是我津濟。令我得入諸佛如來蓮華池。

故漸漸南行。至海潮處。見普莊嚴園。眾寶垣墻。周而圍繞。一切寶樹。行列莊嚴。一切寶華樹。雨眾妙華。布散其地。一切寶香樹。香氣氤氳。普熏十方。一切寶鬘樹。雨大寶鬘。處處垂下。一切摩尼寶王樹。雨大摩尼寶。徧布充滿。一切寶衣樹。雨種種色衣。隨其所應。周而敷布。一切音樂樹。風動成音。其音美妙。過於天樂。一切莊嚴具樹。各雨珍玩奇妙之物。處處分布。以爲嚴飾。其地清淨。無有高下。於中具有百萬殿堂。大摩尼寶之所合成。百萬樓閣。閣浮檀金。以覆其上。百萬宮殿。毗盧遮那摩尼寶間錯莊嚴。一萬浴池。眾寶合

成。七寶欄楯周帀圍繞。七寶階道四面分布。八功德水湛然盈滿。其水香氣如天梅檀。金沙布底。水清寶珠周徧間錯。鳧鴈孔雀俱枳羅鳥遊戲其中。出和雅音。寶多羅樹周帀行列。覆以寶網。垂諸金鈴。微風徐搖。恆出美音。施大寶帳。寶樹圍繞。建立無數摩尼寶幢。光明普照百千由旬。其中復有百萬陂池。黑梅檀泥凝積其底。一切妙寶以爲蓮華。敷布水上。大摩尼華光色照耀園中。復有廣大宮殿名莊嚴幢。海藏妙寶以爲其地。毗瑠璃寶以爲其柱。閻浮檀金以覆其上。光藏摩尼以爲莊嚴。無數寶王。光燄熾然。重樓挾

閣種種莊飾。阿盧那香王。覺悟香王。皆出妙香。普熏一切。其宮殿中。復有無量寶蓮華座。周迴布列。所謂照耀十方摩尼寶蓮華座。毗盧遮那摩尼寶蓮華座。照耀世間摩尼寶蓮華座。妙藏摩尼寶蓮華座。師子藏摩尼寶蓮華座。離垢藏摩尼寶蓮華座。普門摩尼寶蓮華座。光嚴摩尼寶蓮華座。安住大海藏清淨摩尼王寶蓮華座。金剛師子摩尼寶蓮華座。園中復有百萬種帳。所謂衣帳。鬘帳。香帳。華帳。枝帳。摩尼帳。真金帳。莊嚴具帳。音樂帳。象王神變帳。馬王神變帳。帝釋所著摩尼寶帳。如是等其數百萬。有百萬大寶網。

彌覆其上。所謂寶鈴網。寶蓋網。寶身網。海藏眞珠網。紺瑠璃摩尼寶網。師子摩尼網。月光摩尼網。種種形像衆香網。寶冠網。寶纓絡網。如是等其數百萬。有百萬大光明之所照耀。所謂燄光摩尼寶光明。日藏摩尼寶光明。月幢摩尼寶光明。香燄摩尼寶光明。勝藏摩尼寶光明。蓮華藏摩尼寶光明。燄幢摩尼寶光明。大燈摩尼寶光明。普照十方摩尼寶光明。香光摩尼寶光明。如是等其數百萬。常雨百萬莊嚴具。百萬黑梅檀香。出妙音聲。百萬出過諸天曼陀羅華。而以散之。百萬出過諸天纓絡。以爲莊嚴。百萬出過諸天妙

寶鬘帶。處處垂下。百萬出過諸天眾。色妙衣。百萬雜色摩尼寶。妙光普照。百萬天子欣樂瞻仰。頭面作禮。百萬采女。於虛空中。投身而下。百萬菩薩恭敬親近。常樂聞法。時休捨優婆夷。坐真金座。戴海藏真珠網冠。挂出過諸天真金寶釧。垂紺青髮。大摩尼網。莊嚴其首。師子口摩尼寶。以爲耳璫。如意摩尼寶。王以爲纓絡。一切寶網。垂覆其身。百千億那由他眾生。曲躬恭敬。東方有無量眾生。來詣其所。所謂梵天。梵眾天。大梵天。梵輔天。自在天。乃至一切人及非人。南西北方四維上下。皆亦如是。其有見此優婆夷者。一切病

苦。悉得除滅。離煩惱垢。拔諸見刺。摧障礙山。入於無礙清淨境界。增明一切所有善根。長養諸根。入一切智慧門。入一切總持門。一切三昧門。一切大願門。一切妙行門。一切功德門。皆得現前。其心廣大。具足神通。身無障礙。至一切處。爾時善財童子入普莊嚴園。周徧觀察。見休捨優婆夷。坐於妙座。往詣其所。頂禮其足。繞無數匝。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。休捨告言。善男子。我唯得菩薩一解脫門。若有見聞憶念於我。與我同

住。供給我者。悉不唐捐。善男子。若有眾生。不種善根。不爲善友之所攝受。不爲諸佛之所護念。是人終不得見於我。善男子。其有眾生。得見我者。皆於阿耨多羅三藐三菩提。獲不退轉。善男子。東方諸佛。常來至此。處於寶座。爲我說法。南西北方。四維上下一切諸佛。悉來至此。處於寶座。爲我說法。善男子。我常不離見佛聞法。與諸菩薩。而共同住。善男子。我此大眾。有八萬四千億那由他。皆在此園。與我同行。悉於阿耨多羅三藐三菩提。得不退轉。其餘眾生。住此園者。亦皆普入不退轉位。

第七休捨優婆夷。寄不退住。善財以蒙善知識力。故於所入法門。心心不退。隨念證入。依教趣求。至海潮處。覓優婆夷。未見其人。先見所居。依報莊嚴。園殊勝之境。有十事莊嚴。一寶牆圍繞。二林樹行列。三堂閣崇麗。四浴沼清華。五池流映帶。六園敷殿座。七羅以帳網。八光明照耀。九雨散雜嚴。十凡聖欣敬。次見正報端嚴妹妙。有十方那由他人。天雲集圍繞。其有見者。皆得利益。業用難測。爾時善財入已。乃見優婆夷坐於妙座。善財往詣其所。頂禮繞無數匝。既修敬已。乃諮問法要。白己發心。乃

請說修菩薩行。優婆夷見善財已。更無稱讚。卽示法界。直云我唯得菩薩一解脫門。若有見我憶念於我。與我同住。供給我者。悉不唐捐。故諸眾生若無深厚善根者。決不得見我。若有得見我者。卽於無上菩提。獲不退轉。前雖未讚善財。卽此得見徵之。則善財可謂深種善根。卽此見我。不必更問法門何如。則早已登不退轉位矣。所以見我有如此大利益者。以十方諸佛時來爲我說法。以我常不離佛法。與諸菩薩而共同住。以我常不離三寶故。故此園中有八萬四千那由他眾生。皆普入不退

轉位。此顯由上得般若三昧光明故。表方便入俗則八萬四千塵勞皆成波羅蜜門。此已爲善財直示法界之門矣。已上共有六十七行經。直敘法門之事。

善財白言。聖者。發阿耨多羅三藐三菩提心。爲久近耶。答言。善男子。我憶過去於然燈佛所。修行梵行。恭敬供養。聞法受持。次前於離垢佛所。出家學道。受持正法。次前於妙幢佛所。次前於勝須彌佛所。次前於蓮華德藏佛所。次前於毗盧遮那佛所。次前於普眼佛所。次前於梵壽佛所。次前於金剛齋佛所。次前於

婆樓那天佛所。善男子。我憶過去於無量劫。無量生中。如是次第三十六恆河沙佛所。皆悉承事恭敬供養。聞法受持。淨修梵行。於此已往。佛智所知。非我能測。善男子。菩薩初發心。無有量。充滿一切法界故。菩薩大悲門。無有量。普入一切世間故。菩薩大願門。無有量。究竟十方世界故。菩薩大慈門。無有量。普覆一切眾生故。菩薩所修行。無有量。於一切刹。一切劫中。修習故。菩薩三昧力。無有量。令菩薩道不退故。菩薩總持力。無有量。能持一切世間故。菩薩智光力。無有量。普能證入三世故。菩薩神通力。無有量。普現一切

刹網故。菩薩辯才力無有量。一音一切悉解故。菩薩清淨身無有量。悉徧一切佛刹故。

此下善財見優婆夷。如是大益。乃問發菩提心爲久近耶。故下優婆夷答從過去然燈佛所修行梵行時。返推次前已往。次第歷事三十六恆河沙佛。一一佛所精修梵行。於此更推已往所事之佛。已非我所測。唯佛智能知耳。卽此告以久遠事佛之心。不退至今。則已全示善財不退之法門矣。故教善財云。菩薩初發心。應無限量。當與法界等。則一一所修之行。皆與法界等。則前無始。後無終。故所

發者。法界常住真心耳。此上有十七行經。具顯發心之因深。

善財童子言。聖者。久如當得阿耨多羅三藐三菩提。答言。善男子。菩薩不爲教化調伏一眾生故。發菩提心。不爲教化調伏百眾生故。發菩提心。乃至不爲教化調伏不可說不可說轉眾生故。發菩提心。不爲教化一世界眾生故。發菩提心。乃至不爲教化不可說不可說轉世界眾生故。發菩提心。不爲教化閻浮提微塵數世界眾生故。發菩提心。不爲教化三千大千世界微塵數世界眾生故。發菩提心。乃至不爲教化

不可說不可說轉三千大千世界微塵數世界眾生
故發菩提心。不爲供養一如來故發菩提心。乃至不
爲供養不可說不可說轉如來故發菩提心。不爲供
養一世界中次第興世諸如來故發菩提心。乃至不
爲供養不可說不可說轉世界中次第興世諸如來
故發菩提心。不爲供養一三千大千世界微塵數世
界中次第興世諸如來故發菩提心。乃至不爲供養
不可說不可說轉佛刹微塵數世界中次第興世諸
如來故發菩提心。不爲嚴淨一世界故發菩提心。乃
至不爲嚴淨不可說不可說轉世界故發菩提心。不

爲嚴淨一三千大千世界微塵數世界故。發菩提心。
乃至不爲嚴淨不可說不可說轉三千大千世界微
塵數世界故。發菩提心。不爲住持一如來遺法故。發
菩提心。乃至不爲住持不可說不可說轉如來遺法
故。發菩提心。不爲住持一世界如來遺法故。發菩提
心。乃至不爲住持不可說不可說轉世界如來遺法
故。發菩提心。不爲住持一閻浮提微塵數世界如來
遺法故。發菩提心。乃至不爲住持不可說不可說轉
佛刹微塵數世界如來遺法故。發菩提心。如是略說
不爲滿一佛誓願故。不爲往一佛國土故。不爲入一

佛眾會故。不爲持一佛法眼故。不爲轉一佛法輪故。
不爲知一世界中諸劫次第故。不爲知一眾生心海
故。不爲知一眾生根海故。不爲知一眾生業海故。不
爲知一眾生行海故。不爲知一眾生煩惱海故。不爲
知一眾生煩惱習海故。乃至不爲知不可說不可說
轉佛刹微塵數眾生煩惱習海故。發菩提心。欲教化
調伏一切眾生。悉無餘故。發菩提心。欲承事供養一
切諸佛。悉無餘故。發菩提心。欲嚴淨一切諸佛國土
悉無餘故。發菩提心。欲護持一切諸佛正教。悉無餘
故。發菩提心。欲成滿一切如來誓願。悉無餘故。發菩

提心。欲往一切諸佛國土。悉無餘故。發菩提心。欲入一切諸佛眾會。悉無餘故。發菩提心。欲知一切世界中諸劫次第。悉無餘故。發菩提心。欲知一切眾生心海。悉無餘故。發菩提心。欲知一切眾生業海。悉無餘故。發菩提心。欲知一切眾生行海。悉無餘故。發菩提心。欲滅一切眾生諸煩惱海。悉無餘故。發菩提心。善男子。取要言之。菩薩以如是等百萬阿僧祇方便行。故發菩提心。善男子。菩薩行。普入一切法。皆證得故。普入一切刹。悉

嚴淨故。是故善男子。嚴淨一切世界盡。我願乃盡。拔一切眾生煩惱習氣盡。我願乃滿。

此下善財已知因心無量。故問將來得果之久近。下優婆夷答言。菩薩發心不可齊限。初不爲調伏三千大千世界微塵數世界眾生。故而發菩提心。亦不爲供爾所佛。淨爾所佛土。住持爾所佛遺法。故而發菩提心。乃至知不可說不可說轉佛刹微塵數眾生煩惱習氣。故而發菩提心。此上反顯心無齊限。下正釋云。直欲眾生界盡。供養佛盡。護持法盡。乃至眾生煩惱習海盡。故發菩提心。要而言

之菩薩嚴淨一切世界。盡我願乃盡。拔一切眾生煩惱習氣。盡我願乃滿。如是發心。豈有求成佛果之念耶。此已極示善財稱法界無盡不退之行矣。此外更有何法耶。此上有四十八行經。

善財童子言。聖者。此解脫名爲何等。答言。善男子。此解脫名離憂安隱幢。善男子。我唯知此一解脫門。如諸菩薩摩訶薩。其心如海。悉能容受一切佛法。如須彌山。志意堅固。不可動搖。如善見藥。能除眾生煩惱重病。如明淨日。能破眾生無明闇障。猶如大地。能作一切眾生依處。猶如好風。能作一切眾生義利。猶如

明燈能爲眾生智慧光。猶如大雲能爲眾生雨。寂滅法猶如淨月。能爲眾生放福德光。猶如帝釋悉能守護一切眾生。而我云何能知能說彼功德行。善男子。於此南方海潮之處。有一國土名那羅素。中有仙人。名毗目瞿沙。汝詣彼問菩薩云何學菩薩行。修菩薩道。時善財童子頂禮其足。繞無數匝。殷勤瞻仰。悲泣流淚。作是思惟。得菩提難。近善知識難。遇善知識難。得菩薩諸根難。淨菩薩諸根難。值同行善知識難。如理觀察難。依教修行難。值遇出生善心方便難。值遇增長一切智法光明難。作是念已。辭退而行。

此善財童子已領上法門故問此解脫門名爲何等。答言此解脫名離憂安隱幢。言離憂者以有如是廣大無量不退之心。又何憂眾生之難度。以不求佛果。又何憂佛道之難成。以不捨眾生界。又何憂生死之苦可撓。而有何不安穩耶。直以此不厭不求之心。則上不見有涅槃。下不見有生死。由此二見悉已摧盡。故以幢名也。故結示云。我唯知此一解脫門而已。如諸菩薩其心如海。悉能容受一切佛法。如須彌之志。堅固不可動搖等。皆我所不能也。故指授後友。那羅素國有毗目瞿沙僊人。能

爲汝說。時善財童子聞上開示不退法門。愈增尊重之念。故思惟得菩提難。近善知識難。遇善知識難。得菩薩根難。淨菩薩根難。值同行善友難。如理觀察難。依教修行難。出生善心方便難。增長一切智光明難。如此十種難遭之想。故此增進勤求不退也。作是念已。辭退而行。

爾時善財童子隨順思惟菩薩正教。隨順思惟菩薩淨行。生增長菩薩福力心。生明見一切諸佛心。生出生一切諸佛心。生增長一切大願心。生普見十方諸法心。生明照諸法實性心。生普散一切障礙心。生觀

察法界無閻心。生清淨意寶莊嚴心。生摧伏一切眾
魔心。漸漸遊行。至那羅素國。周徧推求。毗目瞿沙。見
一大林。阿僧祇樹。以爲莊嚴。所謂種種葉樹。扶疎布
濩。種種華樹。開敷鮮榮。種種果樹。相續成熟。種種寶
樹。兩摩尼果。大梅檀樹。處處行列。諸沈水樹。常出好
香。悅意香樹。妙香莊嚴。波陀羅樹。四面圍繞。尼拘律
樹。其身聳擢。閻浮檀樹。常雨甘果。優鉢羅華。波頭摩
華。以嚴池沼。時善財童子。見彼仙人。在梅檀樹下。敷
草而坐。領徒一萬。或著鹿皮。或著樹皮。或復編草。以
爲衣服。髻環垂鬢。前後圍繞。善財見已。往詣其所。五

體投地。作如是言。我今得遇真善知識。善知識者。則
是趣向一切智門。令我得入真實道故。善知識者。則
是趣向一切智乘。令我得至如來地故。善知識者。則
是趣向一切智船。令我得至智寶洲故。善知識者。則
是趣向一切智炬。令我得生十力光故。善知識者。則
是趣向一切智道。令我得入涅槃城故。善知識者。則
是趣向一切智燈。令我得見夷險道故。善知識者。則
是趣向一切智橋。令我得度險惡處故。善知識者。則
是趣向一切智蓋。令我得生大慈涼故。善知識者。則
是趣向一切智眼。令我得見法性門故。善知識者。則

是趣向一切智潮。令我滿足大悲水故。作是語已。從地而起。繞無量而。合掌前住。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。時毗目瞿沙願其徒眾而作是言。善男子。此童子已發阿耨多羅三藐三菩提心。善男子。此童子普施一切眾生無畏。此童子普與一切眾生利益。此童子常觀一切諸佛智海。此童子欲飲一切甘露法雨。此童子欲測一切廣大法海。此童子欲令眾生住智海中。此童子欲普發起廣大悲雲。此童子欲普雨於廣大法雨。

此童子欲以智月普照世間。此童子欲滅世間煩惱
毒熱。此童子欲長含識一切善根。時諸仙眾聞是語
已。各以種種上妙香華。散善財上。投身作禮。圍繞恭
敬。作如是言。今此童子。必當救護一切眾生。必當除
滅諸地獄苦。必當永斷諸畜生道。必當轉去閻羅王
界。必當關閉諸難處門。必當乾竭諸愛欲海。必令眾
生永滅苦蘊。必當永破無明黑暗。必當永斷貪愛繫
縛。必以福德大輪圍山。圍繞世間。必以智慧大寶須
彌。顯示世間。必當出現清淨智日。必當開示善根法
藏。必使世間明識險易。時毗目瞿沙告羣仙言。善男

子。若有能發阿耨多羅三藐三菩提心。必當成就一切智道。此善男子。已發阿耨多羅三藐三菩提心。當淨一切佛功德地。時毗目瞿沙告善財童子言。善男子。我得菩薩無勝幢解脫。善財白言。聖者。無勝幢解脫境界云何。時毗目仙人卽申右手摩善財頂。執善財手。卽時善財自見其身往十方十佛刹微塵數世界。中到十佛刹微塵數諸佛所。見彼佛刹及其眾會諸佛相好種種莊嚴。亦聞彼佛隨諸眾生心之所樂而演說法。一文一句皆悉通達。各別受持。無有雜亂。亦知彼佛以種種解淨治諸願。亦知彼佛以清淨願。

成就諸力。亦見彼佛隨眾生心所現色相。亦見彼佛
大光明網。種種諸色。清淨圓滿。亦知彼佛無礙智慧
大光明力。又自見身於諸佛所。經一日夜。或七日夜
半月一月。一年十年。百年千年。或經億年。或阿庾多
億年。或那由他億年。或經半劫。或經一劫。百劫千劫
或百千億。乃至不可說不可說佛刹微塵數劫。爾時
善財童子爲菩薩無勝幢解脫智光明照故。得毗盧
遮那藏三昧光明。爲無盡智解脫三昧光明照故。得
普攝諸方陀羅尼光明。爲金剛輪陀羅尼門光明照
故。得極清淨智慧心三昧光明。爲普門莊嚴藏般若

波羅蜜光明照故。得佛虛空藏輪三昧光明。爲一切
佛法輪三昧光明照故。得三世無盡智三昧光明。時
彼仙人放善財手。善財童子。卽自見身還在本處。時
彼仙人告善財言。善男子。汝憶念耶。善財言唯。此是
聖者善知識力。仙人言。善男子。我唯知此菩薩無勝
幢解脫。如諸菩薩摩訶薩。成就一切殊勝三昧。於一
切時而得自在。於一念頃。出生諸佛無量智慧。以佛
智燈而爲莊嚴。普照世間。一念普入三世境界。分形
徧往十方國土。智身普入一切法界。隨衆生心。普現
其前。觀其根行而爲利益。放淨光明。甚可愛樂。而我

云何能知能說彼功德行。彼殊勝願。彼莊嚴刹。彼智境界。彼三昧所行。彼神通變化。彼解脫遊戲。彼身相差別。彼音聲清淨。彼智慧光明。善男子。於此南方有一聚落。名伊沙那。有婆羅門。名曰勝熱。汝詣彼問。菩薩云何學菩薩行。修菩薩道。時善財童子歡喜踊躍。頂禮其足。繞無數匝。殷勤瞻仰。辭退南行。

第八毗目仙人。寄童真住。善財隨順思惟前知識。教增長種種不退之心。漸次至那羅素國。推求毗目瞿沙仙人。見一大林。阿僧祇樹以爲莊嚴。善財見彼仙人在梅檀樹下敷草而坐。一萬羣仙前後

圍繞善財見已。五體投地。設敬稱讚。乃極讚真善知識。如乘如船。如炬如橋梁。等有十二句。所以如此讚者。以上來見善知識之難故也。讚已作禮。諮問法要。時瞿目仙人。顧其徒眾。而讚善財。有十一種功德。眾仙聞已。各致供養。亦讚善財。有十三種當得利益。末後仙人。總讚善財。當淨一切佛功德。此深見其爲法器。故卽告言。我得菩薩無勝幢解脫善財。白問此無勝幢解脫境界云何。所以如此問者。欲親證故。時毗目仙人。執善財手。卽時善財自見其身。往十方十佛刹微塵數世界。見爾所佛。

眾會相好。及隨眾生心。說種種法。一文一字。皆悉通達。乃至種種境界。又見自身於彼佛所。已經不可說佛刹微塵數劫。此執手之頃。業已身徧十方。親近多佛。歷多法門。經多多劫數。此正廣狹無礙。延促同時。劫念圓融。此正法界圓融無礙。大解脫門。所以能如是者。皆眦目仙人之無勝幢解脫智。光明之力。亦令善財頓證種種光明三昧。斯蓋一念頓證之力也。故仙人放善財手。而善財卽自見其身還在本處。仙人曰。汝憶念耶。此不待言說。但一執手而已。於是足見法力加持。故善財言此是

善知識力。意此特夢幻法門。非已實證也。下謙已
推勝。故仙人言。我唯知此解脫門。如諸種種殊勝
三昧。略舉二十種所不知者。指示伊沙那聚落勝
熱婆羅門。當爲汝說。善財歡喜。辭退南行。

爾時善財童子爲菩薩無勝幢解脫所照。故住諸佛
不思議神力。證菩薩不思議解脫神通智。得菩薩不
思議三昧智光明。得一切時熏修三昧智光明。得了
知一切境界。皆依想所住三昧智光明。得一切世間
殊勝智光明。於一切處。悉現其身。以究竟智說無二
無分別平等法。以明淨智。普照境界。凡所聞法。皆能

忍受清淨信解。於法自性決定明了。心恆不捨菩薩
妙行。求一切智。永無退轉。獲得十力智慧光明。勤求
妙法。常無厭足。以正修行。入佛境界。出生菩薩無量
莊嚴。無邊大願。悉已清淨。以無窮盡智。知無邊世界
網。以無怯弱心。度無量眾生海。了無邊菩薩諸行境
界。見無邊世界種種差別。見無邊世界種種莊嚴。入
無邊世界微細境界。知無邊世界種種名號。知無邊
世界種種言說。知無邊眾生種種解。見無邊眾生種
種行。見無邊眾生成熟行。見無邊眾生差別想。念善
知識。漸次遊行。至伊沙那聚落。見彼勝熱。修諸苦行。

求一切智。四面火聚。猶如大山。中有刀山。高峻無極。登彼山上。投身入火。時善財童子。頂禮其足。合掌而立。作如是言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。婆羅門言。善男子。汝今若能上此刀山。投身火聚。諸菩薩行。悉得清淨。時善財童子。作如是念。得人身難。離諸難難。得無難難。得淨法難。得值佛難。具諸根難。聞佛法難。遇善人難。逢眞善知識難。受如理正教難。得正命難。隨法行難。此將非魔。魔所使耶。將非是魔。險惡徒黨。詐現菩薩善知。

識相。而欲爲我作善根難。作壽命難。障我修行一切智道。牽我入諸惡道中。欲障我法門。障我佛法。作是念時。十干梵天。在虛空中。作如是言。善男子。莫作是念。莫作是念。今此聖者。得金剛燄三昧光明。發大精進度。諸眾生。心無退轉。欲竭一切貪愛海。欲截一切邪見網。欲燒一切煩惱薪。欲照一切惑稠林。欲斷一切老死怖。欲壞一切三世障。欲放一切法光明。善男子。我諸梵天。多著邪見。皆悉自謂是自在者。是能作者。於世間中。我是最勝。見婆羅門五熱炙身。於自宮殿。心不樂著。於諸禪定。不得滋味。皆共來詣婆羅

門所。時婆羅門。以神通力。示大苦行。爲我說法。能令
我等滅一切見。除一切慢。住於大慈。行於大悲。起廣
大心。發菩提意。常見諸佛。恆聞妙法。於一切處。心無
所礙。復有十千諸魔。在虛空中。以天摩尼寶。散婆羅
門上。告善財言。善男子。此婆羅門五熱炙身時。其火
光明。映奪於我所有宮殿諸莊嚴具。皆如聚墨。令我
於中。不生樂著。我與眷屬。來詣其所。此婆羅門。爲我
說法。令我及餘無量天子諸天女等。皆於阿耨多羅
三藐三菩提。得不退轉。復有十千自在天王。於虛空
中。各散天華。作如是言。善男子。此婆羅門五熱炙身

時其火光明。映奪我等所有宮殿諸莊嚴具。皆如聚墨。令我於中。不生愛著。卽與眷屬來詣其所。此婆羅門爲我說法。令我於心而得自在。於煩惱中而得自在。於受生中而得自在。於諸業障而得自在。於諸三昧而得自在。於莊嚴具而得自在。於壽命中而得自在。乃至能於一切佛法而得自在。復有十千化樂天王。於虛空中。作天音樂。恭敬供養。作如是言。善男子。此婆羅門五熱炙身時。其火光明。照我宮殿諸莊嚴具。及諸采女。能令我等不受欲樂。不求欲樂。身心柔軟。卽與眾俱。來詣其所。時婆羅門爲我說法。能令我

等心得清淨。心得明潔。心得純善。心得柔軟。心生歡喜。乃至令得清淨十力清淨之身。生無量身。乃至令得佛身佛語佛聲佛心。具足成就一切智智。復有十千兜率天王天子天女無量眷屬於虛空中。雨眾妙香恭敬頂禮。作如是言。善男子。此婆羅門五熱炙身時。令我等諸天及其眷屬。於自宮殿。無有樂著。共詣其所。聞其說法。能令我等不貪境界。少欲知足。心生歡喜。心得充滿。生諸善根。發菩提心。乃至圓滿一切佛法。復有十千三十三天。并其眷屬天子天女。前後圍繞。於虛空中。雨天曼陀羅華。恭敬供養。作如是言。

善男子。此婆羅門五熱炙身時。令我等諸天。於天音樂。不生樂著。共詣其所。時婆羅門爲我等說一切諸法。無常敗壞。令我捨離一切欲樂。令我斷除憍慢放逸。令我愛樂無上菩提。又善男子。我當見此婆羅門時。須彌山頂六種震動。我等恐怖。皆發菩提心。堅固不動。復有十千龍王。所謂伊那拔羅龍王。難陀優波難陀龍王等。於虛空中。雨黑栴檀。無量龍女。奏天音樂。雨天妙華。及天香水。恭敬供養。作如是言。善男子。此婆羅門五熱炙身時。其火光明。普照一切諸龍宮殿。令諸龍眾。離熱沙怖。金翅鳥怖。滅除瞋恚。身得清

涼。心無垢濁。聞法信解。厭惡龍趣。以至誠心。悔除業障。乃至發阿耨多羅三藐三菩提意。住一切智。復有十千夜。又王於虛空中。以種種供具。恭敬供養此婆羅門。及以善財。作如是言。善男子。此婆羅門五熱炙身時。我及眷屬。悉於眾生發慈愍心。一切羅刹鳩槃茶等。亦生慈心。以慈心故。於諸眾生無所惱害。而來見我。我及彼等。於自宮殿不生樂著。卽與其俱。來詣其所。時婆羅門。卽爲我等如應說法。一切皆得身心安樂。又令無量夜。又羅刹鳩槃茶等。發於無上菩提之心。復有十千乾闥婆王。於虛空中。作如是言。善男

子。此婆羅門五熱炙身時。其火光明。照我宮殿。悉令我等受不思議無量快樂。是故我等來詣其所。此婆羅門爲我說法。能令我等於阿耨多羅三藐三菩提。得不退轉。復有十千阿修羅王。從大海出。住在虛空。舒右膝輪。合掌前禮。作如是言。善男子。此婆羅門五熱炙身時。我阿修羅所有宮殿大海大地悉皆震動。令我等捨憍慢放逸。是故我等來詣其所。從其聞法。捨離詭誑。安住忍地。堅固不動。圓滿十力。復有十千迦樓羅王。勇力持王而爲上首。化作外道童子之形。於虛空中。唱如是言。善男子。此婆羅門五熱炙身時。

其火光明照我宮殿。一切震動。皆悉恐怖。是故我等
來詣其所。時婆羅門卽爲我等如應說法。令修習大
慈稱讚大悲。度生死海。於欲泥中。拔濟眾生。歎菩提
心。起方便智。隨其所宜。調伏眾生。復有十千緊那羅
王。於虛空中。唱如是言。善男子。此婆羅門五熱炙身
時。我等所住宮殿。諸多羅樹。諸寶鈴網。諸寶繪帶。諸
音樂樹。諸妙寶樹。及諸樂器。自然而出。佛聲法聲。及
不退轉菩薩僧聲。願求無上菩提之聲。云某方某國
有某菩薩發菩提心。某方某國有某菩薩修行苦行。
難捨能捨。乃至清淨一切智行。某方某國有某菩薩

往詣道場。乃至某方某國有某如來。作佛事已。而般
涅槃。善男子。假使有人。以閻浮提一切草木。末爲微
塵。此微塵數。可知邊際。我宮殿中寶多羅樹。乃至樂
器。所說菩薩名。如來名。所發大願。所修行等。無有能
得知其邊際。善男子。我等以聞佛聲法聲菩薩僧聲
生大歡喜。來詣其所。時婆羅門。卽爲我等如應說法。
令我及餘無量眾生。於阿耨多羅三藐三菩提。得不
退轉。復有無量欲界諸天。於虛空中。以妙供具。恭敬
供養。唱如是言。善男子。此婆羅門五熱炙身時。其火
光明。照阿鼻等一切地獄。諸所受苦。悉令休息。我等

見此火光明故。心生淨信。以信心故。從彼命終。生於
天中。爲知恩故。而來其所。恭敬瞻仰。無有厭足。時婆
羅門。爲我說法。令無量眾生。發菩提心。爾時善財童
子。聞如是法。心大歡喜。於婆羅門所。發起真實善知
識心。頭頂禮敬。唱如是言。我於大聖善知識所。生不
善心。唯願聖者。容我悔過。時婆羅門。卽爲善財而說
頌言

若有諸菩薩 順善知識教 一切無疑懼

安住心不動 當知如是人 必獲廣大利

坐菩提樹下 成於無上覺

爾時善財童子。卽登刀山。自投火聚。未至中間。卽得
菩薩善住三昧。纔觸火燄。又得菩薩寂靜樂神通三
昧。善財白言。甚奇聖者。如是刀山及大火聚。我身觸
時。安隱快樂。時婆羅門告善財言。善男子。我唯得此
菩薩無盡輪解脫。如諸菩薩摩訶薩。大功德燄。能燒
一切眾生見惑。令無有餘。必不退轉。無窮盡心。無懈
怠心。無怯弱心。發如金剛藏那羅延心。疾修諸行。無
遲緩心。願如風輪。普持一切精進大誓。皆無退轉。而
我云何能知能說彼功德行。善男子。於此南方有城
名師子奮迅。中有童女。名曰慈行。汝詣彼問。菩薩云

何學菩薩行。修菩薩道時。善財童子頂禮其足。繞無數匝。辭退而去。

此下第九勝熱婆羅門。寄王子住。善財由得無勝解脫光明所照故。頓證諸佛不思議神力故。證得菩薩不思議解脫神通智。及種種三昧智光明。求一切智。永無退轉。乃至見無邊眾生差別想。有十三行半經。皆敘證入法門之益。依教趣求。漸次至伊沙那聚落。見勝熱婆羅門。修諸苦行。四面火聚。中有刀山。仙人從刀山上投身入火。善財見已。修敬諮問。修菩薩行。願爲我說。婆羅門言。汝今若能

上此刀山。投身火聚。諸菩薩行悉得清淨。刀山火聚。乃婆羅熟遊法門。故以己所證法界。指授善財。乃示法勸修。疏言刀山不可執。火聚不可取。故般若。若如大火聚。四面不可入。四面亦可入。若執之。取之。則成四謗。若不執不取。則成四解脫門。然刀山。乃喻執取之見也。善財未能忘見。故疑憚而不敢入。且疑爲魔作障道因緣。故自念有十三難。因疑懼而不敢入。正在疑難之時。有十方梵天勸喻。又有魔王乃至六欲諸天。共十三類。齊聲同勸善財。令其諦信莫疑。勸令依教證入。由是善財心大歡。

喜乃作禮悔過。而婆羅門亦說偈示其實證。爾時善財乃敢卽登刀山。自投火聚。未至中間。正在空中。已卽得菩薩善住三昧。纔觸火燄。又得菩薩寂靜樂神通三昧。乃白言甚奇。如是刀山火聚。我身觸時安隱快樂。善財到此。若不全身跳入刀山火聚。親證寂靜樂解脫。則前所參知識所見法門。乃是假他力。非己實證。必至此親證實證之地。乃堪爲佛子。紹佛慧命。故入此解脫門。爲法王子住也。時婆羅門告善財言。我唯得此菩薩無盡輪解脫。如是而已。如諸菩薩大功德。等種種法門。則非

我所知。故謙已推勝。乃指師子城中慈行童女。當
爲汝說也。善財作禮辭退而去。

大方廣佛華嚴經綱要卷第六十四

三原縣志卷之十一

三

大方廣佛華嚴經綱要(第一冊、第五冊)功德主名錄

法印文號：104101

一、五〇〇元：徐永禮。黃英妹。

五二六、五〇七元：佛陀教育基金會。

以上計新台幣：五二九、五〇七元，恭印一、〇〇〇套。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有怨枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印(購)經書及運費，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸含識
同證無上道

佛曆二五六〇年/西元二〇一六年二月

恭印：一〇〇〇本

流水號：13856
書號：CH342-35

大方廣佛華嚴經網要(第四冊)

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(〇二)二三九五一—一九八 傳真：(〇二)二三九一—三四一五

劃撥戶名：財團法人佛陀教育基金會 郵局劃撥帳號：〇七六九九九九

銀行名稱：台灣銀行城中分行(請於電匯或轉帳後告知本會用途)

銀行帳號：〇四五〇〇四五九七五〇三

本會經書免費結緣之請取方式如下：

(一)親臨本會三樓講堂。(二)利用傳真：(02) 23965959

(三)撥打電話：(02) 23951198 分機：11、12

(四)網址：<http://www.budaedu.org/books/>。(五)寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印(請勿增刪)，贈送流通，功德無量。

◎本會交通：

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→253、297 開南商工→208

仁愛路、杭州南路(紹興街)口→630、270、263、245、621、651、37、261

行政院新聞局出版事業登記證局版臺業字第三八六九號

